

LUCAS TỸ RÁ

1 ¹Lucas tỹ rá vĕ. Sỹ ă mỹ rán vĕ, Teófilo!. Ũ tỹ hĕn ri ke ag vỹ to jykřén, ag tỹ kāmén jé, ěg tỹ Jesus to nĕn ki kanhró nỹtĩ ěn ti, Topĕ tỹ ti jĕnĕ ja ěn ti, kỹ ag tóg rán huri. ²Ũ tỹ ti vég mũ ag tóg ěg mỹ kāmén ja nĩgtĩ, ũ tỹ ti vĩ tó tĩ ag, ũ tỹ ti mré mũ ja ěn ag. Ěn ag tỹ nĕn tó rán ag tóg huri, ũ ag. ³Kỹ sóg vāhā rán to jykřén mũ gé sir, ha mĕ. Jesus kāme mĕ kãn ja inh nĩ ha, ti mur mré hā, kỹ sóg ti tỹ nĕn han mũ mĕ kãn gé. Hā kỹ sóg ă mỹ Jesus kāme rán mũ sir. Komĕr hā sóg rán kãn sór mũ.

Tỹ ă tóg pã'i mág nĩ, Teófilo!. ⁴Mĕ ă huri, Jesus kāme ti. Sỹ ă mỹ rán vĕ, ă tỹ ti tỹ ki hā tó ja mĕn jé sir.

João Batista mur ke tó

⁵Kejĕn Herodes tóg tỹ Israel ag pã'i mág tỹ rei nĩ, ga tỹ Judĕia tá. Kỹ Topĕ tũ ki rĩr tĩ ũ tóg nĩ nĩ, ti jiji hā vỹ: Zacarias, he mũ. Ti jóg'jóg ve jyjyn hā vỹ: Abias, he mũ. Arão krĕ'krĕ ũ vĕ, Abias ti. Semana pir ki tóg Topĕ tũ ki rĩr tĩgtĩ, Abias ti. Ti semana ki ti krĕ'krĕ tỹ Zacarias ěn tỹ ki rĩr vĕ, ti tỹ tỹ Abias krĕ'krĕ nĩn kỹ.

Prũ ti nĩ, Zacarias ti, kỹ ti prũ fi jiji hā vỹ: Isabel, he mũ. Arão krĕ'krĕ fi vĕ gé, Isabel fi.

⁶Ěn fag vỹ vĕnh jykře kuryj han tĩ, kỹ fag jykře vỹ kuryj nỹtĩ, Topĕ mỹ. Ti vĩ ki króm fag tóg tĩ, ěg Senhor vĩn ki. Ti tỹ ěg jyvĕn han fag tóg tĩ, kygnĕ sór tũ fag tóg nĩgtĩ. ⁷Hā ra fag krĕ tóg tũ tĩ. Kurĩ fi tóg nĩ, Isabel fi, hā kỹ fag tóg krĕ tũ nỹtĩ. Krĕ tũ nỹtĩ ki fag tóg kófa nỹtĩ ha.

⁸Kejĕn Zacarias tóg ă semana pétĕm mũ sir, ti tỹ Topĕ tũ ki rĩr jé. Kỹ tóg cidade tỹ Jerusalém ra tĩ mũ, Topĕ tũ ki rĩr jé. Tá jun kỹ ag tóg jogar he mũ, ag tỹ ũ tỹ Topĕ mỹ ger há pũn ke mũ ěn ve jé, incenso ěn ti. ⁹Ag jykře vĕ, ag tỹ to jogar he sór ti. Ag tỹ to jogar hen kỹ tóg tỹ Zacarias nĩ sir, kỹ tóg Topĕ jo ĩn kāra rā mũ sir, ti mỹ pũn jé, ger há ěn ti. ¹⁰Ti tỹ Topĕ jo ĩn krĕm pũn kỹ vĕnh kar tóg re tá nỹtĩ nĩ, Topĕ mré vĩn kỹ. Zacarias tỹ Topĕ mỹ pũn kỹ ag tóg Topĕ mré vĩ nỹtĩ nĩ, re ki, ũn e ěn ag.

¹¹Kỹ tóg ti mỹ pũn mũ sir. Kỹ Topĕ tỹ jĕnĕ jafā vỹ ti mỹ vĕnh ven mũ. Topĕ mỹ ger há pũn jafā vỹ tá jĕ nĩ, ĩn kātá. Mesa ěn pĕgja tá tóg jĕ nĩ, Topĕ tỹ jĕnĕ jafā ti. ¹²Zacarias tỹ ti ve kỹ tóg jũrũn ke mũ. Ti mỹ tóg e tĩ, ti tỹ ti ven kỹ. ¹³Hā ra tóg ti mré vĩ mũ, Topĕ tỹ jĕnĕ jafā ti. Kỹ tóg ti mỹ: “Zacarias!” he

mũ. “Kamêg tũg nĩ,” he tóg. “Topê vỹ ã tỹ ti mỹ nén to vỹ mũ ên mẽ, kỹ tóg ã mỹ han ke mũ ha. Fi kufyg jé ã tóg ke mũ, ã prũ fi, Isabel fi. Fi tỹ ti ve kỹ tóg gré nỹnh mũ, ã kósín ti, ha vemnĩ,” he tóg, Topê tỹ jênê jafã ti. “Kỹ ã tỹ ti jyjy han kỹ: João, hemnĩ,” he tóg mũ. ¹⁴“Kỹ tóg ã mỹ sér tĩnh mũ. Á fe tóg mrin kenh mũ. Û tỹ hên ri ke ag mỹ tóg há tĩnh mũ, fi tỹ ti ven kỹ. ¹⁵Topê vỹ ti tỹ ùn mág han ke mũ. Vinho vóg ke tũ tóg nĩ, goj fa vóg ke tũ tóg nĩ gé. Ti vãkre vê. Topê kuprĩg vỹ tỹ ti jagrê nĩnh mũ, fi tỹ ver ti vég tũ ki. ¹⁶Israel ag mỹ tóg Topê vỹ tónh mũ, kỹ ù tỹ hên ri ke ag vỹ ti vỹ mẽ kỹ kri fi kỹ ãjag jykre tovãnh ke mũ. Topê jykre hã han jé. ¹⁷Êg Senhor jo tóg tĩg ke mũ gé. Vãsỹ Topê vỹ tó tí tỹ Elias jykre han jé tóg ke mũ. Elias vỹ Topê kuprĩg tỹ jagrê ja nĩgtĩ, kỹ tóg jykre tar han ja nĩgtĩ. Ên jykre han jé tóg ke mũ. Á kósín tag tỹ ag jyvên kỹ ag panh tóg ãjag krê mré vênh jykre pir han ke mũ. Û tỹ Topê vỹ mranh tĩ ên tóg vênh jykre kuryj han sór ke mũ gé, ù tỹ Topê vỹ ki króm tĩ ên ri ke. Hã ki tóg vênh kar jykre tỹ há' henh ke mũ, ag kugrynh kỹ, ã kósín tag ti. Topê mỹ tóg ag jykre tỹ há' henh mũ, Cristo tỹ kãtĩg ken jo, ag tỹ ti jãvãnh jé,” he tóg mũ, Topê tỹ jênê jafã ti, Zacarias mỹ.

¹⁸Kỹ Zacarias tóg ti mỹ: “hã ra sóg kófa nĩ ha,” he mũ. “Kar inh prũ fi vỹ kófa nĩ gé, inh mré. Kỹ inh hỹn hê ri kenh mũ? Inh mỹ tá krỹg mũ vỹ?” he tóg. ¹⁹Kỹ Topê tỹ jênê jafã tóg ti mỹ: “tỹ sóg Gabriel nĩ,” he mũ. “Topê nĩgja tá inh jêgtĩ. Hã ra tóg inh jênê, sỹ ã mré vỹ jé, sỹ ã mỹ vênh vỹ sér tag tó jé,” he tóg. ²⁰“Ha vé, vỹ vãnh nĩ jé ã tóg ke mũ ha, ha vemnĩ. Vỹ vãnh nĩ ki ã tóg isỹ ã mỹ nén tó mũ kurã ên pétêm ke mũ. Á hã ne tóg sỹ ã mỹ vỹ kri nĩm tũ nĩ! Ti kurã ki ã tóg venh mũ, sỹ ã mỹ nén tó ja ti. Á tỹ inh vỹ kri fig tũ nĩn kỹ ã tóg vỹ vãnh nĩnh mũ ha,” he tóg, Topê tỹ jênê jafã ti.

²¹Hã ra vênh kar ên tóg re tá nỹtĩ nĩ, Zacarias jãvãnh kỹ. Ag mỹ tóg e tĩ, ti kãkutê vãnh han kỹ, Topê jo ãn kãtã. ²²Vãhã tóg kãkutê mũ, hã ra tóg sir vỹ vãnh jê. Kỹ tóg ag mỹ ven mũ, ã nĩgê tỹ. Hã ki ag tóg ki kanhrãn mũ sir, ti tỹ nén nê ve ja ên ti, Topê jo ãn kãtã.

²³Ti vỹ vãnh nĩn ki ti rãnrãj tóg kejên tũ! he mũ sir, ti tỹ Topê tũ ki rĩr ên ti. Kỹ tóg ã ãn ra tĩ mũ sir. ²⁴Ti tỹ ã ãn tá jun kar kỹ ti prũ fi tóg kejên kufyg mũ sir, Isabel fi. Kỹ fi tóg vênh péju kỹ nĩ nĩ sir, fi mỹ sér tĩn kỹ. Kysã tỹ 5 (ke) han fi tóg, vênh péju kỹ nĩ ki. ²⁵“Topê hã ne inh jagãgtãn!,” he fi tóg mũ. “Inh ve tóg, kỹ tóg inh mỹ'ãg tỹ tũg! hé. Inh kurĩ to fag tóg: “Topê hỹn fi to kórég nĩ,” he ja nĩgtĩ. Hã ra tóg fag vỹ tỹ tũg! hé, Topê ti,” he fi tóg mũ. Hã kỹ fi tóg kufyg mũ sir, ã kósín vãnh (hã) ra.

Jesus mur ke tó

²⁶Fi kufy nĩ ki kysã tỹ 6 vê sir, kỹ Topê vỹ ã tỹ jênê jafã jênêg mũ, ti tỹ Jesus mur ke tónh tĩg jé, Gabriel ên ti. Kỹ tóg ga tỹ Galiléia ra tĩ mũ, cidade tỹ Nazaré ra. ²⁷Tá tátãg ù fi tóg nĩ nĩ. Ûn mén ja tũ fi vê. Fi jijin hã vỹ: Maria, he mũ. Fi mén ken hã vỹ: José, he mũ. Davi krê'krê ù vê, José ti, fi mén ke ên ti. ²⁸Fi hã mỹ tóg vênh ven mũ sir, Gabriel ti, kỹ tóg

fi mÿ: “ã mÿ há?” he mÿ. “Topê vÿ ã jagãgtãn, kÿ tóg ã vég mÿ,” he tóg mÿ. ²⁹Fi tÿ ti ve kÿ fi tóg jÿrÿn ke mÿ. Ti vÿ tóg fi mÿ e tÿ, kÿ fi tóg to jykrén mÿ sir, ti vÿ to. “Ti tÿ ne tó nê, hÿn?” he fi tóg mÿ, to jykrén kÿ.

³⁰Kÿ Topê tÿ jênê jafã tóg fi mÿ: “kamêg tÿg ra,” he mÿ. “Topê vÿ ã jagãgtãn mÿr,” he tóg. ³¹“Ha vé, kufyg jé ã tóg ke mÿ,” he tóg. “Kÿ ã tóg kósin ke mÿ. ã tÿ ti jyjyn kÿ ti mÿ: Jesus, hemnÿ,” he tóg, Topê tÿ jênê jafã ti, fi mÿ. ³²“Tÿn ùn mág jênh ke mÿ, ã kósin tag ti, kÿ ag tóg ti to: ù tÿ kynhmÿ nÿ ên kósin, henh ke mÿ. Kÿ êg jóg tÿ Topê vÿ ti tÿ pâ'i mág han ke mÿ, vãsÿ ti jóg'jóg ve tÿ Davi jégja kã. ³³Kÿ tóg tÿ pâ'i nÿ sir, Jacó krê kar to pâ'i. Ti tÿ tÿ pâ'i nÿ tag vÿ tÿ' henh ke tÿ nÿ. Tÿ pâ'i han kÿ tóg nÿ nÿ,” he tóg, Gabriel ti.

³⁴Kÿ fi tóg ti mÿ: “hã ra sóg ù mré nÿ ja tÿ nÿ ver,” he mÿ. “Kÿ inh hê ri kenh mÿ?” he fi tóg ti mÿ. ³⁵Kÿ tóg fi mÿ: “Topê kuprÿg vÿ ã kri tÿnh mÿ,” he mÿ, “kÿ ti kãnhvég vÿ ã kri tÿnh mÿ gé, kÿ tóg ã jykre tÿ ã kósin ti han ke mÿ, Topê ti. Hã kÿ ag tóg ti to: Topê tÿ, henh ke mÿ, ã tÿ ùn venh ke ên to. Topê kósin, he jé ag tóg ke mÿ, ti to. ³⁶Ha vé, ã mré ke fi vÿ kufÿ nÿ, Isabel fi. ùn gré ve jé fi tóg ke mÿ. ã kófa (hã) ra fi tog kufÿ nÿ. Kÿsã tÿ 6 (ke) han fi tóg huri, kufÿ nÿ ki. Fi to ãjag tóg: kurÿ fi tóg nÿ, he tÿ vê, hã ra fi tóg kufÿ nÿ ha. ³⁷Topê hã ne nén kar han há nÿ, hã kÿ tóg fi mÿ han. Kÿ tóg ã mÿ han ke mÿ gé, sÿ ã mÿ tó mÿ tag ti,” he tóg, Gabriel ti. ³⁸Kÿ fi tóg ti mÿ: “há ti nÿ,” he mÿ. “Tÿ sóg Topê camarada nÿ mÿr, ti tÿ pê. Kÿ tóg inh mÿ há ti, ã tÿ inh mÿ tó mÿ tag ti,” he fi tóg ti mÿ. Kÿ tóg tÿ mÿ sir, Topê tÿ jênê jafã ti.

Maria fi tÿ Isabel fi venh tÿ

³⁹Ti tÿg kar kÿ Maria fi tóg tÿ mÿ gé sir, Isabel fi jamã ra. Pãnónh e tá tóg nÿ, fi jamã ti, ga tÿ Judéia tá. Fi tÿ ra tÿg kÿ fi tóg fÿrÿn tÿ mÿ. ⁴⁰Fi tÿ Zacarias ìn tá jun kÿ fi tóg Isabel fi mÿ: “ã mÿ há?” he mÿ. ⁴¹Kÿ Isabel fi tóg fi vÿ mêg mÿ, kÿ fi kósin tóg vo mÿ, fi kãki. Kÿ Topê kuprÿg vÿ fi krÿn mÿ. ⁴²Kÿ fi tóg prêr mÿ. “Topê tóg ã ve há han, fag kar kãmÿ tóg ã kuprêg,” he fi tóg fi mÿ. “Kÿ Topê vÿ ã kósin ve há han mÿ gé, ã tÿ ùn venh ke ti. ⁴³Inh Senhor mÿnh fi hã ne tóg inh venh kãtÿ mÿ, kÿ tóg inh mÿ e tÿ,” he fi tóg fi mÿ. ⁴⁴“Ha vé, isÿ ã vÿ mê kÿ inh kósin tóg vo ja nÿ, inh kãki. Ti mÿ tóg sér tÿ, ã vÿ ti. ⁴⁵ã hã ne tóg Topê vÿ kri fi, ti tÿ ã mÿ vênh vÿ jênên kÿ. Hã kÿ tóg ã ve há han, Topê ti. ã tÿ ti vÿ kri nÿm kÿ ã tóg venh ke mÿ, ti tÿ ã mÿ nén tó ja ti,” he fi tóg, Isabel fi, Maria fi mÿ.

Maria fi jãn

⁴⁶Kÿ Maria fi tóg ke mÿ gé. “Topê mÿ sóg vÿ há han sór mÿ,” he fi tóg. “Inh mÿ tóg tÿ ùn mág nÿ, êg Senhor ti. ⁴⁷Kÿ inh fe tóg mÿn ke mÿ, isÿ tÿ Topê tÿ nÿn kÿ, isÿ tÿ êg kren han tÿ ên tÿ nÿn kÿ. ⁴⁸Inh ki tóg êvãnh mÿr. Tÿ sóg ti camarada nÿ. Tÿ sóg ùn sÿ nÿ, hã ra tóg inh ki êvãnh. Kÿ vênh kar tóg iso: “Topê vÿ fi ve há han,” henh ke mÿ, inh krê'krê kar ke gé, êprã ke krê kar

ke gé. ⁴⁹Topě hã ne inh mÿ ěg tÿ nén han vãnh han! Tar ti nĩ, Topě ti, hã kÿ tóg han, inh mÿ. Jykre kuryj ti nĩ, Topě ti, kÿ ti jiji tóg ěg mÿ mẽ há tí. ⁵⁰Ěg jagãgtãn tóg nĩgtĩ, ěg jóg'jóg ve ag ke gé, ěg panh ag ke gé, ěg ke gé, ěg krê kar ke gé. Ũ tÿ ti kaměg mü kar jagãgtãn tóg nĩgtĩ mÿr, ha mẽ. ⁵¹Jykre (ka) mẽ tóg nĩ, kÿ tóg ěg tÿ nén han vãnh hyn han ti. Ũ tÿ: “vėsóg ki inh nén kar han tí,” he mü ěn ag jykre tÿ tóg tũg' henh ke mũ,” he fi tóg. ⁵²“Pã'i mág ag tÿ tóg ũn kãsir han, Topě ti. Kÿ tóg ũn kãsir ag tÿ ũn mág han. ⁵³Ũn jagãgtar ag fónfan tóg mü, nén ũ há tÿ, ũ tÿ ti vĩ mẽ sór mü ag. Ũn rico ag mÿ tóg: “ha mü jěg,” hé, kÿ tóg ag mÿ nén ũ nĩm tũ nĩ, kÿ ag tóg jagãgtar nÿtĩ ha, ũ tÿ ti vĩ mẽ jãvãnh ěn ag. ⁵⁴Israel ag jagãgtãn tóg mü, ã camarada ag, ã tÿ vãsÿ ag jagãgtãn tĩ ěn to jykrén kÿ. Ěg hã vè, ěg jagãgtãn tóg. ⁵⁵Ěg jóg'jóg ve ag mÿ tóg tó ja nĩ, Abraão mÿ, ti krê ag mÿ ke gé, ti tÿ ěg jagãgtãn ke ti. Kÿ tóg ã vĩ ěn to jykrén kÿ han, ti tÿ vãsÿ nén tó ja ti. Ti tÿ ěg jagãgtãn ke ěn tóg tũg' he jãvãnh nĩ,” he fi tóg, Maria fi. Fi tÿ Topě mÿ vĩ há han hã vè.

⁵⁶Kar fi tóg kysã tágtũ han mü sir, Isabel fi mré, kÿ fi tóg ã jamã ra vÿn ke mü sir.

João Batista mur

⁵⁷Fi tĩg kar Isabel fi vÿ fi kósin venh ke kurã pétẽm mü sir, kÿ fi tóg vég mü. Hã ra tóg gré nÿ, fi kósin ti. ⁵⁸Kÿ fi rã nÿtĩ fag vÿ vég mü, fi kanhkã fag ke gé. Topě tÿ fi jagãgtãn mēg fag tóg mü. Kÿ tóg fag mÿ sér tĩ sir, fi mré, fi kósin to.

⁵⁹Kurã tÿ 8 (ke) ki ag tóg fi tá junjun mü, ag tÿ ti gré junun fár kym jé. Kÿ ag tóg ti jyjy to jykrén mü gé, hã vÿ: Zacarias, he mü. Ti panh jiji tó sór ag tóg mü, ti mÿ. ⁶⁰Hã ra ti mÿnh fi tóg: “vó,” he mü. “João, he jé tóg ke mü, ti jyjy ti,” he fi tóg mü. ⁶¹Kÿ ag tóg fi mÿ: “ã kanhkã jiji tũ vè hã ra,” he mü. ⁶²Kÿ ag tóg ti panh ki jēmē sór mü. Ājag nĩgē tÿ ag tóg ti mÿ: “ti jyjy hÿn hē ri kenh mü!” he mü, ti panh mÿ, ag nĩgē tÿ. ⁶³Kÿ tóg ki rán jafã to vĩ mü, Zacarias ti, kÿ tóg rán mü. “Ti jijin hã vÿ: João, he mü,” he tóg, vėnh rán ki. Kÿ tóg ag mÿ e tĩ sir. ⁶⁴Kÿ vãhã ti vĩ tóg punh ke mü. Ti nũnē tóg krónh ke mü, kÿ tóg vĩ mü sir, Topě mÿ vĩ há han tóg mü, ti mÿ sér tĩn kÿ.

⁶⁵Kÿ fag rã nÿtĩ kar vÿ kaměg mü. Kÿ vėnh vĩ ěn tóg vėnh kar kri rũm mü, ga tÿ Judéia kar mĩ hã. Vėnh kar tóg tÿ vēmén kãn mü. ⁶⁶Kÿ ũ tÿ mēg mü fag vÿ to jykrén mü. “Gĩr tag hÿn hē ri kenh mü,” he fag tóg mü. Topě vÿ ti ki rĩr há han, hã kÿ tóg fag mÿ e tĩ.

Zacarias tÿ Topě mÿ vĩ há han

⁶⁷Kÿ Topě kuprĩg vÿ ti panh tÿ Zacarias krĩn mü, kÿ tóg tag tó mü, ha mẽ.

⁶⁸“Tÿ ti ũn mág jē, ěg povo tÿ Israel kri, ěg Senhor ti, hã vÿ: Topě, he mü. Ěg ki tóg ěvãnh nĩgtĩ, Topě ti, ti tÿ ti tũ ag krenkren han jé. Ěg hã vÿ tÿ ti tũ nÿtĩ,” he tóg. ⁶⁹“Ti camarada tÿ Davi krê'krê ěn vÿ ěg krenkren han ke mü, ěg tÿ ti vĩ jēmēn kÿ. Ũn mág pē vè, Davi krê'krê ěn ti. Topě tÿ ěg mÿ nén han hã vè. ⁷⁰Hã kÿ tóg tó ja nĩ, vãsÿ. Ti vĩ tó tĩ ag vÿ tugtó ja nĩ, vãsÿ, ěg si ag, ti

tũ ag. ⁷¹Ū tỹ hēn ri ke ag vỹ ěg kato tēgtē mūgtĩ, hã ra tóg ěg krenkren han mũ, ag to, ũ tỹ ěg to kórég tãvĩ nỹtĩ ag to. ⁷²Ti tỹ ěg jóg'jóg ve ag mỹ tó ja ěn han ja tóg nĩ, ěg jagãgtãn kỹ, Topē ti. Ag mré jykřn ja tóg nĩ, Topē ti. Ěn to jykřn ja tóg nĩ, kỹ tóg ki króm ja nĩ sir, Topē ti. ⁷³Ěg jóg'jóg ve tỹ Abraão mỹ tóg vēnh vĩ mág han ja nĩ, Topē ti. ⁷⁴Kỹ tóg ti mỹ: “ag krenkren han jé sóg ke mũ, ã krē ag, ag kato tēgtē mũ ag to, ha vemní,” he ja nĩ. “Sỹ ke há vē. Sỹ ag krenkren han kỹ ag tóg sir jatun mỹ isũ han ke mũ, mũmēg tũ nĩn kỹ,” he ja tóg nĩgtĩ, Topē ti. ⁷⁵“Nén ũ vēnhmỹ han ke tũ ag tóg nĩgtĩ, kurã kãtig ke mũ ěn kã. Vēnh jykře kuryj tãvĩ han jé ag tóg ke mũ, isũ han kỹ. Ag tỹ ga kri mũn kỹ ag tóg han ke mũ, isũ ti. Kurã kar ki ag tóg sir inh jykře hã han ke mũ,” he ja tóg nĩgtĩ, Topē ti, Abraão mỹ,” he tóg, Zacarias ti.

⁷⁶Kỹ tóg ã kósin mỹ: “ha vé, vỹ,” he mũ. “Sĩ ã tóg nĩ ver. Ū tỹ kynhmỹ nĩ ěn vĩ tó jé ã tóg ke mũ, kỹ ag tóg ã to: “Topē vĩ tó ti tĩ,” henh ke mũ. “Ěg Senhor jo ã tóg tĩnh mũ, ã tỹ ti japry kure ri ke han jé, ã tỹ ti jamĩn kurynh ri ke han jé, ã tỹ vēnh kar mỹ Topē vĩ tón kỹ,” he tóg. ⁷⁷“Ag kanhrãn jé ã tóg ke mũ, Topē tỹ ěg krenkren han sór ěn to. Ěg tỹ ti vĩ mranh tỹ tóg ěg mỹ vēnh pãte fón ke mũ, hã ki tóg ěg krenkren han ke mũ, Topē ti,” he tóg, Zacarias ti. ⁷⁸“Topē tỹ ěg jagãgtãn hã vē, ti tỹ ěg to há tãvĩ nĩn kỹ. Ěg ve jé tóg kãtig ke mũ, kỹ tóg rã tỹ jun ke ri ke nĩ, Cristo mur ke ti. ⁷⁹Kuty ri ke ti nĩ, ěg mỹ, ěg tỹ ti ki kãtig nỹtĩn kỹ. Ti kãtig kỹ tóg ěg mỹ kurã ri ke nĩ sir. Kãgter jé ěg tóg ke mũ, kỹ tóg ěg mỹ kuty ri ke nỹ sir. Hã ra tóg ěg mỹ ã japry ven ke mũ, ã jamĩn ti. Jagma mũn kỹ ěg tóg ti jykře kusa venh ke mũ,” he tóg, Zacarias ti. Ti tỹ ã kósin mỹ tón hã vē.

⁸⁰Hã kỹ fi tóg João ve ja nĩ, ti han mũ fag tỹ kófa (hã) ra. Kỹ tóg mog mũ sir, kỹ tóg tar jē sir. Krĩ há tóg nĩ gé. Ěmã tũ mĩ tóg tĩ mũ ver, ã kurã tỹ tá krỹg ki. A kurã ki tóg Israel ag mỹ vēnh ven mũ, ag mỹ Topē vĩ kãmén jé.

Jesus Mur

(Mt 1.18-25)

2 ¹João mur kar kỹ ga kri pã'i mág tỹ imperador tỹ Augusto vỹ kejēn vēnh vĩ jēnēg mũ, vēnh kar ag tỹ ãjag jyjy rán mũ jé. Ga kri mũ kar ag mỹ tóg vēnh vĩ ěn jēgnēg mũ, pã'i mág tỹ Augusto ti. ²Vēnh jiji rá ve vē, ge han ja tũ ag nỹtĩ. Cirênio vỹ tỹ ga tỹ Síria kri pã'i tỹ governador nĩ, Augusto tỹ vēnh vĩ ěn jēnēg mũn kã. Tỹ tóg Augusto krēm ke nĩ, Cirênio ti. Ti tỹ tỹ pã'i nĩn kỹ ag tóg sir ãjag jyjy ránrán vén mũ. ³Kỹ ag tóg mũ kãn mũ, ãjag jóg'jóg ve ag jamã ja ra. Tá ag tóg ãjag jiji rá vin mũ sir.

⁴⁻⁵Kỹ José tóg tĩ mũ gé, ã prũnh ke fi mré, hã vỹ: Maria, he mũ. Cidade tỹ Nazaré tá fag tóg pa mũ, ga tỹ Galiléia tá. Kỹ fag tóg ga tỹ Judéia ra mũ mũ, cidade tỹ Belém ra. Davi krē'krē vē, José ti, hã kỹ tóg Belém ra tĩ mũ, ã jyjy rá nĩm jé. Davi jamã ja vē, Belém ti. Hã kỹ tóg ra tĩ mũ. Kỹ ti prũnh ke fi vỹ ti mré tĩ mũ, hã ra fi tóg kufy jagy nĩ. ⁶Fag tỹ tá nỹtĩ ki fi tóg ã kurã pétēm mũ. ⁷Kỹ fi tóg ã kósin vėg mũ sir. Gré ti nỹ, fi kósin ve tag ti. Kỹ fi tóg ti pãg kỹ koso kãkã ti fig mũ. Ěn vỹ funfór nỹtĩ, hã kỹ fag tóg vēnh mēg jo ěn krēm nỹtĩ ja nĩgtĩ.

Mé ki rír tí ag

⁸Kỹ ù tỹ mé ki rír tí ag vỹ tá nỹtĩ gé, carneiro ki rír tí ag. Ag japỹ ja tá ag nỹtĩ, ãjag mễg ki rír jé, kuty ên kã. ⁹Kỹ vãhã Topẽ tỹ jẽnẽ jafã vỹ ag mỹ vẽn h ven mũ, kanhkã tá. Topẽ tỹ jẽngrẽ vỹ ag kri rùm ke mũ. Kỹ ag tóg kamễg kỹ jũrũn ke mũ sir. ¹⁰Kỹ Topẽ tỹ jẽnẽ jafã tóg ag mỹ: “kamễg tũg ra,” he mũ. “Sỹ ãjag mỹ nén ù tónh ke vẽ. Vẽn h vĩ há tó jé sóg ke mũ, kỹ tóg ãjag mỹ sér tĩnh mũ. Vẽn h kar vỹ mẽn h mũ, inh vĩ ti, povo kar, kỹ ag fe tóg mrin ke mũ sir. ¹¹Ãjag krenkren han tí vỹ ùri mur, hã vỹ: Cristo, he mũ. Êg Senhor vẽ ha mỹr. Davi jamã ja tá tóg mur mũ. ¹²Ha mũ jẽg, ãjag tỹ gĩr ên ve jé. Koso kãkã tóg pãg kỹ nỹ nĩ. Hã ki ãjag tóg ti ki kanhró nỹtĩnh mũ,” he tóg ag mỹ, Topẽ tỹ jẽnẽ jafã ti.

¹³Kỹ vãhã ù tỹ hẽn ri ke ag tóg vẽn h ven mũ sir. Topẽ tỹ jẽnẽ jafã ag, kanhkã tãn ag. Ên ag vỹ Topẽ mỹ vĩ há han mũ. ¹⁴“Topẽ vỹ tỹ ùn mág pẽ nĩ,” he ag tóg mũ. “Kynhmỹ ti nĩ, vẽn h kar kãfór ti nĩ, kỹ êprã ke ag vỹ jatun mỹ nỹtĩ, ãjag krĩ kusa tĩn kỹ, Topẽ tỹ ù tó há ag,” he ag tóg mũ. ¹⁵Kar ag tóg tũg' he mũ sir, ag tỹ kanhkã ra mũn kỹ.

Ag tỹ tũg' hen kỹ ù tỹ carneiro ki rír tí ag vỹ jagnẽ mỹ: “mũ nỹ, Belém ra, êg tỹ ve jé, Topẽ tỹ nén han ja ti, êg Senhor tỹ êg mỹ vẽn h vĩ jẽnẽ ja ên ti,” he mũ. ¹⁶Kỹ ag tóg fũrũnrũn mũ mũ sir. Tá ag tóg junjun mũ. Kỹ ag tóg vếg mũ, Maria fi, José ti ke gé, gĩr ti ke gé. Koso kãkã tóg nỹ nĩ, Maria fi kósin ên ti. ¹⁷Hã kỹ ag tóg vếg mũ. Hã kỹ ag tóg kãmén mũ, vẽn h kar mỹ. Topẽ tỹ ag mỹ vẽn h vĩ jẽnẽ ja ên kãmén ag tóg mũ, gĩr ên to. ¹⁸Kỹ tóg ù tỹ mễg mũ ag mỹ e tí sir. ù tỹ mé ki rír tí ag vỹ mễg ag tóg mũ, kỹ tóg ag mỹ sér tí. ¹⁹Kỹ Maria fi tóg vẽn h vỹ tag to jykrén mũ gé sir. Fi pi(jé) kã jatun mũ!, ag tỹ nén tó ja ên ti. To jykrén kỹ fi tóg nĩ nĩ, Maria fi.

²⁰Kỹ carneiro ki rír tí ag tóg sir ãjag mễg to vỹnvỹn ke mũ gé. Topẽ mỹ ag tóg vỹ há han mũ. “Ti hã ne tóg êg mỹ vẽn h vỹ jẽnẽ ja nĩ!, ã tỹ jẻgnẽ jafã ag tỹ!, kỹ êg tóg vế,” he ag tóg mũ sir, Topẽ to.

Fag tỹ Jesus jijin

²¹Kar kurã tỹ 8 (ke) vỹ tũg mũ. Kỹ tóg ti gré junun fár kym ke kurã pětẽm mũ sir, gĩr sĩ ên ti. Kỹ fag tóg ti jijin kỹ ti mỹ: “Jesus,” he mũ. Topẽ tỹ jẽnẽ jafã vỹ ti jyjy tag tó ja nĩ, ti mỹnh fi tỹ ver ti tỹ kufyg tũ ra. Hã kỹ fag tóg sir tỹ ti jijin mũ.

Fag tỹ Topẽ mỹ Jesus ven

²²Kejẽn fag vãkre tóg tá krỹg mũ, kỹ fag tóg vẽn h kỹkũnh sór mũ. Moisés vỹ tag rán ja nĩ, gĩr mur kar kỹ fag tỹ vẽn h kỹkũnh ke ti. Judeu ag jykre hã vẽ. Fag tỹ vẽn h kỹkũnh jé fag tóg cidade tỹ Jerusalém ra mũ mũ, fi tỹ Topẽ mỹ ã kósin ven jé, tá. “Á tũ vẽ,” he sór fag tóg mũ, Topẽ mỹ, fi kósin ên to. ²³Topẽ vỹ ki tag vỹ rán kỹ nĩ, hã vỹ: “fi kósin ve tỹ gré nỹn kỹ tóg tỹ êg jóg mág tỹ Topẽ tũ nỹ,” he mũ, Topẽ vỹ tỹ rán kỹ nĩ ki. ²⁴Hã

kỹ fag tóg Topê jo ìn ra mũ mũ, Topê mỹ nén ù pũn jé. Rán kỹ tóg nĩ nĩ, êg jóg mág vĩn ki, fag tỹ ne tỹ ti mỹ pũn ke ti, hã vỹ: sórãg régre, ke tũ nĩ kỹ ton régre, he mũ gé. Ên ma fag tóg mũ mũ, fag tỹ Topê mỹ pũn jé. Topê tũ ki rĩr tĩ ag mỹ fag tóg vĩn tĩ, sórãg ti, kỹ ag tóg tãnh kỹ Topê mỹ pũn tĩ.

²⁵Kỹ Jerusalém tá ù tóg nĩ nĩ, ti jyjy hã vỹ: Simeão, he mũ. Ûn jykre kuryj vê, Simeão ti. Topê kamêg tóg tĩgtĩ, Topê kuprĩg tỹ tóg jagrê nĩ. Topê tỹ Israel ag krenkren han mũ ên jãvãnh tóg nĩgtĩ, Simeão ti. ²⁶Kỹ Topê kuprĩg vỹ ti mỹ: “Cristo ve jé ã tóg ke mũ, ã ter ke to hã, êg Senhor tỹ ti jênên kỹ,” he ja nĩgtĩ ti mỹ.

²⁷Topê kuprĩg tỹ ti krĩn kỹ tóg kejên Topê jo ìn kãra tĩ mũ. Kỹ tóg tá jê nĩ, hã ra fag tóg Jesus ma kãmũ mũ, fag tỹ Topê mỹ sórãg pũn jé, Moisés tỹ Judeu ag mỹ nén tó ja ti. ²⁸Ã tỹ Jesus ve kỹ tóg ti vãg mũ sir, kỹ tóg ti to Topê mỹ vĩ há han mũ, Simeão ti. ²⁹“Êg jóg mág,” he tóg, Topê mỹ. “Vãhã ã tóg inh jé prêr ke mũ, kỹ sóg jatun mỹ tĩg mũ ha,” he tóg. “Ã tỹ inh mỹ nén tó jan han ã tóg huri,” he tóg. ³⁰“Ve inh huri, ã tỹ êg krenkren han ke mũ ti. Cristo ve inh huri,” he tóg, Simeão ti. ³¹“Vênh kar rĩnve ã tóg han, ã tỹ êg krenkren han ke mũ ti. ³²Kỹ tóg êg mỹ jêngrê ri ke nĩ, Cristo mur ti. Kỹ povo kar vỹ vég mũ, fóg ag kar, kanhgág ag kar ke gé, ã tỹ ag krenkren han ke mũ ti. Êg povo tỹ Israel tỹ ã tóg ùn mág han huri, vênh kar rĩnve, Cristo tỹ êg mré ke nĩn kỹ,” he tóg, Simeão ti, Topê mỹ.

³³Kỹ Jesus jóg vỹ ti vĩ mẽg mũ, Jesus mỹnh fi ke gé, kỹ tóg fag mỹ e tĩ, ti tỹ Jesus to nén tó mũ ên ti.

³⁴Kỹ Simeão vỹ fag mỹ vênh vĩ há tó mũ gé. “Topê vỹ ãjag ve há han mũ,” he tóg mũ fag mỹ, Simeão ti. Kỹ tóg Maria fi mỹ: “ha vé,” he mũ. “Israel tỹ hên ri ke ag vỹ ti tugrĩn mũ há han ke mũ, jãvo ù tỹ hên ri ke ag vỹ ti tugnĩn mũ kónãn ke mũ gé. Kỹ ag tóg ti kato vĩnh ke mũ gé, Topê tỹ ti jênê ja ra. ³⁵Kỹ ã tóg ti tugrĩn vêsýrênh kenh ke mũ, jy, kỹ tóg rógro tỹ ã fe tỹ gynh ke ri ke nĩnh ke mũ, ã vêsýrênh ke ti. Kỹ êg tóg venh ke mũ, ag tỹ nén to ti to jykrên mũ ti,” he tóg, Maria fi mỹ, Simeão ti.

³⁶Kỹ ù fi tóg tá nĩ gé, Topê jo ìn krêm, fi jiji hã vỹ: Ana, he mũ. Topê vĩ tó tĩ fi vê gé. Faniel kósĩn fi vê. Kỹ fi jóg!jóg ve vỹ tỹ Aser nĩ. Kófa fi nĩ ha, kófa tãvĩ. Á mén kỹ fi tóg 7 anos han, fi mén mré, kar tóg ter ja nĩ, fi mén ti, fi mré 7 anos han kar. ³⁷Kar fi tóg mén tũ tĩ nĩ sir. 84 anos han fi tóg, mén tũ tĩ ki. Ên fi vỹ Topê jo ìn krêm nĩ nĩ, kurã kar ki fi tóg tá nĩ nĩ sir. Tá fi tóg Topê tũ han nĩgtĩ, ti mré vĩ kỹ. Jêg tũ fi nĩgtĩ, fi tỹ Topê mré vĩ jé. Kutỹ tá fi tóg ke tĩ, kurã tá ke gé. ³⁸Ên fi vỹ hora ên kã Topê jo ìn krêm jê mũ, Simeão tỹ Jesus ven kỹ. Kỹ fi tóg Jesus vég mũ gé sir, Ana fi. Ti ve kỹ fi tóg Topê mỹ vĩ há han mũ. “Inh mỹ tóg há tĩ, sỹ ti ven kỹ,” he fi tóg mũ, Topê mỹ. Vênh kar mỹ fi tóg tó mũ, ùn krenkren sór mũ ag mỹ, Jerusalém tá.

Fag tỹ Nazaré ra vỹn ke

³⁹Kỹ fag tóg sir Moisés tỹ vènh kykũnh to nén rán ja ên han kãn mũ sir, Jesus mỹnh fi, Topê tỹ Judeu fag mỹ vènh jykre nĩm ja ên ti. Kar kỹ fag tóg sir cidade tỹ Nazaré ra vỹnvỹn ke mũ, ga tỹ Galiléia ra, fag jamã ra ke vè sir. ⁴⁰Kỹ gĩr sĩ ên tóg mog mũ sir, komêr hã tóg tar jê sir. Kỹ tóg vènh kanhrãn há han mũ, kỹ Topê vỹ ti ve há han mũ gé, hã kỹ tóg vènh kanhrãn mág mũ sir, ùn sĩ ên ti.

Jesus tỹ ã pir mỹ Topê jo ãn tá nĩ

⁴¹Jesus mỹnh fag tóg prỹg kar ki Jerusalém ra mũ tĩ, fag tỹ festa tỹ Páscoa venh mũ jé. Fag jykre hã vè. ⁴²Jesus tỹ 12 anos han kỹ tóg fag mré tĩ mũ gé, fag tỹ festa ên venh mũn kỹ, Jerusalém ra. ⁴³Festa tỹ tũ ken kỹ fag tóg vỹnvỹn ke mũ, hã ra Jesus tóg Jerusalém tá nĩ nĩ. Hã ra fag tóg ki kagtĩg nỹtĩ, ti tỹ Jerusalém tá nĩ ên ki. ⁴⁴Kỹ fag tóg: “ti hỹn ù tỹ êg mré kãmũ mũ fag mré vyr, êg jo,” he mũ. Kỹ fag tóg kurã pir ki mũ mũ, fag jamã ra vỹnvỹn ke kỹ. Fag tỹ ãjag mré ke fag tá junjun kỹ fag tóg ti jãvãnh mũ, ãjag to há kar fag kãmĩ. ⁴⁵Hã ra fag tóg tá Jesus vég tũ nĩ. Kỹ fag tóg Jerusalém ra vỹnvỹn ke mũn mũ gé, ti jãvãnh jé. ⁴⁶Vãhã fag tóg ti vég mũ, kurã tãgtũ tũ kỹ. Topê jo ãn krêm tóg nĩ nĩ, professor ag mré. Ag vĩ mēg tóg nĩ nĩ, kỹ tóg ag ki jēmēg mũ gé, “ne nē?” hen kỹ. ⁴⁷Ú tỹ ti vĩ mēg mũ ag mỹ tóg e tĩ. To jykren há han tóg, Jesus ti, kỹ tóg ag mỹ tó há han mũ. Ag tỹ ti vĩ mē kỹ tóg ag mỹ e tĩ, professor ag mỹ.

⁴⁸Ti mỹnh fag tỹ ti ve kỹ tóg fag mỹ e tĩ gé sir. Kỹ ti mỹnh fi tóg ti mỹ: “inh kósĩn!” he mũ. “Á tỹ tag kã ne han nĩ nē!? Á jóg mré sóg ã jãvãnh jagy han. Á jãvãnh to êg tóg kanē jur, êg tỹ ã vég tũ nĩn kỹ,” he fi tóg ti mỹ. ⁴⁹Hã ra tóg fi mỹ: “ã tỹ ne jé inh jãvãnh ja nē?” he mũ. “Hê ri ken kỹ hỹn!?” he tóg. “Inh panh pē ãn krēm sóg nĩ nĩ mỹr, kỹn mỹ ãjag mỹ vènhmỹ?” he tóg, ã mỹnh fag mỹ. ⁵⁰Hã ra tóg fag tỹ to jykren tũ tĩ, fag kósĩn vĩ to.

⁵¹Kỹ tóg fag mré tĩ mũ, cidade tỹ Nazaré ra. Tá tóg fag mré nĩ nĩ sir, ti tỹ fag vĩ jēmēn kỹ. Kỹ ti mỹnh fi pí(jé) vènh vĩ kar tag kã jatun nĩ!

⁵²Kỹ Jesus tóg mog mũ sir. Krĩ há tãvĩ tóg nĩ. Topê vỹ ti ve há han mũ gé. Kỹ tóg vènh kar mỹ há tĩ sir, ag tỹ ti jykre ven kỹ.

João Batista ti

(Mt 3.1-12; Mc 1.1-8; Jo 1.19-28)

3 ¹Kejēn tóg Tibério tỹ pã'i mág tỹ imperador nĩ kri 15 anos han mũ. Ti tỹ Roma tá tỹ pã'i mág nĩ ên kã Pôncio Pilatos vỹ tỹ ga tỹ Judéia kri pã'i tỹ governador nĩ, Tibério krēm. Ên kã Herodes vỹ tỹ Galiléia kri pã'i tỹ governador nĩ gé, Tibério krēm. Herodes jãvy tỹ Filipe vỹ tỹ ga tỹ Ituréia tá pã'i tỹ governador nĩ gé, ga tỹ Traconites tá ke gé, Tibério krēm. Jãvo Lisãnias vỹ tỹ ga tỹ Abilene tá pã'i tỹ governador nĩ, Tibério krēm.

²Ēn kā Caifás vỹ tỹ Topě tũ ki rĩr tĩ ag pã'i mág nĩ, Anás mré hã. Kỹ vãhã Topě vỹ João mré vĩ mũ sir, Zacarias kósin ěn mré. Ěmã tũg ja mũ tóg tĩ mũ, João ti. Kỹ Topě tóg ti mỹ: “ha Israel ag mỹ vĕnh ven tĩg,” he mũ. ³Kỹ tóg sir tĩ mũ. Goj tỹ Jordão jagma tóg tĩ mũ. Tĩg kỹ tóg vĕnh kar jyvĕn mũ, kỹ tóg ag mỹ: “ã kype jé sóg ke mũ, ã tỹ ã jykre kórég tovãnh sór kỹ, Topě tỹ ã tỹ ti vĩ mranh tỹ ã mỹ vĕnh pãte fón jé,” he tóg mũ sir, vĕnh kar mỹ.

⁴João tóg rán kỹ nĩ, vãsỹ. Topě vĩ tó tĩ tỹ Isaías vỹ João to tag rán ja nĩ, ha mẽ: “ěmã tũg ja tá tóg jĕnh ke mũ, ga kórég tá,” he ja tóg nĩ, Isaías ti. “Tá tóg ag mỹ tónh ke mũ. “Ěg Senhor kãtĩg ke jo vĕnh jãnhkrĩgkrĩg nĩ,” he jé tóg ke mũ. “Ěpry kurég ajag tóg tĩ, ěmĩn kurynh ajag tóg tĩ, ajag chefe jun ken kỹ. Kỹ tag ri ke han nĩ, ajag jykre pãno togvãnh kỹ, ěg Senhor kãtĩg ken jo. ⁵Ti kãgnó tỹ ajag tóg kyjer' he tĩ, kar ajag tóg ěpry sór kar kũm ke tĩ gé, ěmĩn sór ti. Ti jonjor kugrynh kãn ajag tóg tĩ, ti sunsór vãvãm kãn ajag tóg tĩ gé, ajag tỹ ěpry han kỹ, ěmĩn han kỹ. Kỹ tag ri ke han nĩ, ajag jykre kórég to. ⁶Hã kỹ ěprã ke kar vỹ venh ke mũ, Topě tỹ ěg krenkren han ke ti,” he jé tóg ke mũ, kỹ vĕnh kar vỹ ti vĩ mẽnh mũ,” he ja tóg nĩ, Isaías ti, João to.

⁷Hã kỹ João tóg sir ag jyvĕn mũ sir, ag tỹ ti venh kãmũn kỹ, ti tỹ ag kygpe jé. E tãvĩ ag nỹtĩ, ũ tỹ ti venh kãmũ mũ ag. Ag jyvĕn kỹ tóg ag mỹ: “pỹn ri ke ajag tóg nỹtĩ, ajag jykre pãno tãvĩ nĩn kỹ,” he mũ. “Ũ nỹ ajag mỹ: “Topě jũ venh ke tũ ajag nĩ,” he tĩ? ⁸Ajag jykre si togvãnh ra, ajag tỹ ti jũ ve jãvãnh tĩn kỹ. Vĕnh jykre há han ra, ěg tỹ ajag jykre tãg ve jé. Hã ra ajag tóg jagnĕ mỹ: “Abraão vỹ tỹ ěg jóg'jóg ve nĩ,” he mũ, “kỹ Topě hỹn ěg to jũnh ke tũ nĩ, ěg tỹ tỹ Abraão krĕ'krĕ nỹtĩn tugrĩn,” he ajag tóg tĩ. Hã tũ vĕ hã ra. Ajag jykre kórég ěn to ajag tóg jagtar ke mũ, ha vemnĩ. Topě vỹ Abraão krĕ'krĕ hyn han ki kanhró nĩ, pó tag tỹ mỹr, ti tỹ Abraão krĕ'krĕ ve sór kỹ, Topě ti. ⁹Hã ra tóg ajag tỹ tũ' henh ke mũ, ajag tỹ ajag jykre kórég tovãnh tũ nĩn kỹ,” he tóg, João ti.

“Ěg tỹ ka gỹn ri ke tóg nĩ. Ti kanĕn vãnh nĩn kỹ ěg tóg ti gỹn tĩ, tỹ pĩ han jé. Tag ri ke han jé tóg ke mũ, Topě ti, ajag mỹ, ajag tỹ vĕnh jykre há han tũ nĩn kỹ. Kỹ tóg pĩ ki ajag vãm ke mũ, Topě ti,” he tóg ag mỹ, João ti.

¹⁰Kỹ ũn e ag tóg ti ki jĕmĕnh kãmũ mũ sir, João ki. Kỹ ag tóg ti mỹ: “kỹ ěg hỹn hĕ ri kenh mũ ha, Topě jykre han jé?” he mũ. ¹¹Kỹ tóg ag mỹ: “ã kur régre nĩn kỹ ã kur pir nĩmnĩ, ũn kur tũ ěn mỹ,” he mũ. “Á jĕn tỹ ũn kókĩnkĩr ag mỹ vĕnh kãpópãm nĩ gé,” he tóg.

¹²Kỹ ũ tỹ governo mỹ imposto kaja mãg tĩ ag vỹ João to kãmũ mũ gé, ti tỹ ag kygpe jé. Kỹ ag tóg ti mỹ: “professor’,” he mũ. “Ěg hỹn hĕ ri kenh mũ?” he ag tóg mũ gé. ¹³Kỹ João tóg ag mỹ: “pã'i mág tỹ ajag mỹ nĕn tó mũ ěn hã ri ke mãn nĩ, jãnkamy ti,” he mũ. “Ker ti kãfór mãn sór hĕ!,” he tóg ag mỹ.

¹⁴Kỹ soldado ag vỹ tá junjun mũ gé. “Kỹ ěg hỹn hĕ ri kenh mũ?” he ag tóg mũ gé sir, soldado ag. Kỹ tóg ag mỹ: “ag tũ mãn sór tũg nĩ,” he mũ. “Ag to vãsãn ajag tóg tĩ, ũ to ón ajag tóg tĩ gé, ajag tỹ ag jãnkamy ve jé. Ke tũg nĩ. Ajag rãnhřãj to ajag tóg jãnkamy vég tĩ. Ti kãfór mãn sór tũg nĩ,” he tóg, João ti, soldado ag mỹ.

¹⁵Kỹ vênh kar ag tóg ti to jykren mũ, João to. “Ti mỷ tỹ Cristo tũ nĩ vỹ?” he ag tóg mũ sir ti to. João to ag tóg ke mũ, ag tỹ Cristo kătĩg jāvnh kỹ. ¹⁶Kỹ João tóg ag mỷ: “inh pi(jé) tỹ Cristo nĩ,” he mũ. “Goj hã tỹ sóg ajag kygpég tí. Inh nón tóg kătĩg mũ, Cristo ti, ha mẽ. Inh kãfór ti nĩ. Sỹ tỹ ti camarada nĩnh ke vê vê, sỹ ti pẽn né kunũ jé, ti pẽn to ró ti. Hã ra sóg tỹ ti krêm pẽ jê. Ên vỹ tóg Topê kuprĩg jênhênh ke mũ, ti tỹ tỹ ajag jagrê nĩ jé, kỹ tóg pĩ jêngrê ri ke nĩ. Ti tỹ ajag kygpenh ken hã vê,” he tóg, João ti. mũ, ti tỹ tỹ ajag jagrê nĩ jé, kỹ tóg pĩ jêngrê ri ke nĩ. Ti tỹ ajag kygpenh ken hã vê,” he tóg, João ti.

¹⁷“Ti kătĩg vỹ tỹ êg tỹ rãgró rên ri ke nĩ. Ti rên kar kỹ êg tóg ti fár vãm tí, êg tỹ pãjó kuprãg jé. Ti kanê há vin han êg tóg tí. Ti fár pũn êg tóg tí. Cristo kătĩg kỹ tóg ri ke nỹ. Ủ tỹ ã to há ag mỷ tóg: “ha kãmũ jêg,” henh ke mũ. Ủ tỹ ã to kórég ag vãm jé tóg ke mũ, pĩ ki, hã ra tóg nhyn kenh ke tũ pẽ nĩ,” he tóg, João ti. ¹⁸Hã kỹ tóg vênh kar mỷ Topê vĩ sér tó mũ, ag jyvên kỹ, João ti.

¹⁹Kỹ tóg pã'i mág tỹ Herodes jyvên mũ gé, ti prũ fi to, hã vỹ: Herodias fi, he mũ. Tỹ fi ti jãvy prũ ja nĩ, hã ra tóg fi pēju kỹ fi tỹ prũg mũ, Herodes ti. Nén ù vênhmỹ e han tóg tí, hã kỹ João tóg ti jyvên mũ. ²⁰Kar tóg sir nén ù vênhmỹ ù han mãn mũ gé, Herodes ti. João ség tóg mũ, ti tỹ ti jyvên to.

João tỹ Jesus kype
(Mt 3.13-17; Mc 1.9-11)

²¹Hã ra tóg kãgmĩ kỹ jê tũ nĩ ver, João ti. Kỹ tóg ag kygpe kãn mũ. Kỹ tóg kejên Jesus kypég mũ gé. Kỹ Jesus tóg jê nĩ, ti tỹ Topê mré vĩn kỹ, João tỹ ti kype kar kỹ. Kỹ vãhã kanhkã tóg nor' he mũ. ²²Kỹ Topê kuprĩg vỹ kanhkã tá kătêre mũ, ti kri. Tỹ sórãg ve ti nĩ, Topê kuprĩg ti. Kỹ kanhkã tá vênh vĩ tóg mẽ há tí, kỹ tóg: “tỹ ã inh kósın pir jê, tỹ ã tóg inh fe pẽ jêgtĩ,” he mũ, vênh vĩ ti, Topê ti.

Jesus jóg'jóg ve ag
(Mt 1.1-17)

²³Jesus vỹ 30 anos han mũ, ti tỹ vênh kar mỷ Topê kãmén ve ki. “José kósın vê,” he ag tóg tí ti to, hã ra tóg tỹ ti kósın tũ nĩgtĩ. Eli kósın vê, Jesus ti, kỹ Eli ên vỹ tỹ ti vovô nĩ. ²⁴Eli vỹ tỹ Matate kósın nĩ. Matate vỹ tỹ Levi kósın nĩ. Levi vỹ tỹ Malqui kósın nĩ. Malqui vỹ tỹ Janai kósın nĩ. Janai vỹ tỹ José kósın nĩ. ²⁵José vỹ tỹ Matatias kósın nĩ. Matatias vỹ tỹ Amós kósın nĩ. Amós vỹ tỹ Naum kósın nĩ. Naum vỹ tỹ Esli kósın nĩ. Esli vỹ tỹ Nagai kósın nĩ. ²⁶Nagai vỹ tỹ Maate kósın nĩ. Maate vỹ tỹ Matatias kósın nĩ. Matatias vỹ tỹ Semei kósın nĩ. Semei vỹ tỹ José kósın nĩ. José vỹ tỹ Joda kósın nĩ. ²⁷Joda vỹ tỹ Joanã kósın nĩ. Joanã vỹ tỹ Resa kósın nĩ. Resa vỹ tỹ Zorobabel kósın nĩ. Zorobabel vỹ tỹ Salatiel kósın nĩ. Salatiel vỹ tỹ Neri kósın nĩ. ²⁸Neri vỹ tỹ Melqui kósın nĩ. Melqui vỹ tỹ Adi kósın nĩ. Adi vỹ tỹ Cosã kósın nĩ. Cosã vỹ tỹ Elmadão kósın nĩ. Elmadão vỹ tỹ Er kósın nĩ. ²⁹Er vỹ tỹ Josué kósın nĩ. Josué vỹ tỹ Eliézer kósın nĩ. Eliézer vỹ tỹ Jorim kósın nĩ. Jorim vỹ tỹ Matate

kósin nĩ. Matate vỹ tỹ Levi kósin nĩ. ³⁰Levi vỹ tỹ Simeão kósin nĩ. Simeão vỹ tỹ Judá kósin nĩ. Judá vỹ tỹ José kósin nĩ. José vỹ tỹ Jonã kósin nĩ. Jonã vỹ tỹ Eliaquim kósin nĩ. ³¹Eliaquim vỹ tỹ Meleá kósin nĩ. Meleá vỹ tỹ Mena kósin nĩ. Mena vỹ tỹ Matata kósin nĩ. Matata vỹ tỹ Natã kósin nĩ. Natã vỹ tỹ Davi kósin nĩ. ³²Davi vỹ tỹ Jessé kósin nĩ. Jessé vỹ tỹ Obede kósin nĩ. Obede vỹ tỹ Boaz kósin nĩ. Boaz vỹ tỹ Sala kósin nĩ. Sala vỹ tỹ Nassom kósin nĩ. ³³Nassom vỹ tỹ Aminadabe kósin nĩ. Aminadabe vỹ tỹ Admim kósin nĩ. Admim vỹ tỹ Arni kósin nĩ. Arni vỹ tỹ Esrom kósin nĩ. Esrom vỹ tỹ Peres kósin nĩ. Peres vỹ tỹ Judá kósin nĩ. ³⁴Judá vỹ tỹ Jacó kósin nĩ. Jacó vỹ tỹ Isaque kósin nĩ. Isaque vỹ tỹ Abraão kósin nĩ. Abraão vỹ tỹ Tera kósin nĩ. Tera vỹ tỹ Nacor kósin nĩ. ³⁵Nacor vỹ tỹ Seruque kósin nĩ. Seruque vỹ tỹ Ragaú kósin nĩ. Ragaú vỹ tỹ Faleque kósin nĩ. Faleque vỹ tỹ Éber kósin nĩ. Éber vỹ tỹ Sala kósin nĩ. ³⁶Sala vỹ tỹ Cainã kósin nĩ. Cainã vỹ tỹ Arfaxade kósin nĩ. Arfaxade vỹ tỹ Sem kósin nĩ. Sem vỹ tỹ Noé kósin nĩ. Noé vỹ tỹ Lameque kósin nĩ. ³⁷Lameque vỹ tỹ Metusalém kósin nĩ. Metusalém vỹ tỹ Enoque kósin nĩ. Enoque vỹ tỹ Jarete kósin nĩ. Jarete vỹ tỹ Maleleel kósin nĩ. Maleleel vỹ tỹ Cainã kósin nĩ. ³⁸Cainã vỹ tỹ Enos kósin nĩ. Enos vỹ tỹ Sete kósin nĩ. Sete vỹ tỹ Adão kósin nĩ. Adão vỹ tỹ Topê tỹ há nĩ. Jesus jóg!jóg ve ag há vê.

Jesus tỹ Topê vĩ mranh tũ

(Mt 4.1-11; Mc 1.12-13)

4 ¹Kỹ Topê kuprĩg vỹ tỹ Jesus jagrê nĩ. Kỹ Jesus vỹ goj tỹ Jordão tá vỹn ke mũ, ã kype kỹ jên kỹ. Ti tũg kỹ Topê kuprĩg vỹ ti krĩn mũ. ²Kỹ tóg ti tỹ ti krĩn kỹ êmã tũg ja ra tí mũ sir, ga kórég ra. Tá tóg kurã tỹ 40 (ke) han mũ, êmã tũg ja ki. Kỹ Japo vỹ ti tỹ ã jóg vĩ mranh han sór mũ, tá, hã ra Jesus tóg ke tũ nĩ. Êmã tũg ja tá nĩn kỹ tóg jêg tũ nĩ, kurã tỹ 40 ên ki. Kar kỹ tóg sir kókĩr mũ. ³Ti kókĩr nĩn kỹ Japo vỹ ti mỹ vĩ mũ. “Tỹ ã Topê kósin nĩ mỹr,” he tóg. “Ã tỹ tỹ Topê kósin nĩn kỹ pó tag tỹ êmĩ han nĩ, ã tỹ kon jé,” he tóg ti mỹ, Nén-Kórég ên ti, Jesus mỹ. ⁴Kỹ Jesus tóg ti mỹ: “hã ra tag tóg rán kỹ nĩ, ha mẽ,” he mũ. “Êmĩ tãvĩ jamên kỹ êg rĩnrĩr tũ nỹti, Topê vĩ jamên kỹ êg rĩnrĩr nỹti. Hã kỹ tóg sỹ ti vĩ mranh jãvãnh tí, êmĩ to,” he tóg, Jesus ti, Nén-Kórég ên mỹ.

⁵Kỹ Japo vỹ ti mré tãpry mũ. Kỹ tóg ti mỹ mundo ven kãn mũ, ù tỹ kri ke kar ag ke gé. Ven pir ki tóg ti mỹ ven kãn mũ. ⁶Kỹ tóg ti mỹ: “isũ vê mỹr,” he mũ, Japo ti. “Ã mỹ sóg tovãnh kãn sór mũ, ã tỹ tỹ vênh kar tag ag pã'i jê jé. Kỹ ti sĩnvĩ tag kar vỹ tỹ ã tũ nĩnh mũ. Isũ vê mỹr, ù tỹn han ja ên tỹ inh mỹ: “té,” hen kỹ. Kỹ sóg sỹ ùn kuprêg mũ ên mỹ vin tí sir. ⁷Ã hã mỹ sóg tovãnh sór mũ ha, ã tỹ inh krêm grĩnh ken kỹ, ã tỹ iso: “Topê vỹ tỹ ã nĩ,” hen kỹ,” he tóg, Nén-Kórég ti, Jesus mỹ. ⁸Kỹ Jesus tóg ti mỹ: “tag vỹ rán kỹ nĩ, ha mẽ,” he mũ. “Êg pã'i tỹ Topê hã krêm êg tóg êg jakrĩ tỹ krỹ! he tí, ti hã to êg tóg: Topê vê, he tí,” he tóg, Topê vỹ tỹ rán kỹ nĩn ki. Hã kỹ sóg mranh jãvãnh nĩ,” he tóg, Jesus ti, Nén-Kórég mỹ.

⁹Kỹ Japo tóg ti mré tīg mǎn mǔ, cidade tỹ Jerusalém ra. Tá tóg ti mỹ: “Topê jo ìn kri jēmni, ti krī kri,” he mǔ. Kĩ tóg ke mǔ. Hǎ ra kǎgnó tóg tá nĩ, Topê jo ìn jo. Japo tóg Jesus mỹ: “Topê kósin vỹ tỹ ã nĩ,” he mǔ. “Kỹ hũm hemni. ¹⁰Tag vỹ rán kỹ nĩ, ha mē: “ã tỹ jēnē jafǎ ag mỹ tóg tónh mǔ, Topê ti, kỹ ag tóg ã ki rĩr ke mǔ. ¹¹Ājag nĩgé tỹ ag tóg ã vyn ke mǔ, kỹ ã tóg rỹj ke tũ nĩ. Ā pēn vỹ rỹj ke tũ nĩ gé, hǎ jé ag tóg ã ki rĩr ke mǔ,” he tóg, Topê vỹ tỹ rán kỹ nĩ ěn ki. Kỹ jatun mỹ hũm nĩ,” he tóg, Nén-Kórég ti, Jesus mỹ. ¹²Kỹ Jesus vỹ ti mỹ ke mǔ gé. “Kỹ tag vỹ rán kỹ nĩ gé, ha mē,” he tóg. “Topê mỹ: ã mỹ ã tỹ nén tó ja ěn han mǔ vỹ? he tũg nĩ,” he tóg mǔ gé, Topê vỹ tỹ rán kỹ nĩ ěn ki. Hǎ kỹ sóg Topê hǎ tỹ inh mỹ nén tó mǔ ěn han ke mǔ, kỹ sóg hũm ke tũ nĩ, ti tỹ inh mỹ tó tũ nĩn kỹ,” he tóg, Jesus ti, Nén-Kórég mỹ. ¹³Kỹ Japo vỹ ã tỹ nén tónh ke ěn tó kǎn ja nĩ, hǎ kỹ tóg Jesus tovǎnh mǔ ver, ti tỹ kurǎ ũ kǎ ti mré vỹ mǎn jé, kejēn, ti tỹ ti mỹ há tĩ ve nĩn kỹ, Japo mỹ.

Jesus tỹ Galiléia tá ag kanhrǎn

(Mt 4.12-17; Mc 1.14-15)

¹⁴Kỹ Jesus tóg tĩ mǔ sir, Topê kuprĩg tỹ ti krĩn kỹ. Ga tỹ Galiléia ra tóg tĩ mǔ. Kỹ vēnh kar ti kǎme mē kǎn mǔ sir, ga ěn tá ke kar ag. ¹⁵Kỹ tóg ag kanhrǎn mǔ sir, Jesus ti, ag vēnh kanhrǎn jafǎ krēm. Krēm ag tóg Topê vỹ tó tĩ, Judeu ag. Jesus tỹ ag kanhrǎn kỹ tóg ag mỹ e tĩ, ti vỹ ti. Hǎ kỹ ag tóg ti to vỹ há han mǔ sir.

Jesus tỹ Nazaré ra vỹn ke

(Mt 13.53-58; Mc 6.1-6)

¹⁶Kỹ Jesus tóg Nazaré tá jun mǔ gé, ã jamǎ tá. Tá tóg mog ja nĩ, cidade tỹ Nazaré tá. Kỹ tóg ã tỹ nén han tĩ ěn han mǔ. Ag vēnh kanhrǎn jafǎ ra tóg tĩ mǔ, vēnh kǎn ke kurǎ ki. Tá tóg sir jēgnē mǔ, culto ki, ag vēnh mǎn kỹ nỹtĩ ěn ki. Ti tỹ Topê vỹ to ke sór vē, hǎ kỹ tóg jēgnē mǔ, Jesus ti. ¹⁷Ti jē kỹ ag tóg ti mỹ livro nĩm mǔ, Isaías tỹ rán ja ěn ti, vǎsỹ Topê vỹ tó tĩ tỹ rán ja ěn ti. Kỹ tóg livro tỹ vym ke mǔ. Kỹ tóg ã tỹ to ke sór mǔ ěn vég mǔ, Isaías tỹ tó ja ti, ha mē. ¹⁸“Topê kuprĩg vỹ inh krĩn mǔ,” he tóg. “Inh jagrē vē mỹr, hǎ kỹ tóg inh krĩn mǔ. “Ūn jagǎgtar ag mỹ inh vỹ tómnĩ,” he tóg inh mỹ. Inh jēnēg tóg mǔ, isỹ ũn sigse kỹ nỹtĩ ag kygvǎn jé, isỹ ũn kyvó ag tỹ ěvǎnh (há) han jé, isỹ ag tỹ ũn vóg kónǎn mǔ ag ki rĩr há han jé, ag jatu nỹtĩ jé, ¹⁹isỹ vēnh kar mỹ: “ũri ěg jóg mág vỹ ěg kren han sór mǔ,” he jé,” he tóg, Isaías ti, vēnh rá ki. Hǎ to ke tóg mǔ, Jesus ti. ²⁰Tag to ke kar kỹ tóg livro ěn kri tỹ tam ke mǎn mǔ. Livro ki rĩr tĩ ěn mỹ tóg jun mǔ, livro ti. Kỹ tóg nĩ mǔ sir.

Hǎ ra vēnh kar ag tóg ti ki ěvǎnh mǔ. ²¹Kỹ tóg ag mỹ kǎmén mǔ, kỹ tóg: “vǎsỹ rán kỹ nĩ ja tag mē ājag tóg,” he mǔ. “Ūri ke vē, ũri ājag tóg vég mǔ, vǎsỹ rán kỹ nĩ ja ěn ti,” he tóg. “Inh hǎ to tóg tag tó ja nĩ, Isaías ti,” he tóg, Jesus ti.

²²Ag tỹ ti vỹ mē kỹ tóg ag mỹ e tĩ sir. “Ki hǎ tóg tó mǔ, hǎ kỹ tóg ěg mỹ e tĩ,” he ag tóg mǔ. Kỹ ag tóg ti to vỹ mǔ gé. “José kósin vē mỹr, ěg mré ke ěn, hǎ ra tóg ěg vỹ kǎfór han sór mǔ,” he ag tóg mǔ ti to.

²³Kỹ Jesus tóg ag mỹ: “ājag h̄yn iso jykrén sór mũ,” he mũ. “Médico mỹ ěg tóg: “kur vēsý há' hé, ā t̄y t̄y médico nĩ sór n̄n k̄y,” he tĩ. Ājag h̄yn tag tó sór mũ inh mỹ. Ājag h̄yn inh mỹ: “cidade t̄y Cafarnaum tá ā tóg ag t̄y há' hé, ũn kagyga ag t̄y, k̄y kur tag ki ěg t̄y há' hemnĩ gé, ā jamā tag ki, ā t̄y vĕnh kar t̄y há' he sór n̄n k̄y,” he sór ājag h̄yn mũ inh mỹ,” he tóg, Jesus ti.

²⁴Kỹ tóg ag mỹ: “ti jamā tá ke ag ne tóg Topĕ vĩ tó tĩ ěn to é he tĩ’,” he mũ. “Ti t̄y ke há vĕ. Hā k̄y ājag tóg iso é he tĩ,” he tóg ag mỹ, Jesus ti. ²⁵⁻²⁶“Ha mĕ, s̄y nĕn tó mũ ti. Elias to jykrén nĩ. Ti t̄y ga kri tĩ mũ k̄y tóg ta kutĕ vānh han ja n̄gtĩ, pr̄yg t̄agtũ kri kysā t̄y 6 (ke) ki. K̄y tóg pr̄yg tĩ sir, ga ěn mĩ, vĕjĕn tóg tũ' he mũ sir. K̄y Topĕ tóg Elias mỹ tó, ti t̄y cidade t̄y Sarepta ra t̄ig jé, cidade t̄y Sidom kakó ra. Tá fóg fi tóg nĩ nĩ, ũn mén ter ja fi. Fi mré tóg jĕg tĩ sir, Elias ti, fi t̄y ti mỹ vĕjĕn t̄y vĕnh k̄ap̄am k̄y, pr̄yg ra. Topĕ pi(jé) Israel fi to ti jĕnĕ ja n̄gtĩ'. Ti pi(jé) ti jamā ra ti jĕnĕ ja n̄gtĩ'. Tá fag tóg e n̄tĩ ja n̄gtĩ gé, ũn mén ter ja fag. Hā ra Topĕ tóg fóg ěn fi to ti jĕnĕ ja n̄gtĩ, fi t̄y ti ki r̄ir jé,” he tóg, Jesus ti.

²⁷“Kỹ Eliseu to jykrén nĩ gé, vāsý Topĕ vĩ tó tĩ ěn to. Ti t̄y ga kri tĩ n̄n k̄y ũn kagyga ag tóg e ja n̄ytĩgtĩ gé, ěg povo t̄y Israel k̄amĩ, vĕnh kaga kren vānh han mũ ag, vĕnh kaga t̄y lepra han mũ ag. Hā ra ag tóg ti mỹ to vĩ ja tũ n̄gtĩ, ti t̄y ag t̄y há' hen jé. Kuvar há tá tóg k̄atig ja n̄gtĩ, fóg ti, Naamā ti, ga t̄y Síria tá ke ěn ti. K̄y ti hā ne tóg Eliseu m̄y to v̄in k̄y há' he mũ sir inhhā. Ti kaga kren vānh ěn tóg tũ' he mũ sir. Ge ājag tóg n̄gtĩ iso. Kuvar há tá ke fag v̄y inh ki ge tĩ, jāvo ājag tóg inh ki ge jāvānh n̄tĩ, ājag t̄y t̄y inh jamā tá ke n̄tĩ ra,” he tóg ag mỹ, Jesus ti.

²⁸Kỹ ũ t̄y ti vĩ mĕg mũ ag fe tóg ḡym ke mũ sir, Jesus to, ũ t̄y vĕnh kanhrān jafā ěn krĕm n̄tĩ ag. ²⁹Jĕgĕg nĕgnĕ ag tóg mũ sir. K̄apa ag tóg mũ sir. Ti vóg ag tóg mũ sir, p̄anónh ra. Nazaré v̄y p̄anónh tá nĩ, ag jamā ti. P̄anónh ěn to jāpry k̄y ag tóg tá ti kutĕm sór mũ, k̄agnó ki ti ter jé. ³⁰Hā ra Jesus tóg ag ré k̄y tĩ mũ, ag jāmĩ. Ti t̄y hĕ ri ke tũ ag tóg nĩ sir, k̄y tóg ag f̄in r̄am k̄y ag ré k̄y tĩ mũ.

Hā ra ag tóg ti vĩ kri fi jāvānh n̄tĩ, ti jamā tá ke ag.

Jesus t̄y vĕnh jagrĕ kórég kutĕm

(Mc 1.21-28)

³¹Kỹ Jesus tóg cidade t̄y Cafarnaum ra tĩ mũ. Ga t̄y Galilĕia tá ti nĩ, Cafarnaum ti. Tá jun k̄y tóg ag kanhrān mũ, vĕnh kán ke kurā ki. ³²Kỹ tóg ag m̄y e tĩ, ag t̄y ti vĩ mĕn k̄y. Ti vĩ v̄y vĕnh kar vĩ k̄afór nĩ, hā k̄y tóg ag m̄y e tĩ.

³³Kỹ vĕnh kanhrān jafā ěn krĕm ũ tóg nĩ nĩ. Jagrĕ kórég ti nĩ. K̄y tóg prĕr mũ, k̄y tóg: ³⁴“ha mĕ, ā t̄y ěg t̄y hĕ ri kenh ke nĕ, Nazaré tá Jesus!?” he mũ. “Ā m̄y ěg t̄y sór mũ?” he tóg. “Ā ki kanhró sóg nĩ. T̄y ā tóg ā pir m̄y Topĕ mré ke nĩ, ti tũ pĕ v̄y t̄y ā nĩ,” he tóg, ũn jagrĕ kórég ti. ³⁵Hā ra Jesus tóg ti m̄y vĩ tar han mũ, k̄y tóg: “vĩ t̄y ra,” he mũ. “Ti tovānh ra,” he tóg. K̄y ti jagrĕ kórég ěn tóg ti ter tĩ han mũ, vĕnh kar r̄inve, k̄y tóg ti ki kutĕ mũ sir. Ti kókég tũ tóg nĩ, ti jagrĕ kórég ti.

³⁶Kỹ tóg vènh kar mÿ e pẽ tãvĩ tĩ sir. Jagnẽ mÿ ag tóg: “ne nẽ hÿn vé?” he mũ. “Vènh jagrẽ kórég ag mÿ tóg vĩ tĩ, Jesus ti, kÿ ag tóg sir ki króm tĩ, ti vĩ ki, ti kamẽg kÿ, ti tÿ ag pan kÿ. Ti hÿn tÿ ag kri ke nĩ,” he ag tóg mũ sir, Jesus to. ³⁷Kÿ ti kãme tóg vènh kar kri rùm ke kãn mũ sir, ga ãn tá.

Jesus tÿ ùn kagyga e ag tÿ há' he

(Mt 8.14-17; Mc 1.29-34)

³⁸Kÿ Jesus tóg vènh kanhrãn jafã ãn ki kutẽ kÿ Simão ãn ra tĩ mũ. Hã ra Simão prũ fi mÿnh fi tóg kaga nÿ nĩ. Rÿ jagy fi nÿ nĩ. Kÿ ag tóg Jesus mÿ fi tó mũ. ³⁹Kÿ tóg fi vènh tĩ mũ. Fi krĩ tá jẽ kÿ tóg fi mÿ: “rÿg mãn tũg nĩ,” he mũ. Kÿ fi rÿ ãn tóg tũ' he mũ sir. Kÿ fi tóg vèsÿmér nĩ nĩ. Ag ki rĩr fi tóg mũ sir, Simão má fi.

⁴⁰Kÿ tóg sir kutyg mũ, rã tÿ pun ke kÿ. Kÿ ag tóg ùn kagyga ag tatĩn kãmũ kãn mũ. Kÿ tóg ã nĩgẽ tÿ ag mẽ kãn mũ, Jesus ti, kÿ ag tóg hághá' he kãn mũ. ⁴¹Vènh jagrẽ kórég pan kãn tóg mũ gé, ag to jũ kÿ. Ag panh ke to hã ag tóg prẽr mũ, kÿ ag tóg: “Topẽ kósin vÿ tÿ ã nĩ,” he tĩ. Hã ra tóg ag mÿ: “vĩ tũg ra,” he mũ. Ti ki kanhró ag tóg nÿtĩ, ti tÿ tÿ Cristo nĩ ti. Hã kÿ tóg ag mÿ: “vĩ tũg ra,” he mũ, Jesus ti.

Jesus tÿ Topẽ vĩ tó

(Mc 1.35-39)

⁴²Tÿ vaj kÿ Jesus tóg tá kutẽ kÿ ãmã tũg ja ra tĩ mũ. Kÿ vènh kar ag tóg ti jãvãnh kãn mũ. Hã ra ag tóg ti vég mũ. Ti ve kÿ ag tóg ti mÿ: “ẽg ré kÿ tĩ tũg nĩ,” he mũ. ⁴³Hã ra tóg ag mÿ: “vó,” he mũ. “Cidade ù ra sóg tũg mũ, sÿ ag mÿ Topẽ vĩ tó jẽ gé, Topẽ tÿ tÿ ẽg pãlĩ nĩnh ke ti. Hã jẽ Topẽ tóg inh mÿ: “hã ag mÿ vènh ven,” he ja nĩ,” he tóg ag mÿ, Jesus ti. ⁴⁴Kÿ tóg tĩ mũ sir. Ga tÿ Judéia mĩ tóg tĩ mũ. Vènh kanhrãn jafã krẽm tóg ag mÿ Topẽ vĩ tó tĩ mũ sir, Jesus ti.

Jesus tÿ Pedro kanhrãn

(Mt 4.18-22; Mc 1.16-20)

5 ¹Kejẽn Jesus tóg goj nig tÿ Genesaré fyr tá jẽ nĩ, Topẽ vĩ kãmén kÿ. Kÿ vènh kar vÿ ti pénin nÿtĩ nĩ, kÿ ag tóg ti kutãn mũ sir, ag e tãvĩ nÿtĩn kÿ, ag tÿ Topẽ vĩ mẽ sór kÿ. ²Ag tÿ ti kutãn kÿ tóg canoa régre vigvég mũ, nig fyr tá. Pirã kugmĩg tĩ ag vÿ tá kãpa kÿ nÿtĩ nĩ. Goj kãki jẽg jẽg kÿ ag tóg pirã kugmĩ jafã kunũnh kÿ kupég nÿtĩ nĩ. ³Kÿ Jesus tóg canoa kãra rã mũ. Simão tũ vè, canoa ãn ti. Kÿ tóg Simão mÿ: “tũg sĩ han ra, canoa kãmĩ, goj kuju ra,” he mũ. Kÿ Simão tóg tĩ mũ. Hã ra Jesus tóg canoa kãkã nĩ nĩ, ti mré. Kãkã nĩ kÿ tóg ag kanhrãn mũ sir, vènh kar ãn ag, ù tÿ ti kutãn ja ãn ag. Goj fyr tá ag tóg nÿtĩ.

⁴Ti tÿ ag kanhrãn kãn kÿ tóg Simão mÿ: “goj kuju ra tũg, ti nig ja ra,” he mũ. “Tá ã rede tÿ goj kãki fón, ã tÿ pirã kugmĩ jẽ,” he tóg. ⁵Kÿ Simão tóg ẽg Senhor mÿ: “hã ra ẽg tóg kuty tag kã goj ki ti fón', fón' he ja nĩgtĩ, fagrĩnh mÿ,” he mũ. “Nén ù kãgmĩg tũ ẽg tóg nĩ mÿr,” he tóg. “Hã ra sóg

ã vĩ tugrĩn ki fón sór mũ ha,” he tóg, Simão ti. ⁶Kỹ tóg ke mũ sir. Kỹ tóg kugmĩ mág mũ. Fór tóg nĩ, rede ti, kỹ tóg jaran ke mũ, ti kufy jagy tăvi nĩn kỹ, pirã e tugnĩn. ⁷Kỹ ag tóg ãjag régre ag mỹ ven mũ, ag tỹ canoa ù kãki kãmũ jé. Ag tỹ tá junjun kỹ ag tóg canoa régre ãn fãn mũ, pirã tỹ. Funfór ti nỹti, hã kỹ tóg ki punpun ke kren mũ sir, canoa régre ãn ti.

⁸Kỹ Simão tóg Jesus krẽm grĩnh ke mũ. Ti mỹ tóg e ti, pirã e ãn to, kỹ tóg Jesus krẽm grĩnh ke mũ. Kỹ tóg ti mỹ: “Senhor!” he mũ. “Ã hỹn inh ré kỹ tĩg mũ ha. Topẽ vĩ mranh ja inh nĩgtĩ, kỹ inh hỹn ã mỹ kórég nĩ ha,” he tóg, Simão ti, Jesus mỹ. ⁹Ti mỹ tóg e pẽ tăvi tí, ti tỹ pirã e ãn ven kỹ, ti tỹ Jesus jykre ven kỹ. Ti mré ke ag mỹ tóg e tí gé, ¹⁰Tiago mỹ ke gé, João mỹ ke gé, Zebedeu krẽ tag ag mỹ. Simão régre ag vẽ, Zebedeu krẽ tag ag, ti companheiro ag vẽ.

Kỹ Simão tóg Jesus mỹ: “ã hỹn inh ré kỹ tĩg mũ ha,” he mũ. Hã ra Jesus tóg ti mỹ: “kamẽg tũg nĩ,” he mũ. “Pirã kugmĩ há ã tóg jẽ. ã kanhrãn jé sóg ke mũ, ã tỹ ãprã ke ag tỹ inh ki ge han jé,” he tóg, Simão mỹ, Jesus ti.

¹¹Kỹ ag tóg ãjag canoa vóg mũ, goj fyr ra. Tá junjun kỹ ag tóg ãjag tũ kar ré kỹ mũ mũ sir, Jesus mré.

Jesus tỹ ùn kaga kren vãnh tỹ há' he

(Mt 8.1-4; Mc 1.40-45)

¹²Kỹ tóg kejẽn cidade ù tá nĩ nĩ. Kỹ ù tóg ti tá jun mũ, ù tỹ vãnh kaga kren vãnh han kỹ nĩ ti, vãnh kaga tỹ lepra he mũ ãn. Ti kri tóg rũm ke kãn ja nĩ, vãnh kaga ti. ãn tóg Jesus tá jun kỹ ti krẽm mũg ke mũ, kỹ tóg ti mỹ: “Senhor!” he mũ. “Ã mỹ isỹ há' he sór tũ nĩ?” he tóg. “Ã hã tóg isỹ há' henh mũ, ã tỹ isỹ há' he sór kỹ,” he tóg ti mỹ.

¹³Kỹ Jesus tóg ã nĩgẽ tỹ ti mẽg mũ, kỹ tóg ti mỹ: “hej,” he mũ. “To sóg há nĩ, há' he ja há ã tóg nĩ,” he tóg ti mỹ. Kỹ tóg ti kaga kren vãnh tỹ há' he mũ sir vēsỹmér. Jãnhkri! he tóg mũ, ti fár ti. ¹⁴Kỹ Jesus tóg ti mỹ ke mũ, ti tỹ ù mỹ tó tũg jé, ti tỹ há' he tag ti. “Ha tĩg,” he tóg. “Topẽ tũ ki rĩr tí to tĩg. Ti hã mỹ tómnĩ, kỹ ti mỹ nén ù nĩm nĩ, ti tỹ Topẽ mỹ pũn jé, Moisés tỹ vãsỹ ãg mỹ nén tó ja ãn ti, ã jãnhkri to. Hã tugrĩn vãnh kar vỹ ã tỹ há' he mũ tag ki kanhrãn mũ,” he tóg ti mỹ, Jesus ti.

¹⁵Ge ra ti kãme tóg vãnh kar kri rũm ke mũ, kỹ ù tỹ hẽn ri ke ag tóg vãnh mãn mũ sir. Ag tỹ ti vĩ mẽ sór vẽ, ag tỹ ãjag tỹ há' he ãn ve sór vẽ gé. Hã jé ag tóg sir vãnh mãn mũ. ¹⁶Hã ra Jesus tóg ãmã tũg ja ra tĩ mũ, Topẽ mré vēmén jé.

Jesus tỹ ùn tĩg vãnh tỹ há' he

(Mt 9.1-8; Mc 2.1-12)

¹⁷Kejẽn tóg ag kanhrãn rãn mãn mũ. Kỹ Fariseu ù ag tóg ti vĩ mẽgmẽg mũ gé sir, Topẽ vĩ to professor ag mré hã. Kór há tá ag tóg kãmũ ja nĩ, ga tỹ Galiléia tá, ga tỹ Judéia tá ke gé, cidade tỹ Jerusalém tá ke gé. Jesus pénin ag tóg nĩgnĩ kỹ nỹti nĩ. Hã ra Topẽ tóg ti tar han ja nĩ, hã kỹ tóg ù tỹ hẽn ri ke ag tỹ há' he mũ, ùn kagyga ag tỹ, Jesus ti.

¹⁸Kỹ vāhā ũ ag tóg tá junjun mũ gé. Ũ va ag tóg kāmũ jĕg, kur kã, ũn kãnhgrĩ, ũn kónhgrĩ. Ag tỹ Jesus mỹ ti ven sór vĕ, ag tỹ ti krĕm ti fi sór vĕ. ¹⁹Hã ra tóg fór tãvĩ nĩ, tá, kỹ ag tóg ti tá junjun tũ nĩ sir, Jesus tá. Kỹ ag tóg ĩn to jãpry kỹ ti kri ĩn kunũg mũ. Ti nor ěn ki ag tóg ti tĕrem mũ, Jesus jĕ ěn kukãm. ²⁰Kỹ Jesus tóg ag tỹ ti ki ge kỹ nỹtĩ tag vĕg mũ. Hã kỹ tóg ũn kãnhgrĩ mỹ: “ã tỹ Topĕ vĩ mranh ja ěn tỹ tũ! he vĕ ha, vỹ,” he mũ.

²¹Hã ra ti vĩ tag tóg Topĕ vĩ to professor ag mỹ e tĩ, Fariseu ag mỹ ke gé. Kỹ ag tóg ti vĩ tag to jykrĕn kónãn mũ. “Ti tỹ ne tó nĕ hỹn!” he ag tóg mũ. “Topĕ to vĩ kónãn vĕ mỹr, ti vĩ tag to,” he ag tóg. “Topĕ hã ne ã pin kỹ Topĕ vĩ mranh ěn tỹ tũg! he há nĩnh mũ!, kỹ ti tỹ vĕsỹ tỹ Topĕ han vĕ sir, ti mỹ vĕnh pãte fón sór kỹ,” he ag tóg mũ, to jykrĕn kónãn kỹ.

²²Hã ra Jesus tóg ag tỹ nĕn to jykrĕn mũ vĕg mũ. Kỹ tóg ag mỹ: “ãjag tỹ ne jé to jykrĕn kónãn nĕ?” he mũ. ²³“Ne nỹ ãjag mỹ vĕnhmỹ nỹ?” he tóg. “Ũn tĩg vãnh mỹ sóg: “ã tỹ Topĕ vĩ mranh ja ěn tỹ tũ! he vĕ ha,” hé. Kỹn mỹ ãjag mỹ vĕnhmỹ?” he tóg. “Sỹ ti mỹ: “nĩ ra, tĩg ra,” henh ke vĕ gé. Kỹn mỹ ãjag mỹ vĕnhmỹ ke gé?” he tóg, tag to. ²⁴“Hã ra sỹ ãjag mỹ ĩnh jykre ven sór vĕ ha. Tỹ sóg ěprã ke fi kósĩn nĩ. Tá sóg krỹg ke mũ, Topĕ vĩ mranh tỹ vĕnh pãte fón ke tá. Sỹ tá krỹg mũ ven jé sóg ke mũ ãjag mỹ,” he tóg. Hã kỹ tóg ũn kónhgrĩ mỹ: “nĩ ra, ã kur gég tĩg, ã ĩn ra,” he mũ, Jesus ti. ²⁵Kỹ tóg vĕsỹmĕr jĕgnĕ mũ sir. Ā kur gég tóg mũ vãhã, ag rĩnve. Ā ĩn ra tóg tĩ mũ, Topĕ mỹ vĩ há han kỹ, ũn kãnhgrĩ ja ěn ti.

²⁶Kỹ tóg vĕnh kar mỹ e tãvĩ tĩ. Topĕ mỹ ag tóg vĩ há han mũ gé, ti to: “ĕg kãfór ti nĩ,” hen kỹ. “Ge ve ja tũ ĕg nỹtĩ, kỹ ĕg tỹ ne to jykrĕn ke tóg tũ tĩ,” he ag tóg mũ sir, Jesus tỹ ũn kãnhgrĩ ja ěn tỹ há! hen kỹ.

Jesus tỹ Levi jé prĕr
(Mt 9.9-13; Mc 2.13-17)

²⁷Kar kỹ Jesus tóg tĩg mãn mũ. Kỹ tóg ũ tỹ governo mỹ jãnkamy mãg tĩ ũ vĕg mũ, imposto mãg tĩ ěn ti. Ti jĩĩn hã vỹ: Levi, he mũ. Ā rãnrãj han kỹ tóg nĩ nĩ, ti rãnrãj jafã krĕm, Jesus tỹ ti ve kỹ. Kỹ tóg ti mỹ: “ĩnh mrĕ kãtĩg,” he mũ. ²⁸Kỹ tóg jĕgnĕ mũ sir. Ti mrĕ tóg tĩ mũ sir, ã tũ kar ré kỹ.

²⁹Kỹ Levi tóg ti mỹ festa mág han mũ, ti ĩn tá. Kỹ ti tỹ festa to ũn jé prĕr mũ ag vỹ tỹ ũ tỹ hĕn ri ke nỹtĩ, festa venh kãmũ mũ ěn ag. Governo mỹ jãnkamy mãg tĩ ũ ag vĕ, ag mrĕ ke ũ ag mrĕ hã. Jesus mrĕ ag tóg jĕg mũ.

³⁰Kỹ Fariseu ag tóg vĕg mũ, Topĕ vĩ to professor ag ke gé, kỹ tóg ag mỹ kórĕg tĩ. Kỹ ag tóg ũ tỹ Jesus mrĕ mũ tĩ ag to vĩ mũ gé. Ag mỹ ag tóg: “ãjag hã ne tóg governo mỹ jãnkamy mãg tĩ ag mrĕ jĕg mũ!,” he mũ. “Topĕ vĩ mranh tĩ ag mrĕ ãjag tóg jĕg mũ!,” he ag tóg, ũ tỹ Jesus mrĕ mũ tĩ ag mỹ.

³¹Hã ra Jesus tóg ag mỹ kãmĕn mũ. “Hỹ, ag mrĕ sóg jĕg mũ,” he tóg. “Hã ra ũn kagyga tũ ag vỹ mĕdĩco venh mũ tũ nĩgtĩ,” he tóg mũ. “Ũn kagyga ag hã vỹ ti venh mũ tĩ,” he tóg. ³²“Inh pi(jé) ũ tỹ vĕnh jykre kuryj han mũ ag mỹ:

“Ājag jykre tovānh ra,” he sór tī'. Ũ tỹ Topě vī mranh ja ěn ag hā mỹ sóg: “Ājag jykre kórég tovānh ra,” he sór tī. Hā jé sóg ājag mỹ vĕnh ven,” he tóg, Jesus ti.

Văkre

(Mt 9.14-17; Mc 2.18-22)

³³Kỹ Fariseu ag tóg ti mỹ ke măn mũ. “João mré mũ tĩ ag vỹ văkre (ka) mẽ nýtĩgtĩ, vĕjĕn ki, kỹ ag tóg Topě mré vī (ka)mĕ han tĩ gé, ag văkre kỹ. Kỹ Fariseu mré ke ag tóg ge nýtĩgtĩ gé. Hā ra ā mré mũ tĩ ag tóg ge tũ nýtĩ. Jĕg ag tóg mũgtĩ, kură kar ki. Văkre vānh ag nýtĩ, ěg văkre kură ki,” he ag tóg mũ sir, Jesus mỹ. ³⁴Kỹ tóg ag mỹ: “hỹ,” he mũ. “Hā ra vĕnh prũg tỹ festa to kāmũ ag pi(jé) văkrég tĩ’,” he tóg. “Festa vĕ mỹr, vĕnh prũg ti, kỹ ti mré ke ag tóg ũn prũg mũ ěn venh kāmũ tĩ. Hā ra sóg tỹ ũn prũg mũ ěn ri ke nĩ, hā kỹ tóg inh mré mũ tĩ ag mỹ sér tĩ,” he tóg. ³⁵“Vāhā tóg jun mũ, inh kură ti. ěn kă ag tóg inh pére mũnh mũ. ěn kă hā ag tóg ājag văkrenh ke venh mũ, kură ěn kă, inh mré mũ tĩ ag,” he tóg, Jesus ti.

³⁶Kỹ tóg ag mỹ comparação han mũ, kỹ tóg: “inh jykre tăg vỹ ge nỹnh mũ,” he mũ. “Ēg pi(jé) ěg kur tăg kókég tĩ’, ěg tỹ ěg kur si jar kă nĩm jé,” he tóg. “Ke tũ nĩ mũ ra ěg tóg ěg kur há ěn kókég mũ, hā ra tóg ěg kur si ěn ki par tũ nĩgtĩ gé, ũn há ti. Kỹ ěg kur tóg kórég kar nýtĩ nĩ sir,” he tóg. Ti tỹ ā jykre tăg tó vĕ, hā ra tóg kur tăg ri ke nĩ.

³⁷Kỹ tóg ag mỹ: “vinho vỹ ge nĩgtĩ gé,” he mũ gé. “Ēg pi(jé) vinho kajăg mũ tỹ ti făr si tỹ saco ki kujĕg tĩ’, vinho tăg ěn tĩ’. Ke tũ nĩ mũ ra tóg kunānh kỹ jar mũ. Kỹ vinho ěn tóg tũ’ he mũ, bolsa ke gé sir. ³⁸Vinho kajăg mũ tỹ ti făr tăg tỹ bolsa ki kujĕn ke vĕ mỹr,” he tóg. Ti tỹ ā jykre tăg tó vĕ, hā ra tóg vinho kajăg mũ ri ke nĩ.

³⁹Kỹ tóg ag mỹ: “ěg pi(jé) vinho si kron kỹ ũn kajăg kron sór tĩ’, ũn tăg ěn ti,” he mũ gé. “Ti si hā tóg ěg mỹ há nĩ,” he ěg tóg tĩ,” he tóg, Jesus ti. Ti tỹ ā jykre tăg tó vĕ, hā ra ag jykre si tóg ag mỹ há tĩ, ũ tỹ ti vī mĕg mũ ag mỹ.

Vĕnhkán ke kură ki vĕnh jykre

(Mt 12.1-8; Mc 2.23-28)

6 ¹Kejĕn tóg vĕnhkán ke kură tá krỹg mũ. Kỹ Jesus tóg ěpỹ mĩ tĩ mũ, trigo jo ěpỹ mĩ. Ti mré mũ tĩ ag tóg ti mré mũ mũ. Hā ra ag tóg sir trigo mó ěn tỹ kam ke mũ sir. Ājag nĩgé tỹ ag tóg rynhranh mũ, ag tỹ ti kanĕ ko jé. ²Hā ra Fariseu ũ ag tóg ag vĕg mũ. Ag mỹ vĕnh rānhřăj vĕ, ag tỹ trigo rynhranh mũ ti. Hā ki ag tóg ag mỹ Topě vī mranh mũ, ag tỹ vĕnhkán ke kură ki rānhřăj kỹ. Hā kỹ ag tóg ag mỹ: “Ājag ne tóg nĕn han ke tũ han mũ nĩ’, vĕnhkán ke kură ki’,” he mũ. “Vĕnh rānhřăj vĕ mỹr’, ājag tỹ nĕn han mũ ti,” he ag tóg, Jesus mré mũ tĩ ag mỹ.

³Hā ra Jesus tóg ag mỹ: “vó,” he mũ. “Ag kókĩnkĩr vĕ mỹr,” he tóg. “Davi to jykren nĩ, ti mré mũ tĩ ag to ke gé. Ti kókĩr kỹ tóg ā tỹ nĕn han ke tũ han gé, hā ra Topě pi(jé) ti to jũ mũ’,” he tóg. ⁴“Topĕ jo ĩn kă ra tóg ră, Davi ti. Tá

tóg Topê jamĩ ên kó. Ti tỹ konh ke tũ vê vê, Topê tũ ki rĩr tĩ ag hã tỹ konh ke vê vê. Hã ra tóg kó, ã mrê mũ tĩ ag mỹ tóg vênh kãpópãm gé, Davi ti. Rán kỹ tóg nĩ nĩ mỹr,” he tóg, Jesus ti. ⁵Kỹ tóg ag mỹ: “tỹ sóg vênhkán ke kurã to pã'i nĩ mỹr,” he mũ. “Tỹ sóg êprã ke fi kósin nĩ,” he tóg ag mỹ, Jesus ti.

Jesus tỹ vênhkán ke kurã kã ù tỹ há' he

(Mt 12.9-14; Mc 3.1-6)

⁶Vênhkán ke kurã ù kã Jesus tóg Israel ag tỹ vênh kanhrãn jafã kãra rã mũ, ag kanhrãn jé. Tá ù tóg jê nĩ. Ti nĩgé vỹ tóg ja nĩ. ⁷Kỹ Topê vĩ to professor ag tóg Jesus tugnyĩ mũ, Fariseu ag ke gé, ag tỹ ti tỹ há' he mũ ên ven jé. “Ti mỹ ti tỹ há' he sór tũ, tỹ êg vênhkán ke kurã (hã) ra'?” he ag tóg. “Ti tỹ ti tỹ há' he kỹ êg tóg ti kãmén mũ, pã'i ag mỹ, ti tỹ vênhkán ke kurã kã rãnrãj mũ ti,” he ag tóg. Hã kỹ ag tóg ti tugnyĩ mũ.

⁸Hã ra Jesus tóg ag tỹ nén to jykrén véj jê nĩ. Kỹ tóg ùn nĩgé tóg ên mỹ: “kunĩg,” he mũ. “Tag kã jênh nĩ,” he tóg ti mỹ. Kỹ tóg kãtig kỹ kã jê mũ sir. ⁹Kỹ tóg ag mỹ: “sỹ ajag ki jêmênh há tóg tĩ,” he mũ. “Vênhkán ke kurã ki êg hỹn ne han mũ?” he tóg, “êg tỹ Topê vĩ ki króm jé?” he tóg. “Êg mỹ nén ù há han mũ? Êg tỹ ù tũ kókén kỹn mỹ kórég tũ nỹnh mũ hỹn?” he tóg. “Êg mỹ ù kren han mũ hỹn? Êg tỹ ù tén kỹn mỹ kórég tũ nĩnh mũ hỹn?” he tóg. Hã ra ag tóg ti mỹ nén ù tó tũ nĩ.

¹⁰Kỹ tóg ag ki êvãnh kãn kỹ ùn nĩgé tóg ên mỹ: “ã nĩgé tỹ krỹg hé,” he mũ. Kỹ tóg tỹ krỹg he mũ sir. Ti tỹ tỹ krỹg he kỹ tóg há' he mũ, ti nĩgé tóg ên ti. ¹¹Kỹ tóg vênh kar mỹ e tĩ. Ag fe tóg gỹm ke mũ, kỹ ag tóg jagnê mré vémén mũ. “Êg hỹn ti tỹ hê ri kenh mũ hỹn', ti kãgmĩnh mũ vó?” he ag tóg, Jesus to. Hã ra tóg ùn nĩgé tóg ên tỹ há' he ja nĩ sir.

Jesus tỹ apóstolo ag kuprêg

(Mt 10.1-4; Mc 3.13-19)

¹²Ên kã Jesus tóg kejên pãnónh ra tĩ mũ, ti tỹ Topê mré vémén jé. Kutỹ ên kã tóg Topê mré vĩ nĩ ki kurãg mũ. ¹³Tỹ vaj kỹ tóg ã mré mũ tĩ ag jé prêr kãn mũ, kỹ tóg ag kãmĩ ù tỹ 12 (ke) ên ag kuprêg mũ. Ag to tóg: “sỹ ùn vin mũ ên ag,” he mũ, hã vỹ: apóstolo, he mũ. ¹⁴Ag hã vê, ha mē: Simão, Jesus tỹ ti jyjy ù hã vỹ: Pedro, he mũ, ti jãvy tỹ André ke gé, Tiago ke gé, ti jãvy tỹ João mré, Filipe ke gé, Bartolomeu ke gé, ¹⁵Mateus ke gé, Tomé ke gé, Tiago ke gé, Alfeu kósin tag ti, Simão ke gé, ag tỹ ù to: Zelote, he mũ tag ti, ¹⁶Judas ke gé, Tiago kósin tag ti, Judas Iscariotes ke gé, ù tỹ Jesus vatánh tá pã'i ag mỹ ti kãmén ke tag ti.

Jesus tỹ ùn e ag ki rĩr

(Mt 4.23-25)

¹⁷Kỹ Jesus tóg ag mré pãnónh ên to tére mũ sir, kỹ tóg kyjer tá jê nĩ. Kỹ ti mré mũ tỹ hên ri ke ag vỹ tá nỹtĩ gé. Û tỹ hên ri ke ag vỹ ti ki junjun ja nĩgtĩ, ga tỹ Judéia tá kãmũ kỹ, cidade tỹ Jerusalém tá ke gé, goj kafã tũ fyr tá ke

gé, hã vỹ: cidade tỹ Tiro, he mũ, cidade tỹ Sidom, he mũ gé. Ën kar vỹ ti ki junjun ja nĩgtĩ, ti tỹ ag tỹ há' he jé. Kỹ tóg fór pẽ nĩ, tá, ag tỹ e pẽ tãvĩ nỹtĩn kỹ. ¹⁸Ûn jagrẽ kórég ag tỹ tóg há' he mũ gé, ag jagrẽ pan tóg mũ, Jesus ti, jag mré hã. ¹⁹Kỹ vãnh kar vỹ ti kã krỹ' he sór mũ sir, hã jé ag tóg ti ki junjun mũ. Kỹ ù tỹ ti kã krỹ' he mũ ãn ag vỹ há' he kãn mũ, ti tỹ ã jykre tar tỹ ag tỹ hághá' hen kỹ. Hã jé ag tóg vãnh mãn ja nĩ. Hã kỹ ag tóg ti pẽnĩn e tĩ sir.

Jesus tỹ ag kanhrãn

(Mt 5.1-12)

²⁰Kỹ tóg ã mré mũ tĩ ag ki ãvãnh mũ, kỹ tóg ag mỹ kãmén mũ, Jesus ti, kỹ tóg: “Topẽ vỹ ãjag ve há han mũ, ãjag tỹ: “kórég eg tóg nỹtĩ,” hen kỹ,” he mũ. “Kỹ ãjag tóg Topẽ tỹ tỹ ãg pã'i nĩ venh ke mũ,” he tóg. ²¹“Topẽ vỹ ãjag ve há han mũ, ãjag tỹ: “inh kókĩr ri ke tóg tĩ, sỹ vãnh jykre kuryj ve sór tĩ ãn ti,” hen kỹ. Kỹ ãjag tóg venh ke mũ,” he tóg. “Topẽ vỹ ãjag ve há han mũ, ãjag vësỹrénh mũn kỹ, ãprã. ãjag mỹ sér nĩ jé tóg ke mũ, tá,” he tóg. ²²“Topẽ vỹ ãjag ve há han mũ, ag tỹ ãjag to kórég nỹtĩn kỹ isugnĩn, ag tỹ ãjag mỹ: “ha mũ jãg,” hen kỹ, isugrĩn. Ag tỹ isugnĩn ãjag mỹ vĩ kónãn kỹ tóg há tĩ, ag tỹ ón kỹ ãjag jykre kórég tóg kỹ. Tỹ sóg ãprã ke fi kósĩn nĩ mỹr,” he tóg, Jesus ti. ²³“Mỹ sér nỹtĩmnĩ, ãjag fe tỹ mrin kemnĩ, ag tỹ isugrĩn ãjag vóg kónãn mũ ra. Kỹ ãjag tóg kãnhkã tá nén ù há kar venh ke mũ, vãnh kaja jé, isugnĩn. Ge ja ag tóg nỹtĩ ja nĩgtĩ, ù tỹ ãjag vóg mũ ag jóg'jóg ag, vãsỹ Topẽ vĩ tóg ti ag mỹ. Ag vóg kónãn ja ag tóg nĩ gé. Vãsỹ Topẽ vĩ tóg ti ãn ag ri ke ãjag tóg nỹtĩ, ag krẽ'krẽ tỹ ãjag vóg kónãn kỹ,” he tóg, Jesus ti.

²⁴“Hã ra Topẽ vỹ ãjag ve kónãn mũ, ãjag tỹ: “há ãg tóg nỹtĩ,” hen kỹ. Ga kri mũn kỹ ãjag tóg nén ù há vég tĩ, kỹ ãjag tóg kãnhkã tá jun ke tũ nĩ,” he tóg. ²⁵“Topẽ vỹ ãjag ve kónãn mũ, ãjag tỹ vãnh jykre kuryj ve sór tũ nỹtĩn kỹ, ti tỹ ãjag mỹ ãjag kókĩnkĩr ri ke tũ nĩn kỹ, ãprã. Kỹ ãjag tóg venh ke tũ nĩ. Kỹ tóg ãjag kókĩnkĩr ri ke tĩnh mũ, tá,” he tóg. “Topẽ vỹ ãjag ve kónãn mũ, ti tỹ ãjag mỹ sér tĩn kỹ, ãprã. Vësỹrénh jé ãjag tóg ke mũ, kygfỹ jé ãjag tóg ke mũ, tá,” he tóg. ²⁶“Topẽ vỹ ãjag ve kónãn mũ, vãnh kar tỹ ãjag to vĩ há han mũn kỹ. ãjag mỹ ti há tĩ, vãnh kar tỹ ãjag to vĩ há han mũn kỹ, hã ra tóg Topẽ mỹ kórég nĩ. Ge ja ag tóg nỹtĩgtĩ, ù tỹ ãjag mỹ vĩ há han mũ ãn jóg'jóg ag, ón kỹ Topẽ vĩ tóg (ka)mẽ ãn ag mỹ, vãsỹ. Ag mỹ ag tóg vĩ há han ja nĩ gé. Ag ri ke ãjag tóg nỹtĩ, ón kỹ Topẽ vĩ tóg (ka)mẽ ãn ri ke ãjag tóg nỹtĩ, vãnh kar tỹ ãjag mỹ vĩ há han kỹ. Hã kỹ tóg ãjag ve kónãn mũ, Topẽ ti,” he tóg, Jesus ti, ag mỹ.

Ëg tỹ ãg kato tẽ mũ ag to há nỹtĩnh ke

(Mt 5.38-48)

²⁷“ãjag jyvẽn sóg mũ, ãjag tỹ inh vĩ jãmẽn kỹ, ha mẽ. Û tỹ ãjag kato vãsãnsãn mũ ãn ag to fe nỹtĩmnĩ jãvo. Û tỹ ãjag to jũ mũ ag mỹ nén ù há han nĩ jãvo. ²⁸Û tỹ ãjag mỹ vĩ kónãn mũ ag mỹ vĩ há han nĩ gé. Û tỹ ãjag mỹ féfén mũ ag to Topẽ mré vĩmnĩ gé. ²⁹Û ag tỹ ãjag jamẽ ki tãnh kỹ ag

mỹ ãjag jamẽ ù ti ven nĩ gé, ag tỹ ãjag mỹ ki tãnh jé gé. Û ag tỹ ãjag capa mãn sór mũ ên ag mỹ ãjag camisa nĩm nĩ gé. ³⁰ Û ag tỹ ãjag mỹ nén ù to: “inh mỹ nĩm,” he kỹ ag mỹ nĩmnĩ. Û ag tỹ ãjag tỹ nén ù mãn kỹ ag mỹ: “inh mỹ isũ nĩm,” he tũg nĩ. ³¹ ãjag tỹ ãjag mré ke ù to: “ti tỹ êg mỹ tag han há tóg tĩ vễ,” he mũ ra êg hã tóg ti mỹ han ke mũ,” he tóg.

³² “Û ag tóg ãjag to há nỹtĩ. ãjag tỹ tag ag hã to há nỹtĩn kỹ tóg tỹ nén ù tũ tĩ ver. Vẽnh kar ag vỹ ge nỹtĩ gé. Û tỹ ãjag to há nỹtĩ ên ag to ag tóg há nỹtĩ gé, vễnh kato, ù tỹ Topẽ vĩ mranh mũ ag vỹ tag han tĩ. Tag vỹ há nĩ, hã ra tóg tỹ nén ù tũ nĩ ver. ³³ Û ag tóg ãjag mỹ vĩ há han tĩ. ãjag tỹ ên ag hã mỹ vĩ há han kỹ tóg tỹ nén ù tũ nĩ ver. Ge ag tóg nỹtĩ gé, Topẽ vĩ mranh tĩ ag. ãjag tỹ ag mỹ vĩ há han kỹ ag tóg ãjag mỹ vĩ há han mũ gé, vễnh kato. Há ti nĩ, hã ra tóg tỹ nén ù tũ nĩ ver. ³⁴ Û ag vỹ, ãjag tỹ ag mỹ prestar hen kỹ ag tóg ãjag mỹ nĩm mãn mũ, ãjag tũ ti. ãjag tỹ ag hã mỹ prestar he mãn kỹ tóg tỹ nén ù tũ nĩ ver. Topẽ vĩ mranh tĩ ag vỹ ge nỹtĩ gé. ãjag tỹ ag mỹ nĩm mãn kỹ ag tóg ãjag mỹ prestar he mãn mũ sir, ãjag tũ ti. Há ti nĩ, hã ra tóg tỹ nén ù tũ nĩ ver.

³⁵ Ag jãvo ù tỹ ãjag kato vãsãnsãn mũ ag to há nỹtĩmnĩ, ha mẽ. Vễnh kar mỹ vĩ há han kãn nĩ. Vễnh kar mỹ prestar he kãn nĩ, ag tỹ ãjag mỹ ãjag tũ nĩm tũ (hã) ra. Kỹ ãjag tóg kãnhkã tá venh ke mũ, ãjag tỹ ùri nén han mũ tag ri ke ti. Hã ki ãjag tóg tỹ ù tỹ kynhmỹ nĩ ên krẽ nỹtĩ, ãjag tỹ ti ri ke han kỹ. Ti hã ne vễnh kar mỹ vĩ há han kãn tĩ ver!, ùn jykre kórég kar ag mré hã, ag tỹ ti mỹ: “êg mỹ tóg há ti,” he tũ (hã) ra, ag tỹ vễnh hã ki rĩr há han mũ (hã) ra tóg ag mỹ vĩ há han tĩ ver, Topẽ ti. ³⁶ Vễnh kar jagãgtãn kãn nĩ, êg jóg ri ke. Êg jóg tỹ vễnh kar jagãgtãn kóm vễnh kar jagãgtãn nĩ gé,” he tóg, Jesus ti.

Êg tỹ kãnhmar ù to vĩ kónãn ke tũ

(Mt 7.1-5)

³⁷ “Kãnhmar ù to vĩ kónãn tũg nĩ, kỹ Topẽ vỹ ãjag to vĩ kónãn ke tũ nĩ gé. Kãnhmar ù to: “kórég ti nĩ,” he tũg nĩ, kỹ Topẽ vỹ ãjag to: “kórég ti nĩ,” henh ke tũ nĩ gé. Vễnh kar mỹ vễnh pãte fón nĩ, ke tũ nĩ mũ ra Topẽ vỹ ãjag mỹ vễnh pãte fón ke tũ nĩ gé. ³⁸ Ag mỹ nén ù há kar nĩmnĩ, kỹ Topẽ vỹ ãjag mỹ nén ù há kar nĩm ke mũ gé sir, hã ra tóg ãjag mỹ ên kãfór nĩm ke mũ. ãjag mỹ nĩm mág han jé tóg ke mũ, Topẽ ti. Nĩm mág pẽ han jé tóg ke mũ, nén ù há kar tỹ. Hỹ, ge ti nĩ. ãjag tỹ ag mỹ nén ù há han kỹ Topẽ vỹ ãjag mỹ nén ù há han ke mũ gé. ãjag tỹ ag mỹ nén ù kórég han kỹ tóg ãjag mỹ hã ri ke han ke mũ gé,” he tóg, Jesus ti.

³⁹ Kỹ tóg ag mỹ: “ù tỹ ki kagtĩg ra tỹ ãjag pã'i nỹtĩ sór mũ tag vỹ ge nỹnh mũ, ha mẽ,” he mũ gé. Kỹ tóg: “ùn kyvó tỹ ùn kyvó ù mỹ: “sỹ ã péré tĩg ke vễ,” hen kỹ ag tóg ag mũn kỹ kãgnó ki vár kãn ke mũ. Ge ag tóg tĩ, ãjag pã'i ag. ãjag tỹ ùn ki kagtĩg ag mré mũn kỹ ãjag tóg mũ kónãn kãn ke mũ.

⁴⁰ Aluno pi(jé) ã professor kãfór nĩnh mũ!. Ti tỹ kãnhrãn há han kỹ tóg kejẽn ã professor ri ke nĩnh mũ, hã ra ti pi(jé) ti kãfór nĩnh mũ!. ⁴¹ Jykre kórég mág ãjag tóg nỹtĩ, hã ra ãjag régre jykre pãno sĩ ên ãjag mỹ kórég

nỹ'. ⁴²Kỹ ājag hã ne tóg ājag régre ag mỹ: “sỹ ã mỹ ã jykre kórég kurynh há tóg tí,” he tí', ājag tỹ ājag jykre pãno tãvi ěn kurynh jãvãnh (hã) ra. Ke tũg ra mỹr, ke tũ nĩ mũ ra ājag tóg jykre régre nỹtĩ. Ājag jykre kurynh vén nĩ, kar ājag tóg ājag régre ag jykre kurynh há han mũ,” he tóg, Jesus ti.

Ka to comparação

(Mt 7.16-20; 12.33-35)

⁴³“Ha vé, ka há pi(jé) kanē kórég han tí'. Kỹ ka kórég pi(jé) kanē há han tí gé'. ⁴⁴Ēg tỹ ti kanē ve kỹ ěg tóg: “ũn kanē ko há ja vē,” henh ke mũ, ke tũ nĩn kỹ ěg tóg: “ũn kanē ko vãnh ja vē,” henh ke mũ. Sónh to ěg tóg pẽnva vég tũ nĩgtĩ mỹr!, kar ěg tóg vãnh tỹ jóhó to uva vég tũ nĩgtĩ gé, ha mẽ. ⁴⁵Ge tóg nỹgtĩ, ěprã ke ag jykre ti. Ũn jykre há vỹ nén ũ há kar to jykrén tí, ti jykre kuryj nĩn kỹ. Kỹ tóg ěg mỹ tó há han tí gé sir. Kỹ ũn jykre kórég vỹ ũ kórég kar to jykrén tí, ti jykre pãno nĩn kỹ. Kỹ tóg ěg mỹ tó kónãn tí gé sir. Hỹ, ge ti nỹgtĩ. Ēg tỹ nén to jykrén tí ěn kãmén ěg tóg tí mỹr,” he tóg, Jesus ti.

Īn to comparação

(Mt 7.24-27)

⁴⁶“Ājag ne tóg inh mỹ: “Senhor!, Senhor!,” he tí'. Hã ra ājag tóg isỹ ājag mỹ nén tó mũ ěn han vãnh nỹtĩgtĩ. Kỹ tóg vẽnhmỹ nỹ. ⁴⁷Inh ki ge kỹ ājag nỹtĩ. Inh vĩ ki kanhró ājag tóg nỹtĩ. Ājag tỹ ki króm kỹ ājag tóg sir tag ri ke nỹtĩnh mũ, ha mẽ. ⁴⁸Īn han mũ ri ke vē. Ũ tóg, ti tỹ ĩn han jé tóg kũm tí, kã há tá. Kũm kỹ tóg pãró kri ĩn han mũ sir, pãró kri tóg ti nũna gunhgũnh mũ sir. Kỹ vãhã goj tóg var mũ, kỹ tóg ĩn kri rũm ke mũ, goj var ti. Hã ra ĩn tóg jẽ nĩ. Ti kókég tũ tóg nĩ, goj var ti. Ti tỹ pãró kri jẽ hã kỹ tóg tar jẽ. Ge ti nĩ, ājag tỹ inh vĩ ki króm kỹ. ⁴⁹Ājag tỹ inh vĩ ki króm tũ nĩn kỹ ājag tóg sir tag ri ke nỹtĩnh mũ, ha mẽ. Ũ tóg ĩn han mũ gé, hã ra tóg jo kũm tũ nĩ, ti nũna vỹ jãvo krĩgmỹ nỹtĩ. Kỹ vãhã goj var vỹ ĩn kri rũm ke mũ sir, kỹ tóg kutẽ mũ sir, ĩn ti. Kỹ tóg mráj mũ sir, ha mẽ, ti nũna tỹ krĩgmỹ nỹtĩn kỹ. Ge ti nĩ, ũ tỹ inh vĩ jẽmẽ jãvãnh ěn ti,” he tóg, Jesus ti.

Fóg tỹ capitão tỹ Jesus ki rã

(Mt 8.5-13)

7 ¹Jesus tỹ ag kar kanhrãn kãn kar tóg cidade tỹ Cafarnaum ra tí mũ. ²Tá fóg tỹ capitão tóg nĩ nĩ. Ti camarada tóg kaga nỹ nĩ. Vẽnhmỹ tóg nỹ, kỹ capitão tóg: “ti hỹn ter mũ ha,” he mũ. Hã ra tóg ti mỹ ti fe ri ke nĩ, ti camarada ti, capitão ěn mỹ. ³Hã kỹ tóg Jesus kãme mẽ kỹ Israel kófa ag jẽgnẽg mũ, Jesus to, ag tỹ ti mỹ: “ti venh kãtĩg,” he jé. Jesus tỹ ti camarada tỹ há! he jé tóg ti mỹ vẽnũh vỹ jẽnẽg mũ, fóg tỹ capitão ěn ti. ⁴Kỹ ag tóg Jesus tá junjun mũ, Israel kófa ěn ag. Kỹ ag tóg Jesus mỹ tó mũ. “Ā mỹ ti venh tĩg ke tũ nĩ?” he ag tóg mũ, Jesus mỹ. “Ũn há vē. ⁵Ēg povo to tóg há

tāvī nī, ti tỹ tỹ fóg (hã) ra. Ēg mỹ tóg ĩn han ja nī, ěg tỹ krēm Topě vī tó jafã ti, ti tỹ tỹ fóg (hã) ra,” he ag tóg mũ, Jesus mỹ, fóg tỹ capitão ěn to.

⁶Kỹ Jesus tóg: “hej,” he mũ. Kỹ tóg ag mré tĩ mũ. Kỹ tóg ti ĩn kakó ki jun mũ. Kỹ capitão tóg ti mỹ vĕnh vĩ jĕnĕ mǎn mũ gé. Ā mré ke ag jĕgnĕg tóg mũ, Jesus to. Kỹ ag tóg ti mỹ: “Senhor!,” he mũ. “Ti venh kārãnh ke tũ Ā nĕji nī, ti tỹ tỹ fóg nĩn kỹ,” he ag tóg. “Ā mỹn hỹn jagy nỹ, Ā tỹ fóg ĩn kãki sãn ken kỹ, Judeu ag tỹ fóg ĩn sãn jãvãnh nỹtĩn kỹ,” he ag tóg. ⁷“Hã kỹ ti nĕji Ā venh kãtĩg tũ nĩ gé, hã ra tóg Ā mỹ vĕnh vĩ jĕnĕg mũ. Ā vĩ pir ki ti camarada nĕji há' henh mũ, Ā tỹ Ā vĩ tỹ ti tỹ há' henh há nĩn kỹ,” he ag tóg. ⁸“Ha vé, tỹn ji pã'i krēm ke nĩ gé, kỹ soldado ag nĕji tỹ ti krēm ke nỹtĩ gé. Hã kỹn ji tóg pã'i jykre ki kanhró nĩ. Ti tỹ soldado ũ mỹ: “kutĩg,” hen kỹn ji tĩ mũ, ti tỹ ti mỹ: “kunĩg,” hen kỹn ji kãtĩ mũ gé. Ti tỹ Ā camarada mỹ: “tag han ra,” hen kỹn ji han mũ. Ti vĩ tỹn ji ag jĕgnĕg tĩ. Hã kỹn ji ki kanhró nĩ. Ā vĩ tỹ Ā nĕji ti camarada tỹ há' he há nĩ,” he ag tóg mũ, Jesus mỹ, capitão mré ke ag.

⁹Kỹ tóg Jesus mỹ e tĩ, ti vĩ tag ti. Kỹ tóg Ā mré mũ tĩ ag mỹ ke mũ, ũn a ag mỹ, ti nón kãmũ ěn ag mỹ. Kỹ tóg ag mỹ: “Israel ũ pi(jé) ti ri ke nĩ, ti tỹ tỹ fóg (hã) ra!,” he mũ. “Ki kanhró tóg nĩ mỹr, kỹ tóg ĩnh ki rã kỹ jĕ. Ge ve ja tũ sóg nĩ. Há' he kỹ ti nĩ ha, ti camarada ti,” he tóg, Jesus ti.

¹⁰Kỹ ag tóg vỹnvỹn ke mũ, capitão ĩn ra, capitão tỹ ũn jĕgnĕg mũ ag. Hã ra ti camarada ěn tóg há' he ja nĩ sir, ag tỹ tá junjun mũ ra.

Jesus tỹ ũn ter mũ rĩn mǎn

¹¹Kãnhmar Jesus tóg tĩ mũ gé sir, ěn ki. Kỹ tóg cidade tỹ Naim ra tĩ mũ. Ti mré mũ tĩ ag tóg ti mré mũ mũ, ũn e a g ke gé. Ti nón ag tóg mũ mũ. ¹²Kỹ tóg cidade ěn fyr ki jun mũ, cidade to ró jãnkã ki. Kỹ ag tóg vĕser va kãmũ nĩ, ha mĕ. Ti mỹnh fi kósin pir vĕ mỹr. TI panh tóg ter ja nĩ. Kỹ ũ tỹ hĕn ri ke fag vỹ fi mré mũ nĩ, cidade tá kãmũn kỹ. ag tỹ ti péjunh mũ vĕ, vĕnh kej tá.

¹³Kỹ Jesus tóg fi vég mũ, kỹ fi tóg ti mỹ jagtar nĩ. Kỹ tóg fi mỹ: “fỹ tũg nĩ,” he mũ. ¹⁴Kỹ tóg vĕser venh tĩ mũ, kỹ tóg tá jun kỹ ti mĕg mũ. Kỹ ũ tỹ ti va mũ ěn ag vỹ krỹg'krỹg' he mũ. Kỹ Jesus tóg vĕser mỹ: “kyrũl’,” he mũ. “Nĩ ra, he sóg mũ Ā mỹ,” he tóg mũ, vĕser mỹ, Jesus ti. ¹⁵Kỹ tóg nĩ mũ (mỹr) sir, ha mĕ, vĕser ěn ti, kỹ tóg vĩ mũ sir, ũn ter ja ěn ti. Kỹ Jesus tóg ti mỹnh fi mỹ ti fĕg mũ.

¹⁶Kỹ tóg vĕnh kar mỹ e tĩ, kỹ ag tóg Topě to vĩ há han mũ sir. “Topě vĩ tó tĩ kãfór vỹ ěg ki jun,” he ag tóg mũ, “Topě vỹ ěg ve há han, hã kỹ tóg ti jĕnĕ,” he ag tóg mũ, Jesus to. ¹⁷Kỹ ti vĕme tóg vĕnh kar kri rũm ke mũ sir, ga tỹ Judéia kar tá, ga kar ěn kãmĩ ke gé, Jesus tỹ ũn ter ja ěn rĩn mǎn ja ti.

João Batista tỹ Jesus mỹ vĕnh vĩ jĕnĕ

(Mt 11.2-19)

¹⁸Ēn kã João vỹ se kỹ jĕ nĩ, João Batista ti, ũ tỹ ag kygpég tĩ ti. Kỹ João mré mũ tĩ ag tóg ti mỹ tó kãn mũ sir, Jesus tỹ nĕn han mũ ti. ¹⁹Kỹ tóg ti mỹ e

tí. Kĩ tóg Jesus to: “Topê tỹ ùn jēnēg mũ hã mỹ vỹ?” he mũ. Hã kỹ tóg ã mré mũ tĩ régre ag jēgnēg mũ, ag tỹ Jesus venh mũ jé, ag tỹ ti ki jēmē jé, ti mỹ: “ã hã mỹ?” he jé. “Ēg tỹ ùn jāvānh mũ mỹ tỹ ã nĩ? Topê tỹ ùn jēnēg mũ hã mỹ tỹ ã nĩ? Ēg mỹ ù jāvānh mǎn ke tũ nĩ ha!, ã pǎte?” he sór ag tóg mũ, Jesus mỹ.

²⁰Kỹ ag tóg Jesus tá junjun mũ. Kỹ ag tóg ti mỹ: “João Batista vỹ ěg jēgnē, ěg tỹ ã ki jēmē jé,” he mũ. “Ā hã mỹ?” he tóg. Ēg tỹ ùn jāvānh mũ ěn hã mỹ tỹ ã nĩ? Ēg mỹ ù jāvānh mǎn ke tũ nĩ ha!, ã pǎte? he tóg, João ti, ã mỹ,” he ag tóg mũ, Jesus mỹ.

²¹Hã ra Jesus tóg ùn kaga ag tỹ há! he mũ, ag tỹ ti mré vīnh kāmũ kỹ. Vēnh jagrē kórég pan tóg mũ gé, kurǎ ěn kǎ. Ûn kyvó ag tỹ há! he tóg mũ gé, ag kanē tỹ. ²²Kỹ tóg João mré mũ ti ag mỹ: “Ha João mỹ tag tómnĩ, ha mē,” he mũ. “Ājag tỹ nén vég mũ ta g tómnĩ, ājag tỹ nén mēg mũ ti ke gé,” he tóg. “Tag han inh tí, ha mē: ùn kyvó ag vỹ isugrīn ěvānh há nỹtĩ ha. Ûn kǎnhgrĩ ag vỹ mũ há han mũ ha, ùn kónhgrĩ ěn ag. Û tỹ vēnh kaga kren vānh han mũ ag krenkren han inh tí, ù tỹ lepra han mũ ag. Ûn kutu ag vỹ ěmē há nỹtĩ ha. Ûn kǎgter mũ ag vỹ rīnrīr mǎn gé. Ûn jagāgtar e ag vỹ Topê vĩ sér mēg mũ ha ke gé, Topê tỹ tỹ ěg pǎli ninh ke to. ²³Kỹ tóg ti tỹ iso jykrén kónǎn tũ ninh kỹ há! he mũ. Kỹ Topê tóg ti ve há han mũ sir. Tag tómnĩ, João mỹ,” he tóg, Jesus ti. ²⁴Kỹ João tỹ ùn jēgnēg mũ ag tóg mũ mũ sir, João mỹ tó jé, mỹr, ha mē.

João tỹ ùn jēgnēg mũ ěn ag mũ kar kỹ Jesus tóg ùn e ěn ag kanhrǎn mũ sir, kỹ tóg ag mỹ João kāmén mũ. “Ēmǎ tũ ja ra ājag tóg mũ ja nĩgtĩ, João ve jé,” he tóg. “Kỹ ti jykre hỹn ne ri ke nĩ, ājag mỹ? Kejēn kǎka tóg goj jagma krǎ tỹ man man ke tí. João jykre mỹ ājag mỹ tag ri ke tũ nĩ? Hỹ, ri ke tũ ti nĩ. ²⁵Kỹ ti jykre hỹn ne ri ke nĩ ājag mỹ? Ti mỹ ājag mỹ ùn kur sīnvĩ ag jykre ri ke nĩ? Vó. Ûn kur sīnvĩ ag vỹ cidade mág tá nỹtĩ, pǎli mág ĩn krēm, ùn jēn mág mũ ag. Ag pi(jé) ěmǎ tũg ja mĩ mũ tí! ²⁶Kỹ ti jykre hỹn ne ri ke nĩ ājag mỹ? Ti jykre mỹ ājag mỹ Topê vĩ tó tí ag jykre ri ke nĩ? Hỹ, ri ke ti nĩ. Topê vĩ tó tí vē mỹr, hã ra tóg Topê vĩ tó tí ag kǎfór kar nĩ, João ti. ²⁷Topê vỹ João jēnē, ti tỹ ijo tĩg jé. Hã kỹ tag tóg ti to rán kỹ nĩ, Topê vĩ ki, ha mē. “Ha vé, ã jo sóg ù jēnēnh mũ, ti tỹ vēnh kar tỹ há! he jé, ã tĩg ken jo. Ag jyvēn jé tóg ke mũ, kỹ tóg ěpry kure ri ke nĩ, ěmĩn kurynh ri ke,” he tóg, Topê vĩ tỹ rán kỹ nĩ ki, João to, ti tỹ ijo tĩg ke tag to,” he tóg, Jesus ti, ag mỹ. ²⁸“Ki hã sóg tó mũ, hã kỹ sóg ke mũ, ha mũ. Ēprǎ ke ag kǎfór kar ti nĩ, João ti, Topê vĩ tón ki. Û tỹ ga kri mũ kǎfór kar ti nĩ. Hã ra ù tỹ hēn ri ke ag tóg Topê tỹ tỹ ěg pǎli nĩ venh ke mũ mỹr. Ag tỹ venh ke mũ (hã) ra ag tóg kāsir nỹtĩ. Kỹ ùn kāsir ěn ag tỹ ěgno pē ěn tóg João mág kǎfór ninh mũ hã ra,” he tóg, Jesus ti, João to.

²⁹“Jo João vĩ mēg mũ e ěn ag tóg João vĩ mē há han ja nĩgtĩ, hã kỹ ag tóg Topê vĩ tag ti to: “ki hã ã tóg tó mũ,” he ja nĩgtĩ, João tỹ ag mỹ nén tó ja to. Hã kỹ tóg ag kygpe ja nĩgtĩ, João ti, ù tỹ governo mỹ imposto tỹ jǎnkamy mǎg tí ag mré hã. ³⁰Hã ra Fariseu ag tóg João vĩ jēmē jāvānh ja nỹtĩgtĩ, Topê vĩ to professor ag ke gé. Hã kỹ ag tóg Topê tỹ ag mỹ nén han sór mũ ěn tỹ ti mỹ nenh ja nĩgtĩ gé. Hã kỹ João tóg ag kygpe ja tũ nĩgtĩ gé,” he tóg, Jesus ti.

³¹“Ūri ke ag vỹ ge nỹtĩ gé, ha mẽ. ³²Gĩr ag ri ke ag tóg nỹtĩ. Gĩr ag vỹ jagně mré kanhinnhir mũgtĩ. Kỹ ag tóg ājag mré ke ag jé prěr tĩgtĩ, ag mré kanhinnhir jé. Kỹ ag tóg kejěn jũ tí. “Ājag mỹ ěg tóg vākyn, kanhinnhir kỹ, hã ra ājag ne tóg vėnh gringrén jāvãnh nỹtĩ!” he ag tóg tí, gĩr ag, jagně mỹ. “Ājag tỹ vėnh gringrén jāvãnh nỹtĩn kỹ ěg tóg ón kỹ vėsýrėnh mũ sir, ěg kanhinnhir kỹ, hã ra ājag ne tóg ěg mré fỹ jāvãnh nỹtĩgtĩ gé!” he ag tóg tí gé, ón kỹ jagně to jũ kỹ, gĩr ag. ³³Gĩr tag ag ri ke ājag tóg nỹtĩ, João to, iso ke gé,” he tóg, Jesus tí. “João vỹ vākre ja nĩgtĩ, jěn mág tũ, kron tũ. Kỹ ājag tóg ti to: “jagrě kórég tóg nĩ,” he ja nĩgtĩ, ti vākre to. ³⁴Ti jãvo sóg vākreg tũ nĩgtĩ. Jėg sóg nĩgtĩ, kron sóg nĩgtĩ. Kỹ ājag tóg iso: “ti hã ne jěn mág tí!” he tí. “Ti hã ne kronkron tí, ti hã ne governo mỹ imposto tỹ jãnkamy mág tí ag to há nĩ!, ti hã ne Topě vĩ mranh tí ag to há nĩ!” he ājag tóg tí iso, ěprã ke fi kósın to. Kỹ João jykre tóg ājag mỹ kórég nĩ, ti vākre to, jãvo inh jykre tóg ājag mỹ kórég nĩ gé, inh vākreg tũ to. ³⁵Hã ra ěg tỹ ũ jykre tugnỹm kỹ ěg tóg ti jykre há ěn ki kanhró nỹtĩ sir. Kỹ tóg tỹ Topě krě nĩ sir, kỹ ěg tóg ti ki Topě jykre ki kanhró nỹtĩ sir, ti jykre há ěn tugrĩn,” he tóg, Jesus ti. Ti tỹ ag mỹ João kãmén hã vė.

Jesus tỹ Simão ĩn krēm jėg

³⁶Kejěn Fariseu ũ tóg Jesus mỹ tó mũ, ti tỹ ti mré jěn jé. Kỹ tóg tí mũ, Fariseu ěn ĩn ra. Tá tóg ti mré jėg mũ sir.

³⁷Ti tỹ mré jėg nĩ ra ũ fi tóg ti ki jun mũ, cidade tá ke ũ fi. Hã ra fi tóg mén ja e nĩ, Topě vĩ mranh kỹ. Jesus tỹ Fariseu ěn ĩn krēm jě mėg fi tóg mũ, hã kỹ fi tóg garrafa va kãtĩ mũ. Garrafa kãki tóg ěg tãg jafã nĩ, nén ger há tỹ. Pó kupri tỹ tóg han kỹ nĩ nĩ, garrafa ěn, pó tãnjã tỹ. ³⁸Ěn va kãtig kỹ fi tóg ti pěn to jě nĩ sir. Hã ra Jesus tóg cama kri nỹ kỹ jėg mũ. Ag jykre vė, ag tỹ nỹ kỹ jěn ke mũ ěn ti. Kỹ fi tóg ti pěn to jě kỹ fỹ mũ. Fi tỹ Topě vĩ mranh ja ěn tugrĩn fi tóg fỹ mũ. Kỹ fi tóg Ā kaně var tỹ ti pěn kupég mũ, kỹ fi tóg Ā gãnh tỹ ti pěn kykũg mũ gé. Ti pěn ki nhun ke fi tóg mũ gé. Kỹ fi tóg ti pěn tãg mũ sir, garrafa ki jě ěn tỹ.

³⁹Kỹ Fariseu ěn tóg vėg mũ, ũ tỹ Jesus mỹ: “inh mré jěn kãtig,” he ja ěn ti. Kỹ tóg to jykrén mũ, ũn tỹtã fi to, Jesus to ke gé. “Ti tỹ tỹ Topě vĩ tó tí nĩ ra tóg fi ki kanhró ninh mũ vė,” he tóg. “Hã ra tóg ki kãtig nĩ ve nĩ. Ūn mén ja e fi vė mỹr, Topě vĩ mranh fi tóg tĩgtĩ mỹr, hã ra tóg fi tỹ Ā pěn mẽ ěn kamėg tũ nĩ, Jesus i,” he tóg, to jykrén kỹ, Fariseu ěn ti.

⁴⁰Hã ra Jesus tóg ki kanhró nĩ. Kỹ tóg ti mỹ: “Simão!,” he mũ. “Sỹ Ā mré vėmėn ke vė,” he tóg. Kỹ tóg ti mỹ: “ha tó,” he mũ sir, Jesus mỹ. ⁴¹Kỹ tóg: “kejěn patrão ũ tóg nĩgtĩ,” he mũ. “Ti camarada rėgre ag tóg ti mỹ név(e) nỹtĩ. Ūn név(e) ěn vỹ tỹ 500 (ke) nĩ, kar ũn név(e) vỹ tỹ 50 (ke) nĩ gé. ⁴²Hã ra ag tỹ ne tỹ kajãm ke tóg tũ tí, kỹ tóg ag mỹ tỹ tũg! he mũ, ag név(e) tỹ, ag patrão ti. Kỹ ti camarada tỹ hě nỹ hỹn ti to há kãfór nĩ?” he tóg, Jesus ti, ti tỹ Simão ki jēmėn kỹ.

⁴³Kỹ Simão tóg ti mỹ: “ũn név(e) mág ja ěn hỹn tóg ti to há kãfór nĩ,” he mũ. Kỹ Jesus tóg ti mỹ: “ki hã Ā tóg tó mũ,” he mũ. ⁴⁴Kỹ tóg fi jé vĩrĩn

ke mũ sir, ùn týtá kórég ěn fi jé, kȳ tóg Simão mȳ: “ã mȳ fi vég mũ?” he mũ. “Ă kanē var tȳ fi tóg inh pĕn kugpég mũ, kar fi tóg ã gãnh tȳ inh pĕn kykũg mũ gé,” he tóg. “Fi jãvó ã tóg inh mȳ goj ven tũ nĩ, isȳ inh pĕn kugpe jé, sȳ ã ĩn kãra rã kȳ,” he tóg. ⁴⁵“Inh ki nhun ke ja tũ ã tóg nĩ, ã jãvo fi tóg inh pĕn ki nhun ke mũ, to fi krónh ke tũ nĩ jãvo,” he tóg. ⁴⁶“Ă pi(jé) inh gãnh tãg ja nĩ, ã jãvo fi tóg inh pĕn tãg,” he tóg. ⁴⁷“Hã kȳ sóg ã mȳ tó mũ. Topē vĩ mranh tȳ hĕn ri ke han fi tóg. Hã ra tóg fi mȳ vĕnh pãte fón kãn mũ sir, Topē ti, fi tȳ iso há tãvĩ nĩn kȳ, sȳ tȳ fi fe nĩn kȳ. Ũ mȳ tóg kejĕn vĕnh pãte fón pir han tĩ, Topē ti, ũ tȳ patrão ki név(e) sĩ ěn ri ke mȳ. Kȳ ěn tóg ti to há sĩ nĩ gé sir, fi tȳ iso há tãvĩ jãvo,” he tóg. ⁴⁸Kȳ tóg fi mȳ: “ã tȳ Topē vĩ mranh ja ěn tȳ sóg vĕnh pãte fón mũ,” he mũ, Jesus ti.

⁴⁹Kȳ ti mré jĕg mũ ag tóg to jykrĕn mũ sir, ti vĩ to. Kȳ ag tóg jagnē mȳ ke mũ. “Ti hã mȳ ěg tȳ Topē vĩ mranh kȳ vĕnh pãte fón ke mũ vȳ?” he ag tóg mũ. “Topē hã ne vĕnh pãte fón há nĩ, hã kȳ tóg ěg mȳ vĕnhmȳ tĩ,” he ag tóg. ⁵⁰Hã ra Jesus tóg fi mȳ ke mãn mũ. “Ă tȳ inh ki rã kȳ sóg ã kren han mũ,” he tóg. “Ha jatun mȳ tĩg,” he tóg, Jesus ti, ùn týtá kórég ja ěn fi mȳ.

Ũn týtá fag tȳ Jesus ki rĩr

8 ¹Tag pãte Jesus vȳ cidade kar mĩ tĩg kãn mũ, ěmã kãsir mĩ ke gé. Topē vĩ tó tóg tĩ mũ. Ag mȳ tóg: “Topē tȳ tȳ ãjag pãli nĩ sór vĕ,” he mũ. Kȳ ũ tȳ 12 (ke) ag tóg ti mré mũ mũ. ²Kȳ ùn týtá fag tóg ti mré mũ mũ gé sir. Jesus tóg fag tȳ há! he ja nĩ. Ũ fag tóg kaga ja nȳtĩgtĩ, kȳ ũ fag tóg jagrĕ kórég ja nȳtĩgtĩ gé. Hã ra Jesus tóg fag tȳ hághá! he kãn ja nĩ. Ũ fi vȳ tȳ Maria fi nĩ, Madalena he mũ tag fi. Jesus vȳ fi jagrĕ kórég pan ja nĩ, ũ tȳ 7 (ke) vĕ, ha mĕ, fi jagrĕ kórég ag. ³Kar ũ fi vȳ tȳ Joana fi nĩ gé, Cuza prũ fi vĕ, pãli mág tȳ Herodes tũ vég nĩ ěn prũ fi vĕ. Kar ũ fi vȳ tȳ Suzana fi nĩ gé. Kar ũ fag vȳ ti mré mũ mũ gé, ti mȳ vĕjĕn han jé. Ājag tũ tȳ fag tóg ti mȳ vĕjĕn han tĩ, kar ti mré mũ tĩ ag mré hã.

Nén fy to comparação

(Mt 13.1-9; Mc 4.1-9)

⁴Kejĕn ùn e ag vȳ vĕnh mãn mũ sir, ěmã tȳ hĕn ri ke tá kãmũ kȳ. Jesus to ag tóg vĕnh mãn mũ. Kȳ tóg ag kanhrãnrãn kȳ ag mȳ: “ũ tȳ Topē vĩ tó tĩ vȳ ge nȳnh mũ, ha mĕ,” he mũ. ⁵“Kejĕn ũ tóg trigo fy vãvãm tĩ mũ. Ti tȳ vãvãm kȳ ti fy ũ tóg ěpry kri, ěmĩn kri vár mũ, kȳ ag tóg ti sãn mũ, kȳ sĕsĩ ag vȳ ko mũ gé sir, jĕsĩ tóg tȳ tũg! ke mũ sir. ⁶Ti fy ũ tóg pãrõ kri vár mũ. Kȳ tóg mur mũ vĕ, hã ra tóg tóg mũ sir. Ga tȳ sĩ nĩn kȳ tóg goj ve ja tũ nĩ, hã kȳ tóg tóg mũ sir. ⁷Ti fy ũ tóg sónh kãki vár mũ. Kȳ sónh tóg ti mré mur mũ, ti kri tóg rũm ke mũ sir. Kȳ tóg ter mũ sir, sónh kãki. ⁸Ti fy ũ tóg ga há kri vár mũ. Kȳ tóg mur há han mũ, kanē há ke gé. Kanē tȳ 100 (ke) han tóg mũ sir, ga há kri,” he tóg, Jesus ti. Kȳ tóg tag tó kar kȳ prĕr mũ. “!..Ũ nĩgrĕg nȳtĩ ag tȳ ki ěmĕn jé..!” he tóg, prĕr kȳ, Jesus ti.

Jesus t̄y n̄n fy to comparaçāo kāmén
(Mt 13.10-23; Mc 4.10-20)

⁹K̄y ti mré m̄ũ t̄i ag tóg ti ki jēmēg m̄ũ. “Ne to ke nē, trigo fy kāmē tag ti?” he ag tóg m̄ũ, Jesus m̄y. ¹⁰K̄y tóg ag m̄y: “ājag hā m̄y sóg Topē t̄y t̄y ěg pā'i n̄ ěn kāmén há han ke m̄ũ, ijo tó ja t̄ũ ěn ti,” he m̄ũ. “Hā ra sóg ũ ag m̄y comparaçāo tāvī han m̄ũ. Ag m̄y sóg tó há han ke t̄ũ n̄, ũ t̄y ón k̄y mēg m̄ũ ag m̄y, k̄y ag tóg ājag t̄y vėg m̄ũ ra ki kagtīg n̄ȳt̄i, ājag t̄y mēg m̄ũ ra ag tóg to jykrén t̄ũ n̄ȳt̄i, k̄y tóg ag t̄y to jykrén ke t̄ũ t̄i,” he tóg.

¹¹K̄y tóg ag m̄y kāmén m̄ũ. “Nén fy kāmē v̄y ge n̄ȳnh m̄ũ, ha mē,” he tóg. “Topē v̄i v̄y trigo fy ri ke n̄. ¹²Ū ag tóg Topē v̄i jēmēg t̄i. Jēmē kar k̄y Japo tóg ag m̄y t̄y t̄ũg! he t̄i, Topē v̄i t̄y. K̄y ag tóg sir ti ki ge t̄ũ n̄gt̄i, krenkren ke t̄ũ ag n̄gt̄i sir. K̄y tóg ěpyr̄y ěn, ěm̄in kri vār m̄ũ ěn ri ke n̄, ěn ti. ¹³Kar ũ ag tóg p̄aró kri vār m̄ũ ěn ri ke n̄ȳt̄i gé. Mēg ag tóg t̄i v̄e, Topē v̄i ti. K̄y ag tóg: “hej,” he m̄ũ. Ag m̄y tóg sér t̄i sir. Hā ra ag tóg t̄y n̄n kré jāre t̄ũ ri ke n̄ȳt̄i m̄y, ha mē. M̄ũ s̄i han ag tóg m̄ũ, Topē mré. Nén ũ jagy kutē k̄y ag tóg Topē tovānh m̄ũ sir, ag t̄y Topē v̄i mranh sór k̄y. ¹⁴Kar ti t̄y sónh kāk̄i vār m̄ũ v̄y ge n̄ȳt̄igt̄i gé. Topē v̄i mēg ag tóg t̄i gé. Hā ra ag tóg m̄ũ m̄ũ sir, ājag rānhraj̄ nón. Ón k̄y ag tóg rico n̄ȳt̄i sór m̄ũ, ājag rānhraj̄ to. Hā to ag tóg kr̄i kufy n̄ȳt̄i. Nén kar to ěn ag tóg t̄i, k̄y tag hā ne ag m̄y há t̄i! Hā k̄y ag tóg Topē v̄i to jykrén m̄an t̄ũ n̄gt̄i sir. Hā k̄y ag tóg kanē há han t̄ũ n̄ gé sir. ¹⁵Kar ga há kri vār m̄ũ v̄y ge n̄i gé. Jēmēg ag tóg t̄i gé, Topē v̄i ti. K̄y ag tóg ājag fe t̄y ti ki r̄ag m̄ũ sir, ag t̄y ti v̄i ki króm jé. K̄y ag tóg kanē há han m̄ũ sir. Komēr hā ag tóg kanē há han!, han!, he m̄ũ, ag t̄y n̄n ũ jagy vėg m̄ũ ra,” he tóg. Ti t̄y ag m̄y ěg t̄y Topē tovānh ke t̄ũ kāmén hā v̄e, Jesus ti.

Lampiāo to comparaçāo
(Mc 4.21-25)

¹⁶K̄y tóg ag m̄y: ěg t̄y lampiāo grug k̄y ěg pi(jé) k̄y krēm f̄eg t̄i,” he m̄ũ. “Ěg pi(jé) cama krēm f̄eg t̄i gé!, néj gru ti. Ti f̄eg jafā kri ěg tóg ti f̄eg t̄i. K̄y v̄enh kar tóg vėg m̄ũ sir, ag t̄y ěg ĩn k̄ara k̄agen k̄y. ¹⁷Ge ti n̄y, s̄y ājag m̄y n̄n tó m̄ũ kar ti. Ver ājag tóg to jykrén t̄ũ n̄gt̄i. Ājag t̄y vāhā to jykrén k̄an ke v̄e. Ver ājag tóg ki kagtīg n̄ȳt̄i. Ājag t̄y vāhā ki kanhrān k̄an ke v̄e,” he tóg. ¹⁸“Hā k̄y jēmē há han n̄. Ū t̄y to jykrén há han k̄y tóg ũ to jykrén m̄an!, ũ to jykrén m̄an!, henh ke m̄ũ. Ū t̄y inh v̄i to jykrén há han t̄ũ n̄n k̄y tóg ti m̄y t̄ũg! he k̄an m̄ũ, ti t̄y n̄n ũ to jykrén m̄ũ kar ěn mré hā,” he tóg. Ti t̄y ag m̄y ěg t̄y ti v̄i to jykrén há han ke kāmén hā v̄e, Jesus ti.

Jesus mré ke p̄e fag
(Mt 12.46-50; Mc 3.31-35)

¹⁹Kej̄en Jesus m̄ȳnh fi v̄y ti venh k̄at̄i m̄ũ, ti jāvy ag mré. Hā ra fag tóg ti ki junjun t̄ũ n̄. Ti p̄én̄n tóg fór tāvī t̄i, hā k̄y ag tóg ti ki junjun t̄ũ n̄, ti m̄ȳnh fi mré hā. ²⁰K̄y ũ tóg ti m̄y: “ā m̄ȳnh fi v̄y re tá jē, ā jāvy ag mré,”

he mū. “Fag tỹ ã venh kãmũ vê,” he tóg, Jesus mỹ. ²¹Hã ra Jesus tóg ti mỹ: “mê!,” he mū. “Hã ra ù tỹ Topẽ vỹ jẽmẽg mũ fag vỹ inh mỹnh pẽ ri ke nỹtĩ, inh jãvy pẽ ri ke ke gé, ù tỹ Topẽ vỹ ki króm mũ ag,” he tóg, Jesus ti.

Jesus tỹ kóho tỹ tũg' he
(Mt 8.23-27; Mc 4.35-41)

²²Kejẽn tóg canoa kãra rã mũ, ti mré mũ ti ag mré. Kỹ tóg ag mỹ: “mũ nỹ, goj nig kafã ù ra,” he mū. Kỹ ag tóg mũ mũ, canoa kãmĩ. ²³Ag mũn ki Jesus tóg nũr mũ sir. Kỹ vãhã kóho jũ tóg kraug he mũ sir. Króg ke tóg mũ sir, kóho ti. Kỹ goj tóg canoa kãki krém ke mũ. Ti fãn sór tóg mũ sir. Kỹ tóg ag mỹ ag kãgter ha mẽ tí. ²⁴Kỹ ag tóg ti rĩn mũ mũ. Ti mỹ ag tóg: “Senhor!, Senhor!,” he mū. “Ëg mỹ ãg kãgter ha mẽ tóg tí,” he ag tóg ti mỹ. Kỹ tóg rĩr mũ sir. Kỹ tóg kóho mỹ vỹ mũ, goj mỹ ke gé, goj vóg nén ãn mỹ. Kỹ tóg krỹg' he mũ sir, kóho ti. Katy' he tóg mũ sir. ²⁵Kỹ tóg ag mỹ ke mũ. “Ajag tỹ ne jé inh ki ge há han tũ nĩ nẽ?” he tóg. Kỹ ag tóg kanẽ jur nỹtĩ nĩ. Ag mỹ tóg e tí, kỹ ag tóg jagnẽ mỹ: “ti jykre tóg ãg mỹ e tí,” he mū. “Kóho mỹ tóg vỹ mũ, Kỹ tóg ki hã ke mũ, kóho ti, goj ti ke gé,” he ag tóg mũ, jagnẽ mỹ.

Jesus tỹ ùn jagrẽ kórég tỹ há! he
(Mt 8.28-34; Mc 5.1-20)

²⁶Kóho tỹ tũg' hen kỹ ag tóg Gerasa ag jamã tá junjun mũ sir. Goj nig kafã ù tá tóg nĩ, ga tỹ Galiléia to hã. ²⁷Kỹ tóg canoa kãki kãkutẽ mũ, Jesus ti. Kỹ ù tóg ti kato tẽ mũ, cidade tá ke ù, hã ra tóg jagrẽ kórég tỹ hẽn ri ke nĩ. Si há tóg tí ha, ti jagrẽ e nĩ ti. Kỹ tóg kur tũ nĩ. Kato r tóg nĩ. Ìn tũ ti nĩ gé. Vẽnh kej tá tóg jẽgtĩ, pãró tỹ vẽnẽh kej tá. ²⁸Ën tóg Jesus kato tẽ mũ. Kỹ tóg ti krẽm mũg ke mũ. Prẽr kỹ tóg: “!..ã isỹ hẽ ri kenh mũ, Jesus!..!” he mū. “!..Kynhmỹ Topẽ kósĩn!..!” he tóg. “!..Ã mỹ sóg to vĩnh mũ, ã tỹ inh vóg kónãn tũ nĩ jé..!” he tóg, prẽr kỹ, ùn jagrẽ kórég ãn ti. ²⁹Hã ra Jesus tóg Nén-Kórég mỹ: “ti ki pa jẽg,” he ja nĩ, hã kỹ tóg prẽr mũ. Ti ki vĩrĩn ke!, ti ki vĩrĩn ke! tỹ hẽn ri ke han ja ag tóg nĩgtĩ, Nén-Kórég ag. Kỹ ti mré ke ag tóg ti se ja nĩgtĩ gé, ti mrĩnh kỹ, ferro tỹ, ti nĩgé, ti pẽn ke gé. Hã ra tóg ã se ja kykym kãn ja nĩgtĩ. Kỹ Nén-Kórég ag tóg ãmã tũg ja ra ti tĩn ja nĩgtĩ. Hã kỹ tóg vẽnẽh kej mĩ tũgtĩ, ùn jagrẽ kórég ãn ti.

³⁰Kỹ Jesus tóg ti mỹ: “ã jiji hẽ ri ke tí?” he mū. Kỹ tóg: “Mil,” he mū. Nén-Kórég tỹ hẽn ri ke ag tỹ tóg jagrẽ nĩ, hã kỹ tóg: “Mil,” he mū.

³¹Kỹ ag tóg Jesus mỹ to vỹ mũ, Nén-Kórég ag, ti tỹ nũgme ra ag jẽgnẽg tũ nĩ jé, inferno ra. ³²Hã ra porco tỹ hẽn ri ke tóg tá jẽg nỹtĩ nĩ, pãnónh tá. Kỹ Nén-Kórég ag tóg Jesus mỹ to vỹ e han, ti tỹ ag mỹ: “ha porco ki ge jẽg, ge kỹ,” he jé. Kỹ tóg ag mỹ ke mũ. ³³Kỹ ag tóg ãn ki kãpa mũ sir, Nén-Kórég ag. Porco ag ki ag tóg ge mũ sir. Kỹ porco ag tóg mer ki re mũ, rãn ki, goj nig ra. Goj ki ag tóg vár mũ sir. Nãgnãr kỹ ag tóg tũ' he kãn mũ sir.

³⁴Kỹ ù tỹ porco ki rĩr tí ag tóg vэг mũ. Kỹ ag tóg pètẽ mũ, cidade ra. Tá ag tóg kãmén mũ, ãmã kãsir mĩ hã ke gé. ³⁵Kỹ tá ke ag tóg ra mũ kãn mũ, ag vỹ

mêg mũ ag. Ag tỹ nén ên ve sór vê. Ra mũ kỹ ag tóg Jesus tá junjun mũ. Kỹ ag tóg ti vég mũ sir, ùn jagrê kórég ja ti. Nĩ tóg mũ ha, Jesus rã hã. Kur tóg nĩ ha, kri há tóg nĩ ha. Kỹ ag fe tóg jürün ke mũ sir. ³⁶Û tỹ Jesus tỹ ti tỹ há! he mũ vég mũ ên ag tóg kãmén kãn mũ sir, ù tỹ ùri ti venh kãmũ mũ ên ag mỹ. Ûn jagrê kórég tó ag tóg mũ, ag mỹ, Jesus tỹ ti han ja ti, porco kãgter ja ti ke gé. ³⁷Kỹ tá ke ag tóg ti mỹ to ví mũ, Jesus mỹ, ti tỹ tá kãkutê jé. Gerasa tá ke kar ag tóg kanê jur nỹti, hã kỹ ag tóg ti mỹ: “ã tĩg kỹ tóg êg mỹ há tĩnh mũ,” he mũ. Kỹ tóg canoa kãra rã kỹ tĩg sór mũ, ti mré mũ ti ag mré. ³⁸Kỹ ùn jagrê kórég ja tóg ti mỹ to ví e han mũ, “nhỹ ã mré tĩg mũ,” hen kỹ, Jesus mỹ. Hã ra Jesus tóg ti père tĩg jãvãnh nĩ. ³⁹“Ã jamã ra vỹn ké,” he tóg ti mỹ. “Tã ag mỹ kãmén nĩ, Topê tỹ ã tỹ há! he ja tag ti,” he tóg, Jesus ti. Kỹ tóg ti mũ sir, ùn jagrê kórég ja ti. Cidade kar mũ tóg ti mũ. Ag mỹ tóg kãmén mũ sir, Jesus tỹ ti tỹ há! he ja ên ti.

Jesus tỹ Jairo kósín fi rĩn mãn

(Mt 9.18-26; Mc 5.21-43)

⁴⁰Kỹ Jesus tóg vỹn ke mũ, nig kafã ù ra. Kỹ tóg vènh e ên mỹ sér ti, ag tỹ ti ven kỹ. Ti jãvãnh ja ag tóg nĩ, hã kỹ tóg ag mỹ sér ti, ag tỹ ti ven kỹ. ⁴¹Kỹ vãhã ù tóg ti ki jun mũ, Jesus ki. Israel ag vènh kanhrãn jafã to pã'i vê, ti jyjyn hã vỹ: Jairo, he mũ. Ên tóg Jesus krêm mũg ke mũ, ã jakrĩ tỹ tóg jê mũ, kỹ tóg ti mỹ ví mũ, ti tỹ ti ìn ra tĩg jé, Jesus ti. ⁴²Ti kósín pir fi vỹ kaga tãvi nỹ, kỹ fi kaga tãvi ên vỹ fi tén sór mũ. Kri prỹg tỹ 12 (ke) fi nĩ, Jairo kósín pir ên fi. Kỹ tóg ti mré ti mũ, Jesus ti.

Ti tĩg kỹ ùn e ag tóg ti nón mũ mũ. ⁴³Kỹ ag kã ù fi tóg ag pètêm mũ. Kyvènh krỹg tũ han kỹ fi tóg nĩ, prỹg tỹ 12 (ke) ki. Hã ra ag tóg fi kaga tỹ hê ri ke ja tũ nĩ, ag tỹ fi kygtãg mũ ra, mé dico ag. ⁴⁴Ên fi tóg ti nón ti kur mráj vóg mũ. Kỹ vèsỹmér fi kyvènh tóg tũ! he mũ. ⁴⁵Kỹ Jesus tóg: “ũ nỹ inh kur vóg?” he mũ. Hã ra vènh kar tóg: “inh hã tũ vê, inh hã tũ vê,” he mũ. Kỹ Pedro tóg ti mỹ ví mũ, Jesus mré mũ ti ag kar ke gé. Ti mỹ ag tóg: “ã kur mē kãn êg tóg, hã ra ã tóg: “ũ nỹ inh kur vóg?” he mũ,” he tóg, Pedro ti, Jesus mỹ. ⁴⁶Hã ra Jesus tóg: “vó,” he mũ. “Û tóg inh kur vóg,” he tóg. “Inh kuprĩg tóg inh ki kãtère, hã kỹ sóg ki kanhrãn mũ,” he tóg. ⁴⁷Kỹ ùn tỹtã ên fi tóg to jykrén mũ sir. “Ti hỹn tóg inh vé,” he fi tóg. Hã kỹ fi tóg jürün ke kỹ kãti mũ. Jesus krêm fi tóg mũg ke mũ. Kỹ fi tóg ti mỹ tó kãn mũ, vènh kar rĩnve. Ti mỹ fi tóg ã kaga ja ên kãmén kãn mũ, fi tỹ ti kur vóg ja ên ti ke gé, fi tỹ há! he ja ti ke gé. “Isỹ ã kur vóg kỹ sóg vèsỹmér há! hé,” he fi tóg, Jesus mỹ. ⁴⁸Kỹ tóg fi mỹ ví há han mũ, Jesus ti. “Inh kósín!,” he tóg. “Ã tỹ inh ki rã kỹ ã tóg há! hé. Ha tĩg, jatun mỹ. Há ã tóg nĩ ha,” he tóg fi mỹ, fi han kar kỹ, Jesus ti.

⁴⁹Ti tỹ ver fi mré vémén jê ra ù tóg jun mũ, pã'i tỹ Jairo ên ìn tá. “Ã kósín fi hur ter,” he tóg, pã'i mỹ. “Tũg ja fi tóg nĩ ha,” he tóg, Jairon mỹ. “Hã kỹ ti mỹ: kunĩg, he mãn tũg nĩ, ti kutãn mãn tũg nĩ,” he tóg.

⁵⁰Hã ra Jesus tóg mêg mũ, kỹ tóg ti mỹ: “mũmêg tũg nĩ,” he mũ. “Inh ví hã kri fimnĩ, kỹ ã kósín fi tóg há! henh mũ,” he tóg. ⁵¹Kỹ ag tóg mũ kỹ ti ìn tá

junjun mũ sir, Jairo ãn tá. Kÿ Jesus tóg ag tÿ ãn kãra ge kamêg mũ. “Pedro vÿ ãn ra rãnh mũ, inh mré, João ke gé, João kãke tÿ Tiago ke gé, gÿr fi panh ke gé, fi mÿnh fi ke gé,” he tóg, Jesus ti. ⁵²Hã ra ãn e fag vÿ tá nÿtÿ nÿ gé, kygfÿ fag nÿtÿ nÿ, vêsÿrénh kÿ, Kÿ Jesus tóg fag mÿ: “kygfÿ tÿg ra,” he mũ. “Fi pi(jé) ter mũ! Fi nÿr vê,” he tóg. ⁵³Hã ra fag tóg ti nyg mũ. Fi ter ki kanhró fag tóg nÿtÿ, hã kÿ fag tóg ti nyg mũ. Hã ra Jesus tóg fag mÿ: “ha mũjêg,” he mũ.

⁵⁴Fag mũn kar kÿ Jesus tóg fi nÿgé kãgmÿg mũ, kÿ tóg prêr mũ sir. “!..Nÿ ra, já..!” he tóg, jamã hár(a). ⁵⁵Kÿ fi kuprÿg tóg fi to vÿn ke mũ. Nÿ fi tóg mũ sir, mÿr, ha mē, ãn ter mũ ên fi. Kÿ Jesus tóg fag mÿ tó mũ, fag tÿ fi mÿ vjênh ven jé. ⁵⁶Kÿ tóg fi han mũ fag mÿ e tãvÿ tÿ sir. Hã ra Jesus tóg fag mÿ tó mũ, fag tÿ ã mÿ tó tÿg jé, fi rÿr mãn ja tag ti. Hã ra tóg fi ter mũ ra fi rÿn, Jesus ti.

Jesus tÿ ã mré mũ tÿ ag jêgnê

(Mt 10.5-15; Mc 6.7-13)

9 ¹Kÿ Jesus tóg ã tÿ 12 (ke) ag jé prêr mũ, ti tÿ ãn vin mũ ên ag, ag vjênh mãn jé. Ag vjênh mãn kÿ tóg ag tar han mũ sir, ag tÿ vjênh jagrê kórêg pan jé, ag tÿ ãn kagyga ag tÿ há! he jé gé. ²Kÿ tóg ag jêgnêg mũ sir, ag tÿ Topê tÿ tÿ êg pã'i nÿ ên kãmén jé, vjênh kar mÿ, ag tÿ ãn kagyga ag tÿ há! he kãn jé gé. ³Hã kÿ tóg ag mÿ ke mũ sir. “Ãjag mũn kÿ nén ã ma mũ tÿg nÿ, vátó va mũ tÿg nÿ, sacon ke gé, bolsa ên, pão ke gé, jãnkamy ke gé. Kur régre rÿnh tÿg nÿ gé,” he tóg. ⁴“Ãjag tÿ ãn ra ge mũ hã ki nÿgnÿr! hemnÿ, hã ki ãjag tÿ kurã ki kãpanh ke tá krÿg nÿ,” he tóg. ⁵“Ag tÿ ãjag mÿ: “kãge jêg ra,” he jãvãnh nÿn kÿ tá kãpamnÿ. Tá kãpa kÿ ãjag pên hã kykÿnhkÿnh nÿ, ag tÿ to ki kanhró nÿtÿ jé sir, Topê tÿ ag tovãnh ken ki,” he tóg, Jesus ti.

⁶Ti tÿ ag jêgnên kÿ ag tóg mũ sir, ã tÿ 12 (ke) ag. Êmã kar mÿ ag tóg mũ sir. Topê kãmén ag tóg mũ mũ sir. ãn kagyga ag tÿ há! he kãn ag tóg mũ gé sir, fag ke gé.

Jesus kãme tÿ pã'i tÿ Herodes mÿ e

(Mt 14.1-12; Mc 6.14-29)

⁷Kÿ pã'i mág tÿ governador tÿ Herodes vÿ mēg mũ sir, Jesus tÿ nén han mũ ti. Kÿ tóg ti mÿ e tÿ. Kÿ ti tÿ ne to jykrén ke tóg tÿ tÿ. Hã ra ã ag tóg Jesus to: “João Batista vê,” he tÿ. “João hÿn tóg ã ter kÿ rÿr mãn,” he ag tóg tÿ, Jesus to. ⁸Jo ã ag tóg ti to: “Elias vê,” he tÿ gé. “Ti hÿn vjênh ven mãn, vãsÿ Topê vÿ tó tÿ ên, Elias ti,” he ag tóg tÿ gé, Jesus to. Kÿ ã ag tóg ti to: “vãsÿ Topê vÿ tó tÿ ã hÿn rÿr mãn,” he tÿ gé. ⁹Hã jêmê tóg, Herodes ti, kÿ tóg to jykrén kÿ: “João mÿ vó?” he mũ, Jesus to. “Hã ra sóg João krÿ kym, kÿ tóg tÿ! he mũ. Kÿ ã nê, hÿn!” he tóg. “Nén han vãnh tÿ hên ri ke hÿn han tóg huri. ã nê, hÿn!” he tóg. Herodes ti. Kÿ tóg kejên ti ve sór mũ, ti tÿ ti mÿ e tÿn kÿ, hã ra Jesus vÿ ti venh tÿ tÿ nÿ.

Jesus tÿ ù tÿ 5 mil (ke) ag jën
(Mt 14.13-21; Mc 6.30-44; Jo 6.1-14)

¹⁰Kejën Jesus tÿ ùn vïn mÛ ag vÿ Jesus to vÿnvÿn ke mÛ, ti tÿ ag jëgnë ja ën tá. Ti mÿ ag tóg kámén mÛ sir, ag tÿ nén han ja ën kar ti. Kÿ tóg ag mré vënh péju kÿ tí mÛ, ëmã tÿ Betsaida ra, vyr mÿ ag mré vëmén jé. ¹¹Hã ra ùn e ën ag tóg mëg mÛ, Jesus tÿg ti, kÿ ag tóg ti nón mÛ mÛ. Ag tÿ ti pétëm kÿ tóg ag mÿ ví há han mÛ, Jesus ti. Ag mÿ tóg kámén mÛ, Topë tÿ tÿ ëg pã'i nĩ sór ti. Ag kãmĩ ùn kagyga tÿ há! he tóg mÛ gé, fag mré há.

¹²Ti tÿ ag mÿ tó jë ki tóg rãké nÿ sir, kÿ ù tÿ 12 (ke) ag tóg Jesus to kãmÛ mÛ. Ti mÿ ag tóg: “ã tÿ ag jëgnënh há tóg tí,” he mÛ, “ag tÿ ëmã kar mĩ mÛ jé, pão comprar he jé, tá nÿgnÿr jé ke gé. Tag ki tóg ëmã tú nĩ,” he ag tóg, Jesus mÿ. ¹³Hã ra Jesus tóg ag mÿ: “vó,” he mÛ. “Ha inhhã ag jën,” he tóg. Kÿ ag tóg ti mÿ: “há ra vëjën tóg ëg mÿ tú tí,” he mÛ. “Pão tÿ 5 (ke) há vÿ ki nÿtĩ, pirã régre mré ke gé. Ëg mÿ ag jo comprar henh mÛ vÿ, vëjën ti?” he ag tóg, Jesus mÿ. ¹⁴Û tÿ mil tÿ 5 (ke) ag vë, ag tävĩ, fag mré tó tú ra. Hã ra fag tóg tá e nÿtĩ gé, gĩr mré ke gé.

Ag tÿ ti mÿ ke kÿ Jesus tóg ã mré mÛ tí ag mÿ: “ag mÿ tugtó, ag nĩgnĩ jé,” he mÛ, “ag tÿ vënh nĩkrén jé, ù tÿ 50 (ke) pãte ù tÿ 50 (ke) ù pãte nĩgnĩ jé,” he tóg, Jesus ti, ã mré mÛ tí ag mÿ. ¹⁵Kÿ ag tóg ke mÛ sir. Kÿ vënh kar tóg nĩgnĩ mÛ sir. ¹⁶Kÿ tóg pão tÿ 5 (ke) in gég mÛ, pirã régre ën mré. Kÿ tóg kanhkã ki ëvãnh mÛ, kÿ tóg Topë mré ví mÛ sir. Kÿ tóg pão vënh kãpópãm mÛ sir. Kÿ tóg ã mré mÛ tí ag mÿ vïn mÛ, ag tÿ ùn e ën mÿ vënh kãpópãm jé, pirã ën mré há. ¹⁷Kÿ vënh kar tóg ko kãn kÿ funfór mÛ sir. Kÿ ag tóg ti ke ën gég mÛ. Këj tÿ 12 (ke) fãn tóg, vëjën mru ën ti. Hã kÿ Jesus tóg pão tÿ 5 (ke) tÿ ùn e ag fónfãn ja nĩgtĩ.

Pedro tÿ Jesus tó
(Mt 16.13-19; Mc 8.27-29)

¹⁸Kejën Jesus tóg Topë mré ví mÛ, ã pin kÿ. Hã ra ti mré mÛ tí ag tóg ti mré nÿtĩ nĩ. Kÿ tóg ag mÿ ke mÛ. “Ag iso hë ri ke tí?” he tóg ag mÿ, Jesus ti. ¹⁹Kÿ ag tóg ti mÿ: “ù ag vÿ: João Batista vë, he tí, jãvo ù ag vÿ: Elias vë, he tí gé, jãvo ù ag vÿ: vãsÿ Topë ví tó tí ù vÿ rĩr mãn, he tí gé, ã to,” he ag tóg, Jesus mÿ. ²⁰Kÿ tóg ag mÿ: “ag jãvo ãjag hë ri ke tí, iso?” he mÛ. Kÿ Pedro vÿ ti mÿ kámén mÛ. “Tÿ ã Cristo nĩ, Topë tÿ ëg mÿ ùn jënëg mÛ ën vÿ tÿ ã nĩ,” he tóg, Pedro ti, Jesus mÿ. ²¹Kÿ tóg ti mÿ ví tar han mÛ, Jesus ti, ag tÿ ù mÿ tó tú nĩ jé ver, ti tÿ tÿ Cristo nĩ ën.

Jesus tÿ ã jagtar ke tó vén
(Mt 16.20-28; Mc 8.30-9.1)

²²Kÿ tóg ag mÿ kámén mÛ. “Tÿ sóg ëprã ke fi kósin ën nĩ,” he tóg. “Ijagtar jagy han ke vë,” he tóg. “Kófa ag tÿ iso: kórég ti nĩ, henh ke vë,

Topê tũ ki rĩr tĩ to pã'i ag ke gé, Topê vĩ to professor ag ke gé. Ag tỹ isén ke vê. Kurã tágtũ tũg mũ ra sóg rĩr mãn mũ hã ra," he tóg, Jesus ti.

²³Kỹ Jesus tóg vènh kar mỹ tó mũ. "Ajag tỹ inh mré kãmũ kỹ tóg há tĩnh mũ," he tóg. "Kỹ ajag jykre tovãnh nĩ, ajag tỹ isũ távĩ han jé. Ha vé, ag tỹ inh cruz tỹ inh kri fi kỹ sóg tĩg ke mũ, ag tỹ to isa kỹ isén jé, ha vemnĩ. Vènh nenh ke tũ sóg nĩ. Isỹ tag han ri ke han nĩ, kurã kar ki, ajag tỹ inh mré mũ sór nỹtĩn kỹ," he tóg. ²⁴"Ajag tỹ ajag jykre hã han sór kỹ ajag tỹ nũgme ki vár ke vê. Jãvo ajag tỹ isugrĩn ajag jykre tovãnh kỹ ajag krenkren ke vê, ajag kãgter ke mũ (hã) ra. ²⁵Ajag tỹ ga kri mũn kỹ ajag tóg nén kar ganhar he sór mũ. Kỹ ajag kuprĩg vỹ vãfor ke mũ. Kỹ tóg kórég nỹ sir, ajag rico távĩ nỹtĩ ra. Ganho há venh ke tũ ajag tóg ke mũ, gen kỹ. ²⁶Iso mỹ'ãg tũg nĩ, inh vĩ to. Ajag tỹ ùri iso mỹ'ãg kỹ sóg ajag to mỹ'ãg ke mũ gé, inh kãtĩg mãn ken kỹ. Tỹ sóg êprã ke fi kósin ên nĩ. Sĩnvĩ ti nĩnh mũ, inh kãtĩg mãn kỹ, inh jóg tỹ inh jẽnên kỹ, ti tỹ isỹ ùn mág han kỹ. Kỹ ti tỹ jègnè jafã ag vỹ inh mré kãmũnh mũ gé, Topê tũ ag. Ên kã sóg ajag to mỹ'ãg ke mũ, ajag tỹ ùri iso mỹ'ãg kỹ," he tóg. ²⁷"Ki hã sóg tó mũ, ha mẽ. Ajag kãmĩ ù ag vỹ Topê tỹ tỹ êg pã'i nĩ venh ke mũ, ag ter ke to hã, tag ki êg mré nỹtĩ ù ag," he tóg, Jesus ti.

Jesus tỹ vènh ven ù han

(Mt 17.1-13; Mc 9.2-8)

²⁸Jesus tỹ tag tó kar kỹ kurã tỹ 8 (ke) vỹ tũg mũ. Kỹ tóg kejèn ag mỹ: "mũ nỹ, vỹrmỹ," he mũ. Pedro mỹ tóg ke mũ, João mỹ ke gé, Tiago mỹ ke gé. Ag hã mré tóg tĩ mũ, pãnónh ra, Topê mré vèmén jé. ²⁹Tã jun kỹ tóg Topê mré vĩ mũ sir. Kỹ tóg vãhã vènh ven ù han mũ, vènh ven kupri han tóg mũ. Ti kur tóg kópréj nĩ, kókov tóg nĩ, ti kur ên ti. ³⁰Kỹ ùn régre ag tóg vãhã tá vènh ven mũ sir. Kỹ ag tóg Jesus mré vèmén mũ sir. Moisés vê, Elias mré hã, ùn régre ên ag. ³¹Ag ve vỹ ti ve ri ke nĩ gé, Moisés mré Elias ti. Jesus mré ag tóg vèmén mũ, ti ter ken kãmén ag tóg mũ sir, ti tỹ Jerusalém tá ter ke mũ ên ti.

³²Pedro ag mỹ tóg nũr há távĩ tĩ, ge ra ag tóg ag vég mũ sir, ag mỹ nũgnũr há (hã) ra. Hã kỹ ag tóg Jesus tỹ ag mỹ vènh ven ù han mũ ên vég mũ sir, ti kókov ên ti, ti mré vèmén mũ ag ke gé. ³³Kỹ ù tỹ Jesus mré vèmén kỹ nỹtĩ ag tóg mũ sór mũ sir. Kỹ Pedro tóg Jesus mỹ: "Senhor!," he mũ. "Tag ki tóg há nĩ," he tóg. "Êg tỹ tag ki pãjó tágtũ han kỹn hỹn há nĩnh mũ, ã mỹ, Moisés mỹ, Elias mỹ ke gé," he tóg, Pedro ti. Hã ra tóg krĩ tũ nĩ, hã kỹ tóg pãjó tó mũ.

³⁴Pedro tỹ ver ti mỹ vèmén kỹ kanhkã góg vỹ ag kri rũm ke mũ sir. Kỹ ag tóg kamègmèg mũ, kanhkã góg ên ti. ³⁵Kỹ vènh vĩ tóg mẽ há! he mũ, kanhkã góg ên kãtã, kỹ tóg: "inh kósin hã vê," he mũ. "Inh fe pẽ hã vê," he tóg. "Ti vỹ jèmẽ ra," he tóg, vènh vĩ ti, Topê ti.

³⁶Ag tỹ tag mẽ kar kỹ Jesus tóg ã pir mỹ tá jẽ nĩ sir. Ti mré vèmén ja ên ag ve mãn tũ ag tóg nĩ sir, Pedro ag. Kỹ ag tóg mũ mũ. Hã ra ag tóg ù mỹ tó tũ nĩ ver, ag tỹ nén ve ja ti. Tỹ vèmén tũ ag tóg nĩ ver, ag tỹ kanhkã tá vènh jykre ve ja ên ti.

Jesus tÿ kyrÿ jagrê kórég kutêm

(Mt 17.14-21; Mc 9.14-29)

³⁷Tÿ vaj kÿ ag tóg pãónh ên tá kãre mũ, Jesus mré. Kÿ ag tóg ù tÿ hên ri ke ag vigvég mũ sir. Jesus kato ag tóg kãmũ mũ. ³⁸Kÿ vãhã ù tóg ag kãmĩ prêr mũ, ha mẽ. “!..Senhor..!” he tóg. “!..Inh kósín ve ra..! Inh kósín pir vē. ³⁹Jagrê kórég ti nĩ, ha mẽ. Kÿ tóg kejên ti kã vryrn ke tĩ, kÿ tóg prêr tĩ, kÿ tóg ti ter tĩ han tĩ gé, kÿ tóg jãrãn mũ. Jãrãn kÿ tóg jÿrũn! jÿrũn! ke tĩ gé, kÿ tóg kejên ti tovãnh mũ sir, komêr hã, ti rÿj kar kÿ. ⁴⁰Ã mré mũ tĩ ag mÿ sóg to vĩ mũ vē, ag tÿ ti jagrê kórég tag kutêm jé, hã ra ag tóg ti tÿ hê ri ke tú nĩ,” he tóg, ti panh ti, Jesus mÿ.

⁴¹Kÿ Jesus tóg ti mÿ: “ãjag ne tóg inh ki ge há han tú nĩgtĩ,” he mũ. “Jykre pãno ãjag nÿtĩ,” he tóg. “Kysã tÿ hên ri ke ki inh hÿn ãjag mré tĩ nĩ? Kysã tÿ hên ri ke ki inh hÿn ãjag to fe tÿg nĩ?” he tóg. “Inh mÿ ti pére kãtÿg nĩ,” he tóg, Jesus ti, ti panh mÿ. ⁴²Kÿ ag tóg ti pére kãmũ mũ. Ti jun kÿ ti jagrê tóg ti kã vryrn ke mũ. Ti tÿ jÿrũn!, jÿrũn! ke han tóg mũ sir. Kÿ Jesus tóg ti jagrê mÿ vĩ jũ han mũ, ti tÿ ti ki kãkutê jé. Hã ki tóg kyrÿ ên tÿ há! he mũ sir. Kÿ tóg ti panh mÿ: “té,” he mũ sir.

⁴³Kÿ tóg vênh kar mÿ e tãvĩ tĩ. “Topê ne tóg tÿ ùn mág tãvĩ nĩ!, ti jykre tóg há tãvĩ nĩ,” he ag tóg mũ sir, ag tÿ Jesus tÿ nén han mũ to jykrén kÿ.

Jesus tÿ ã jagtar ke tó mãn

(Mt 17.22-23; Mc 9.30-32)

Kÿ Jesus tóg ã mré mũ tĩ ag mÿ: ⁴⁴“ha mẽ há han,” he mũ. “Ëprã ke fi kósín ên vÿ jagtar nĩnh ke mũ. Inh hã vē,” he tóg. “Ëprã ke ag vÿ ãjag tÿ inh ki nén han sór mũ ên han ke mũ,” he tóg, Jesus ti. ⁴⁵Hã ra tóg ag tÿ ti tÿ ã ter ke kãmén tag to jykrén tú nĩgtĩ. Ag tÿ to jykrén mũ ra ag tóg ki kagtÿg nÿtĩ. Kÿ ag tóg ãjag tÿ ti ki jêmê sór mũ ra ti kamêg mũ gé, hã kÿ ag tóg ti mÿ: “ã tÿ ne tó nê?” he tú nĩ, Jesus mÿ.

Ûn mág

(Mt 18.1-5; Mc 9.33-37)

⁴⁶Kejên Jesus mré mũ ag vÿ jagnê mÿ vĩ jũ han mũ. “Ëg kã ù tÿ hê nÿ jagnê kãfór nĩ?” he ag tóg jagnê mÿ. Tag to ag tóg jagnê mÿ vĩ jũ han mũ. ⁴⁷Hã ra Jesus tóg vég mũ, ag tÿ nén to jykrén mũ ti. Kÿ tóg gĩr jé prêr mũ, ti tÿ ti mré jê jé. ⁴⁸Kÿ tóg ag mÿ tag tó mũ, ha mẽ. “Gĩr tÿ ge jê'ÿn nĩ, ti to há nÿtĩmnĩ, isugnĩn,” he tóg. “Ãjag tÿ isugrĩn ti to há nÿtĩn kÿ ãjag tóg iso há nÿtĩ gé sir. ãjag tÿ iso há nÿtĩn kÿ ãjag tóg ù tÿ inh jênêg mũ to há nÿtĩ gé sir. Kÿ ãjag tÿ êgno kar vÿ tÿ ãjag mág kãfór kar nĩnh mũ, ha mẽ, ãjag tÿ tÿ ùn mág nÿtĩ sór kÿ. Tag to jykrén nĩ,” he tóg, Jesus ti, ag mÿ.

Ũ tỹ ěg kato tẽ tũ ag
(Mc 9.38-40)

⁴⁹Kỹ João tóg Jesus mỹ: “Senhor!” he mũ. “Ũ ve ěg tóg vẽnĥ jagrẽ pan tĩ, ã jiji tó kỹ, ěg tỹ ùn vég mũ ěn ti,” he tóg, Jesus mỹ. “Hã ra tóg ěg mré tĩ tũ nĩgtĩ, hã kỹ ěg tóg ti mỹ: “vẽnĥ jagrẽ kórég pan sór tũg nĩ,” hé,” he tóg, João ti, Jesus mỹ. ⁵⁰Kỹ Jesus tóg ti mỹ: “ũ mỹ: “vẽnĥ jagrẽ kórég pan tũg nĩ,” he tũg nĩ,” he mũ. “Ũ tỹ ěg kato tẽ tũ nĩn kỹ ěg mré ke vẽ sir,” he tóg, Jesus ti, João mỹ.

Samaria tá ke ag tỹ Jesus mỹ: “kārā ra,” he sór tũ

⁵¹Kejĥn Jesus ter ke kurā tóg kakó nĩ sir. Kỹ tóg to jykrén kỹ Jerusalém ra tĩg sór mũ, ag tỹ tá ti tén jé. Kỹ tóg tĩg kỹ ù ag jẽgnẽg mũ, vẽnĥ jo, ag tỹ ti jun ke tó jé, cidade kāsir tá. ⁵²Kỹ ag tóg mũ mũ, ag tỹ tón jé. Kỹ ag tóg cidade sĩ ù ki jun mũ. Samaria tá ke ag jamā ù vẽ. Tá ag tóg ti nũr ke ve sór mũ. ⁵³Hã ra tá ke ag tóg ag mỹ nenh mũ. Ag mỹ ag tóg: “ãjag tỹ hẽ ra mũ nẽ?” he mũ. Kỹ ag tóg: “Jerusalém ra,” he mũ. Kỹ tóg ag mỹ kórég nĩ, hã kỹ ag tóg ag mỹ cama ven sór tũ nĩ. ⁵⁴Kỹ Tiago tóg jũ mũ, João ke gé, Jesus mré mũ tĩ ag. Kỹ ag tóg Jesus mỹ: “Senhor!” he mũ. “Ěg mỹ tóg há nỹnh mũ, ěg tỹ Topẽ mỹ: “kanhkã tá pĩ tỹ ag pũn nĩ,” hen kỹ. Mỹ ã mỹ há nỹnh mũ?” he ag tóg. “Ěg tỹ Elias tỹ nẽn han ja ěn han há tóg tĩ,” he ag tóg, Jesus mỹ. ⁵⁵Hã ra Jesus tóg ag jé vĩrĩn ke kỹ ag mỹ: “vĩ tũg ra,” he mũ. “Topẽ jykre pijé!, ãjag tỹ nẽn han sór mũ tag ti. Inh pi(jé) ag tũg sór mũ!. Isỹ ag kren han sór vẽ jãvo, hã jé sóg kãtĩ mũ, inh, hã vỹ: tỹ sóg ěprã ke fi kósĩn ěn nĩ, he mũ,” he tóg, Jesus ti, ag mỹ. ⁵⁶Kỹ ag tóg cidade ù ra mũ mũ, tá nũgnũr jé sir.

Ěg tỹ Jesus mré mũnh ke
(Mt 8.18-22)

⁵⁷Ag mũn kỹ ù tóg Jesus mỹ: “sỹ ã mré tĩg há tóg tĩ,” he mũ. “Ã tỹ hẽn ra tĩg kỹ sóg ã mré tĩg ke mũ,” he tóg. ⁵⁸Kỹ Jesus tóg ti mỹ: “hã ra tóg jagy tĩ,” he mũ. “Ĩn tũ sóg nĩ. Mĩg vỹ kré nỹtĩgtĩ, jẽsĩ vỹ jagfe nỹtĩgtĩ gé, ag jãvo isỹ hẽ tá nũr ke tóg tũ tĩ. Tỹ sóg ěprã ke fi kósĩn ěn nĩ,” he tóg, Jesus ti.

⁵⁹Kỹ Jesus tóg kejĥn ù mỹ: “mũ nỹ, inh mré,” he mũ. Hã ra tóg ti mỹ: “inh hỹn ver tĩg mũ ha, sỹ inh panh ter kỹ ga ki ti fón jé ver,” he mũ.

⁶⁰Hã ra Jesus tóg ti mỹ: “vó,” he mũ. “Inh ki ge tũ ag vỹ ã panh kej han mũnh mũ. Ã tỹ inhhã inh mré tĩg há tóg tĩ, ã tỹ Topẽ tỹ tỹ ěg pã'i nĩnh ke ěn kãmén jé,” he tóg ti mỹ, Jesus ti.

⁶¹Kỹ ù tóg ti mỹ ke mũ gé sir, Jesus mỹ. “Sỹ ã mré tĩg há tóg tĩ,” he tóg. “Hã ra sóg inh jamã ra tĩg sór mũ ver, sỹ inh mré ke fag mỹ isĩg ke tó jé,” he tóg, Jesus mỹ. ⁶²Kỹ Jesus tóg ti mỹ: “vó,” he mũ gé. “Ěg tỹ arado tỹ ga kũm kỹ ěg pi(jé) vỹsyãm ěvãnh tĩ!” he tóg. “Ge ti nĩ, ã tỹ inh mré tĩg sór kỹ. Inh mré ã tóg tĩg mũ. Ã tỹ ã tũ han sór tĩn kỹ ã tóg Topẽ tỹ tỹ ěg pã'i nĩ tá krỹg ke tũ nĩ,” he tóg, Jesus ti, ù tỹ ti mré tĩg sór mũ mỹ.

Ū tỹ 70 (ke) ag tỹ Jesus vĩ kāmén mũ

10 ¹Kỹ Jesus tóg ũ ag vin mũ gé sir, ũ tỹ 70 (ke) ag. Kỹ tóg ag jëgnëg mũ sir, ag tỹ ti jo mũ jé. Ūn régre tĩn', ũn régre tĩn' he tóg. Ag mỹ tóg ke mũ, ag tỹ êmã kar mĩ Topê kāmén mũn jé, cidade kar mĩ ke gé. Ag nón tóg ra tĩg sór mũ gé, Jesus ti. ²Kỹ tóg ag mỹ: “inh mỹ ag tóg êkré ri ke nỹtĩ, ãjag tỹ ũn mỹ tónh ke mũ ag,” he mũ. “Kejën êg jakré tóg éhé nỹgtĩ, hã ra ag pipir nỹtĩ, ũ tỹ krenh ke mũ ag. Kỹ ag tóg ãjag tỹ krég mũ (hã) ra kre kãn tũ nĩgtĩ sir. Ge ti nĩgtĩ, inh vĩ ti. Ūn e ag tóg inh ki ge sór mũ nĩ, hã ra ũ tỹ ag mỹ tónh ke tóg tũ tĩ,” he tóg. “Hã kỹ Topê mré vĩmnĩ, ti tỹ ũ ag jëgnën jé, ag tỹ ag mỹ tugtón jé, ti vĩ ti,” he tóg, Jesus ti, ã mré mũ tĩ ag mỹ.

³“Ha mũjég. Ha vé, carneiro krê vỹ vënh jy nĩgãn ki kagtĩg nỹtĩ, mĩg tỹ ag mãn sór kỹ. Mé krê ên ri ke ãjag nỹtĩ, hã ra sóg ãjag jëgnëg mũ, kỹ Topê vỹ ãjag jy nĩgãn mũ,” he tóg. ⁴“Kỹ ãjag mũn kỹ saco ma mũ tũg nĩ, bolso ên, jãnkamy tũ ke gé, pën né vënh kafã gé(g) mũ tũg nĩ gé, pën to ró ên. Kỹ ãjag tỹ ũ ven kỹ ti mỹ: “ã mỹ há?” he tũg nĩ gé. Jatun mỹ mũmnĩ,” he tóg.

⁵“Kejën ãjag tóg êmã ũ tá junjun ke mũ. Kỹ ãjag tỹ ĩn ũ ra ge kỹ tá ke fag mỹ: “Topê jé ãjag ki rĩr, kỹ ãjag jé jatun mỹ nỹtĩ nĩ,” hemnĩ fag mỹ,” he tóg, Jesus ti, ag mỹ. ⁶“Kỹ tá ke ũ tỹ inh ki rã kỹ tóg jatu' he mũ sir, ti tỹ tỹ Topê kósĩn nĩn kỹ. Tá ke ũ tỹ inh ki rã jãvãnh nĩn kỹ tóg jatu' he tũ nĩ sir. Ti jãvo ãjag tóg jatu' he mũ sir inhhã.

⁷Īn ên krêm nũgnũrmnĩ, ãjag tỹ kãra ge ja ên krêm. Fag tỹ ãjag mỹ nén nĩm mũ ên komnĩ gé. Ūn rãnrãj han mũ ên tóg ti kaja venh ke mũ, ti rãnrãj kaja ti, hã kỹ ag tóg ãjag jën ke mũ sir, vënh kaja jé. Īn ũ kãra ge tũg nĩ, êmã ên tá. ⁸Ãjag tỹ êmã ũ tá junjun kỹ ĩn pir krêm nỹtĩmnĩ, tá ke ag tỹ ãjag mỹ: “kãge ra,” hen kỹ. Ag vëjën hã komnĩ. ⁹Ūn kagyga ag tỹ há' hemnĩ. Ag mỹ: “Topê vỹ tỹ ãjag pã'ĩ nĩnh mũ, ũn ri,” hemnĩ.

¹⁰Kejën êmã ũ tá ke ag tóg ãjag mỹ: “kãge ra,” he jãvãnh nỹtĩnh mũ. Kỹ êmã ên fin rãm kỹ ag mỹ tag tómnĩ, ha mē: ¹¹“ha vé, êg pën nug hã kykũnh êg tóg mũ, ãjag tỹ êg kavënh tũ nĩ jé,” hemnĩ. “Ge ra êg tóg ãjag mỹ tó mũ, êg tỹ ãjag mỹ nén tónh kãmũ jan ki, hã vỹ: “Topê vỹ tỹ êg pã'ĩ nĩnh mũ, ũn ri,” he mũ,” hemnĩ ag mỹ,” he tóg, Jesus ti. ¹²“Ha mē, kurã tỹ êgno ki ag tóg vësýrënh ke mũ, ag tỹ ãjag vĩ mē jãvãnh kỹ. Cidade tỹ Sodoma tá ke ag vësýrënh kãfór han jé ag tóg ke mũ, kurã ên kã, ha vemnĩ,” he tóg, Jesus ti, ag mỹ.

Jesus tỹ ũ ag mỹ vĩ kónãn

(Mt 11.20-24)

¹³Kỹ tóg: “sỹ cidade tỹ Corazim ki ke ag mỹ tag tó sór mũ, ha mē,” he mũ. “Kórég ve jé ãjag tóg ke mũ,” he tóg. “Sỹ cidade tỹ Betsaida ki ke ag mỹ tag tó sór mũ gé, ha mē. Kórég ve jé ãjag tóg ke mũ gé,” he tóg. “Êg tỹ nén han vãnh tỹ hën ri ke hyn han isóg ãjag mỹ, milagre tỹ hën ri ke, hã ra ãjag tóg ãjag jykre tovãnh sór tũ nĩgtĩ,” he tóg. “Cidade tỹ Tiro tá, cidade tỹ

Sidom tá sóg ěg tỹ nén han vãnh ěn hyn han tũ nĩ. Sỹ tá milagre hyn han mũ ra ag tóg ãjag jykre kórég tovãnh mũ vễ, vẫsỹ,” he tóg. “Ăjag jykre pãno to ag jykrén ke mũ vễ, kygfỹ ag mũ vễ, ag mỹ ti e tĩnh mũ vễ, sỹ ag mỹ tó mũ ra. Ag jãvo ãjag tóg tovãnh sór tũ nĩ!, to jykrén sór tũ pẽ nĩ!,” he tóg, Jesus ti. ¹⁴“Tiro tá ke ag vỹ vễsỹrénh kãn ke mũ, kurã tỹ ěgno ěn ki, Sidom tá ke ag ke gé, ag jykre pãno to. Ag vễsỹrénh kãfór han jé ãjag tóg ke mũ jãvo, ha mẽ,” he tóg, Corazim tá ke ag to, Betsaida tá ke ag to ke gé.

¹⁵Kỹ tóg: “sỹ cidade tỹ Cafarnaum ki ke ag mỹ tag tó sór vễ, ha mẽ,” he mũ. “Uri tóg ver ãjag mỹ sér tĩ,” he tóg. “Kanhkã ve jé ěg tóg ke mũ,” he ãjag tóg tĩ, ón kỹ. Hã ra ãjag tóg nũgme ki vár ke mũ jãvo, inferno ki,” he tóg, Jesus ti. Ti tỹ ã vỹ jẽmẽ jãvãnh mũ ag mỹ vi kónãn hã vễ.

¹⁶Kỹ tóg ã mré ke ag mỹ tag tó mũ. “Ủ tóg ãjag vỹ mẽ sór mũ, ha vemnĩ,” he tóg. “Kỹ tóg sir inh vỹ mẽg mũ gé, ti tỹ ãjag vỹ mẽn kỹ. Ủ tóg ãjag vỹ mẽ sór tũ nĩ, ha vemnĩ. Kỹ tóg inh vỹ mẽnh ke tũ nĩ gé. Ti tỹ inh vỹ mẽnh ke tũ nĩn kỹ tóg ù tỹ inh jẽnẽg mũ ěn vỹ mẽnh ke tũ nĩ gé sir, Topẽ vỹ ti,” he tóg, Jesus ti. Ti tỹ ã mré mũ tĩ ag mỹ tón hã vễ, ag tỹ ti vỹ kãmén mũ jé, kór há mĩ, kuvar há mĩ.

Kỹ ag tóg sir mũ mũ, ù tỹ 70 (ke) ěn ag.

Ủ tỹ 70 (ke) ag tỹ Jesus to vỹnvỹn ke

¹⁷Kejẽn ag tóg ti to vỹnvỹn ke mũ, kỹ ag tóg ti mỹ vỹ sér han mũ sir. “Senhor!,” he ag tóg mũ. “Vẻnh jagrẽ kórég ag vỹ ěg vỹ ki han tĩ. Ā jiji tó kỹ ěg tóg ag mỹ vỹ tĩ, kỹ ag tóg ki hã han tĩ,” he ag tóg mũ, Jesus mỹ.

¹⁸Kỹ tóg ag mỹ: “vẫsỹ inh Japo vé, ti tỹ kanhkã tá kãtẽre kỹ,” he mũ. “Ti fĩn rãm sóg, hã kỹ sóg ti fón. Ta tỹ kómkóm ke ri ke nĩ ja ti nĩ, ti kutẽ ja ěn ti. ¹⁹Ti kri ke vỹ tỹ inh nĩ. Ha vé, ãjag to sóg vẫsãn mũ, pỹn tỹ ãjag kókén tũ nĩ jé, ãjag tỹ ti sãn mũ ra, pỹn kakra ke gé, Nén-Kórég kar ag ke gé. Ủ vỹ ãjag kókén ke tũ pẽ nĩ gé. ²⁰Hã ra tag to mỹ há nỹtĩ tũg nĩ ver. Tag vỹ tỹ nén ù tũ nĩ ver. Vẻnh jagrẽ kórég vỹ ãjag vỹ han, vẻnh kuprĩg ke gé. Hã ra tag to mỹ sér nỹtĩ tũg nĩ. Nén ù vỹ há pẽ nĩ, kỹ tag hã to mỹ sér nỹtĩmĩ. ãjag jyjy vỹ rãnrán kỹ nỹtĩ, Topẽ livron ki, kanhkã tá, ãjag tỹ kanhkã tá junjun jé. Kỹ tag hã to mỹ sér nỹtĩmĩ,” he tóg, Jesus ti.

Jesus tỹ ùn kãsir ag to há

(Mt 11.25-27; 13.16-17)

²¹Kỹ tóg Jesus mỹ sér tĩ, hora ěn kã. Topẽ kuprĩg tỹ ti krĩn kỹ tóg ti mỹ sér tĩ: “jóg!,” he mũ. “Tỹ ã tóg kanhkã tãn ag kãfór kar nĩ, kar ã tóg tỹ ěprã ke ag kãfór nĩ gé,” he tóg. “Inh mỹ tóg há tĩ, ã tỹ nén han mũ ti. Ủ tỹ: “ki kanhró mág inh nĩ,” he mũ ag mỹ ã tóg ã jykre ven ja tũ nĩ. Ag mỹ ã tóg kãmén ja tũ nĩ. Ủ tỹ gĩr ri ke ki kagtĩg ag hã mỹ ã tóg ven ja nĩ, ã jykre ti,” he tóg. “Hỹ, hã vễ. Ā tỹ nén to jykrén mũn hã vễ, hã kỹ ã tóg ag hã mỹ ã jykre ti nĩm. Hã ra tóg há tãvĩ nĩ, jóg!,” he tóg, Jesus ti. ²²Kỹ tóg ã mré mũ tĩ ag mỹ: “inh jóg tóg inh mỹ tovãnh kãn, ã tỹ nén han ja kar ti,” he mũ. “Kỹ ù pi(jé) ti kósın ki kanhró nĩ! Inh jóg ne

inh ki kanhró nĩ'. Kĩ ũ pi(jé) inh jóg ki kanhró nĩ gé! Inh hã ne ti ki kanhró nĩ', isỹ tỹ ti kósin nĩn kỹ. Hã ra sóg ajag mỹ ti kãmén jé kãtĩ mũ, inh jóg ti. Isỹ tag to ũn kuprêg mũ ag hã mỹ sóg ti kãmén tĩ, inh jóg ti," he tóg, Jesus ti.

²³Kỹ tóg ã mré mũ tĩ ag mỹ nén ũ kãmén mũ gé. Vyrmỹ tóg ag mỹ ke mũ, kỹ tóg: "ajag hã ne vég mũ! Topê jykre ti, hã kỹ Topê tóg ajag ve há han mũ," he mũ. "Sér pē ti tĩ, ũ tỹ ti jykre vég mũ ag mỹ," he tóg, Jesus ti. ²⁴"Ki hã sóg tó mũ, ha mẽ. Ũ tỹ hēn ri ke ag vỹ inh ve sór tãvĩ ja nỹtĩgtĩ, vãsỹ, ajag tỹ ũri nén vég mũ tag ti. Hã ra ag tóg inh mur ken jo kãgter kãn. Topê vĩ tó tĩ ag ja vē, pã'i mág ag ja vē, hã kỹ ag tóg ajag tỹ nén vég mũ ve sór tãvĩ ja nỹtĩgtĩ. Hã ra ag tóg ve ja tũ nĩ, mẽ ja tũ ag tóg nĩ gé, ajag tỹ ũri nén mēg mũ ti. Ajag hã ne mēg mũ inhhã!," he tóg, Jesus ti, ti mré mũ tĩ ag mỹ.

Samaria tá ke to comparação

²⁵Kỹ vãhã Topê vĩ to professor ũ vỹ ag kãmĩ jěgně mũ, kỹ tóg Jesus ki jěmě sór mũ. Ti tỹ ón kỹ ti vỹ mẽ sór vē, hã kỹ tóg ti mỹ: "Senhor!," he mũ. "Inh hỹn hē ri kenh mũ, isỹ rĩr krỹg ja tũ ve jé?" he tóg, Jesus mỹ.

²⁶Kỹ Jesus tóg ti mỹ: "ne nỹ hỹn rãn kỹ nĩ, Topê vĩ ki?" he mũ. "Topê jykre tỹ ne han jé ã ke mũ hỹn!?" he tóg. "To ke há ã tóg nĩ, ha inh mỹ tó," he tóg.

²⁷Kỹ tóg ti mỹ: "Topê vỹ tỹ ã kri ke nĩ, kỹ ti hã to há nĩmnĩ, ti ki rã há han nĩ, ti to jykre pir nĩmnĩ, ti to tar nĩmnĩ, ti mỹ ã tỹ nén han mũ kar ěn han nĩ, ha mẽ. Kỹ ã régre kar ki rĩr nĩmnĩ gé, ã tỹ vėnh ki rĩr há han ri ke. Topê tỹ nén tón hã vē," he tóg, Topê vĩ to professor ti.

²⁸Kỹ Jesus tóg: "hỹ," he mũ. "Ki hã ã tóg tó mũ," he tóg. "Tag han ra, kỹ ã tóg rĩr krỹg ja tũ venh ke mũ," he tóg.

²⁹Hã ra tóg ti mỹ há tũ nĩ, Jesus vỹ tag ti, hã kỹ tóg ti mỹ: "kỹ ũ nỹ tỹ inh régre nĩ?" he mũ.

³⁰Kỹ Jesus tóg ti mỹ tag tó mũ, ha mẽ. "Kejēn ũ tóg nĩgtĩ. Hã ra tóg Jerusalém tá kãtĩg kỹ Jericó ra tĩ mũ. Ēpry jagma, ěmĩn jagma ũn jykre kórég ag tóg ti jo vãjĩg mũ, bandido ag. Kỹ ag tóg ti kãgmĩ kỹ ti kur kunũg mũ. Ti mrãnmrãn ag tóg mũ. Ti tén kren ag tóg mũ, kỹ ag tóg há ki ti tovãnh kar mũ mũ sir, ti tũ mãn kãn kỹ. Kỹ tóg tá nỹ nĩ sir.

³¹Ti tỹ tá nỹ ra ũ tóg ěpry ěn jagma kãtĩ mũ gé. Topê tũ ki rĩr tĩ ũ vē. Ti vég tóg mũ, ũn vėsỹrėnh kỹ nỹ ěn ti, hã ra tóg ti venh rã tũ nĩ. Ěmĩn jagma tóg tĩ mũ.

³²Kỹ vãhã Levi krē ũ tóg ěpry jagma kãtĩ mũ gé. Tá jun kỹ tóg ti vég mũ gé, hã ra tóg ti venh rã tũ nĩ gé. Ěmĩn jagma tóg tĩ mũ gé sir.

³³Kỹ vãhã Samaria tá ke ũ tóg ěpry jagma kãtĩ mũ gé. Kỹ tóg tá jun mũ, kỹ tóg ti vég mũ. ³⁴Kỹ tóg ti venh rã mũ inhhã. Ti kygtãg tóg mũ sir, azeite tỹ, vinho tỹ ke gé, ti mỹ to tĩn kỹ. Ā kur tỹ tóg ti pãg mũ sir. Kỹ tóg ã mēg kri ti nĩm mũ, ã tỹ ti ma tĩg jé. Hã kỹ tóg ag tỹ ĩn krēm nũr jafã tá jun mũ sir. Kỹ tóg tá ti ki rĩr mũ.

³⁵Tỹ vaj k̄y tóg tĩg m̄an s̄or m̄ũ, h̄ã k̄y tóg ũ tỹ ĩn ki r̄ĩr m̄ũ ěn m̄ỹ j̄ãnkamy r̄ẽgre vin m̄ũ, k̄y tóg ti m̄ỹ: “ti ki r̄ĩr há han,” he m̄ũ. “J̄ãnkamy tag tỹ ã m̄ỹ tá kr̄ȳg tũn k̄y s̄óg ã m̄ỹ kajãm m̄ãn m̄ũ, s̄ỹ v̄ȳn ken k̄y,” he tóg. “Kajãm k̄ãn j̄é s̄óg ke m̄ũ, s̄ỹ v̄ȳn ken k̄y,” he tóg, Samaria tá ke ěn ti. Ti tỹ ũn kaga ki r̄ĩr m̄ũn h̄ã v̄ẽ,” he tóg, Jesus ti.

³⁶K̄y tóg: “k̄y ũn tãgtũ ag v̄ȳ ti ve ja n̄ĩ. Ag k̄ã ũ tỹ h̄ẽ n̄ȳ tỹ ti r̄ẽgre ja n̄ĩ, ag tỹ ũn vóg kónãn ja ěn r̄ẽgre? Ha to jykr̄en (ke)ma!,” he tóg, Jesus ti, Topẽ v̄ĩ to professor ěn m̄ỹ.

³⁷K̄y ũ tỹ ti ki j̄ẽm̄ẽg m̄ũ ěn tóg ti m̄ỹ: “ũ tỹ ti jagãgtãn m̄ũ ěn v̄ȳ tỹ ti r̄ẽgre ja n̄ĩ,” he m̄ũ.

K̄y Jesus tóg ti m̄ỹ: “h̄y, tó há han ã,” he m̄ũ. “K̄y ěn ri ke han n̄ĩ. Ũn v̄ẽs̄ȳr̄ẽnh m̄ũ ag jagãgtãn k̄ãn n̄ĩ, ti ri k̄ẽn,” he tóg, Jesus ti. Ti tỹ ũ tỹ ón k̄y ti ki j̄ẽm̄ẽg m̄ũ m̄ỹ tón h̄ã v̄ẽ.

Jesus tỹ Maria mré Marta fag venh tĩg

³⁸Kej̄ẽn ag tóg m̄ũ m̄ũ, Jesus ag, k̄y ag tóg ěm̄ã s̄ĩ ũ ki junjun m̄ũ. Tá ũ fi tóg n̄ĩ n̄ĩ, fi j̄ijin h̄ã v̄ȳ: Marta, he m̄ũ. ěn fi v̄ȳ Jesus m̄ỹ: “inh ĩn k̄ãra ge j̄ẽg, ãjag tỹ ěg mré n̄ȳtĩ j̄é,” he m̄ũ.

³⁹K̄y fi j̄ãvȳ fi v̄ȳ n̄ĩ gé, h̄ã v̄ȳ: Maria, he m̄ũ. K̄y Maria fi v̄ȳ Jesus mré n̄ĩ n̄ĩ, ti v̄ĩ j̄ẽm̄ẽ j̄é. ⁴⁰H̄ã ra Marta fi v̄ȳ r̄ãnr̄ãj (ka)m̄ẽ n̄ĩ, Jesus ag m̄ỹ v̄ẽj̄ẽn han j̄é. J̄ãvo Maria fi tóg n̄ĩ n̄ĩ.

K̄y Marta fi tóg Jesus m̄ỹ: “Senhor!,” he m̄ũ. “R̄ãnr̄ãj mág han tĩ s̄óg n̄ĩ, h̄ã ra fi tóg n̄ĩ n̄ĩ. Fi m̄ỹ k̄é, fi tỹ inh mré v̄ẽj̄ẽn ki r̄ĩr j̄é,” he fi tóg m̄ũ.

⁴¹H̄ã ra Jesus tóg fi m̄ỹ: “kr̄ĩ kufy ã tóg n̄ĩ, n̄én ũ tũ to, h̄ã ra fi tóg inh v̄ĩ j̄ẽm̄ẽg n̄ĩ n̄ĩ,” he m̄ũ, Marta fi m̄ỹ. “V̄ẽj̄ẽn to v̄ẽnh kutãn tũg n̄ĩ. ⁴²N̄én ũ pir h̄ã ne há n̄ĩ!, h̄ã v̄ȳ: inh v̄ĩ, he m̄ũ. Maria fi v̄ȳ inh v̄ĩ h̄ã j̄ẽm̄ẽ s̄ór m̄ũ, k̄y s̄óg fi m̄ỹ: “ha n̄én ũ han,” he j̄ãv̄ãnh n̄ĩ. N̄én ũ há kupr̄ẽg fi tóg, fi tỹ inh v̄ĩ m̄ẽ s̄ór k̄y,” he tóg, Jesus ti, Marta fi m̄ỹ.

Ěg tỹ Topẽ mré v̄ẽm̄ẽn

(Mt 6.9-15; 7.7-11)

11 ¹Kej̄ẽn tóg Topẽ mré v̄ĩ m̄ũ, Jesus ti, ěm̄ã ũ tá n̄ĩ k̄y. Ti tỹ Topẽ mré v̄ẽm̄ẽn kar k̄y ti mré m̄ũ tĩ ag tóg ti mré v̄ĩnh k̄ãmũ m̄ũ. K̄y ag tóg ti m̄ỹ: “Senhor!,” he m̄ũ. “Ěg kanhr̄ãn n̄ĩ, ěg tỹ Topẽ mré v̄ĩ há han j̄é. João v̄ȳ ã mré m̄ũ tĩ ag kanhr̄ãn. Ge ki ěg kanhr̄ãn n̄ĩ gé,” he ag tóg, Jesus m̄ỹ.

²K̄y tóg ag kanhr̄ãn k̄y ag m̄ỹ:

“Topẽ mré v̄ĩ k̄y tag tómn̄ĩ, ha m̄ẽ,” he m̄ũ.

“Ěg jóg mág, ã jyjy tó ěg tóg tĩ.

K̄y v̄ẽnh kar j̄é ã tỹ tỹ ũn mág n̄ĩ vé.

Ěg j̄é k̄ãnhmar ã tỹ tỹ ěg pã'i n̄ĩ vé.

³Ěg m̄ỹ ěg j̄ẽn ti n̄ĩm, kurã kar ki, ěg tỹ kurã kar ki ko tĩ ěn.

4 Kÿ ãg mÿ vãnh pãte fón nĩ, ãg tÿ ã vĩ mranh ja ti, hã jé ãg tóg ãg tÿ jagnê to jũ tÿ jagnê mÿ vãnh pãte fón ke mũ gé.

Kÿ ãg tÿ ã vĩ mranh sór kÿ ãg kren han nĩ, ãg tÿ mranh tũ nĩ jé,” hemnĩ,” he tóg, Jesus ti.

5 Kÿ tóg ag mÿ ãg tÿ Topê mré vēmén tĩ ěn kãmén mãn mũ. Kÿ tóg ag mÿ: “kejĕn ũ tóg nigti,” he mũ. “Kuty si há tá tóg ã régre ĩn ki jun mũ. Kÿ tóg ti mÿ: “régre!,” he mũ. “Inh mÿ ěmĩ tagtũ nĩm, sÿ kar ã mÿ ti ri kén kÿ nĩm jé,” he tóg. 6 “Inh mré ke ũ vÿ jun. Kór há tá tóg kãtĩg, kuvar há tá. Hã ra sÿ ti mÿ ne han ke tóg tũ tĩ,” he tóg, ã régre mÿ.

7 Kÿ ti régre tóg ti mÿ: “hã ra sóg nũr nÿ nĩ,” he mũ. “Kar inh krê tóg inh mré nũgnũr nÿti gé. Jãnkã vÿ nĩfĕnh kÿ jĕ nĩ. Hã kÿ tóg inh mÿ vĕnhmÿ tĩ, inh nĩnh ke mũ ra, sÿ ã mÿ ěmĩ nĩm jé. Ũ ki jãvãnh,” he tóg ti mÿ.

8 Hã ra tóg sir to vĩ mãn!, to vĩ mãn! he mũ. Hã kÿ tóg nĩ kÿ ti mÿ nĩm mũ sir, ti tÿ ti mÿ ěmĩ to vĩ mũ ti. Ti régre vĕ, ũ tÿ ti mÿ to vĩnh kãtĩ mũ ti. Ge ra tóg ti mÿ nĩm ke tũ nĩ vĕ, ti tÿ tÿ ti régre ra. Ti tÿ ti mÿ to vĩ mãn!, to vĩ mãn! he tigrĩn tóg sir ti mÿ nĩm mũ jãvo. ãg tÿ Topê mré vĩ ri ken hã vĕ,” he tóg, Jesus ti.

9 “Ha mĕ, sÿ ãjag mÿ nĕn tó mũ tag ti. Topê mÿ nĕn kar to vĩmnĩ, kÿ tóg ãjag mÿ han mũ sir. ãjag tÿ ti mÿ nĕn ũ to vĩ mũ ěn jãvãnh nĩ, kÿ ãjag tóg venh ke mũ sir. Ti mré vĩ kÿ ãg tÿ ti jãnkã tÿ tórón tórón ke ri ke han nĩ, kÿ tóg ãjag mÿ ti róm ri ke han mũ, ti tÿ ãjag mÿ ãjag tÿ nĕn to vĩ mũ ěn han kÿ. 10 Hÿ, hã vĕ. ãjag tÿ ti mÿ nĕn to vĩn kÿ tóg ãjag mÿ han mũ. ãjag tÿ ti jãvãnh kÿ ãjag tóg venh ke mũ. ãjag tÿ ãg tÿ jãnkã tÿ tórón tórón ke ri ke han kÿ tóg ãjag mÿ ti róm ri ke han mũ. 11 Kejĕn ãjag kósin tóg ãjag mÿ pirã to vĩ mũ. Kÿ ãjag pi(jé) ti mÿ pÿn nĩm ke mũ! Pirã hã nĩm jé ãjag tóg ke mũ. 12 Kejĕn tóg ãjag mÿ garĩnh ovo to vĩ mũ, ãjag kósin ti. Kÿ ãjag pi(jé) ti mÿ pÿn kakrã nĩm ke mũ! Garĩnh ovo hã nĩm jé ãjag tóg ke mũ. 13 Jykre pãno ãjag nÿtĩ. ãjag jykre pãno (hã) ra ãjag tóg ãjag krê mÿ nĕn ũ há nĩm tĩ. Ge ti nĩ gé, ãjag tÿ Topê mÿ nĕn ũ to vĩn kÿ. Nĕn ũ há hã nĩm jé tóg ke mũ. Hã ra tóg ãjag kãfór han tĩ, ãg jóg tÿ kanhkã tá nĩ ti. ãjag tÿ ti mÿ to vĩn kÿ tóg ã kuprĩg tÿ ãjag jagrĕ han ke mũ mÿr, Topê ti,” he tóg, Jesus ti.

Jesus tÿ Topê jykre hã han kÿ tar nĩ

(Mt 12.22-30; Mc 3.20-27)

14 Kejĕn tóg ũn jagrĕ kórég mÿ ti jagrĕ kutĕm mũ. Ti vĩ vãnh han ja tóg nĩ, ti jagrĕ ti. Jesus tÿ ti kutĕm kar tóg vĩ há nĩ sir. Kÿ tóg vĕnh kar mÿ e tĩ sir, ag mÿ tóg sér tĩ sir. 15 Hã ra ũ ag tóg ti to: “jagrĕ kórég ti nĩ,” he mũ. “Nĕn-Kórég ag pãlĩ vÿ tÿ ti jagrĕ nĩ, Satanás ěn, Belzebu he mũ ěn,” he ag tóg mũ, ón kÿ. “Hã kÿ tóg Nĕn-Kórég ag pan tĩ, ag jagrĕ kórég ag. Nĕn-Kórég ag pãlĩ jykre tÿ tóg ag pan tĩ,” he ag tóg ón kÿ, Jesus to. 16 Hã ra ũ ag tóg ón kÿ ti jykre ve sór mũ gé, kÿ ag tóg ti tÿ ãg tÿ nĕn han vãnh han mũ ve sór mũ sir, ti tÿ ag mÿ kanhkã jykre ven jé.

17Hã ra Jesus tóg ki kanhró nĩ, ag tỹ nén to jykrén mũn ki. Hã kỹ tóg ag mỹ: “pã'i pir krēm ke ag tỹ jagnē kato tēn kỹ ag tóg jagnē kãgtén kãn ke mũ,” he mũ. “In pir krēm ke fag tỹ jagnē kato tēn kỹ fag tóg jagnē kãgtén kãn ke mũ gé sir. 18Ge ti nĩ, Nén-Kórég ag jykre ti. Nén-Kórég ag tỹ jagnē kato tēn kỹ ag tóg jagnē tỹ tũ' henh mũ gé vë, Satanás ag. Hã kỹ tóg vènhmỹ nĩ, ãjag vĩ ti, ãjag tỹ iso: “Satanás jykre tỹ, Belzebu ên jykre tỹ tóg Nén-Kórég ag pan tĩ,” he mũ ti. Ag tỹ jagnē kato tēgtē to ken hã vë sir, ha mẽ,” he tóg, Jesus ti. 19“Belzebu jykre tỹ tóg ag pan mũ, Nén-Kórég ag,” he ãjag tóg ti iso. ãjag mré ke ag to jykrén nĩ. Nén-Kórég ag pan ag tóg ti gé, ãjag mré ke ag. Ag pi(jé) Satanás jykre ki ag pan tĩ'. Topē jykre ki ag tóg ag pan tĩ (mỹr') ãjag tỹ tag to jykrén kỹ ãjag tóg inh jykre há ki kanhrãn ke mũ vë,” he tóg ag mỹ, Jesus ti. 20“Topē kuprĩg jykre tỹ sóg Japo ag pan tĩ mỹr, ha mẽ. Topē kuprĩg tỹ Japo ag pan kãn kỹ Topē tóg tỹ ěg pã'i nĩ vë, mỹr. Tag to jykrén nĩ,” he tóg, Jesus ti.

21“Ũ tỹ é he (ka)mē ag tóg ãjag tũ ki rĩr há han ti. Ag rógro vỹ jēgtĩ, kỹ ag tóg ãjag in ki rĩr tĩ sir, ũ tỹ ag tũ mäg tũ nĩn jé. Kỹ ũ tóg ag tũ vóg ke tũ nĩ gé, ag tỹ ki rĩr há han kỹ. 22Kejēn ũ tóg ũ tóg ũ tỹ é he (ka)mē ên in tá jun mũ, ũ tỹ ti tar kãfór nĩ ti. Ti rárá kãfór nĩn kỹ tóg ti tỹ hēn ri kenh mũ sir. Kỹ tóg ti rógro vãg mũ. Ti tỹ ũn kãgtén jafã vãg tóg mũ, kỹ tóg ti tũ mãn kãn mũ gé sir. Ge ti nĩ, isỹ nén han mũ ên ti. Ũ tỹ é he (ka)mē ri ke ti nĩ, Japo ti, hã ra sóg ũn tar ên ri ke nĩ,” he tóg.

23“ãjag tỹ tỹ inh mré ke tũ nỹtĩn hã kỹ ãjag tóg inh kato tēgtē mũ. ãjag tỹ inh mré ěprã ke ag tỹ Topē to kãmũ han tũ nĩn kỹ ãjag tóg ag kãmũ kamēg mũ,” he tóg.

Vènh jagrē kórég vỹn kenh ke

(Mt 12.43-45)

24“Kejēn sóg vènh jagrē kórég ũ kutēm mũ. Kỹ tóg ga kórég mĩ tĩ mũ, ti jagrē ên ti. Goj venh ke tũ tóg nĩ, tá. Vènhkãn ke tũ tóg nĩ gé, ti tỹ hē ri ken kỹ vènhkãn ke tũ tĩn kỹ. Kỹ tóg vãhã to jykrén mũ sir. “Inh hỹn ên ra tĩg mãn ha, sỹ ũ tá kãkutē ja ên ra. Inh mỹ tóg tỹ in ri ke ja nĩ, kỹ inh jé hỹn ti kãra rá mãn ha,” he tóg mũ, ti jagrē ên ti. 25Kỹ tóg ti venh kãtĩ mũ. Hã ra tóg sir krĩ há nĩ. Kỹ tóg ti mỹ in há ri ke nĩ sir, in prur, in sĩnvĩ ri ke. 26Kỹ tóg Nén-Kórég tỹ 7 (ke) ag mỹ tónh tĩ mũ sir. “Ha kãmũ jēg,” he jé tóg ke mũ. Hã ra ag jykre pãno tóg ti jykre pãno kãfór nĩ. Kỹ ag tóg sir ũ ên kãge ge mũ, tỹ ag tóg ti jagrē nỹtĩ sir, isỹ ũn mỹ ti jagrē pir kutēm ja ên ti. Hã kỹ tóg kórég tãvĩ nĩ sir. Ti jagrē kórég pir kutēm inh nĩ vë, hã ra ũ tỹ 8 (ke) ag tóg tỹ ti jagrē nỹtũ, ti tỹ inh ki rá tũ nĩn kỹ,” he tóg, Jesus ti. Ti tỹ ag mỹ vènh jagrē jykre tón hã vë.

Topē tỹ ěg ve há han ke

27Kỹ ũ tỹ ti vĩ mēg mũ ũ fi tóg prēr mũ sir, fi tỹ ti vĩ tag mẽ kỹ. ũn e ên kãmĩ fi tóg jē nĩ, kỹ fi tóg ti mỹ ke mũ. “!.Topē vỹ ã mỹnh fi ve há han, fi tỹ ã han tugrĩn, fi tỹ ã pafãm tugnen..!” he fi tóg, prēr kỹ. 28Kỹ Jesus tóg

fi mÿ: “hÿ,” he mÿ. “Hã ra Topê vÿ ã ve há han ke mÿ gé, ã tÿ ti ví jëmën kÿ. Hã kÿ ã tÿ ti ví mē kÿ ke króm nÿ, kÿ tóg ã ve há tâvÿ han ke mÿ,” he tóg, Jesus ti, ù tÿ prër mÿ ën fi mÿ.

Jesus tÿ ón kÿ milagre han ke tÿ

(Mt 12.38-42)

²⁹Hã ra ù tÿ hën ri ke ag tóg sir tá junjun mÿ, ti ví mē jé. Kÿ tóg fór tâvÿ tÿ. Kÿ Jesus tóg ag mÿ: “kórég ãjag nÿtÿ,” he mÿ. “Ón kÿ ãjag tóg nén han vanh ve sór mÿ. Venh ke tÿ ãjag tóg nÿ. Nén ù pir hã ve jé ãjag tóg ke mÿ, hã vÿ: Jonas tÿ nén ve ja ën ri ke, he mÿ,” he tóg. ³⁰“Jonas vÿ cidade tÿ Nínive tá ke ag mÿ Topê ví tó ja nÿ, kÿ ag tóg ti ví mē há han ja nÿ. Ën ri ke han jé sóg ke mÿ, ãjag mÿ. Tÿ sóg ëprã ke fi kósín ën nÿ,” he tóg. ³¹“Kÿ pâ'i mág ën fi, kanhkã tâpér tÿ sul tá kâtÿg ja ën fi, tâ tá kâtÿg ja ën fi vÿ nÿnh ke mÿ gé, kurã tÿ ëgno ki, sÿ vënh kar jykre venh ke kurã ën ki. ãjag mré fi tóg jënh mÿ, kÿ Topê tóg ãjag mÿ ví kónãn ke mÿ, fi ve kÿ. Kanhkã fyr ja tá fi tóg kâtÿg ja nÿ, vãsÿ, fi tÿ pâ'i mág tÿ Salomão ví mē jé. Salomão kãfór vÿ tÿ inh nÿ, hã ra ãjag tóg inh ví mē jãvãnh nÿtÿ fi jãvo,” he tóg. ³²“Kÿ Topê vÿ Nínive tá ke ag ve kÿ ãjag mÿ ví kónãn ke mÿ gé, kurã tÿ ëgno ën ki, ha vemní. Nínive tá ke ag tÿ Jonas ví mē kÿ ag tóg ãjag jykre togvãnh ja nÿ. Tÿ sóg Jonas kãfór nÿ, hã ra ãjag tóg ãjag jykre tovãnh jãvãnh nÿtÿ, sÿ ãjag mÿ tó tÿ (hã) ra,” he tóg, Jesus ti.

Jëngrë ri ke ëg nÿtÿ

(Mt 5.15; 6.22-23)

³³“Ëg tÿ lampião grug kÿ ëg pi(jé) ïn krëm péju kÿn fëg tÿ!, ëg pi(jé) kěj krëm fëg tÿ!. Ti fëg jafã kri ëg tóg fëg tÿ, lampião gru ti. Kÿ ëg tóg ti gru tÿ ve há jëgtÿ, ëg tÿ ïn kãtã kãmÿ kÿ,” he tóg, Jesus ti.

³⁴“Ëg kanë hã tóg tÿ ëg tÿ ve jafã nÿ. Kÿ tóg ëg jo kurã han tÿ, ëg kanë ti, ti há nÿn kÿ. Kÿ tóg ëg jo kurã kar nÿ sir, ëg kanë há nÿn kÿ. Ëg kanë kórég nÿn kÿ tóg ëg jo kuty ke kãn mÿ sir. Kÿ tóg ge nÿ, ëg jykre kórég ti. Ëg kanë kórég ri ke ti nÿ, ëg jo kuty han tóg tÿ. ³⁵Kÿ vënh kanhrãn nÿ. Ke tÿ nÿ mÿ ra tóg ãjag jo kuty ri ke nÿ. Vënh jykre kórég hã vë. Kÿ vënh jykre kórég han sór tÿg nÿ. ³⁶ãjag jo kurã nÿn kÿ tóg há tâvÿ nÿ, ãjag jo kuty tÿ nÿn kÿ, ãjag jo kuty sÿ tÿ nÿn kÿ ke gé. ãjag jykre há tâvÿ nÿn kÿ tóg ãjag jo kurã ri ke nÿ. Kÿ ãjag tóg sir lampião gru ri ke nÿtÿ gé. Lampião gru mág nÿn kÿ tóg kómkóm ke tÿ, ëg kanë jo, kÿ tóg ëg mÿ jëngrë há han tÿ. Ge ëg nÿtÿ, ëg jykre há tâvÿ nÿn kÿ, ti kórég sÿ tÿ nÿn kÿ,” he tóg, Jesus ti. Ti tÿ ag mÿ Topê jykre há tón hã vë.

Jesus tÿ ùn jykre régre ag mÿ ví kónãn

(Mt 23.1-36; Mc 12.38-40)

³⁷Ti tÿ ag mré vëmén kar Fariseu ù tóg ti mÿ: “inh mré jën kâtÿg,” he mÿ. Kÿ tóg ti mré tÿ mÿ, ti mré jën jé, Jesus ti. ³⁸Hã ra Jesus tóg Judeu

ag jykre han ja tū nī, ag jēn jé ag tóg vēnh nīgpég tī. Kŷ tóg Fariseu ēn mŷ e tī. Kŷ tóg to jykrén kónān mŷ sir.

³⁹Kŷ Jesus tóg ki kanhró nī, kŷ tóg ti mŷ kāmén mŷ. “Fariseu vŷ tŷ ājag nŷtī,” he tóg. “Kŷ ājag tóg copo ven ja kugpég tī, pénky ven ja ke gé, hā ra ti kátá ke tóg kavéj nī. Kŷ ājag jykre vŷ ge nŷtī gé. Jykre há nī ve ājag tóg nŷtī, hā ra ājag tóg vēnh jykre pāno han tī, hā vŷ: jānkamy to ag lograr he tī, he mŷ, ājag prŷ tū fag mré nŷ, he mŷ gé. ⁴⁰Krī tū pē ājag nŷtī. Ū tŷ ēg ven ja han mŷ vŷ ēg jykre han mŷ gé mŷr. Ēg jykre há nīn kŷ ēg ven ja vŷ há nī gé. ⁴¹Ū jagāgtān ra, ājag tŷ nén ū tŷ. Vēnh jykre há kar han ra, kŷ tóg ājag tŷ nén ū kar jānhkri nī ri ke nī sir,” he tóg.

⁴²“Fariseu', Topē vŷ ājag ve kónān. Ón kŷ ājag tóg Topē mŷ ājag jakré tŷ dízimo han kán tī. Ājag jakré tŷ hortelā tŷ 10 (ke) nīn kŷ ājag tóg Topē mŷ ūn pir nīm tī, dízimo han kŷ. Ājag jakré tŷ arruda tŷ ājag tóg dízimo nīm tī gé, ājag jakré tŷ vēnh kagta kar tŷ mŷr, ājag tŷ nén ū kar mré hā. Nén ū kar tŷ ājag tóg dízimo vin tī, Topē mŷ. Hā ra ājag tóg vēnh jykre kuryj han tū nī jāvo. Topē to há tū ājag tóg nŷtī, ti vī jēmē jāvānh ājag tóg nŷtī. Ājag tŷ ti tŷ ēg jyvēn ki króm mré hā ājag jakré tŷ dízimo vin ra tóg há tāvī nīnh mŷ vē, ha mē. Hā ra ājag tóg ki króm sór tū nīgtī,” he tóg.

⁴³“Fariseu', Topē vŷ ājag ve kónān. Vēnh kanhrān jafā krēm ājag tóg vēnh kápām kŷ nŷtī, vēnh kar tŷ ājag ve jé. Cidade kaju tá ājag tóg mŷgtī, kŷ vēnh kar tŷ ājag mŷ: “Senhor, ā mŷ há?” hen kŷ tóg ājag mŷ sér tī.

⁴⁴Topē vŷ ājag ve kónān mŷr. Vēnh kej si ri ke ājag nŷtī, vēnh kej to ró tū ri ke. Kri mŷ ag tóg tī, vēnh kar, kŷ ag tóg ki kagtīg nŷtī, ti tŷ tŷ vēnh kej nī tī. Kŷ ag tóg vēnh vatānh tá vēnh kavēnh tī. Tag ri ke ājag tóg nŷtī. Kŷ ājag krēm ke ag vŷ Topē vī mranh tī, ājag ven kŷ,” he tóg, Jesus ti, Fariseu ag mŷ.

⁴⁵Kŷ Topē vī to professor ū tóg Jesus mŷ: “ā tŷ Fariseu ag mŷ tag tó kŷ ā tóg ēg to vī kónān tī nī gé, ag mré,” he mŷ, ēg Senhor mŷ.

⁴⁶Kŷ tóg: “ón kŷ Topē vī to professor!,” he mŷ. “Hŷ, Topē vŷ ājag ve kónān gé,” he tóg. “Vēnh kar mŷ ājag tóg vēnh jykre kufy nīm tī. Kufy jagy ti nŷ, vēnh jykre ēn ti, kŷ ājag tóg han sór tū nīgtī. Ge ra ājag tóg ag mŷ: “ha ki króm,” he tī.

⁴⁷Topē vŷ ājag ve kónān mŷr. Ājag jóg!jóg ve ag vŷ Topē vī tó tī ag kāgtén. Jāvo ājag tóg ag kej ki rīr há han tī. ⁴⁸Hā ki ājag tóg ājag jóg!jóg ve ag tŷ ag kāgtén to: “há ti nī,” he tī. Hā ki tóg ājag mŷ há nī mŷr, ag tŷ ag kāgtén ja tugrīn. Ag hā vŷ ag kāgtén ja nī, kŷ ājag hā nŷ ag kej ki rīr há han tī,” he tóg. ⁴⁹“Hā kŷ Topē vŷ ājag to vī ja nī. Ki kanhró ti nī, Topē ti, hā kŷ tóg ājag to vī kónān ja nī, ha mē. “Inh vī tó tī ag jēgnē jé sóg ke mŷ ag mŷ, isŷ ūn vin mŷ ag ke gé, ag tŷ ag mŷ inh vī tó jé. Hā ra ag tóg ag vóg kónān ke mŷ, ag kāgtén jé ag tóg ke mŷ,” he ja tóg nī, Topē ti. ⁵⁰Ājag jóg!jóg ve ag vŷ ag kygrēn kán, hā ra tóg ājag mŷ há tī, hā kŷ Topē vŷ to ājag vóg kónān ke mŷ. Ū tŷ hēn ri ke ag kygrēn ag tóg, ājag jóg!jóg ve ag, Topē tŷ ēprā ke ag han kar kŷ. ⁵¹Ti káke tóg Abel tén. Ti nón ke ag kāgtén ja ag tóg nī gé, ājag jóg!jóg ve ag, Zacarias mré hā. Topē in jānkā krēm ag tóg ti tānh, Topē mŷ nén ū pūn jafā ēn ki, Zacarias ti. Topē tŷ jēgnēg mŷ ag

kāgtén tovānh tũ pẽ ag nýtĩ, ājag jóg'jóg ve ag. Hã ra tóg ājag mỹ há tí. Ājag tỹ ag kygrēn kãn ri ke ti nĩ. Ūn kãgter mũ tag jagfy kajãm kãn jé ājag tóg ke mũ, ha vemnĩ. Ājag mỹ sóg tó mũ mỹr," he tóg, Jesus ti.

⁵²“Ón kỹ Topẽ vĩ to professor!, Topẽ vỹ ājag ve kónãn. Topẽ vỹ tỹ ěg kanhrãn mũ ěn ki ge jāvãnh ājag tóg nýtĩ mỹr!. Kỹ ũ tỹ ki rã sór mũn kỹ ājag tóg ti mỹ tó kónãn tí, ti tỹ ki vẽn h fón tũ nĩn jé. Kỹ tóg ěg tỹ ũ jo ĩn nĩfẽn ěn ri ke nĩ, ājag tỹ ag tỹ Topẽ ki ge kamẽg ti,” he tóg, Jesus ti. Ti tỹ ũ tỹ ón kỹ Topẽ vĩ to professor ag mỹ vỹ kónãn hã vẽ.

⁵³Ti tỹ tag tó kar kỹ tóg hẽn ra tĩ mũ sir. Tag pãte Topẽ vỹ to professor ag tóg ti mré mũ kỹ ti tugnỹm tí, Fariseu ag ke gé. Ag tỹ ti vỹ to ti se sór vẽ. Hã kỹ ag tóg ón kỹ ti ki jēmẽgmẽg mũ. ⁵⁴Ón kỹ ag tóg ti vỹ jēmẽg tí gé sir, ag tỹ ti vỹ to ti kãgmĩn jé.

Ūn jykre régre ag
(Mt 10.26-27)

12 ¹Hã ra ũ tỹ hẽn ri ke ag vỹ vẽn h mãn kỹ nýtĩ nĩ. E tãvĩ ag tóg tí ha, mil tỹ hẽn ri ke ag. Kỹ ag tóg jagnẽ sãnsãn mũ sir, ag e nýtĩn kỹ. Kỹ Jesus tóg ag kanhrãn rãn mũ. Ā mré mũ tí ag kanhrãn vén tóg mũ, kỹ tóg ag mỹ: “Fariseu ag jykre han sór tũg nĩ,” he mũ. “Pão jẽgja jafã ri ke ti nĩ, ag jykre ti, hã kỹ tóg Topẽ mỹ kórég nĩ. Ag jykre hã vẽ, ha mẽ: jykre régre ag nýtĩ. Kỹ tag tóg Topẽ mỹ kórég tãvĩ nĩ,” he tóg. ²“Ēg tỹ péju kỹ nén han mũ vỹ vẽn h ven kãn ke mũ, ěg tỹ vẽn h kar vatãnh tá nén to jykrén mũ vỹ vẽn h ven kãn ke mũ, kurã tỹ ěgno ki,” he tóg. ³“Ājag tỹ vẽn h kar vatãnh tá vēmén ja ěn mẽ kãn jé ag tóg ke mũ, vẽn h kar. Ājag tỹ kékén kỹ nén tó ja ěn tó kãn jé ag tóg ke mũ, jamã hár(a), ājag tỹ ĩn kãtã nén tó ja ěn. Hã kỹ vẽn h jykre régre han tũg nĩ,” he tóg.

Ēg tỹ ěprã pã'i ag kamẽg ke tũ
(Mt 10.28-31)

⁴“Ha mẽ, iso há ājag nýtĩ. Ag kamẽg tũg nĩ, ũ tỹ ěg tén tí ag, pã'i ag. Ag tỹ ěg tén kar kỹ ag tóg ěg tỹ hẽ ri kenh ke tũ nĩ sir. Hã kỹ ag kamẽg tũg nĩ. ⁵Ājag mỹ sóg tónh mũ ha, ājag tỹ ũn kamẽg ke ti, hã vỹ: Topẽ, he mũ. Ti hã ne ěg tén kar nũgme ki ěg vãm ki kanhró nĩ, mỹr ha mẽ!. Kỹ ti hã kamẽg nĩ. ⁶Sẽsĩ vãm ag tóg tí, jãnkamy kato, ěg tỹ ko jé. Jẽsĩ tỹ 5 (ke) kato ěg tóg jãnkamy pir mãg tí. Hã ra Topẽ pí(jé) ag kã jatun mũ!. Ag ki rĩr nĩ tóg nĩ, sēsĩ ěn ag ki. ⁷Ēg ki rĩr tóg nĩ gé, Topẽ ti. Ēg tỹ nén vég mũ kar ki kanhró tóg nĩ. Hã kỹ tóg ěg gãnh ki kanhró nĩ gé. Nĩkrén kãn ja tóg nĩ, Topẽ ti, ěg gãnh ti. Jẽsĩ kãfór ājag tóg nýtĩ, Topẽ mỹ. Ājag kãmĩ ũn pir tóg sēsĩ e kãfór nĩ, ti mỹ. Hã kỹ ag kamẽg tũg nĩ, ũ tỹ ěg tén sór mũ ag,” he tóg.

Ĕg tỹ Jesus kāmén ke
(Mt 10.32-33; 12.32; 10.19-20)

8“Hā kỹ sóg ājag mỹ tag tó mũ. Ĕprā ke ag mỹ: “tỹ sóg ti mré ke nĩ,” hemnĩ, iso. Ag kamēg tũg nĩ. Kỹ sóg ājag tónh ke mũ gé, Topē tỹ jēnē jafā ag mỹ, kurā ěn kā, ājag tỹ tỹ inh mré ke nỹtĩ ti. Tỹ sóg ěprā ke fi kósin ěn nĩ, ha mē. 9Ājag tỹ ěprā ke ag mỹ inh kāmén tũ nĩn kỹ sóg ājag tónh ke tũ nĩ gé, Topē tỹ jēnē jafā ag mỹ, ājag tỹ iso: “ti ki kagtĩg sóg nĩ,” hen kỹ,” he tóg.

10“Tỹ sóg ěprā ke fi kósin ěn nĩ. Ag tỹ iso vēmē jũ han kỹ sóg ag mỹ vėnh pāte fón sór mũ. Ag tỹ hā ra Topē kuprĩg to vēmē jũ han kỹ Topē tóg ag mỹ vėnh pāte fón mǎn ke tũ nĩ ha,” he tóg.

11“Ājag vin jé ag tóg ke mũ, pā'i ag mỹ, governador ag mỹ ke gé, ag tỹ ājag sigse jé. Ĕg vėnh kanhrān jafā krēm ag tóg ājag ki jēmē sór ke mũ, ājag tỹ inh ki ge kỹ nỹtĩ ti, ha vemnĩ. Hā ra to krĩ kufy han tũg nĩ, ājag tỹ ag mỹ inh kāmén ke ěn to. 12Topē kuprĩg hā ne ājag kanhrān ke mũ!, kurā ěn kā. Hā kỹ ājag tóg tónh ke mũ sir,” he tóg, Jesus ti, ā mré mũ tĩ ag mỹ.

Ĕg tỹ nén ũ to én ke tũ

13Kỹ ũn e ag kāmĩ ũ tóg Jesus mỹ: “Senhor!,” he mũ. “Inh jo inh kāke mré vĩmnĩ, ěg tỹ ěg panh ter ja tỹ nén kar vėnh kǎpām jé, ti kuge ti,” he tóg, Jesus mỹ.

14Hā ra Jesus tóg ti mỹ: “vó,” he mũ. “Isũ pijé!,” he tóg. “Inh pi(jé) ā mỹ ā kuge ve sór mũ! Inh pi(jé) ā tũ tỹ vėnh kǎpām sór mũ!,” he tóg.

15Kỹ tóg ag kar mỹ: “ker nén ũ to én hē!,” he mũ. “Ĕg tỹ nén kar pi(jé) ěg rĩr han ke mũ! Ĕg tũ mág nĩ ra ěg pi(jé) mũ há han ke mũ!,” he tóg.

16Kỹ tóg ag mỹ: “vėnh jykre há vỹ ge nỹnh mũ, ha mē,” he mũ. “Ũn rico tóg nĩ ja nĩgtĩ mỹr,” he tóg. “Ti japỹ vỹ nén kar kanē e han ja nĩgtĩ.

17Kỹ tóg to jykrén mũ sir, ũn rico ti. “Inh hỹn ne han mũ ha?” he tóg. “Inh pājó mág vó, inh pājó kása vó, sỹ krēm isũ kar rāg jé?” he tóg. 18“Inh pājó kókén jé sóg ke mũ, sỹ ti jėgja ki ũn mág han jé, kỹ sóg krēm isũ kar vin mũ, inh jakré kanē kar ti,” he tóg mũ, to jykrén kỹ. 19“Kỹ sóg jatu nĩ sir. Isũ vỹ prỹg tỹ hėn ri ke pétēm mũ, kỹ sóg rānhraj mǎn ke tũ nĩ ha. Jatun mỹ sóg jėg nĩnh ke mũ, kron nĩ jé inh ke mũ gé. Inh mỹn sér tĩ sir, sỹ jatu nĩn kỹ,” he tóg, to jykrén kỹ, ũn rico ti.

20Hā ra Topē tóg ti mỹ vĩ mũ. “Krĩ tũ ā nĩ,” he tóg ti mỹ. “Kuty tag kā ā tóg ter ke mũ ha, kỹ ā tũ mág tag tỹ tỹ ũ tũ nĩnh ke mũ ha ke gé. Ma tĩg ke tũ ā tóg nĩ. Ā ter ke vė,” he tóg ti mỹ, Topē ti,” he tóg, Jesus ti, ũ tỹ ā panh tũ mǎn sór mũ ěn mỹ. 21“Ge tóg tĩ, ěg tỹ ga kri nén ũ há ve sór kỹ, ěg tỹ kanhkā tá tỹ nén ũ tũ nĩn kỹ, Topē mré. Ĕg pi(jé) ga kri ěg tũ mág ěn ma mũnh mũ! Ĕg tỹ kanhkā tá tũ mág nỹtĩn kỹ tag hā tóg há nĩ,” he tóg, Jesus ti.

Ĕg tỹ nén ũ to krĩ kufy han ke tũ
(Mt 6.25-34)

22Kỹ tóg ã mré mũ tí ag mỹ: “ha vé,” he mũ. “Vějĕn to jykrén kỹ krĩ kufyg tũg nĩ,” he tóg. “Inh hỹn ũri ne konh mũ’? Inh hỹn ne tunh mũ’?” he tũg nĩ. 23Topĕ tỹ ĕg han ja vē, ĕg tỹ ga kri mũ jé. Hã kỹ tóg ĕg jĕn ki rĩr ke mũ gé, ĕg kur ki ke gé. 24Sĕsĩ to jykrén nĩ. Ag mỹ ĕkrán tí’? Vó. Ag mỹ ājag jakré kunũg tí’? Vó. Ag mỹ pājó han tí’? Vó, ke tũ ag tóg nĩgtĩ, ge ra Topĕ tóg ag jĕn tí. Jĕsĩ kãfór ājag tóg nỹtĩ, Topĕ mỹ, hã kỹ tóg ājag jĕn ke mũ gé. 25Kỹ, Topĕ tỹ ĕg jé prĕr kỹ ĕg tóg mũnh mũ gé. Ĕg pi(jé) mũnh ke tũ nĩ, ti tỹ ĕg jé prĕr kỹ’. Ĕg tỹ to krĩ kufy han mũ ra ĕg tóg tũg mũ. 26Ĕg pi(jé) ĕg krĩ kufy tugrĩn, ĕg krĩ há tugnĩn mũnh ke tũ nĩ. Mũ jé ĕg tóg ke mũ, ti tỹ ĕg jé prĕr kỹ. Hã kỹ nén ũ ũ to krĩ kufy han tũg nĩ.

27Ka fej to jykrén nĩ gé. Jatun mỹ tóg mog tí. Rãnrhãj tũ tóg nĩgtĩ, kur han tũ tóg nĩgtĩ. Hã ra tóg sĩnvĩ nỹtĩgtĩ, ka fej ti, kỹ pã’i mág tỹ Salomão ĕn kur tóg ri ke tũ nỹtĩ ja nĩgtĩ, ti sĩnvĩ ja ra, vēnh kar kur sĩnvĩ kãfór ti nĩ, Salomão kur ti. Ki hã sóg tó mũ mỹr. 28Topĕ hã ne ka fej sĩnvĩ han tí’. Hã ra tóg kãnhmar kãgter tí, ka fej ti, ti sĩnvĩ ra. Ũri tóg há nỹtĩ, tỹ vaj kỹ tóg kógungun tí. Topĕ tỹ ka fej sĩnvĩ han kỹ tóg ājag kur ki rĩr ke mũ gé, ha vemnĩ. Kỹ ti to: “ti mỹ ĕg mỹ kur nĩm mũ vỹ?” he tũg nĩ. 29“Inh hỹn ne konh mũ’, ũri?” he tũg nĩ gé. To krĩ kufy han tũg nĩ. 30Topĕ ki ge tũ ag vỹ tag to jykrén mág tí. Hã ra ĕg jóg tỹ Topĕ vỹ ĕg ki kanhró nĩ, ĕg tỹ nén konh ke mũ ti, ĕg kur ti ke gé. Kỹ to krĩ kufy han tũg nĩ. 31Topĕ tỹ tỹ ĕg pã’i nĩ ĕn hã ve jé vãsãnsãn nĩ. Kỹ tag hã to jykrén nĩ. Kỹ Topĕ vỹ ājag mỹ ājag tỹ nén ve sór mág ĕn vin ke mũ sir,” he tóg, Jesus ti.

Kanhkã tá ĕg tũ
(Mt 6.19-21)

32“Kamĕg tũg nĩ, ājag pipir nỹtĩ ra. Ĕg jóg tỹ Topĕ vỹ ājag to há nĩ, hã kỹ tóg ājag mỹ kanhkã ti ven sór mũ, ha mĕ. 33Ājag tỹ nén kar vin nĩ, ũn vēsỹrĕnh mũ ag mỹ. Hã kỹ ājag tóg kanhkã tá tỹ nén ũ mág nỹtĩnh mũ. Tá ājag kuge tóg tũ’ henh ke tũ nĩ. Tag ki ĕg tóg ĕg jãnkamy fón tí, nén ũ kar to. Tá tóg tũ’ he jãvãnh nĩ, ĕg kuge ti. Tá ũ tóg pĕjunh kãtĩg ke tũ nĩ gé, tá ti ga tóg kaggranh ke tũ nĩ gé. Kanhkã tá ĕg tũ vỹ ge nĩ. Tũg jãvãnh ti nĩ. 34Ājag tỹ ga kri tỹ nén ũ mág nỹtĩn kỹ ājag tóg ga kri mũ mág sór mũ. Ājag tỹ hã ra kanhkã tá tỹ nén ũ mág nỹtĩn kỹ ājag tóg kanhkã ra mũ sór mũ, kỹ tag hã ne há nĩ,” he tóg, Jesus ti.

Ĕg tỹ Jesus kãtĩg mãn jãvãnh ke

35“Ĕg kur tỹ ĕg tóg vēsógfĩg tí, ĕg tỹ rãnrhãj há han jé. Ĕg lampião grug ĕg tóg tí, kuty kã, ĕg tỹ ve há han jé. Ĕn ri ke han nĩ, ājag tỹ inh kãtĩg mãn ke jãvãnh kỹ. 36Kỹ ājag tóg ũn camarada ri ke nỹtĩ. Kejĕn ag patrão vỹ hĕn ra tĩg mũ, ã prũ ke festa mág han jé. Kỹ ti camarada ag vỹ ti tỹ tá vỹn ke jãvãnh nỹtĩ. Ag tỹ ti jãvãnh há han kỹ tóg há tí, ag nũgnũr tũ nĩn kỹ. Kỹ ag tóg kãnhmar

ti tỹ jänkã tỹ tórón tórón ke kỹ mēnh mũ, kỹ ag tóg ti mỹ róm ke mũ sir, ti jun kỹ. ³⁷Kỹ tóg kejēn jun mũ sir, ag patrão ti. Kỹ tóg sér tĩ, ti camarada ag tỹ ti jãvãnh nỹtĩn kỹ. Kỹ tóg ag mỹ vĩ há han ke mũ sir. Kỹ tóg vēsóg fin kỹ ag mỹ: “nignĩ ra ver, mesa to,” henh ke mũ sir. Kỹ tóg ag mỹ vễjēn ven ke mũ. Ag patrão hã ne ã camarada ag mỹ vễjēn ven ke mũ, ha vemnĩ. Ki hã sóg tó mũ,” he tóg, Jesus ti. ³⁸“Hēn ri ke mũn tóg meia noite ki jun ke mũ, hēn ri ke mũn tóg galo kyr mũ ra jun ke mũ. Ti camarada ag tỹ ti jãvãnh kỹ nỹtĩn kỹ tóg ag mỹ vĩ há tãvĩ han ke mũ sir, ha vemnĩ,” he tóg, Jesus ti.

³⁹“Kỹ tag to jykrén nĩ, ha mẽ. Inh kãtĩg mãn ke vỹ ù tỹ nén ù pigju(g) tĩ kãtĩg ri ke nĩnh mũ. Û tỹ ti ìn krēm nĩ ěn pí(jé) ki kanhró nĩ, hora kã ti kãtĩg ke mũ ti. Û tỹ ti tỹ nén ù péju sór mũ tóg ěn ge nĩ, ha mẽ. Ti tỹ ti kãtĩg ke hora ki kanhró nĩ (hã) ra tóg ã kanē fãn mũ vễ, ti tỹ ti ìn kãra rã tũ nĩ jé. Hã ra tóg ki kãtĩg nĩ. ⁴⁰Ge ti nĩ, inh kãtĩg mãn ke ti. Věnh ki rĩr, vễnh ki ěmẽ. Ēprã ke fi kósın vỹ kãtĩg ke mũ, ãjag tỹ ti kãtĩg ke to jykrén tũ (hã) ra,” he tóg, Jesus ti.

Ûn camarada to comparação

(Mt 24.45-51)

⁴¹Kỹ Pedro vỹ ti mỹ: “Senhor!,” he mũ. “Ã tỹ ù mỹ ke nẽ, ã tỹ tó ja tag ti? Ã tỹ ù tỹ ã ki ge tũ ag mỹ ke mỹ, ěg mỹ ke mỹ vó?” he tóg, Pedro ti, Jesus mỹ.

⁴²Kỹ ěg Senhor tóg ti mỹ: “hỹ,” he mũ. “Kejēn patrão tóg hēn ra tĩg sór mũ, kỹ tóg ã camarada ag kã ù tỹ pã'i han mũ, ti tỹ ti jo ã mré camarada ag ki rĩr jé. Û tỹ ã rãnrhãj ki rĩr há han tĩ ěn kupręg tóg mũ, ti tỹ ag mỹ vễjēn ven jé, vễjēn ke horan ki. ⁴³Ti tỹ ag ki rĩr há han kỹ ti patrão vỹ ti mỹ vĩ há han ke mũ, ti kãtĩg mãn kỹ, ù tỹ ag ki rĩr há han mũ ěn mỹ. ⁴⁴Tỹ pã'i mág han jé tóg ke mũ, ti tỹ ti tũ ki rĩr kãn jé sir. Ki hã sóg ke mũ, ha mẽ. ⁴⁵Ti camarada ěn jykre kórég nĩn kỹ tóg věnhmỹ nĩ jãvo, ha mẽ. To jykrén kỹ tóg: “ěg patrão vỹ kãtĩg vãnh han mũ,” he mũ. Kỹ tóg ã mré camarada ag vóg kónãn kỹ ag mrãnmrãn mũ sir, fag ke gé. Kỹ tóg jatun mỹ jēn mág han mũ, ùn kronkron tĩ ag mré tóg kronkron kỹ pépév tĩ nĩ gé sir. ⁴⁶Kỹ ti patrão vỹ ti kãnhmỹ jun ke mũ, ha vemnĩ, ti tỹ ti jun ke kurã ki kãtĩg nĩn kỹ, ti hora ti ke gé, kỹ tóg ti vóg kónãn ke mũ gé sir, ti patrão ti, kỹ tóg ti fón ke mũ, Topẽ vĩ mranh tĩ ag mré hã,” he tóg.

⁴⁷“Topẽ camarada ù vỹ ã patrão kãtĩg ken jo ki rĩr há han tũ nĩgtĩ, ti patrão tỹ ti mỹ tó mũ ra. ã patrão vĩ ki króm tũ ti nĩgtĩ. Ti mrãnmrãn mág jé tóg ke mũ, ti patrão ti, Topẽ ti. ⁴⁸Û tóg ã tỹ nén han ke mẽ ja tũ nĩ, ti patrão vĩ ti, ti camarada ù ti. Hã ra tóg kórég han mũ gé. Kỹ ti patrão tóg ti mrãnmrãn ke mũ gé. Ti mrãnmrãn sĩ han jé tóg ke mũ jãvo. Û tóg vễnh kanhrãn mág han tĩ. Kỹ Topẽ tóg vễnh jykre há tãvĩ ve sór mũ sir, ti tỹ ki kanhrãn mág han mũ ěn to. Û mỹ ti vĩ mág tĩ, Topẽ ti, kỹ tóg ti tỹ ki króm há han ve sór mũ gé sir,” he tóg, Jesus ti.

Ũ tỹ Jesus tugrín ěg kato tĕnh ke
(Mt 10.34-36)

49“Ga kri inh mur, isỹ re pũr tĩg ri ke han jé, hã vỹ: ũn e tỹ inh ki ge mũ, he mũ. Sỹ re pũr tĩg ri ke ěn venh há tóg tí, hã ra tóg ver gru tũ nĩ. 50Ti grug to hã sóg vĕsỹrĕnh ke mũ. Iser ke vĕ, kỹ tóg inh mỹ e tí. Sỹ re jãvãnh tóg tí, inh vĕsỹrĕnh ke ti,” he tóg, Jesus ti.

51“Ājag hỹn iso: “vĕnh kar tỹ jagnĕ to há han jé tóg ke mũ,” he tí. Hã tũ vĕ. Ũ tỹ hĕn ri ke tỹ jagnĕ kato tĕ han jé sóg ke mũ, ha vemnĩ. 52Ha vé, ĩn pir krĕm ke fag vỹ jagnĕ kato tĕnh ke mũ. Ũn tãgtũ fag vỹ ũn régre fag kato tĕgtĕnh mũ ha. Kar ũn régre ěn fag vỹ ũn tãgtũ fag kato tĕgtĕnh mũ gé sir. 53Jagnĕ kato fag jagnĕ to jũgjũnh mũ. Ũ tóg Ā kósin kato tĕnh ke mũ, kỹ ũ tóg kejĕn Ā panh kato tĕnh ke mũ gé. Ũ fi vỹ Ā kósin fi kato tĕnh ke mũ, kỹ fi vỹ Ā mỹnh fi kato tĕnh ke mũ gé. Kỹ ũ tóg Ā má fi kato tĕnh ke mũ, kỹ fi tóg Ā jamré kato tĕnh ke mũ gé sir. Ge ti nĩgtĩ,” he tóg, Jesus ti.

Jesus jykre ki kanhrãn
(Mt 16.2-3)

54Kỹ tóg vĕnh kar mỹ tó mãn mũ gé, kỹ tóg ag mỹ: “kanhkã ve kỹ ājag tóg ta ki kanhró nỹtĩ,” he mũ. “Kanhkã góg tỹ tãtã kãtĩn kỹ ājag tóg: “ta vỹ kutĕnh mũ,” he tí. Ki kanhró ājag tóg nỹtĩgtĩ. 55Kar ājag tóg kãka ki kanhró nỹtĩ gé. “Tag tán kãtĩ mũ, kãka ti, kỹn hỹn jũ jagy ninh mũ, ha vemnĩ,” he ājag tóg tí gé. 56Ki kanhró ājag tóg nỹtĩ, ta jykre ti, kãka jykre ti, ga jykre ti ke gé. Hã ra ājag tóg inh jykre ki kanhrãnran sór tũ nĩ, sỹ ũri ājag mỹ tó mũ tag ti. Kutu ājag nỹtĩ, ha mĕ, hã kỹ ājag tóg ki kanhrãnran sór tũ nĩ,” he tóg, Jesus ti.

Ēg tỹ jagnĕ mỹ vĕnh pãte fón
(Mt 5.25-26)

57“Kỹ ājag tóg vĕnh jykre kuryj to jykren tũ nĩ gé, ājag tỹ jagnĕ mỹ vĕnh pãte fón jé, ājag tỹ ver ga kri mũn kỹ. 58Kejĕn ājag tóg jagnĕ mỹ vĕnh jykre vĕnhmỹ tó tí. Kỹ ājag tóg pã'i mỹ tónh mũ sir. Ā tỹ ũ to jũ mũ ěn vỹ Ā tónh tĩg sór mũ. Ti tỹ pã'i tá jun ke to hã ti mré vĩmnĩ. Ti mỹ: “inh mỹ vĕnh pãte fón,” hemnĩ. Ke tũ nĩ mũ ra pã'i vỹ Ā jykre pãno venh ke mũ, kỹ tóg polícia mỹ: “ti se ra,” henh ke mũ. Kỹ tóg Ā senh ke mũ sir. 59Ha mĕ, tá Ā kãnhmar kãkutĕ mãn ke tũ nĩ. Ā tỹ kajãm kãn kar kỹ Ā hĕn ri ke mũn tá kãkutĕ mãn ke mũ sir,” he tóg. Jesus tỹ ěg tỹ jagnĕ mỹ vĕnh pãte fón kãmĕn hã vĕ.

Ēg tỹ ěg jykre tovãnh ke

13 ¹Kejĕn ũ ag tóg Jesus tá junjun mũ, hã ra ag tóg ti vĩ mĕ kỹ nỹtĩ. Kurã ěn kã ũ ag tóg ti mỹ Galilĕia tá ke ag tó ja nĩ, fóg tỹ pã'i tỹ Pilatos tỹ ũn kãgtĕn ja ěn ag. Topĕ mỹ ag tóg ājag mĕg tãnh ja nĩ, ti mỹ pũn jé, hã ki

Pilatos tóg ag kygrēn ja nī, hā kŷ ag kyvénh tóg ājag mēg kyvénh mré kutē ja nī. Hā kāmén ag tóg, Jesus mŷ, ti tŷ ag mŷ e tīn kŷ, ag tŷ ūn kągter mŷ ag to: “ag hŷn Topē vī mranh mág,” hen kŷ. ²Kŷ Jesus tóg ag mŷ: “ājag hŷn Galiléia tá ke ēn to jykrén sór mŷ, ūn kągter mŷ ēn ag to,” he mŷ. “Topē vī mranh mág tī ag vē,” he ājag tóg mŷ ag to. “Ag hŷn vēnh jykre pāno han mŷ nī, ag hŷn Galiléia tá ke ag jykre pāno káfór han mŷ nī, hā kŷ Topē hŷn tóg ag vóg kónān mág,” he ājag tóg tī ag to. ³Ke tū vē hā ra. Ājag ri ke ag tóg nŷtī, mŷr, ha mē. Ājag tŷ ājag jykre tovānh tū nīn kŷ ājag tóg nŷgme ki vár ke mŷ, ha vemnī,” he tóg. ⁴“Ū tŷ 18 (ke) ēn ag to jykrén nī, ū tŷ goj tŷ Siloé tá kągter mŷ ēn ag. Īn téj ēn tóg ag kri kutē, ĩn vag jē ēn ti, hā kŷ ag kągter mŷ. Jerusalém tá ke kar ag jykre ri ke ja ag tóg nŷtī. Ag pí(jé) ag jykre pāno ēn káfór ja nŷtī. Ag ri ke han ja ag nŷtī, ha mē. ⁵Kŷ sóg ājag mŷ ke mŷ. Ājag tŷ ājag jykre pāno tovānh tūn kŷ ājag tóg nŷgme ki vár ke mŷ,” he tóg, Jesus ti.

Ka tŷ figueira to comparação

⁶Kŷ tóg ag mŷ: “ū tŷ Topē jykre han sór tū ag vŷ ge nŷtīnh mŷ, ha mē,” he mŷ. “Kejēn ū tóg nŷgtī. Ka há krān ja tóg nŷgtī, ka tŷ figueira. Ka kanē ū vē, ko há ti jē. Ēn krān ja tóg nī. Uva kāmī tóg ti krān ja nī. Kŷ tóg kejēn ti kanē ko sór mŷ, kŷ tóg venh kātī mŷ. Hā ra tóg kanēn ja tū nī. ⁷Kŷ tóg uva ki rīr tī mŷ: “ti gŷn ra,” he mŷ. “Prŷg tāgtū tóg nī ha, sŷ ti kanē vég tū ki. Kanēn vānh ti hŷn jē. Ti gŷn ra, ti tŷ ga kókég tū nīn jé,” he tóg. ⁸Hā ra tóg ā patrāo mŷ: “ti tovānh ra ver,” he mŷ, uva ki rīr tī ti. “Ti pénīn sóg kŷm mŷ ver, sŷ ti krēm ga jēgja han jé ver. ⁹Hēn ri ke mŷn tóg kanē há hyn han ke mŷ ha. Ke tū nīn kŷ sóg ā mŷ ti gŷn ke mŷ vāhā,” he tóg mŷ, uva ki rīr tī ti,” he tóg, Jesus ti. Ti tŷ ū tŷ ā jykre kórég tovānh sór tū tón hā vē.

Jesus tŷ vēnhkán ke kurā ki ūn kaga tŷ há' he

¹⁰Kejēn tóg ag vēnh kanhrān jafā krēm ag kanhrān mŷ, Jesus ti, vēnhkán ke kurā ki. ¹¹Kŷ ū fi tóg tá jē nī. Jagrē kórég fi nī, hā kŷ fi tóg pānh ke kŷ jē nī. Vēnh ra hā jē kórég fi tóg nī, fi jagrē tugnīn. Prŷg tŷ 18 (ke) han fi tóg, fi jagrē tŷ fi kagāg tī ki. ¹²Kŷ Jesus tóg fi vég mŷ, kŷ tóg fi jé prēr mŷ. “Kunīg, jŷ,” he tóg. “Ā kaga tŷ sóg tū' henh mŷ,” he tóg fi mŷ. ¹³Kŷ tóg ā nŷgē tŷ fi kri fig mŷ. Kŷ fi tóg vēnh ra hā jēg há han mŷ, ha mē. Kŷ fi tóg Topē to vī há han mŷ sir.

¹⁴Hā ra vēnh kanhrān jafā to pā'i tóg Jesus to jŷ mŷ, ti tŷ vēnhkán ke kurā ki fi tŷ há' hen kŷ. Ti mŷ tóg tŷ vēnh rānhrāj nī, fi tŷ há' he mŷ tag ti, hā kŷ tóg Jesus to jŷ mŷ. Kŷ tóg vī mŷ sir. Vēnh kar jyvėn kŷ tóg ag mŷ: “kurā tŷ 6 (ke) hā ki ēg tóg rānhrāj ke mŷ ha,” he mŷ. “Hā kŷ kurā tŷ 6 (ke) ēn ki kāmŷmnī, ti tŷ ājag tŷ há' hen jé. Vēnhkán ke kurā ki vēnh kygtāg kāmŷ tŷg nī,” he tóg mŷ, pā'i ti.

¹⁵Hā ra Jesus tóg ti vī káfān mŷ, kŷ tóg: “jykre régre ā nī (mŷr),” he mŷ. “Vēnhkán ke kurā ká ājag tóg ājag mēg ki rīr tī gé, monh ki, cavalo ki ke gé, ha mē. Ājag mēg kygvān ājag tóg tī, ājag tŷ ti kron mŷn jé, ti tŷ ĩn kākā se kŷ jē

kỹ, cocho to. ¹⁶Kỹ tag fi vỹ se kỹ jẽ ẽn ri ke jẽ ja nĩ gé, ha mẽ. Satanás hã vỹ fi sé!, prỹg tỹ 18 (ke) ki. Ēg jóg!jóg ve tỹ Abraão kósin ũ fi vẽ, ěg mẽg kãfór fi tóg jẽ, hã ra ã tóg jũ sór mũ, isỹ vẽn kán ke kurã ki fi tỹ há! hen kỹ, isỹ fi kavãn ri ke han kỹ. Vẽnh jykre vẽnhmỹ han sór ã tóg nĩ,” he tóg, Jesus ti, pã'i ti mỹ.

¹⁷Ti vỹ tag to ag tóg mỹ!ãg!ãg mũ sir, ti kato tẽ mũ ag. Hã ra tóg vẽnh e ẽn mỹ sér ti sir. Ag mỹ tóg nén ũ kar há han tí, hã kỹ tóg ag mỹ sér ti sir.

Mostarda fy to comparação

(Mt 13.31-32; Mc 4.30-32)

¹⁸Kỹ Jesus tóg ag mỹ: “Topẽ tỹ tỹ ěg pã'i nĩnh ke vỹ ge nĩ, ha mẽ,” he mũ. ¹⁹“Vãn h tỹ mostarda fy ri ke ti nĩ. Sĩ ti nĩ, ti fy ti. Ēg japỹ ki ěg tóg krãn tí, kỹ tóg mog tí. Kỹ tóg ka ri ke nĩ, ti tỹ pẽ téj nĩn kỹ. Hã kỹ sēsĩ tóg kri jagfẽn h ke mũ, ti pẽ kri, ti pẽ mág nĩn kỹ. Topẽ tỹ tỹ ěg pã'i nĩ kãme tỹ vẽnh kar kri rúm ke to ken hã vẽ,” he tóg, Jesus ti.

Fermento to comparação

(Mt 13.33)

²⁰Kỹ tóg ag mỹ: “Topẽ tỹ tỹ ěg pã'i nĩn kỹ tóg tag ri ke nĩnh mũ, ha mẽ,” he mãn mũ. ²¹“Ūn týtá fag vỹ pão han tí, farĩnh tỹ. Pão han jé fag tóg pão jęgja jafã tỹ fermento ẽn tỹ farĩnh mré jęgjãg tí. Kejẽn ũ fi tóg farĩnh e kãki ti jãgja jafã pir tỹ kãki vãm ja nĩ, hã ra tóg tỹ sòn ke kãn,” he tóg, Jesus ti. Ti vỹ tỹ vẽnh kar kri rúm ke kãmén hã vẽ.

Jãnkã sĩ to comparação

(Mt 7.13-14; 21-23)

²²Kỹ Jesus tóg ti mũ. Cidade e fĩn rãm tóg mũ, ěmã kãsir fĩn ke gé. Tĩg kỹ tóg ag kanhrãn rãn mũ sir. Ge kỹ tóg komẽr hã cidade tỹ Jerusalém kukãm tí mũ. ²³Kỹ ũ tóg ti mỹ: “Senhor!,” he mũ. “Ūn krenkren mũ ag mỹ pipir nỹtĩ, e nỹtĩ vó?” he tóg ti mỹ. Kỹ tóg ti mỹ: ²⁴“hỹ,” he mũ. “Inh ki rã vỹ jãnkã sĩ ra rã ri ke nĩ,” he tóg. “Vãsãn nĩ, ã tỹ ra rã jé. Kejẽn ũ tóg ra rã mãn ke tũ nĩ ha. Ēn kã ũ tỹ hẽn ri ke ag vỹ ra ge sór mũ, hã ra ag tóg tỹ hẽ ri kenh ke tũ nĩ ha sir. ²⁵Īn ki rĩr tí ẽn tỹ nífẽn h ja vẽ mỹr, hã kỹ ag tóg ĩn kãra genh ke tũ nĩ ha. Kanhkã to ken hã vẽ, ĩn ti. Īn ki rĩr tí ẽn hã ne nífẽn h ke mũ!, kỹ ãjag tóg sir re tá nỹtĩnh kỹ tỹ tórón! tórón! kenh ke mũ. “Senhor! ěg mỹ róm, ěg mỹ nón, jãnkã ti,” he jé ãjag tóg ke mũ. Hã ra tóg sir ãjag mỹ: “ãjag ki kagtĩg sóg nĩ,” henh ke mũ, ĩn ki rĩr tí ti. “Ãjag tỹ ũ nỹtĩ?” he jé tóg ke mũ. ²⁶Kỹ ãjag tóg ti mỹ: “ã mỹ ěg ki kagtĩg?” henh ke mũ. “Ēg hã vỹ ã mré jẽn ja nĩ, ěg hã vỹ ã mré kron ja nĩ, ěg kanhrãn ja ã tóg nĩ, ěg jamã tá. Ēg hã vẽ,” he jé ãjag tóg ke mũ, ãjag tỹ re tá nỹtĩn kỹ. ²⁷Hã ra tóg ãjag mỹ: “inh pi(jé) ãjag ki kanhró nĩ!,” henh ke mũ. “Ãjag pi(jé) tỹ inh mré ke nỹtĩ! Ha mũjẽg. Vẽnh jykre pãno han ãjag tóg mũgtĩ,” he jé tóg ke mũ, ĩn ki rĩr tí ti, ãjag mỹ. ²⁸Ãjag tỹ ra mũnh ke tá ãjag tóg vēsỹrẽn h ke mũ, tá ãjag jã tóg gyngyn ke mũ, gangan ke jé ãjag

tóg ke mũ, tá. Kór há tá ãjag tóg Abraão venh ke mũ, tá, Isaque ke gé, Jacó ke gé, Topê ví tó tí ag kar ke gé. Ën ag kar vỹ Topê tỹ tỹ ãg pã'i nĩ venh mũ sir, ãjag jãvo. ²⁹Ën kã Topê ki ge kỹ nỹtĩ kar ag tóg kãmũnh mũ, rã jur ja tá, rã pur ja tá, kanhkã fyr tá, rã krêm tĩg ja tá. Kãmũ kỹ ag tóg Topê tỹ tỹ ãg pã'i nĩ venh ke mũ, ti tỹ ag ki rĩr nĩ ti, kỹ ag tóg tá jãg nỹtĩnh mũ ãjag jãvo. ³⁰Kỹ tag ki ùn kãsir ù ag tóg mág nỹtĩnh mũ, tá pã'i nỹtĩnh mũ. Kỹ tag ki ùn mág ù ag tóg kãsir nỹtĩnh mũ gé, tá, tére kỹ,” he tóg, Jesus ti.

Jesus tỹ Jerusalém tá ke ag to há nĩ

(Mt 23.37-39)

³¹Kurã ãn kã Fariseu ù ag tóg tá junjun mũ, Jesus mré vēmén jé. Ti mỹ ag tóg: “ha mẽ,” he mũ. “Pã'i mág tỹ Herodes vỹ ã tén sór mũ. Hã kỹ vėnh péju tĩg, ěmã ù ra,” he ag tóg mũ sir, Jesus mỹ.

³²Kỹ tóg ag mỹ: “mĩg sĩ ri ke ti nĩ, Herodes ti,” he mũ. “Hã kỹ tóg ke mũ. Ver sóg vėnh jagrẽ kórég pan mũ, ùn kagyga ag tỹ há' he jé sóg ke mũ, ùri, vaj kỹ ke gé, kurã tỹ hėn ri ke ki. Kãnhmar sóg ter ke mũ, inh kurã ki, ha vemnĩ. ³³Ûri sóg ver tĩg mũ, vaj kỹ ke gé, vaj ùn kỹ ke gé. Iser ken kỹ sóg Jerusalém tá ter ke mũ. Tag ki ke pijé'. Topê ví tó tí vỹ tỹ inh nĩ, jo Jerusalém tá ke ag tóg ag kãgtén tĩ, Topê ví tó tí ag. Hã kỹ sóg Jerusalém tá ter tĩg ke mũ gé. Tag tómnĩ, Herodes mỹ,” he tóg, Jesus ti.

³⁴Kỹ tóg Jerusalém ki ke ag to vēmén mũ. Fe kaj han tóg, ag to, kỹ tóg: “Jerusalém tá ke ag mỹ sóg tag tó sór mũ, ha mẽ,” he mũ. “Topê ví tó tí ag kãgtén ag tóg tí. Topê tỹ ag mỹ ùn jėgnėg tí ag pin ag tóg tí, pó tỹ, ag tỹ ag kãgtén jé. Isỹ ag vėnh mãn há tóg tí vė, isỹ ag ki rĩr jé, Jerusalém tá ke ag, hã kỹ sóg ag jé prěr tỹ hėn ri ke han mũ. Garĩnh fi jykre ri ke han sór isóg mũ vė, ag mỹ. Garĩnh fi vỹ ã krẽ kri jė nĩ, fi tỹ ag vėsỹrėnh tũ nĩ jé ke vė. Ën ri ke han sór sóg mũ vė, hã ra ag tóg ke jãvãnh nỹtĩ. ³⁵Hã kỹ ag tóg ag jamã pũn kãn ke mũ, kỹ vãpũr vė sir. Û vỹ kãnhmar tá nĩg mãn ke tũ nĩ ha, ag tỹ cidade kókén ja tá. Hã kỹ sóg ag mỹ ke mũ. Inh ve mãn ke tũ ag nĩ ha (mỹr). Kejėn ag tóg iso: “Topê tỹ ti jėnė ja vė,” henh ke mũ. “Topê vỹ ti ve há han, ti tỹ ti jiji tó kãtig kỹ,” he jé ag tóg ke mũ iso. Ën hã kã ag tóg inh ve mãn ke mũ,” he tóg, Jesus ti.

Jesus tỹ vėnhkãn ke kurã ki ù tỹ há' he

14 ¹Kejėn tóg vėnhkãn ke kurã tá krỹg mũ. Kỹ tóg pã'i ù ĩn krēm nĩ nĩ. Fariseu ag pã'i vė. Ti tỹ ti ĩn krēm jėn ke vė. Hã ra ag tóg tá ti tỹ rĩr mũ, “ti mỹ vėnhkãn ke kurã ki rãnhraj ke tũ?” he ag tóg mũ.

²Hã ra ù tóg tá nĩ gé, ùn kaga ù. Kãnhpar kãn kỹ tóg jė. Jesus rĩn ja tá tóg jė nĩ. ³Kỹ Jesus tóg Topê ví to professor ag mỹ ke mũ, Fariseu ag mỹ ke gé. Ag mỹ tóg: “ėg tỹ vėnhkãn ke kurã kã ù tỹ há' hen mỹ há nĩ, mỹ kórég nĩ vó?” he mũ. ⁴Hã ra ag tóg ti mỹ nén ù tó tũ nĩ. Kỹ Jesus tóg ùn kaga ěn kri ã nĩgė fi kỹ ti tỹ há' he mũ sir. Kỹ tóg ti mỹ: “ha tĩg ge,” he mũ. ⁵Kỹ tóg ag mỹ: “kejėn ãjag kósın ù tóg goj ki kutėnh mũ,” he mũ, “goj nig ki, ke tũ nĩn kỹ

ājag mēg tỹ monh. Vēnhkán ke kurā ki tóg goj ki kutēnh mũ, hēn ri ke mũn. Kỹ ājag tóg ti kunũg tĩ gé, ti tỹ vēnhkán ke kurā kã ki kutēn kỹ. Kỹ ājag tỹ ne jé iso jũ sór nē?” he tóg. ⁶Kỹ tóg ag tỹ ti mỹ nén tónh ke tóg tũ ti sir.

Festa to comparação

⁷Kỹ Jesus tóg vēnh kar kanhrān jé tag tó mũ sir, ha mē. Ti mré jēg jēn kỹ nỹtĩ ag mỹ tóg kāmén mũ. Ag jēn vén sór vē, ag tỹ tỹ ũn mág nỹtĩ jé. Hã vэг tóg mũ, hã kỹ tóg ag kanhrānrān sór mũ, Jesus ti. ⁸Kỹ tóg ag mỹ: “kejēn ũ tóg ājag mỹ: “kurā ēn kã sóg vēnh prũg ke to festa han ke mũ. Ha inh mré jēn kãtĩg,” henh ke mũ. Kỹ ti festa kã jēn vén sór tũg nĩ. Hēn ri ke mũn ā kãfór nĩ ũ tóg ki jun mũ. ⁹Kỹ festa ki rĩr mũ tóg ā mỹ: “toreg ver!,” henh ke mũ. “Ti jēn kar kỹ ā tóg jēn ke mũ. Mē kỹ jē nĩ ver,” he jé tóg ke mũ ā mỹ, ũ tỹ festa ki rĩr tĩ ti. Kỹ tóg ā mỹ'a tĩnh mũ sir, ha mē. ¹⁰Kỹ ā tỹ festa venh tĩg kỹ mē kỹ nĩmnĩ ver, vėjēn jāvānh kỹ. Kỹ festa ki rĩr mũ vỹ ā mỹ: “ha jēn vén, fag mré,” henh ke mũ. Kỹ ā pi(jé) mỹ'āg ke mũ!” he tóg ag mỹ, Jesus ti. ¹¹“Hã kỹ tóg ũ tỹ ag kãfór nĩ sór mũ térem ke mũ, vēsỹkã, Topē ti, ha vemnĩ. Jãvo tóg ũ tỹ: “tỹ inh ũn sĩ nĩ,” he mũ ēn jānfyn ke mũ, ha vemnĩ,” he tóg, Jesus ti.

Ēg tỹ ũn jagtar ag jagāgtān

¹²Kỹ tóg ũ tỹ ā kógfyn mũ ēn mỹ kāmén mũ gé. Ti mỹ tóg: “ā tỹ festa han sór kỹ ũn rico ag mỹ tó sór tũg nĩ, ā mré ke fag mỹ, ā kãke ag mỹ, ā jãvy ag mỹ, ā rã nỹtĩ ag mỹ tó tũg nĩ gé,” he mũ. “Ā tỹ ũn rico ag mỹ tó mũ ra ag tóg vēnh kaja jé ā mỹ festa han sór mũ gé. Kỹ ā tóg ā festa kaja ti vэг mũ sir, ēprã. ¹³Ā tỹ festa han sór kỹ ũn kaga kỹ rānhrāj vānh ag mỹ tómnĩ, ũn kãnhgrĩ ag mỹ, ũn kyvó ag mỹ. ¹⁴Ā tỹ tag han kỹ Topē vỹ ā ve há han ke mũ, ha vemnĩ. Ā mỹ ag tóg festa han ke tũ nĩ, ag tỹ nén ũ tũ nĩn kỹ. Kỹ ā tóg ā rĩr mǎn ken kỹ ti kaja venh ke mũ, Topē tỹ ũn jykre kuryj kar rĩnrĩr mǎn ke kurā ēn kã,” he tóg, Jesus ti.

Festa mág to comparação

(Mt 22.1-10)

¹⁵Kỹ tóg tá nĩ ũ mỹ mē há tĩ, Jesus vĩ tag ti. Tá nĩg kỹ tóg ag mré jēg mũ gé, hã kỹ tóg Jesus vĩ mēg mũ. Kỹ tóg ti mỹ: “ũ tỹ Topē tỹ tỹ ēg pãi nĩ vэг mũ mỹn hỹn sér pē tĩnh mũ, ũ tỹ tá festa vэг mũ ēn mỹ,” he mũ.

¹⁶Kỹ Jesus tóg ti kanhrān kỹ ti mỹ: “kanhkã tá festa vỹ ge nĩnh mũ, ha mē,” he mũ. “Kejēn ũ tóg nĩgtĩ. Festa mág han sór tóg mũ, kỹ tóg ũ tỹ hēn ri ke ag mỹ tó ja nĩ, ti tỹ festa han ke to hã. ¹⁷Ti festa kurān kã tóg ā camarada jēnēg mũ, ti tỹ ũn kógfyn kỹ nỹtĩ ag mỹ: “ha kãmũjēg,” he jé. “Kar kỹ tóg nĩ ha, inh festa ti,” hemnĩ,” he tóg, ā camarada mỹ. Kỹ tóg ag mỹ tónh tĩ mũ sir. ¹⁸Hã ra ag tóg ve sór tũ nĩ, ag kar ti, hã kỹ ag tóg ti mỹ vĩ mũ. ũ tóg ti mỹ: “ga kajām inh,” he mũ. “Hã kỹ sóg ijapỹ venh tĩ mũ ver. Ũri tóg inh mỹ vēnhmỹ tĩ. Sỹ festa venh tĩg ke vē vē, hã ra tóg vēnhmỹ tĩ,” he tóg mũ. ¹⁹Kỹ ũ tóg ti mỹ: “monh génh sóg, monh tỹ 5 (ke) régre,” he mũ gé. “Kỹ sóg ag venh tĩ mũ ver.

Sỹ festa venh tĩg ke vễ vễ, hã ra tóg vễnhmỹ ti,” he tóg mũ gé sir, ù ti. ²⁰Kỹ ù tóg ti mỹ: “ũri sóg prũg mũ ha, hã kỹ tóg vễnhmỹ tĩ,” he mũ gé.

²¹Kỹ ti camarada tóg ti mỹ tónh kãtĩ mũ, ã patrão mỹ. Kỹ tóg jũ mũ. Ti mỹ tóg: “ẽpry ra tĩg, ẽmĩn mág ra, ẽpry kãsir ra ke gé, ẽmã kar ki,” he mũ. “Kỹ ùn jagtar ag tatĩ kãtĩg, ùn kónhgri ag, ùn kyvó ag, ùn tĩg vãnh ag ke gé,” he tóg. Á camarada mỹ tóg ke mũ. ²²Kỹ tóg tĩg mãn mũ, ti camarada ti. Kỹ tóg tá vỹn ke kỹ ã patrão mỹ: “ke kãn inh huri,” he mũ. “Ag tatĩ kãtĩg inh huri, hã ra tóg fór tũ nĩ ver, festa jo ìn ti,” he tóg mũ, ti camarada ti, ti patrão mỹ.

²³Kỹ ti patrão tóg ti mỹ: “vễsỹkã tĩg mãn ge,” he mũ. “Vãnh kãmĩ tĩg, ẽmã kãsir pẽ kãmĩ ke gé, ẽpry ra, ẽmĩn jagma,” he tóg. “Tá ag mỹ tũgtónh tĩg. Ag kutãn nĩ, ag kãmũ jé, festa jo ìn fór jé,” he tóg, patrão ti, ã camarada mỹ,” he tóg, Jesus ti.

²⁴“Hã kỹ sóg ăjag mỹ ke mũ,” he tóg. “Û mỹ sóg tó vén ja nĩ, hã ra ag tóg inh festa venh ke tũ pẽ nĩ, sỹ ù mỹ tó vén ja ag,” he tóg. Jesus tỹ Fariseu ag mré jẽn kỹ ag mỹ kãmén hã vễ.

Ēg tỹ ěg jykre tovãnh

(Mt 10.37-38)

²⁵Kejẽn ùn e ag tóg Jesus nón mũ mũ. Kỹ tóg ag jé vĩrĩn ke kỹ ag mỹ: ²⁶“ha mẽ,” he mũ. “Û tỹ inh mré tĩg pẽ han sór mũ jé inh hã to há kãfór nĩ, ã han mũ fag kri, ti prũ fi kri, ti krẽ kri, ti kãke ag kri, ti jãvy ag kri, ti ve fag kri, vễnh kri ke gé, mỹr, ha mẽ,” he tóg. “Ke tũ nĩ mũ ra tóg inh mré kãtĩg ke tũ nĩ, kỹ tóg tỹ inh mré ke nĩnh ke tũ nĩ gé. ²⁷Ha vé, ag tỹ inh cruz tỹ inh kri fi kỹ sóg tĩg ke mũ, ag tỹ to isa kỹ isén jé, ha vemnĩ. Vễnh nenh ke tũ sóg nĩ. Û tỹ inh ri ke han sór tũ nĩn kỹ tóg inh mré kãtĩg ke tũ nĩ, kỹ tóg tỹ inh mré ke nĩnh ke tũ nĩ gé,” he tóg, Jesus ti,

²⁸“To jykrén, ù tỹ ìn téj han sór mũ ẽn to. Ti tỹ ìn téj han sór kỹ tóg ã jãnkamy nĩkrén vén ke mũ. Kỹ tóg ìn kaja to jykrén ke mũ gé sir. Kar kỹ tóg ìn han sór ke mũ vãhã. ²⁹Ti tỹ to hã to jykrén há han tũ ra tóg vễnhmỹ tĩ. Kỹ tóg ìn jęg ken ki kũm kỹ ti króggróg han ke mũ sir. Ti króggróg han kỹ ti jãnkamy tóg tũl henh ke mũ, kỹ tóg tovãnh ke mũ sir, ti tỹ ìn han ti. Kỹ ti mré ke ag tóg ti to vĩ kỹ ti nynh mũ sir. ³⁰Ti to ag tóg: “ha mẽ, ìn téj han sór tóg mũ vễ, hã ra tóg to jykrén há han ja tũ nĩ, hã kỹ tóg kar tũ nĩ,” henh ke mũ, ti régre ag,” he tóg.

³¹“Kar pãli mág to jykrén nĩ gé. Pãli ù tỹ ti mré vễnh génh sór kỹ tóg ã krêm ke ag nĩkrén ke mũ gé sir, vễnh génh ke to hã. “10 mil (ke) ěg nỹtĩ,” he jé tóg ke mũ. “Ēg mỹ ag tỹ hẽn ri kenh mũ vỹ?” he jé tóg ke mũ. “20 mil (ke) ag nỹtĩ. Ag mỹ ěg tỹ tũl he kãn ke tũ nĩ vỹ? Ēg kãfór ag tóg nỹtĩ. Ēg hỹn hẽ ri kenh mũ, ag tỹ ěg tovãnh jé?” he jé tóg ke mũ, pãli ti. ³²Ti tỹ tag to jykrén kỹ tóg pãli ù ẽn mỹ vễnh vĩ jẽnẻnh mũ, ti tỹ kór há tá nĩ (hã) ra, kuvar há tá. Ti mỹ vễnh vĩ jẻnẻn kỹ tóg ti mỹ: “ã mỹ ěg tovãnh ke tũ nĩ?” he mũ. “Inh ã mỹ ne nĩm mũ, ã tỹ isovãnh jé?” he jé tóg ke mũ, pãli ẽn mỹ,” he tóg, Jesus ti.

³³“Hã kÿ to jykrén nĩ, ãjag tÿ inh mré mũ pẽ han ke to. Iso há kãfór nÿtĩmnĩ, ãjag tũ kar kri. Ke tũ nĩ mũ ra ãjag pi(jé) inh mré mũ pẽ han mũ,” he tóg, Jesus ti.

Sa to comparaçáo

(Mt 5.13; Mc 9.50)

³⁴“Sa vÿ há nĩ. Hã ra sa kãhór tĩn kÿ ãg tÿ ne tÿ ti tÿ kajã' henh ke tóg tũ tĩ, tÿ sa' he mãn ke tũ tóg tĩ,” he tóg. ³⁵“Ti kãhór tĩn kÿ tóg kórég nĩ, kÿ ãg tóg fón tĩ. ãg pi(jé) ãg japÿ ki ti fón tĩ', ti tÿ ãg jakré tÿ há' he tũ nĩn kÿ, sa kãhór ti. Ti fón pẽ han jé ãg tóg ke mũ. Ri ke ãjag nÿtĩ, ãjag tÿ inh mré mũ pẽ han tũ nĩn kÿ. Jẽmẽ há han nĩ, sÿ ãjag mÿ nén tó mũ tag ti,” he tóg, Jesus ti.

Ovelha vãfor to comparaçáo

(Mt 18.12-14)

15 ¹Kejẽn ù tÿ imposto mãg tĩ ag tóg ti to kãmũ mũ, Topẽ vĩ mranh tĩ ag ke gé. Ag tÿ ti vĩ mẽ sór vẽ. ²Kÿ tóg Fariseu ag mÿ kórég nÿ, Topẽ vĩ to professor ag mÿ ke gé. Kÿ ag tóg ti to vĩ vĩ he mũ sir. “Topẽ vĩ mranh tĩ ag to tóg há nĩgtĩ, tag ti,” he ag tóg mũ. “Ag mré tóg jẽg tĩ mÿr,” he ag tóg mũ, Jesus to.

³Kÿ tóg ag kanhrãn jé ag mÿ: “ù tÿ Topẽ vĩ mranh mũ tÿ ã jykre kórég tovãnh kÿ tóg ge nÿnh mũ, ha mẽ,” he mũ. ⁴“Û tóg nĩ ja nĩgtĩ,” he tóg. “Ti mẽg tÿ mé vÿ tÿ 100 (ke) nÿtĩ, ti mẽg tÿ ovelha ti. Kÿ ti mẽg pir tóg vãfor mũ. Hã ra tóg ti kanẽg tĩ mũ, ti jãvãnh tĩ tóg mũ, ha mẽ. Ûn e ãn tovãnh kÿ tóg ùn pir ãn nón tĩ mũ. Ga kórég tá ag nÿtĩ, ti mẽg kar ãn ag. Ag togvãnh kÿ tóg ùn pir ãn nón tĩ mũ, ha mẽ. ⁵Kÿ tóg ti vég mũ sir, ti mẽg vãfor ja ãn ti. Kÿ tóg ã nunh kri ti fi kÿ ma tĩ mũ. Ti fe tóg mrin ke mũ sir. ⁶Kÿ tóg ã ãn tá jun mũ. Tá tóg ã kanhkã fag jé prẽr mũ, ti rã há nÿtĩ fag kar. Kÿ tóg fag mÿ tó mũ. “Inh mré ti to mÿ sér,” he tóg. “Inh mẽg vÿ vãfor ja nĩ, há ra sóg ti ve mãn mũ ha,” he tóg mũ, ã mẽg to,” he tóg, Jesus ti. ⁷“Hã ra tóg ge nĩ, ha mẽ. Û tÿ 99 (ke) ag tÿ vẽnh jykre kuryj han kÿ tóg há tĩ sir, kÿ tóg mÿ sér tĩ sir, kanhkã tá ke ag mÿ. Hã ra tóg mÿ sér kãfór tĩ, ùn pir tÿ ã jykre kórég tovãnh kÿ, ti tÿ ã tÿ Topẽ vĩ mranh mũ ãn tovãnh kÿ, ha mẽ. Kÿ isũ ag vÿ e nÿtĩ,” he tóg, Jesus ti.

Jãnkamy vãfor to comparaçáo

⁸“Kÿ ùn tÿtá to vẽme vÿ ge nĩ, ha mẽ,” he tóg. “Jãnkamy tÿ 10 (ke) tÿ fi tũ nĩ, jãnkamy tÿ por dia kaja tÿ 10 (ke) tÿ. Kejẽn ùn pir tóg fi mÿ vãfor mũ, kÿ fi tóg lampião grug mũ sir. Fi ãn kãmĩ fi tóg prun kãn mũ. Ve há han fi tóg mũ, jãnkamy ãn kanẽg jé, ãn péno kar mã há. ⁹Vãhã fi tóg kejẽn ve mãn mũ sir. Kÿ fi tóg ã mré ke kar fag jé prẽr mũ, fi rã há nÿtĩ fag kar ke gé. Kÿ fi tóg fag mÿ: “inh mré to mÿ sér,” he mũ. “Inh jãnkamy vÿ vãfor ja nĩ, há ra sóg ve mãn mũ ha,” he fi tóg mũ. ¹⁰Hã ra tóg ge nĩ, kanhkã tá, ha mẽ. Topẽ tÿ jẽnẽ jafã ag mÿ tóg sér tãvĩ tĩ, ù tÿ ã jykre kórég to jũn kÿ, ti tÿ ã tÿ Topẽ vĩ mranh ãn tovãnh kÿ, ha mẽ,” he tóg, Jesus ti.

Ûn kósín vāfor to comparação

11 Kÿ tóg ag mÿ tag tó mÿ gé sir, ha mē. “Û vÿ tóg kósín régre ja nĭgtĭ,” he tóg. 12 “Kÿ ti kósín tÿ ěgno tóg ā panh mÿ: “panh!” he mÿ. “Inh mÿ ũri isū nĭm, ā tÿ inh mÿ nĕn nĭm ke mÿ ěn ti,” he tóg, ā panh mÿ. Ti tÿ to vĭnh ke tÿ vĕ vĕ, hā ra tóg to vĭ mÿ. Ge ra ti panh tóg ā krĕ mÿ ā tÿ vĕnh kāpām mÿ sir. 13 Kānhmar ti kósín kyrŭ tóg ā tÿ mĕn kÿ kór há ra, kuvar há ra tĭ mÿ, ga ũ ra. Tá tóg ā tÿ vām kĕn mÿ, nĕn ũ kórég kar to. 14 Vām kĕn ja tóg nĭgtĭ, ti jānkamy ti. Kÿ tóg kejĕn tá prÿg han mÿ sir, ga ěn tá. Kÿ kyrŭ ěn tóg kókĭr mÿ gé. 15 Kÿ tóg tá ke ũ mrĕ vĕmĕn tĭ mÿ, ti tÿ ti mÿ vĕnh rĕnhraj nĭm jĕ. Kÿ tóg ti jĕnĕg mÿ, ti tÿ ti porco ki rĭr jĕ sir, ti safra tá. 16 Kÿ tóg porco jĕn ko sór mÿ, ti kókĭr nĭn kÿ. Hā ra ag tóg ti mÿ nĕn ũ nĭm tŭg mÿ, ti tÿ ko jĕ. Hā kÿ tóg kókĭr tāvĭ nĭ sir. 17 Kÿ tóg kejĕn krĭ há han mÿ. To jykrĕn tóg mÿ sir. “Inh panh mÿ rĕnhraj tĭ ag vÿ pĕo mág ko tĭ. Ag mÿ tóg kĕn tĭ, ag jĕn tĭ. Jo sóg kókĭr kÿ ter ke mÿ,” he tóg, kyrŭ ti, ā pir mÿ nĭn kÿ. 18 “Inh jĕ hÿn inh panh kukĕm tĭg ha,” he tóg. “Kÿ sóg ti mÿ: “panh!” hĕnh ke mÿ. “Kanhkĕ tá nĭ ěn vĭ mranh inh, ā vĭ ti ke gé. 19 Kÿ sóg vĕnhmÿ tÿ ā kósín tÿ nĭ. Sÿ tÿ ā camarada nĭnh há tóg tĭ,” he jĕ sóg ke mÿ, inh panh mÿ,” he tóg mÿ, kyrŭ ti. 20 Kÿ tóg tĭ mÿ sir, ā panh kukĕm.

Hā ra ti panh tóg kór há tá, kuvar há tá ti vĕg mÿ, kÿ tóg ti kato tĕ mÿ. Ti kato tĕ kÿ tóg ti ki póm ke mÿ sir, ti ki nhun ke tóg mÿ gé sir. 21 Kÿ ti kósín tóg ti mÿ: “panh!” he mÿ. “Kanhkĕ tá nĭ ěn vĭ mranh inh, ā vĭ ke gé. Hā kÿ sóg vĕnhmÿ tÿ ā kósín tÿ nĭ ha,” he tóg, ti panh mÿ.

22 Hā ra ti panh tóg ti mÿ: “vó, vĕnh pĕte fón kÿ tóg nĭ,” he mÿ. Kÿ tóg ā camarada ag mÿ: “kur há tāvĭ ěn ma kĕmŭjĕg,” he mÿ, “ti tÿ kur tāg ra rĕ jĕ. Ti mÿ nĭgĕ kĕnĭm ja nĭm gé. Pĕn né ěn tÿ, pĕn to ró ěn tÿ ti mÿ jun gé. 23 Monh tāgy ěn venh mŭjĕg. Ti tānh ra, ěg tÿ ko jĕ, ěg fe tÿ mrin ke jĕ. 24 Inh kósín vÿ inh mÿ ter ja ri ke han, hā ra tóg rĭr mĕn ri ke han. Vāfor ti vĕ vĕ, hā ra tóg kĕtĭg mĕn huri,” he tóg, ti panh ti. Kÿ tóg ag mÿ sér tĭ sir, ag tÿ festa han kÿ.

25 Hā ra ti kósín sanh tóg ti japÿ tá rĕnhraj jĕ. Kÿ tóg vĕhā tá kĕtĭg kÿ ā ĩn tá jun mÿ. Tá jun kÿ tóg vĕkyr mĕg mÿ, fag vĕnh grĭngrĕn ěn ti. 26 Kÿ tóg ā camarada jĕ prĕr mÿ. Ti mÿ tóg: “festa tÿ ne nĕ?” he mÿ. 27 Kÿ tóg ti mÿ: “ā jāvy vÿ jun, kÿ ā panh vÿ monh tāgy ěn tānh,” he mÿ. “Ti mÿ tóg sér tĭ, ti tÿ ti ve mĕn kÿ. Kaga tÿ tóg jĕ, há tóg jĕ, hā kÿ tóg ā panh mÿ sér tĭ,” he tóg, ti camarada ti. 28 Kÿ tóg jŭ mÿ sir. Kÿ tóg ĩn kĕra rĕ tŭg mÿ, jŭ kÿ.

Kÿ ti panh tóg ti mrĕ vĕmĕn tĭ mÿ. Ti mÿ tóg: “ĕg mrĕ festa venh kĕrĕ,” he mÿ. 29 Hā ra tóg ti mÿ: “vó,” he mÿ. “Prÿg tÿ hĕn ri ke ki sóg ā rĕnhraj ti han, ha mē. Inh pi(jĕ) ā vĭ mranh ja nĭgtĭ! Ge ra ā tóg inh mÿ nĕn ũ nĭm ja tÿ nĭ. Ā pi(jĕ) inh mÿ cabrito fĕg tĭ!, sÿ inh mrĕ ke ag mÿ festa han jĕ. 30 Hā ra ā kósín ěn tóg jun mÿ sir, jo ā tóg ti mÿ monh tāgy ěn tānh. Kórég ti nĭ, ā kósín ěn ti. Ā tÿ fón kĕn tóg mÿr, ũn tÿtĕ kórég fag to, hā ra ā tóg festa mág han mÿ, ti kĕtĭg kÿ,” he tóg, ti kósín sanh ti, ā panh mÿ.

³¹Hã ra ti panh tóg ti mý: “vó,” he mũ. “Inh mré ã tóg jê nĩ, ký tóg inh mý sér tí. Ký isũ kar vỹ tỹ ã tũ nýtĩ, mýr, ha mẽ. ³²Hã ra festa tag vỹ há nĩ, ha mẽ. Ēg mý tóg sér tãvĩ tí. Ā jãvy vỹ inh mý ter ja ri ke han, hã ra tóg rĩr mãn ri ke han. Vãfor ti vê vê, hã ra tóg kãtĩg mãn huri,” he tóg, ti panh ti, ã kósın sanh mý,” he tóg, Jesus ti. Ti tỹ Topê kãmén hã vê.

Ēg tỹ Ēg tũ vãnh kãpãm ke

16 ¹Ký Jesus tóg ã mré mũ tí ag mý tag tó mũ, ha mẽ. “Kejẽn ěprã ke ù tóg nĩgtĩ, ùn rico. Ký ti tũ ki rĩr tí tóg nĩgtĩ gé. Ti patrão mý név(e) nýtĩ ag vég ti tũ, ti mý, ti tũ ki rĩr tí ti. Kejẽn ag tóg ti camarada ěn to vĩ mũ, ti tũ ki rĩr tí ěn to. Ti lograr ke (ka) mẽ ti nẽji nĩ, ti tũ to, ti camarada ti. ²Ký tóg ti jé prẽr mũ, ký tóg ti mý: “ã tỹ han mũ mẽ inh,” he mũ. “Sỹ ã rãnrãj tugnỹm ke vê. Ki rĩr mãn ke tũ ã tóg nĩ ha,” he tóg mũ ti mý. ³Ký tóg to jykrén mũ sir, ti camarada ti. “Inh hỹn hẽ ri kenh mũ ha?” he tóg mũ. “Inh patrão vỹ inh kutẽm, inh rãnrãj ki. Ký inh hỹn ne konh ke mũ ha? Inh ěpỹ jé sóg krój nĩ. Ký sóg vãnh kar mý: “inh mý nén ù nĩm, inh mý jãnkamy nĩm,” he sór tũ nĩ gé. Inh mý ã tóg tí, sỹ ag mý tónh ke ti,” he tóg. ⁴Kejẽn tóg: “ũri hã sóg ki kanhró nĩ ha, sỹ nén han ke ti,” he mũ. “Sỹ tag han ký ag tóg iso há nýtĩnh mũ, ký ag tóg inh mý: “inh mré nĩnh kãtĩg,” henh ke mũ, inh patrão tỹ inh fón kar ký,” he tóg mũ, ti camarada kórég ti. ⁵Ký tóg ù tỹ ã patrão mý név(e) nýtĩ ěn ag jé prẽr kãn mũ sir. Ký tóg ù mý: “ã név(e) hẽ ri ke nĩ?” he mũ. ⁶Ký tóg ti mý: “azeite tỹ lata tỹ 100 (ke) ki inh név(e) jê,” he mũ. Ký tóg ti mý: “hỹn, ã vãnh rãn ti, sỹ ã mý ã név(e) tẽrem ký 50 (ke) rãn jé,” he mũ. Ký tóg rãn mũ sir. ⁷Ký tóg ù ù mý: “jo ã?” he mũ gé. “Ā név(e) hẽ ri ke nĩ?” he tóg mũ gé. Ký tóg ti mý: “trigo tỹ saco tỹ 100 (ke) ki inh név(e) jê,” he mũ. Ký tóg ti mý: “hỹn, ã vãnh rãn ti, sỹ ã mý ã név(e) tẽrem ký 80 (ke) rãn jé,” he mũ gé. Ký tóg rãn mũ gé sir.

⁸Ký ti patrão tóg mẽg mũ, ti camarada tỹ nén han mũ ti. Ký tóg ti mý: “jykre (ka)mẽ ã tóg nĩ, ký ã tóg ù tỹ hẽn ri ke tỹ ã to há nĩ han, ã tỹ ag mý ag név(e) rem ký,” he mũ, ti patrão ti,” he tóg, Jesus ti.

“Kỹ hã vê. Û tỹ inh ki ge tũ ag vỹ ãjag tũ to jykrén há han tí, inhhã, ha mẽ. Ājag krĩ há kãfór han ag tóg tí ag tũ to jykrén ki. Ājag tỹ inh ki ge mũ ra ag tóg ãjag krĩ há kãfór han tí. Tỹ ag ěprã ke nýtĩ, hã ký ag tóg tag ki nén to jykrén há han tí,” he tóg.

⁹“Hã ký sóg ãjag mý tó mũ. Ti camarada ěn ri ke han nĩ, ãjag tũ tỹ ùn mý vãnh kãpãm nĩ, ãjag tỹ ga kri mũn ký. Ký ag tóg ãjag to há nýtĩnh mũ. Kejẽn ãjag tóg ãjag tũ ré ký mũnh mũ. ěn kã ãjag tóg mũ há han ke mũ gé. Ký ãjag tóg kãnhkã tá junjun ke mũ sir, ãjag tỹ ag mý ãjag tũ tỹ vãnh kãpãm ký. ¹⁰Û tỹ nén ù sĩ ki rĩr há han ký tóg nén ù ki rĩr há han kãn ke mũ gé. Jãvo ù tỹ nén ù sĩ ki rĩr kónãn ký tóg nén ù ki rĩr kónãn kãn ke mũ gé sir. ¹¹Ēg tỹ ga kri nén vég mũ vỹ kãnhmar tũ! he mũ. Ājag tỹ hã ra ga kri ãjag tũ ki rĩr há han tũ ký ãjag tóg kãnhkã tá tỹ nén ùn tũ nýtĩnh mũ gé. ¹²Ājag tỹ ěprã nén

vég mü vỹ tỹ Topê tũ nĩ. Ti hã mỹ ãjag tóg ki rĩr ke mü. ãjag tỹ ti tũ ki rĩr há han tũ kỹ tóg sir ãjag mỹ ãjag tũ pẽ ên nĩm ke tũ nĩ gé, kanhkã tá,” he tóg.

¹³“Ã jagrẽ régre nĩn kỹ tóg vẽnhmỹ tĩ. ã tỹ Topê hã tỹ jagrẽ nĩn kỹ jãnkamy tãn ên tỹ jagrẽ nĩ sór tũg nĩ. ã tỹ jãnkamy e ve sór kỹ ti hã mĩ êkrén kỹ ti hã vỹ tỹ ã jagrẽ nĩnh mü. Kỹ êg tóg Topê tỹ êg mỹ nén tó mü ên to jykrén há han ke tũ nĩgtĩ. ã tỹ Topê to há nĩn kỹ ã tóg sir ga kri rico to vãsãn sór ke tũ nĩ. ã tỹ ga kri rico nĩ sór kỹ ã tóg Topê mĩ êkrég tũ nĩ, ha vemnĩ,” he tóg, Jesus ti. Ti tỹ êg tỹ ti tũ hã to jykrén há to jykrén há han ke tón hã vẽ.

Topê jykre

(Mt 11.12-13; 5.31-32; Mc 10.11-12)

¹⁴Hã ra Fariseu ag tóg mẽg mü, ti tỹ nén tó mü ti. Jãnkamy mág hã to ag tóg há nỹtĩ, rico ke sór ag nỹtĩ, Fariseu ag. Kỹ ag tóg Jesus vỹ tag mẽ kỹ ag tóg ti to é he mü. ¹⁵Hã ra Jesus tóg ag mỹ: “êprã ke ag mỹ ãjag tóg há nỹtĩ ve nỹtĩ,” he mü. “Hã ra Topê vỹ ãjag tỹ nén to jykrén mü ên vég nĩ. Òn kỹ ãjag tóg há nỹtĩ. Êprã ke kãmĩ ãjag tóg tỹ ùn mág nỹtĩ. Topê mỹ ãjag tóg kórég nỹtĩ jãvo, ti mỹ kavéj ãjag tóg nỹtĩ,” he tóg.

¹⁶“Moisés tỹ êg mỹ Topê vỹ tó ja ên vỹ João tá krỹg, vãsỹ Topê vỹ tó tĩ ag tỹ êg mỹ nén tó ja kar ên ti. João tá ti krỹg, êg kygpég tĩ ên tá. João tá jun kỹ vènh ù tỹ hèn ri ke ag tóg vãsãnsãn tĩ, ag tỹ ve jé. ¹⁷Hã ra Topê jykre si ên tóg tũ! henh ke tũ nĩ gé, Moisés tỹ êg mỹ nén tó mü ên ti. Ga vỹ tũ! henh ke tũ nĩ. Ki króm kãn kỹ tóg nĩnh mü,” he tóg.

¹⁸“Êg prũg kỹ tóg ge nĩ, ha mẽ. ã tỹ ã prũ fi fón kar kỹ ù fi tỹ prũg mãn kỹ ã prũ tũ fi vẽ sir. Kỹ fi mén tỹ fi fón kỹ ù tỹ fi tỹ prũg mãn kỹ fi mén tũ vẽ gé sir,” he tóg, Jesus ti. Ti tỹ Topê jykre kãmén hã vẽ.

Û tỹ Topê vỹ mẽ jãvãnh ag tỹ nũgme ki vár

¹⁹Kỹ Jesus tóg ag mỹ: “kejèn ù tóg nĩgtĩ, ùn rico pẽ,” he mü. “Kur kaja e tu ti tĩgtĩ, ùn tánh sã, kur ha pẽ. Kurã kar ki tóg vèjèn há ko tĩ. Festa ri ke han tóg tĩ, kurã kar ki.

²⁰Kỹ ùn jagtar tóg nĩgtĩ gé. Ti jiji hã vỹ: Lázaro, he mü. Vènh kaga fugfo han vãnh han tóg tĩ, kỹ tóg nỹ nĩ, ùn rico jãnkã ki. ²¹Ên vỹ kókĩr tĩgtĩ, ã kaga to. Kỹ tóg ùn rico jèn vár ko sór tĩgtĩ, ti jèn mru, hã ra tóg ti mỹ nĩm tũg tĩ. Cachorro hã ne ti pénĩn e nỹtĩ. Vènh fugfo han vãnh ên tugmãn ag tóg tĩ. ²²Kejèn tóg ter mü, ùn jagtar ên ti. Kỹ Topê tỹ jènẽ jafã ag vỹ ti va mü mü, ti kuprĩg ti, kanhkã ra. Tá Abraão tóg nĩ nĩ, êg jóg! jóg ve ti, kỹ tóg ti mré nĩ nĩ sir, ti tỹ tỹ ti krê!krê nĩn kỹ.

Kar ùn rico tóg ter mü gé sir. Kỹ ag tóg ga kãtã ti péju(g) mü. ²³Hã ra tóg nũgme ki kutẽ mü, ti kuprĩg ti. Inferno tá ti vèsỹrénh jagy han mü sir. Kejèn tóg kanhkã ki êvãnh mü, kỹ tóg tá Abraão vég mü, Lázaro ke gé, ti tỹ Abraão mré nĩn kỹ, kuvar há tá. ²⁴Kỹ tóg ag mỹ prër mü. Kỹ tóg Abraão mỹ: “!..ljóg!..!” he mü. “!..Abraão..!” he tóg “!..ljagãgtãn ra..!” he tóg.

“Lázaro jēnē ra, ti tỹ ã nĩ(gé) juja junun mrãn kỹ inh nũnē mrãn sĩ han jé. Inh mỹ tóg rỹjgy tãvĩ tĩ, pĩ kãki,” he tóg, Abraão mỹ, ùn rico ja ěn ti.

²⁵Kỹ Abraão tóg ti mỹ: “inh kósin,” he mũ. “Ã tỹ ga kri tĩg ja ěn ki ěkré. Tá ã tóg há tĩ ja nĩgtĩ, jãvo Lázaro tóg jagtar ja nĩgtĩ. Kỹ tóg tag ki há han tĩ nĩ, jo ã tóg vēsýrénh jē nĩ, ã tỹ ti jagãgtãn ja tũ nĩn kỹ. ²⁶Kỹ ěg kuju ki tóg tỹ kãgnó nĩ, kỹ ù tóg pãte rãnh ke tũ nĩ. Tag ki ke pi(jé) ěn ra tĩg mũ', ěn tá ke pi(jé) tag ra kãtĩg mũ gé', kãgnó tag tugrĩn!,” he tóg, Abraão ti, ùn rico ja ěn mỹ.

²⁷Kỹ ùn rico ja tóg ã jóg tỹ Abraão mỹ: “kỹ sóg ã mỹ nén ù tó sór mũ, ha mē,” he mũ. “Ã mỹ inh jóg in ra ti jēnēnh ke tũ? Tá inh mré ke ag vỹ nỹtĩ. ²⁸5(ke) ag nỹtĩ, inh mré pafa ja ag. Ti tỹ ag mỹ tónh tĩg jé, ag tỹ tag ki junjun tũ nĩ jé, ag tỹ inh mré vēsýrénh tũ nĩn jé,” he tóg, ùn rico ja ti, Abraão mỹ.

²⁹Kỹ Abraão tóg ti mỹ: “tá ag tóg Moisés tỹ ěg mỹ nén tó ja ěn mēnh mũ, Topē vĩ tó tĩ kar ag vĩ ke gé. Hã kỹ ag tóg Topē vĩ jēmēnh mũ, ag tỹ mē sór kỹ,” he tóg.

³⁰Hã ra tóg ã jóg tỹ Abraão ti mỹ: “vó” he mũ. “Vēsēr tỹ ag tá jun mũ ra ag jēmē há han ke mũ vē, kỹ ag tóg ãjag jykre pãno ěn tovãnh ke mũ vē, vēsēr tỹ ag mỹ tó mũ ěn ti,” he tóg.

³¹Hã ra tóg: “vó,” he mũ gé. “Ag tỹ Moisés vĩ jēmē sór tũ nĩn kỹ ag tóg vēsēr vĩ mēnh ke tũ nĩ gé, ag tỹ Topē vĩ tó tĩ ag vĩ mē jãvãnh nỹtĩn kỹ,” he tóg, Abraão ti, ùn rico ja ěn mỹ,” he tóg, Jesus ti. Ti tỹ ag mỹ ěg tỹ Topē vĩ jēmē jãvãnh nỹtĩn kỹ vēsýrénh ke ěn tón hã vē.

Topē vĩ mranh tỹ jagy nĩ
(Mt 18.6-7; 21-22; Mc 9.42)

17 ¹Kỹ Jesus tóg ã mré mũ tĩ ag mỹ: “ũ tỹ hēn ri ke ag vỹ ù tỹ iso há ěn tỹ isovãnh han sór mũ, ha mē,” he mũ. “Vēsýrénh tãvĩn mũ jé ag tóg ke mũ, tag to. Topē vỹ ag ve kónãn tãvĩn mũ, ag tỹ ùn krĩn kónãn mũ tag to. ²Û tỹ ag krĩn kónãn mũ mỹ tóg há nỹnh mũ vē, ěg tỹ pó tỹ kra mág tỹ ag nunh to sa kỹ goj nig kuju ki ag vãm jé. Tag vỹ ag mỹ jagy tĩ vē. Hã ra ag tóg ti jagy tag kãfór venh ke mũ, ag tỹ ùn sĩ tỹ inh ki rã kỹ nĩ (hã) ra ti tỹ inh vĩ mranh han sór kỹ. ³To jykren, vėnh ki rĩr kỹ.

Kejēn ã régre vỹ Topē vĩ mranh mũ. Kỹ ti mỹ tómnĩ, ti tỹ kygnē ti. Ti tỹ tovãnh sór kỹ ti mỹ vėnh pãte fón nĩ. ⁴Hēn ri ke mũn tóg ã tỹ Topē vĩ mranh han sór mũ han mãn', han mãn' he mũ, kejēn. Kurã pir ki tóg ã jũ tỹ hēn ri ke han sór mũ, hēn ri ke mũn. Hã ra tóg ã jũ han kar kỹ: “inh pi(jé) ke mãn mũ ha!,” henh ke mũ gé. Ā jũn kỹ tóg tónh kãtĩg mãn', tónh kãtĩg mãn' he mũ gé. Kỹ ti mỹ vėnh pãte fón to krónh ke tũg nĩ,” he tóg, Jesus ti.

Ěg tỹ Topē ki rã há han ke

⁵Kỹ Jesus tỹ ùn vin mũ ag tóg ti mỹ: “ěg tỹ Topē ki rã há pē han há tóg tĩ,” he mũ. “Kỹ to ěg tar han nĩ,” he ag tóg, Jesus mỹ. ⁶Kỹ tóg ag mỹ: “ãjag tỹ Topē ki rã kỹ tóg há tĩ,” he mũ. “Ka tỹ mostarda fy mĩ ěkrén nĩ,”

he tóg. “Sĩ ti nĩ, hã ra tóg mog tí. Tag ri ke han nĩ, Topẽ ki rã kÿ. Ti ki rã kÿ ãjag tóg nén ù kar to tar nÿtĩnh mũ. Ka tag ve ra, ka krén tag ti. ãjag tÿ ti mÿ: “ã jãre tÿ ga tá kãkutẽ, kÿ goj nig ki vãnh krãn,” hen kÿ tóg kenh mũ, ãjag tÿ Topẽ ki rãn kÿ,” he tóg, Jesus ti.

Tÿ ãg Topẽ camarada nÿtĩ

7“ãjag camarada jykre to jykrén nĩ,” he tóg. “ãjag japÿ ki tóg rĩr tí, ga tÿ vĩrĩn ken kÿ, ke tũ nĩn kÿ tóg ãjag mæg ki rĩr tí gé. Rãkãnh kÿ tóg ã rãnhràj ja tá kãtĩ tí. Kÿ ãjag pi(jé) ti mÿ: “kunig, jẽn jé,” he tí. 8Ti mÿ ãjag tóg: “inh mÿ vėjẽn han, ijẽn jé,” he tí. “Kuri ã kur tãnfyn kÿ tógfin, ã tÿ inh mÿ vėjẽn jun jé, ijẽn jé, kron jé, kar kÿ ã tóg jẽn ke mũ gé sir, kron ke mũ gé sir, ijẽn kar kÿ,” he ãjag tóg tí, ãjag camarada mÿ. 9Kÿ ãjag tóg ti mÿ vĩ há han tũ nĩ gé, ti tÿ ãjag vĩ ki króm mũ ra. ãjag camarada vẽ mÿr, ti rãnhràj vẽ, hã kÿ tóg ãjag vĩ ẽn han ke mũ. 10Kÿ ãjag camarada ag ri ke han nĩ, Topẽ mÿ, ha mẽ. ãjag tÿ Topẽ vĩ ki króm kãn kÿ jagnẽ mÿ: “ti camarada vÿ tÿ ãg nÿtĩ,” hemnĩ. “Ti tÿ ãg mÿ nén tó mũn hã han ãg tóg, kÿ tóg tÿ nén ù tũ nĩ,” hemnĩ jagnẽ mÿ. “Ti vĩ han kãn tugrĩn ãg tóg há nÿtĩ,” he tũg nĩ,” he tóg, Jesus ti.

Jesus tÿ ùn kaga tÿ 10 (ke) ag tÿ há' he

11Kÿ Jesus tóg Jerusalém ra tĩg sór mũ. Hã kÿ tóg ga tÿ Samaria fyr mĩ tí mũ. Ga tÿ Galiléia mré ti fyr vẽ. 12Tá tóg ẽmã ù ki rã mũ, kÿ ù tÿ 10 (ke) ag tóg ti kato tẽgtẽ mũ sir. Vãnh kaga kren vãnh hyn han ag tóg mũ, lepra han kÿ. Hã kÿ ag tóg kór há tá nÿtĩ, kuvar há tá. 13Jamã hár(a) ag tóg prẽnprer mũ, kÿ ag tóg: “!..Jesus!..!” he mũ. “!..Senhor!..!” he ag tóg mũ. “!..Ëg jagãgtãn ra..!” he ag tóg mũ. 14Kÿ tóg ag ki ẽvãnh mũ, kÿ tóg ag mÿ: “Topẽ tũ ki rĩr tí ag mÿ vãnh ven mũjẽg,” he mũ. Kÿ ag tóg mũ mũ.

Ag mũn kã ag tóg jãnhkri! he mũ sir, ag fãr ti, tá junjun to hã. Hághá' he ag tóg mũ sir. 15Kÿ ag kãmĩ ùn pir tóg kyrã mũ, Jesus to. Topẽ mÿ tóg vĩ há han mũ, ã tÿ há' hen kÿ. Kÿ vãnh kar vÿ ti vĩ mæg mũ. 16Ti tÿ Jesus tá jun kÿ tóg ti krêm mũg ke mũ. Ti mÿ tóg: “inh mÿ tóg há tí, ã tÿ isÿ há' hen kÿ,” he mũ. Samaria tá fóg ù vẽ, Jesus to ùn kyrã mũ ẽn ti.

17Kÿ Jesus tóg: “ù tÿ 10 (ke) tũ mÿ', hã vÿ: há', he mũ?” he mũ. “Hã ra ùn pir ne kãtig ja nĩ! Hÿn, ù ag, ù tÿ 9 (ke) ẽn ag?” he tóg. 18“Fóg tag hã vÿ ã pir mÿ kyrã, Topẽ to: “ùn mág vÿ tÿ ti nĩ,” he jé,” he tóg, Jesus ti. 19Kÿ tóg fóg ẽn mÿ: “jẽgnẽ ra,” he mũ. “Ha tĩg,” he tóg. “ã tÿ inh ki rã kÿ, hã kÿ ã tóg há' he mũ,” he tóg, Jesus ti.

Topẽ tÿ tÿ ãg pã'i nĩ to vãnh jykre

(Mt 24.23-28; 37-41)

20Kejẽn Fariseu ag tóg ti ki jẽmẽn kãmũ mũ. “Topẽ tÿ tÿ ãg pã'i nĩ ẽn mÿ ver kór gy nĩ, mÿ kuvar gy?” he ag tóg ti mÿ. Kÿ tóg ag mÿ kãmén mũ sir. “Ti vég tũ ãg tóg nĩ, ẽg kanẽ tÿ, Topẽ tÿ tÿ ãg pã'i nĩ ti,” he tóg. 21“Hã

kỹ ãg tóg to: “tag kã ti nĩ, tãtã ti nĩ,” henh ke tũ nĩ gé. Ha mẽ, ãjag kãmĩ ti huri vẽn ven, ti tỹ tỹ ãg pã'i nĩ ti, ãjag tỹ ti vég tũ (hã) ra,” he tóg.

²²Kỹ tóg ã mré mũ tĩ ag mỹ: “tỹ sóg ãprã ke fi kósin nĩ,” he mũ. “Kejẽn tóg ãjag tỹ Topẽ tỹ tỹ ãg pã'i nĩ venh ha pẽ tĩnh mũ. Ti tỹ kurã pir ki vẽn ven mũ vỹ ãjag mỹ há tĩnh mũ vẽ, hã ra ãjag tóg venh ke tũ nĩ ver,” he tóg. ²³“Kỹ ag tóg ãjag mỹ: “tag ki ti jun ja nĩ,” henh ke mũ. “Ën tá tóg jẽ nĩ,” he jé ag tóg ke mũ gé. Kỹ venh mũ tũg nĩ hã ra. Ag vỹ jẽmẽ sór tũg nĩ. ²⁴Inh kãtĩg mãn ke vỹ ta tỹ kóm kóm ke ri ke nĩ. Ti tỹ kóm kóm ke kỹ ãg tóg nén kar vég tĩ, kanhkã krêm. Kỹ vẽn kar vỹ ti tỹ kóm kóm ke ãn vég tĩ gé. Inh kãtĩg mãn ke vỹ ri ke nĩnh mũ, inh kurã ãn kã. Vẽn kar vỹ inh ve kãn mũ. Tỹ sóg ãprã ke fi kósin nĩ,” he tóg. ²⁵“Inh kãtĩg mãn ke to hã sóg hã ra vẽnyrénh mág han ke mũ ver. Ũri ke ag vỹ iso é henh ke mũ ver,” he tóg.

²⁶“Kỹ inh kãtĩg mãn ke kurã ãn kã ãprã ke ag tóg han kãn ke mũ, ag tỹ Noé tỹ ga mĩ tĩ mũ kã nén han ja ãn ti. ²⁷Ta kutẽ to hã ag tóg jẽn ja nĩgtĩ, jẽn kar kỹ ag tóg kron ja nĩgtĩ gé, vẽn prũ kutẽm ja ag nĩgtĩ gé. Ën kã Noé tóg kejẽn barco tỹ ãn kãra rã ja nĩ. Ti tỹ kãra rã kar kỹ ta tóg sir kutẽ ja nĩ, kỹ ag tóg goj var ki kãgter kãn ja nĩ. ²⁸Kỹ tóg ri ke pẽ ja nĩ gé, Ló tỹ ga mĩ tĩg ki. Ën kã ag tóg jẽn ja nĩgtĩ gé, jẽn kar kỹ ag tóg kronkron ja nĩgtĩ gé. Vender ke mũ ja ag nĩgtĩ gé, kygãm ke mũ ja ag nĩgtĩ gé. Ëkrãn ja ag nĩgtĩ gé, ãn hyn han ja ag nĩgtĩ gé. ²⁹Ën kã Ló tóg kejẽn cidade tỹ Sodoma tá kãkutẽ ja nĩ, kỹ pĩ tóg kanhkã tá kãtẽre ja nĩ, cidade kri, pó tỹ enxofre nĩja ãn ke gé. Kỹ ãn tóg ag kãgtãn kãn ja nĩ. Topẽ tỹ ag vóg kónãn ke to jykrén sór tũ ja ag nỹtĩgtĩ. ³⁰Ge ti nĩnh mũ gé, ãprã ke fi kósin tỹ vẽn ven mãn ke kurã ãn kã. Mĩ ãkrén ke tũ ag nĩgtĩ gé, ti to há tũ ag. ³¹Ũ tỹ kurã ãn kã ã ãn rã hã tĩn kỹn jé ã tũ mãn rã sór tũg, ti tũ tỹ ti ãn krêm nỹtĩ ti. Ũ tỹ ãpỹ tá tĩ ãn jé ã tũ to vỹn ke tũg. ³²Ló prũ fi to jykrén. ³³Ãjag tỹ ãjag jykre hã han sór kỹ ãjag nũgme ki vár ke mũ, ha vemnĩ. ãjag tỹ isugrĩn ãjag jykre fi mãn kỹ ãjag krenkren ke vẽ, ha vemnĩ,” he tóg.

³⁴“Hã kỹ sóg tag tó mũ, ha mẽ. Kuty ãn kã, inh kãtĩg mãn ke kuty ãn kã ãn régre ag vỹ jagnẽ mré nũgnũr nỹtĩnh mũ. Ag kãmĩ ãn pir jé prẽr sóg ke mũ, kỹ tóg inh mré tĩnh mũ, jãvo ti régre vỹ kã nỹnh mũ, ha vemnĩ. ³⁵Ũn régre fag vỹ ãgtynyn nỹtĩnh mũ, jagnẽ mré, ãn kã. Kỹ sóg ãn pir fi jé prẽr ke mũ, kỹ fi tóg inh mré tĩnh mũ, jãvo fi régre fi vỹ kã jẽn hũ, ha vemnĩ. ³⁶Ũn régre ag vỹ ãpỹ ki rãnhraj mũnh mũ, ãn kã. Kỹ sóg ãn pir jé prẽr ke mũ, kỹ tóg inh mré tĩnh mũ. Jãvo ti régre vỹ tá tĩnh mũ gé, ha vemnĩ,” he tóg, Jesus ti.

³⁷Kỹ ti mré mũ tĩ ag tóg ãg Senhor mỹ: “tag hẽ tá ke nĩnh mũ hỹn!?” he mũ. Kỹ tóg ag mỹ: “kurã ãn kã ãjag ki kanhró nỹtĩnh mũ,” he mũ. “Nén ũ ter nỹg ja ri ke ti nĩ. Hã tá tóg vẽn mãn tĩ, jãtã ti, he ãg tóg tĩ. Tag ri ke ti nĩnh mũ, ha vemnĩ,” he tóg, Jesus ti. Ti tỹ ã kãtĩg mãn ke tón hã vẽ.

Ĕg tỹ Topě mré vī to krónh ke tũ

18 ¹Kỹ Jesus tóg ag mỹ: “ájag tỹ Topě mré vēmén ke vỹ ge nỹnh mũ, ha mẽ,” he mũ. Ĕg tỹ kurā kar ki Topě mré vēmén kỹ tóg há tĩnh mũ, Ĕg tỹ to krónh ke tũ nĩn kỹ. Tag tỹ tóg ag kanhrānrān sór mũ, ā mré mũ ti ag, hā kỹ tóg tag tó mũ, ha mẽ. ²“Kejĕn pā'i tóg nĩgtĩ, ĕmā ũ tá,” he tóg. “Ag tỹ jagnĕ to jũ vég ti tĩ. Ti rānrhāj hā vĕ. Hā ra tóg Topě kamĕg vānh nĩ, ti jykre pāno nĩn kỹ. Kỹ tóg ā mré ke ag kamĕg vānh pĕ nĩgtĩ gé. Kórég pĕ ti nĩgtĩ. ³Ti jamā tá ũ fi tóg nĩgtĩ gé, ũn mén ter ja fi. Ĕn fi vỹ kejĕn ti to kātĩg kỹ ti mré vēmén mũ. Kỹ fi tóg ti mỹ: “inh lograr ke sór mũ ĕn ag jo inh vemnĩ,” he mũ. ⁴Hā ra tóg mẽ jāvānh nĩ. Jatu tóg nĩ nĩ, kysā tỹ hĕn ri ke ki. Kỹ fi tóg ti tá jun tỹ hĕn ri ke han mũ, to krónh ke tũ fi nĩ. Kỹ tóg kejĕn to jykrén mũ. “Topě kamĕg vānh inh nĩgtĩ,” he tóg. “Ũ kamĕg vānh inh nĩgtĩ gé. ⁵Hā ra fi tóg isovānh tũ pĕ nĩ, ũn mén ter ja ĕn fi. Kurā kar ki fi tóg inh mỹ to vĩnh kātĩ tĩ. Kỹ inh hỹn fi jy rānh mũ ha, ke tũ nĩ mũ ra fi tóg ijũ han ke mũ, fi tỹ inh venh kātĩ to krónh ke tũ nĩn kỹ, ha vemnĩ,” he tóg, pā'i kórég ti,” he tóg, ĕg Senhor tỹ Jesus ti.

⁶Kỹ tóg ag mỹ: “ti vĩ jĕmĕ ra,” he mũ. “Jykre pāno ti nĩ, pā'i kórég ĕn ti, hā ra tóg fi tỹ ti mỹ vĩ e ĕn to fi kren han sór mũ,” he tóg. ⁷“Hā kỹ Topě vỹ ájag krenkren han ke mũ gé. Ájag kuprĕg ja tóg nĩ mỹr, kỹ ti mré vēmén nĩ. Kurā ki ti mỹ vĩmnĩ, kuty tá ke gé. Ájag kren han vānh nĩ ve ti nĩ, kejĕn. ⁸Hā ra tóg ájag krenkren han ke mũ, kānhmar, ha vemnĩ. Ki hā sóg tó mũ,” he tóg. “Hā ra tóg ĕprā ke fi kósin ĕn tỹ kātĩg mān kỹ ag mỹ ti ki ge sór mũ vỹ?” he tóg, Jesus ti.

Ĕg tỹ: “tỹ inh ũn há nĩ,” hĕnh ke tũ

⁹Kỹ Jesus tóg ag kanhrān mān mũ gé. Ũ tóg ũ tỹ ti vĩ mẽg mũ ĕn ag kāmĩ nỹtĩ, hā ra ag tóg vĕso: “tỹ ĕg tóg ũn há nỹtĩ,” he tĩ. “Kórég tũ ĕg nỹtĩ, jo ũ ag ne kórég nỹtĩ!” he ag tóg tĩ, vĕso, Jesus vĩ mẽg mũ ũ ag. Ĕn ag kanhrānrān sór tóg mũ, Jesus ti. Kỹ tóg ag mỹ: “ájag jykre vỹ ge nỹnh mũ, ha mẽ,” he mũ. ¹⁰“Kejĕn Fariseu ũ tóg nĩgtĩ. Topě jo ĩn ra tóg tĩ mũ, tá Topě mré vĩ jé. Ti mré ũ tóg ra tĩ mũ gé, ũ tỹ governo mỹ jānkamy māg tĩ ti. Topě mré vĩ sór tóg mũ gé. ¹¹Kỹ Fariseu tóg Topě mré vēmén jĕ nĩ. “Topĕ,” he tóg. “Inh mỹ tóg há tĩ, isỹ jykre kórég tũ nĩn kỹ, ag jāvo. Ũ ag tóg nĕn ũ péju(g) tĩ, hā ra sóg han tũ nĩgtĩ. Ũ ag tóg nĕn ũ vĕnhmỹ han tĩ inhhā, jāvo inh pi(jé) han tĩ! Ájag prũ tũ fag mré ag tóg nỹgtĩ inhhā. Kỹ governo mỹ jānkamy māg tĩ tag ti vỹ kórég nĩ gé inhhā. ¹²Ag jāvo sóg vĕnh jykre há han tĩ. Semana kar ki sóg vākre régre han tĩ, jĕg mẽ tĩ ki. Hā ki sóg ā jykre ki króm tĩ. Isũ tỹ sóg dízimo kajām tĩ, ā mỹ. Sỹ nĕn ũ tỹ 10 (ke) ki sóg ũn pir nĩm tĩ, ā mỹ dízimo han kỹ,” he tóg, Fariseu ti, Topé mỹ. ¹³Hā ra governo mỹ jānkamy māg tĩ ĕn tóg kór há tá jĕ nĩ, kuvar há tá, mỹ'āg kỹ. Kỹ tóg kanhkā ki ĕvānh tũ nĩ gé. Ā fe kri tóg kāgmĩg mũ, ti tỹ mỹ'āg mág kỹ. Kỹ tóg Topĕ mré vĩ mũ. “Topĕ,” he tóg mũ gé. “Ā vĩ mranh inh mỹr,” he tóg. “Ā mỹ inh jagāgtān ke tũ hā ra,” he tóg, Topĕ vĩ mranh tĩ ĕn ti,” he tóg, Jesus ti.

14“Ha mẽ, Topê vỹ ti mỹ vãnh pãte fón, hã kỹ tóg jatun mỹ vyr. Jãvo tóg Fariseu ên mỹ vãnh pãte fón tũ nĩ. Ge ti nĩgtĩ. Êg tỹ vêsô: “há inh nĩ,” hen kỹ Topê tóg êg to kórég nĩ. Kỹ tóg êg tereu mũ sir. Êg tỹ hã ra vêsô: “kórég inh nĩ,” hen kỹ Topê vỹ êg to há nĩ, kỹ tóg êg tỹ ãn mág han ke mũ gé sir,” he tóg, Jesus ti.

Jesus tỹ ãn kãsir ag to há
(Mt 19.13-15; Mc 10.13-16)

15Kỹ fag tóg gĩr tatĩ kãmũ mũ ti to, ti tỹ gĩr kri ã nĩgé fi jé. Hã ra ti mré mũ tĩ ag tóg vég mũ, kỹ ag tóg fag to jũ mũ, ã tỹ ag tatĩ kãmũ mũ fag to. 16Hã ra Jesus tóg fag jé prer kỹ ag mỹ: “vĩ tũg nĩ, gĩr ag mỹ,” he mũ. “Gĩr ag tỹ iso kãmũ kamêg tũg nĩ,” he tóg. “Û tỹ ge hã vỹ êg Senhor tỹ Topê krêm nỹtĩnh mũ,” he tóg. 17“Sỹ ke há vễ, hã kỹ sóg tó mũ. Gĩr ag vỹ iso há pẽ nỹtĩ. ãn kãsir tag ag ri ke nỹtĩmĩ, ke tũ nĩ mũ ra ajag tóg Topê tỹ tỹ êg pã'i nĩ venh ke tũ nĩ mỹr,” he tóg, Jesus ti.

Ûn rico ag
(Mt 19.16-30; Mc 10.17-31)

18Kỹ kejẽn ã tóg Jesus ki jẽmẽnh kãtĩ mũ, pã'i ã. Kỹ tóg ti mỹ: “Senhor!” he mũ. “Hã ã tóg nĩ,” he tóg. “Sỹ rĩr krỹg ja tũ venh há tóg tĩ. Sỹ ti ve jé inh hỹn vãnh jykre há tỹ ne han ke mũ?” he tóg. 19Kỹ Jesus tóg ti mỹ: “iso: “há ã nĩ,” he sór tũg nĩ,” he mũ. “Êg pi(jé) há nỹtĩ,” he tóg. “Topê hã ne ã pir mỹ há nĩ!” he tóg. 20“Topê tỹ nén ã to êg jyvẽn ja ên ki kanhró ã tóg nĩ, hã vỹ: ã prũ tũ fi mré nỹ tũg nĩ, he mũ, ã tén tũg nĩ, he mũ, nén ã péju(g) tũg nĩ, he mũ, ã to ón tũg nĩ, he mũ, ã nỹ mré ã jóg kamêg nĩ, he mũ,” he tóg ti mỹ, Jesus ti. 21Hã ra tóg: “ki króm kãn sóg, isĩn kã,” he mũ. 22Kỹ Jesus tóg ti mỹ: “nén ã pir vỹ tũ nĩ ver,” he mũ. “Á tũ vãm kãn nĩ, ã tỹ ãn vêsỹrẻnh mũ ag mỹ vin jé, jãnkamy ti. Kỹ ã tóg kanhkã tá tũ mág nĩ sir. Kar kãtĩg nĩ, ã tỹ inh mré tĩg jé,” he tóg ti mỹ, Jesus ti. 23Kỹ tóg ti mỹ vẽnhmỹ tĩ, Jesus vĩ ti, ti rico pẽ nĩn kỹ.

24Hã ra Jesus tóg ti mỹ vẽnhmỹ ên ki kanhrãn mũ. Kỹ tóg ã mré mũ tĩ ag mỹ: “jagy ti nỹ, ãn rico tỹ Topê tỹ tỹ êg pã'i nĩ venh ke ti,” he mũ. 25“Cavalo pãni sór vỹ prẻj nor fĩn rãm ke tũ nĩ,” he tóg. “Ti tỹ fĩn rãm ke ra tóg jagy tĩ vễ, ãn rico tỹ Topê tỹ tỹ êg pã'i nĩ venh ke ti,” he tóg.

26Kỹ ti vĩ mẽg mũ ag tóg to vẻmẻn mũ. “Kỹ ã hỹn kren ke tũ pẽ nĩ,” he ag tóg. 27Kỹ Jesus tóg ag mỹ: “ẻprã ke ag vỹ tá junjun ke tũ nĩ vễ,” he mũ. “Hã ra Topê hã tóg êg tỹ tá junjun han ke mũ,” he tóg.

28Kỹ Pedro vỹ: “ha vé,” he mũ. “Êg tỹ nén ã kar ré jé êg tóg mũ mũ, êg tỹ ã mré mũ jé,” he tóg. 29Kỹ Jesus tóg ag mỹ: “sỹ ke há vễ, hã kỹ sóg tó mũ,” he mũ. “Û tóg kejẽn ã jamã ré kỹ tĩ mũ, ti prũ fi, ti kãke, ti jãvy, ti han mũ fag, ti krẻ ré kỹ tóg tĩ mũ, Topê tỹ tỹ êg pã'i nĩ tũgrĩn, ti tỹ ti vĩ ki króm jé,” he tóg. 30“Ên vỹ tóg sir vãnh kaja jé nẻn kar ên tỹ ãn e venh ke mũ, ag jẻgja kã, ga kri, kar kỹ tóg vãhã sir êg rĩr krỹg ja tũ venh ke mũ gé sir, kanhkã tá,” he tóg, Jesus ti.

Jesus t̄y ā ter ke tó m̄n
(Mt 20.17-19; Mc 10.32-34)

³¹K̄y tóg ũ t̄y 12 (ke) ag jé pr̄er m̄, vyr̄m̄y, ag m̄y k̄āmén jé. “Ha vé,” he tóg. “Jerusalém ra ěg m̄ m̄, k̄y sóg tá ve k̄n ke m̄, v̄s̄y Topē v̄i tó t̄i ag t̄y iso nén rán ja ěn ti,” he tóg. “T̄y sóg ěpr̄a ke fi kósín ěn n̄i, h̄a k̄y ag tóg inh k̄āmén ja n̄i, Topē v̄i ki. ³²Fóg ag m̄y ag tóg inh f̄ēg ke m̄, p̄a'i ag, Jerusalém tá, ha vem̄n̄i, ag t̄y iso é he jé, ag t̄y inh vóg kón̄n jé, ag t̄y iso sug ke jé gé, ³³ag t̄y inh mr̄n̄mr̄n jé. Ag t̄y isén ke vē. H̄a ra sóg kur̄a t̄agt̄ū t̄ug k̄y r̄ir m̄n ke m̄, ha vem̄n̄i,” he tóg, ti mr̄é m̄ t̄i ag m̄y, Jesus ti. ³⁴H̄a ra ag tóg ti v̄i tag to jykr̄én t̄ū n̄i, ũ t̄y 12 (ke) ěn ag. Ti v̄i tóg ag m̄y vēnhm̄y t̄i. K̄y ag tóg ki kagt̄ig n̄yt̄i. “Ti t̄y ne tó nē h̄yn'?” he ag tóg m̄ sir.

Jesus t̄y ũn kyvó t̄y há' he
(Mt 20.29-34; Mc 10.46-55)

³⁵Ag m̄n k̄y ag tóg Jericó to h̄a m̄ m̄. Tá ũn kyvó v̄y ěpr̄y kri n̄i n̄i, ěm̄in kri. “Inh m̄y j̄ankamy n̄im,” he tóg t̄i, vēnh kar m̄y, ti kyvó n̄in k̄y. ³⁶Ěn v̄y vēnh kar t̄y ěpr̄y jagma m̄ m̄g t̄i. K̄y tóg ag m̄y: “ũ nē?” he m̄. ³⁷K̄y ag tóg ti m̄y: “Jesus vē, Nazaré tá ke ěn vē,” he m̄. ³⁸K̄y tóg pr̄er m̄ sir. “!..Jesus!..., Davi kósín!..., ijaḡagt̄n ra..!” he tóg m̄, pr̄er k̄y. ³⁹K̄y Jesus jo m̄ ag v̄y ti m̄y v̄i j̄ū han m̄. “Ěm̄ē k̄a n̄i n̄i,” he ag tóg ti m̄y. H̄a ra tóg pr̄er m̄n', pr̄er m̄n' he m̄. “!..Davi kósín!..., ijaḡagt̄n ra..!” he tóg. ⁴⁰K̄y Jesus tóg kr̄ȳg he m̄, k̄y tóg: “ti jé pr̄er,” he m̄. K̄y ag tóg ti pére k̄āmū m̄. Ti ki jun k̄y tóg ti m̄y: ⁴¹“inh ā t̄y h̄ē ri kenh ke?” he m̄. K̄y tóg ěg Senhor m̄y: “s̄y venh há tóg t̄i,” he m̄. ⁴²K̄y Jesus tóg ti m̄y: “k̄y t̄y vé,” he m̄. “Ā t̄y inh ki r̄a k̄y ā há' henh ke m̄,” he tóg. ⁴³K̄y tóg vēs̄ym̄ér ěv̄anh há' he m̄ sir. K̄y tóg ti mr̄é t̄i m̄. Topē m̄y tóg v̄i há han m̄. K̄y tóg vēnh kar m̄y há t̄i, ag t̄y ti t̄y há' he m̄ ěn ven k̄y. K̄y ag tóg Topē m̄y v̄i há han m̄ gé sir.

Jesus t̄y Zaqueu venh t̄ig

19 ¹K̄y Jesus tóg cidade t̄y Jericó ki r̄a m̄ sir, k̄y tóg f̄in r̄am k̄y t̄ig sór m̄. ²H̄a ra ũ tóg tá n̄i n̄i, ti jyjy h̄a v̄y: Zaqueu, he m̄. Governo m̄y j̄ankamy m̄g t̄i ag p̄a'i vē. Rico p̄ē ti n̄i, rico tāv̄i. ³Ěn tóg Jesus ve sór m̄, ti t̄y Jericó f̄in r̄am k̄y. H̄a ra tóg rur j̄ē, h̄a k̄y tóg ti vég t̄ū n̄i, vēnh e ag t̄y ti p̄én̄in m̄n k̄y. ⁴H̄a k̄y tóg ti jo vēnhv̄ag t̄i m̄, k̄y tóg ka t̄y kr̄én to tāpr̄y m̄, ti t̄y Jesus ve jé, ti t̄y jagma t̄ig k̄y. ⁵K̄y Jesus tóg ka ěn tá jun m̄. H̄a ra tóg kr̄ig m̄y ěv̄anh k̄y ka kri ti vég m̄. K̄y tóg ti m̄y: “Zaqueu!” he m̄. “Kur k̄át̄ere to f̄ür̄n k̄é. Is̄y ā ĩn kr̄ēm n̄ür ke vē,” he tóg, Jesus ti. ⁶K̄y tóg t̄ere t̄y mr̄anh ke m̄ sir. Jesus m̄y tóg: “m̄ jé ha,” he m̄. Ti m̄y tóg sér t̄i, Jesus t̄y ti ĩn kr̄ēm n̄ür sór k̄y. ⁷H̄a ra vēnh e ěn tóg Jesus to v̄i m̄ sir, ti to j̄ū k̄y. “Topē v̄i mranh t̄i vē, ěn ti, h̄a ra tóg ti ĩn kr̄ēm n̄ür sór m̄, vēnh jykre p̄āno han t̄i ěn mr̄é,” he ag tóg m̄.

⁸Kỹ Jesus tóg ti ìn krēm nĩ nĩ. Kĩ Zaqueu vỹ ti mỹ vènh kāmén kãti mũ, ã jykre to jykren kũ. Kĩ tóg ãg Senhor mỹ: “ha vé,” he mũ. “Isũ kaju vin jé sóg ke mũ, ùn jagtar ag mỹ. Û ag lograr he ja sóg nĩgtĩ, ag tũ ki, hã ra sóg ag mỹ ti kãfór nĩm sór mũ ha. Sỹ jãnkamy pir ki ù lograr he jan ki sóg ti mỹ ù tỹ 4 (ke) vin sór mũ,” he tóg, Zaqueu ti.

⁹Kỹ Jesus tóg ti mỹ: “há ti nĩ,” he mũ. “Ûri ã tóg kren mũ, ã mré ke fag mré hã,” he tóg. “Abraão kósín vỹ tỹ ã nĩ gé,” he tóg. ¹⁰“Tỹ sóg ãprã ke fi kósín nĩ. Ûn vãfor mũ ãn jãvãnh jé sóg kãtig, sỹ ag krenkren han jé, ùn jykre pãno han mũ ãn,” he tóg, Jesus ti.

Jãnkamy to comparãção

(Mt 25.14-30)

¹¹Hã ra ag tóg ti vĩ mẽ há han mũ, kũ tóg ag mỹ Topẽ tỹ tỹ ãg pã'i nĩnh ke ti kãmén sór mũ. Jerusalém to hã tóg nĩ, hã kũ ag tóg ti to: “Topẽ tỹ tỹ ãg pã'i nĩ hỹn vènh ven ke mũ, ti tỹ tá jun kũ,” he mũ. ¹²Kỹ Jesus tóg ag mỹ kãmén mũ, Topẽ tỹ tỹ ãg pã'i nĩnh ke tỹ ver vènh ven ke tũ nĩ. Kũ tóg tag tó mũ, ha mẽ. “Kejèn pã'i tóg nĩgtĩ,” he tóg. “Ën tóg ga ù ra tig sór mũ, tá ã tũ ve jé, ga ãn tá ã tũ han jé. Tag han kar tóg tá vỹn ke sór mũ. ¹³Pã'i ãn vỹ ã camarada tỹ 10 (ke) ag jé prër mũ, kũ tóg ag mỹ jãnkamy prestar he mũ sir. Ag kar mỹ tóg ti kãmur pir nĩm mũ, jãnkamy tỹ, ù tỹ 10 (ke) ag mỹ. Kũ tóg ag mỹ: “ha inh mỹ tỹ rãnhraj,” he mũ. “Kejèn sóg vỹn kenh ke mũ, kũ sóg tugnyĩm ke mũ, ajag rãnhraj ti,” he tóg. Kar tóg tĩ mũ sir.

¹⁴Hã ra ti krēm ke ù ag vỹ ti to há tũ nỹti, kũ ag tóg ti nón vènh vĩ jènẽg mũ. Kũ ag tóg: “ã tỹ ãg kri tỹ pã'i nĩn kũ tóg vènhmỹ nĩ,” he mũ, “ãg tỹ tag ve jãvãnh tóg tĩ,” he ja ag tóg nĩgtĩ, ag tỹ ti mỹ vènh vĩ jènẽg mũn kã. ¹⁵Hã ra tóg tỹ pã'i nĩn kũ kejèn vỹn ke mũ, ga ãn ve kar kũ, tá ti rãnhraj han kãn kar. Kũ tóg tỹ pã'i mág jẽ. Vỹn ke kũ tóg ã camarada ag jé prër mũ sir, ti tỹ ùn mỹ jãnkamy vin ja ãn ag. Ti tỹ ag rãnhraj tugnyĩm sór vè, ag ganho ve sór vè gé. ¹⁶Kũ ù tóg ti tá jun kũ ti mỹ: “pã'i,” he mũ. “Ti kãmur pir nĩm ã tóg mỹr. Hã ra sóg kri ù tỹ 10 (ke) ganhar ké,” he tóg. ¹⁷Kũ ti patrão tóg ã camarada mỹ: “jykre há tãvi ã tóg nĩ,” he mũ. “Nén si ki rĩr há han ã tóg, hã kũ ã tóg cidade tỹ 10 (ke) ki rĩr mũ ha,” he tóg, pã'i ti, ã camarada mỹ. ¹⁸Kũ ù tóg ti tá jun mũ gé. Kũ tóg ti mỹ: “pã'i,” he mũ gé. “Ti kãmur pir nĩm ã tóg mỹr. Hã ra sóg kri ù tỹ 5 (ke) ganhar ké,” he tóg. ¹⁹Kũ ti patrão tóg ti mỹ: “cidade tỹ 5 (ke) ki rĩr jé ã tóg ke mũ ha,” he mũ gé.

²⁰Kũ ù tóg tá jun mũ gé. Kũ tóg ti mỹ: “pã'i,” he mũ gé. “Ha vé, ã tũ ti,” he tóg. “Inh krĩ pãgja ki sóg tógfĩn kũ nĩm han. ²¹Á kamẽg ja inh nĩ, ã vĩ tar to. Á tỹ nén vin ja tũ ãn mãn sór ã tóg tĩ, ã tỹ nén krãn ja tũ kunũnh sór ã tóg tĩ,” he tóg, ti camarada ti, pã'i ti mỹ. ²²Kũ ti patrão tóg ti mỹ: “ã vĩ tóg ã jykre pãno han mũ, ha mẽ,” he mũ. “Inh mỹ vĩ tar han tĩ? Inh mỹ sỹ nén vin ja tũ mãn sór tĩ? Inh mỹ sỹ nén krãn ja tũ kunũnh sór tĩ? Hã ki kanhró ã mỹ nĩ? ²³Kũ ã tỹ ne jé inh jãnkamy tỹ banco ki rãnhraj tĩ ag mỹ vin ja tũ nĩ nẽ? Á tỹ ag mỹ vin mũ ra sóg ti juro venh mũ vè, kũ sóg isũ kãfór mãn ke mũ vè,” he

tóg, ti patrão ti, ã camarada mÿ. ²⁴Kÿ tóg tá nÿtí ag mÿ: “ti nĭgã ti tũ mã,” he mũ. “Û tÿ ti kãmur tÿ 10 (ke) mãn ja ěn mÿ nĭm, ti tũ pir ti,” he tóg mũ sir. ²⁵Kÿ ag tóg ti mÿ: “pã'!” he mũ. “Ti kãmur tÿ 10 (ke) vÿ tÿ ti tũ nÿtí. Tũ mág ve ti huri,” he ag tóg, pã'i mÿ. ²⁶Kÿ tóg: “hÿ,” he mũ. “Hã kÿ sóg tó mũ. Ûn tũ mág vÿ mãn mãn ke mũ. Û tÿ tũ sĭ nĭ ěn tũ kunũnh kãn jé ag tóg ke mũ gé,” he tóg. ²⁷“Kÿ inh kato tẽ mũ ag pére kãmũmnĭ, ũ tÿ iso: “ti tÿ ěg kri tÿ pã'i jĕn kÿ tóg ěg mÿ kórég nĭ,” he mũ ěn ag. Ag kãgtén ra, inh rĭnve,” he tóg, pã'i ti,” he tóg, Jesus ti. Ti tÿ ěg tÿ ti rãnrãj ki rĭr há han ke kãmén há vĕ.

²⁸Tag tó kãn kÿ tóg tá kãkutẽ mũ sir, kÿ tóg cidade tÿ Jerusalém ra tĩ mũ.

Jesus tÿ Jerusalém tá jun (Mt 21.1-11; Mc 11.1-11; Jo 12.12-19)

²⁹Ti tÿ Jerusalém ra tĭg kÿ tóg ěmã tÿ Betfagé to há jun mũ, ěmã tÿ Betânia tá, pãnónh tÿ Oliveiras he mũ ěn tá. Tá jun kÿ tóg ã mré mũ tĩ régre ag jĕnĕg mũ, ag tÿ ti mÿ ag mĕg tÿ burrica ve jé. ³⁰Hã kÿ tóg ag mÿ: “ěmã ěn ra mũmnĭ, ěg jo ěmã ěn ra,” he mũ. “Tá junjun kÿ ajag tóg burrica fi kósin venh mũ. Kri nĭ ja tũ ja tóg jĕ ver. ěn kavãn kÿ ti pére kãmũmnĭ, ti kyvãn kÿ,” he tóg. ³¹“Hĕn ri ke mũn ag tóg ajag mÿ: “ajag tÿ ne jé ti kavãn nĕ?” hĕnh mũ. Kÿ ag mÿ: “ěg Senhor vÿ ti ve sór mũ,” hĕmnĭ,” he tóg, Jesus ti.

³²Kÿ ag tóg mũ mũ, Jesus tÿ ag jĕgnĕn kÿ. Ti tÿ ag mÿ tó mũ ve kãn ag tóg mũ sir. ³³Kÿ ag tóg ti kyvãg mũ. Kÿ ti tÿ tÿ ũn mĕg mũ ag tóg ag mÿ vĭ mũ. “Ajag tÿ ne jé burrica kósin tag kavãn nĕ?” he ag tóg. ³⁴Kÿ ag tóg: “ěg Senhor vÿ ti ve sór mũ,” he mũ. ³⁵Kÿ ag tóg Jesus mÿ ti pére kãmũ mũ. Ajag kur kugjĕn ag tóg mũ sir ti kri. Kÿ Jesus tóg kri nĭ mũ sir. ³⁶Kÿ tóg tĩ mũ. Kÿ ag tóg ajag kur kugjĕn mũ sir, ěpry jagma, ěmĭn jagma. ³⁷Ge kÿ ag tóg Jerusalém to há junjun mũ sir, pãnónh tÿ Oliveiras to re kÿ.

Ag tÿ pãnónh ěn to re kÿ vãhã ag kar ěn tóg Topĕ mÿ vĭ há han mũ sir, Jesus mré mũ kar ěn ag. Ag mÿ tóg sér tĩ. Jesus tÿ nĕn han mũ ve ja ag tóg nĭgtĩ, ti tÿ nĕn han vãnh hyn han mũ ti. ěn mĭ ěkrĕn kÿ ag tóg Topĕ mÿ vĭ há han mũ, jamã hár(a). ³⁸Kÿ ag tóg: “!..sér tóg tĩ ěg mÿ..!” he mũ. “!..ěg Senhor vÿ ěg ki jun..., ěg jóg mág tÿ ti jĕnĕn kÿ..!” he ag tóg. “!..Kanhkã tá ke ag tóg jatu nÿtĩ..! Topĕ mÿ ěg tóg vĭ há han sór mũ, kynhmÿ nĭ ěn mÿ..!” he ag tóg, prĕnrĕr kÿ.

³⁹Hã ra Fariseu ũ ag tóg tá nÿtĩ gé, vĕnh e ěn kãmĭ. Kÿ ag tóg Jesus mÿ: “Senhor!” he mũ. “Á mré mũ tĩ ag mÿ: “prĕnrĕr tũg ra,” hé,” he ag tóg, Jesus mÿ. ⁴⁰Hã ra Jesus tóg ag mÿ: “vó,” he mũ. “Ha mĕ, ag prĕnrĕr tũ nĭ ra pó hÿn prĕnrĕr mũ vĕ, ag mÿ sinsér mũ vĕ,” he tóg ag mÿ.

Jesus tÿ Jerusalém to fÿ

⁴¹Ge kÿ ag tóg cidade tá junjun mũ sir. Cidade ěn ve kÿ tóg to fÿ mũ, Jesus ti. ⁴²“Jerusalém tá ke ag vÿ ki kanhrãnrãn sór tũ nÿtĩ,” he tóg. “Ag tÿ ũri ki kanhrãnrãn há tóg tĩ vĕ, há ra ag tóg ke jãvãnh nÿtĩ. Ajag tÿ ki kanhrãnrãn! he mũ ra ajag tóg jatu kĕnh ke mũ vĕ, mÿr, ha mĕ, há ra ajag tóg jĕmĕ sór tũ

nĩ. Kutu ãjag tóg nýtĩ. ⁴³Hã kÿ ãjag tóg vãhã kurã kórég pẽ venh ke mũ. ãjag kato tẽgtẽ mũ ag vÿ ãjag to ráránh ke mũ. Kũm!kũm ke jé ag tóg ke mũ, ãjag cidade jy ró pênĩn. Komẽr hã ag tóg ãjag to grẽngrẽn kenh ke mũ, kÿ ag tóg ãjag mãn vÿrÿn kenh ke mũ sir. ⁴⁴Ãjag tÿ tũg' he kãn jé ag tóg ke mũ, ãjag krẽ ke gé. ãjag ãn kókén kãn jé ag tóg ke mũ gé. Kÿ ãn tÿ pó pi(jé) jagnẽ kri nýtĩn mũ'. Kurã há ki ãjag tóg Topẽ vĩ mẽ jãvãnh nýtĩ, ùri. Topẽ vÿ ùri ãjag mÿ vĩ há han mũ ver, hã ra ãjag tóg mẽ jãvãnh nýtĩ. Hã kÿ ãjag tóg ti kórég venh ke mũ," he tóg, Jesus ti. Fÿ pẽ han kÿ tóg tó mũ, cidade mĩ tĩg kÿ.

Jesus tÿ Topẽ jo ãn tá jun

(Mt 21.12-17; Mc 11.15-19; Jo 2.13-22)

⁴⁵Kÿ tóg Topẽ jo ãn tá jun kÿ kãra rã mũ sir. Kÿ tóg ù tÿ tá nén ù vender he tĩ ag pan mũ sir. ⁴⁶Ag mÿ tóg tag tó mũ, ha mẽ. "Topẽ vĩ rá to jykrén nĩ," he tóg. "Tag vÿ rán kÿ nĩ, ha mẽ. Inh ãn jiji vÿ tÿ Topẽ mré vĩ jafã nĩ, he tóg, Topẽ vĩ tÿ rán kÿ nĩ ki. Hã ra ãjag tóg Topẽ mré vĩ jafã tag krẽm nén kar pigju mũgtĩ, kÿ tóg bandido ag jamã ri ke nĩ sir," he tóg, Jesus ti. Ag pan kÿ tóg ag mÿ tó mũ.

⁴⁷Hã ki tóg kurã kar ki ag kanhrãnrãn mũ, Topẽ jo ãn krẽm. Hã ra Topẽ tũ ki rĩr tĩ to pã'i ag mÿ tóg kórég nĩ, Topẽ vĩ rán tĩ ag mÿ ke gé, pã'i kar ag mÿ. Hã kÿ ag tóg ti tén ke to jykrén mũ sir. ⁴⁸Hã ra tóg ag mÿ ki króm sór tũ nĩ. Vẽnh kar mÿ tóg mẽ sér tĩ, ti vĩ ti, hã kÿ pã'i ag tÿ ti tén sór mũ ra tóg vẽnhmÿ tĩ sir ag mÿ.

Ûn nÿ hÿn Jesus jẽnẽ

(Mt 21.23-27; Mc 11.27-33)

20 ¹Kurã kar ki Jesus tóg Topẽ vĩ tó jẽ nĩ, vẽnã vĩ sér ãn, Topẽ jo ãn krẽm. Kÿ tóg kejẽn tá jẽ nĩ. Kÿ Topẽ tũ ki rĩr tĩ to pã'i ag tóg ti to kãmũ mũ, Topẽ vĩ to professor ag ke gé, kófa ag ke gé. ²Ti mÿ ag tóg: "ẽg tÿ ã ki jẽmẽnã há tóg tĩ," he mũ. Kÿ tóg ag mÿ: "hej," he mũ. Kÿ ag tóg: "ã vẽnã jykre tÿ ne tÿ tag han mũ?" he mũ. "Û nÿ ã jẽnẽ?" he ag tóg. ³Kÿ tóg ag mÿ: "ãjag ki sóg jẽmẽnã ke mũ gé, vẽnã kato," he mũ. "Ha mẽ. ⁴João vÿ ag kygpég tĩ ja nĩgtĩ. Kÿ ti mÿ kanhkã tá vẽnã jykre han mũ, ẽprã jykre vó?" he tóg. "Û nÿ ti jẽnẽ?" he tóg. "Inh mÿ tó," he tóg, Jesus ti, ag mÿ. ⁵Kÿ ag tóg jagnẽ mré to jykrén mũ sir. "Ëg tÿ ti mÿ: "Topẽ tÿ ti jẽnẽ vẽ," hen kÿ tóg ẽg mÿ: "ãjag tÿ ne jé ti vĩ kri fig tũ ja nĩ nẽ?" henh ke mũ," he ag tóg jagnẽ mÿ. ⁶"Ëg tÿ hã ra ti mÿ: "ẽprã ke jykre ja vẽ," hen kÿ vẽnã kar vÿ ẽg pin sór ke mũ, pó tÿ, ha vemnĩ. João to ag tóg: "Topẽ vĩ tó tĩ pẽ ja vẽ," he tĩ, hã kÿ ag tóg ẽg to jũnh ke mũ, ẽg tÿ: "hã tũ vẽ," hen kÿ," he ag tóg mũ jagnẽ mÿ. ⁷"Topẽ jykre han ja ti nĩ," he sór tũ ag nýtĩ, kÿ ag tóg: "ẽprã ke jykre han ja ti nĩ," he sór tũ nýtĩ gé. Hã kÿ ag tóg Jesus mÿ: "ẽg pi(jé) ki kanhró nýtĩ," he mũ, João jykre to. ⁸Kÿ Jesus tóg ag mÿ: "kÿ sóg ãjag mÿ ù tÿ ãn jẽnẽ mũ ãn tónã ke tũ nĩ gé," he mũ. ã kato tẽ mũ ag mÿ tóg ke mũ.

Ûn camarada kórég ag to comparação

(Mt 21.33-46; Mc 12.1-12)

⁹Kỹ tóg vènh kar kanhrânran kỹ ag mý: “èg tỹ Topê kato tẽ kỹ tóg ge nỹnh mũ, ha mẽ,” he mũ. “Kejên ù tóg nĩgtĩ. Uva krân ja tóg nĩ, nèn kanê tỹ vinho han jafã ên. Kỹ tóg ù tỹ ki rĩr tĩ ag mré to jykren kỹ ag mý tovãnh mũ sir. Ag mý tovãnh kỹ tóg ga ù ra tĩ mũ. Hã ra tóg kãtig vãnh han mũ. ¹⁰Ti uva kanên kỹ tóg ag mý ã camarada jênêg mũ, ù tỹ ki rĩr tĩ ag mý, ag tỹ ti mý ti tũ nĩm jé, êkré kanê ên ti. Hã ra ag tóg ti mý vin tũg mũ. Ti mrânmrân ag tóg mũ. Kĩ ag tóg ti mý: “ha tĩg,” he mũ. Nèn ù tũ ra tóg tĩ mũ sir. ¹¹Kỹ tóg ã camarada ù jênêg mũ gé sir. Hã ra ag tóg ti mrânmrân mũ gé. Ti mý fêfén kar kỹ ag tóg ti mý: “ha tĩg,” he mũ gé sir. Nèn ù tũ ra tóg tĩg mũ gé. ¹²Kỹ tóg ag mý ù jênê mãn mũ gé sir, hã ra ag tóg ti mrânmrân kỹ ti rãnh kỹ ti tĩn mũ sir.

¹³Kỹ uva kré tỹ ùn tũn mũ tóg to jykren mũ. “Inh hỹn hèn ri kenh ha,” he tóg, to jykren kỹ. “Inh kósĩn jênê jé sóg ke mũ, inh fe pẽ ên, hèn ri ke mũn ag ti kamêg mũ,” he tóg. ¹⁴Ti kósĩn tỹ ag tá jun kỹ nèn kré ki rĩr tĩ ag tóg ti vég mũ. Kỹ ag tóg ti to jykren mũ, jagnê mré. “Kejên êkré tag vỹ tỹ ti tũ nỹnh mũ,” he ag tóg. “Mũ nỹ, ti tén jé, ti tũ tag tỹ tỹ èg tũ nỹnh jé,” he ag tóg. ¹⁵Kỹ ag tóg ró mã ra ti pére mũ kỹ tá ti tén mũ sir. Kỹn hỹn hẽ ri kenh ke mũ!, êkré tỹ ùn tũn mũ ên ti?” he tóg, Jesus ti. ¹⁶“Kãtig jé tóg ke mũ, êkré ki rĩr tĩ ag kãgtén jé. Kỹ tóg camarada ù ag mý finh mũ sir, ã jakré ti,” he tóg, Jesus ti.

Kỹ ag tóg mềg mũ, ti vĩ ti, ti pênĩn nỹtĩ ên ag. Kỹ tóg ag mý e tĩ. “Èg jé tag venh ke tũ nĩ,” he ag tóg mũ, ù tỹ Jesus vĩ mềg mũ ag. ¹⁷Hã ra Jesus tóg ag ki êvãnh kỹ ag mý: “Topê vĩ rá tag to jykren nĩ, ha mẽ,” he mũ. “Pó tỹ ìn han jafã fón ag tóg, pó tỹ ìn han tĩ ag. Ag mý tóg kórég ja nĩ, pó ên ti. Hã ra Topê tóg pó ên hã tỹ ìn nũna han mũ,” he tóg, Topê vỹ tỹ rãn kỹ nĩ ki,” he tóg, Jesus ti. Ti tỹ ã kato vãsãnsãn mũ ag mý vènh kãmén hã vè. ¹⁸Kỹ tóg ag mý: “ù tỹ hèn ri ke ag vỹ pó tag kri vár ke mũ, kỹ ag tóg kri vár kỹ tũ! henh ke mũ,” he mũ. “Kỹ pó tag vỹ ù tỹ hèn ri ke ag kri kutênh ke mũ gé, kỹ tóg ag tỹ nám nám ke kãn mũ sir, ag kri kutê kỹ,” he tóg, Topê vỹ tỹ rãn kỹ nĩ ki,” he tóg, Jesus ti. Ti tỹ ag tỹ ti ki rã tũ tugrĩn nũgme ki vár ke tón hã vè.

Èg tỹ imposto kajãm

(Mt 22.15-22; Mc 12.13-17)

¹⁹Kỹ Topê vỹ to professor ag vỹ ti vĩ mềg mũ, Topê tũ ki rĩr tĩ to pãli ag ke gé. Ag hã to tóg kãmén ja nĩ, “èg tỹ Topê kato vãsãn tag vỹ ge nỹnh mũ,” he mũ ên ti. Kỹ ag tóg ki kanhró nỹtĩ sir, hã kỹ ag tóg ti se sór mũ. Hã ra ag tóg ùn e ên kamêg mũ. Ti vỹ vỹ vènh kar mý mẽ há tĩ, hã kỹ pãli ag tóg ti ség tũ nĩ ver, ag tỹ ti se sór mũ (hã) ra. ²⁰Kỹ ag tóg hã ra ti tugnỹm mũ. Ti vỹ to ag tóg vãjig mũ, ag tỹ ti vỹ to fóg tỹ pãli mý ti fêg jé. Ag tỹ ti vỹ tugnĩn fóg tỹ pãli mág mý: “ha ti vóg kónãn,” he sór vè. Hã je ag tóg ùn jykre kuryj nỹ ve ag jêgnêg mũ, ag tỹ ón kỹ Jesus ki jêmê jé. ²¹Kỹ ên ag tóg sir Jesus mý: “Senhor!,” he mũ. “Vènh jykre

kuryj hã tó ã tóg tĩ, hã kãmén ã tóg tĩ. Hã kÿ ěprã ke ag ve tóg ã mÿ tÿ nén ũ tũ nĩ. Hã kÿ ã tóg Topẽ japry to, Topẽ jamĩn to ěg kanhrãn há han tĩ,” he ag tóg mũ. ²²“Kÿn mÿ há nÿ, ěg tÿ fóg tÿ pã'i mág tÿ imperador mÿ jãnkamy ěn nĩm ti, imposto kajãm jé? ěg mÿ hÿn nĩm mũ, nĩm ke tũ nĩ vó?” he ag tóg. ²³Hã ra Jesus tóg ki kanhró nĩ, ag jykre régre ti. Hã kÿ tóg ag mÿ: “ãjag ne tóg ón kÿ inh ki jẽmẽ sór mũ,” he mũ. ²⁴“Inh mÿ jãnkamy ven. Ũ jiji nÿ kã nĩ? Ũ kãggrá nÿ kã nĩ?” he tóg. Kÿ ag tóg ti mÿ: “pã'i mág kãggrá vë,” he mũ. ²⁵Kÿ tóg ag mÿ: “kÿ pã'i mág mÿ ti tũ nĩm, jo Topẽ mÿ ti tũ nĩm gé,” he mũ, Jesus ti. ²⁶Hã kÿ tóg ag tÿ ti vĩ to ti senh ke tóg tũ tĩ, ti vĩ há han kÿ. Kÿ tóg ag mÿ e tĩ, ti vĩ há tãvĩ ěn ti. Kÿ ag tóg ti mÿ vĩ mãn tũ nĩ sir. Hã ra vènh kar vÿ ti vĩ mẽg nÿtĩ nĩ.

Ũn kãgter mũ ag tÿ rĩnrĩr mãn ke
(Mt 22.23-33; Mc 12.18-27)

²⁷Kÿ Saduceu ag tóg ti tá junjun mũ gé, ti ki jẽmẽ jé. Hã ra Saduceu ag tóg: “ěg ter ja tá ěg tóg vÿn ke mãn ke tũ nĩ, rĩr mãn ke tũ ěg tóg nĩ,” he tĩ. ²⁸Ěn ag vÿ Jesus ki jẽmẽ sór mũ gé, ón kÿ. Kÿ ag tóg ti mÿ: “Senhor!,” he mũ gé. “Moisés vÿ ěg mÿ vènh jykre tag nĩm, há vÿ: ã régre tÿ ã krẽ tũ ra ter kÿ ã tÿ ti prũ fi tÿ prüg ke vë, he mũ. Á tÿ ã régre mÿ ã krẽ han ke vë, fi ki, he tóg mũ gé. Moisés tÿ ěg mÿ tó jan há vë,” he ag tóg mũ, Saduceu ag. ²⁹“Kÿ ũ tÿ jagnẽ mré pafa ja tÿ 7 (ke) ag vÿ nÿgtĩ. Ag kãke vÿ prüg mũ, há ra tóg ã kósĩn tũ ra ter mũ. ³⁰Kÿ ti jãvy vÿ fi tÿ prüg mũ sir, há ra tóg ã kósĩn tũ ra ter mũ gé. ³¹Kÿ ti jãvy ũ tóg fi tÿ prüg mũ gé, há ra tóg ter mũ gé, ti kósĩn tũ ra. Gen kÿ ag tóg kãgter kãn mũ kejẽn, ũ tÿ 7 (ke) ěn ag. ³²Kÿ vãhã ag prũ fi vÿ ter mũ gé sir. ³³Kÿ fag kãgter ja tá rĩnrĩr mãn kÿ fi hÿn mén tÿ 7 (ke) nĩnh mũ vë. Ag kar vÿ fi tÿ prüg ja nÿtĩgtĩ. Hã kÿ tóg vènhmÿ nÿ, ag tÿ: “rĩnrĩr mãn jé ěg tóg ke mũ,” hen kÿ,” he ag tóg. Saduceu ag tÿ Jesus mÿ ken há vë.

³⁴Kÿ Jesus tóg ag mÿ kãmén mũ. “Ěprã ke ag vÿ prügprüg tĩ, kÿ fag vÿ ag tÿ mén tĩ gé. ³⁵Ag kãmĩ ũ ag tóg ãjag kãgter ja tá rĩnrĩr mãn ke mũ, ti kurã tá krÿg kÿ. Ěn ag vÿ prüg mãn ke tũ nĩ sir, mén mãn ke tũ fag tóg nĩ gé sir, ãjag rĩnrĩr mãn kÿ. ³⁶Ter mãn ke tũ ag tóg nĩ gé, mÿr, ha mẽ, há kÿ ag prüg mãn ke tũ nĩ, kÿ fag mén mãn ke tũ nĩ gé. Kanhkã tân ri ke ag nÿtĩ, Topẽ tÿ jẽgnẽ jafã ag ri ke mÿr, ũn rĩnrĩr mãn mũ ag. Topẽ krẽ vÿ tÿ ag nÿtĩ sir, ag tÿ ãjag kãgter tá rĩnrĩr mãn ken kÿ. ³⁷Rĩnrĩr mãn jé ag tóg ke mũ, ũn kãgter mũ ag, ha vemnĩ. Hã kÿ Moisés tóg Topẽ to tag tó ja nĩ, ha mẽ. Ti tÿ vãnh pũr nĩ ěn tá ti mré vèmén kar kÿ tóg Topẽ to: “Abraão tÿ ũn to: Topẽ, he mũ ěn vë, Isaque tÿ ũn to: Topẽ, he mũ ěn, Jacó tÿ ũn to: Topẽ, he mũ ěn,” he ja nĩ, Moisés ti. ³⁸Kãgter ag huri, Abraão, Isaque, Jacó, há ra Moisés tóg Topẽ to: “Abraão tÿ ũn to: Topẽ, he mũ ěn vë,” he ja nĩ. Ti tÿ tÿ ag Topẽ nĩn kÿ ag tóg rĩnrĩr nÿtĩ, ha mẽ, ag kãgter mũ ra. Ũn kãgter kar ag vÿ Topẽ mÿ rĩnrĩr nÿtĩ,” he tóg, Jesus ti.

³⁹Kÿ ũ tÿ Topẽ vĩ rán tĩ ũ ag tóg ěg Senhor tÿ Jesus mÿ: “vĩ há han ã, ěg ter ja tá vÿn kenh ke mũ tag to,” he mũ, ti mÿ. ⁴⁰Kÿ ũ tóg ti ki jẽmẽ mãn sór tũ nĩ sir. Ti kamẽgmẽg ag tóg mũ, há kÿ ag tóg ti ki jẽmẽ mãn sór tũ nĩ ha.

Cristo m̄y t̄y Davi kósin n̄i, Topē kósin m̄y vó
(Mt 22.41-46; Mc 12.35-37)

⁴¹K̄y Jesus tóg ag ki jēmēg m̄u gé sir. K̄y tóg ag m̄y: “Topē v̄i rán t̄i ag ne tóg: “Cristo v̄y t̄y Davi kósin n̄i,” he t̄i,” he m̄u. ⁴²“Hã ra Davi tóg Cristo tó ja n̄i, ti t̄y Topē jé rán k̄y. K̄y tóg: “ēg jóg mág t̄y Topē v̄y inh Senhor m̄y tag tó ja n̄i, ha mē: “n̄i ra ver, inh pēgja tá,” he ja ti n̄i. ⁴³“Is̄y ã kato vāsānsān m̄u ag t̄y ã krēm vin ke v̄e, k̄y ag sigse ri ke v̄e sir. Tag jāvānh n̄i ver,” he ja ti n̄i, Topē ti,” he ja tóg n̄igt̄i, Davi ti,” he tóg, Jesus ti. ⁴⁴“Hã k̄y Davi tóg Cristo to: “inh Senhor,” he ja n̄i. K̄y ti kósin m̄y t̄y ti kri ke n̄i?” he tóg m̄u, Jesus ti. Hã ra ag tóg ti m̄y tó t̄ug m̄u. Ag t̄y ne tónh ke tóg t̄u t̄i, ti kato tēgtē m̄u ag m̄y.

Ón k̄y Topē v̄i to professor ag kamēg jé ēg ke m̄u
(Mt 23.1-36; Mc 12.38-40)

⁴⁵Vēnh kar tóg mēg m̄u, Jesus v̄i ti. K̄y tóg ã mré m̄u t̄i ag m̄y: ⁴⁶“ón k̄y Topē v̄i to professor ag kamēg n̄i,” he m̄u. “Kur téj r̄inh ka(mē) ag n̄yt̄i,” he tóg. “K̄y vēnh kar t̄y ag m̄y: “ã m̄y há?” hen k̄y tóg ag m̄y sér t̄i, ag t̄y cidade kuju kām̄i m̄un k̄y. Vēnh kanhrān jafā krēm ag tóg vēnh kápām k̄y n̄yt̄igt̄i. Festa ki ag tóg jēn vén t̄i, ag t̄y t̄y p̄a'i n̄yt̄in k̄y,” he tóg. ⁴⁷“Hã ra ag tóg ùn mén ter ja fag t̄u m̄an k̄an t̄i. Fag t̄u m̄an k̄an k̄y ag tóg ón k̄y Topē mré v̄i mág han m̄ugt̄i, ēg t̄y ag to: “ùn há v̄y t̄y ag n̄yt̄i,” he jé. Hã to ag vēs̄yrēnh mág t̄av̄i han ke m̄u,” he tóg, Jesus ti. Ti t̄y ù t̄y ón k̄y Topē to há n̄yt̄i ag kāmén há v̄e.

Ũn mén ter ja fi t̄y ã t̄u vin k̄an
(Mc 12.41-44)

21 ¹K̄y Jesus tóg Topē jo ìn tá jē k̄y tām̄i ēvānh k̄y ùn rico ag vigvég m̄u. Jānkamy vin jafā ki ag tóg ājag t̄u vin t̄i, Topē m̄y, jānkamy t̄i. Vin mág ag tóg m̄u. ²K̄y ùn mén ter ja fi v̄y tá jun m̄u gé sir. T̄y nén ù t̄u fi tóg n̄i, hã ra fi tóg jānkamy kāsir régre vin m̄u, Topē m̄y. ³K̄y Jesus tóg fi to: “ve ra ha,” he m̄u. “Ũn rico t̄y vin káfór han fi tóg, fi t̄u s̄i (hã) ra. T̄y nén ù t̄u fi tóg n̄i, fi mén v̄y hur ter. ⁴K̄y fi tóg ã t̄u vin k̄an ja n̄i, fi jēn mré hã. Jāvo ùn rico ag v̄y ājag t̄u ke hã t̄y Topē m̄y vin mág t̄i. Hã ki fi tóg ag t̄y n̄im káfór han, fi t̄y n̄im s̄i pē han m̄u ra. Ki hã sóg tó m̄u m̄y,” he tóg, Jesus ti.

Topē jo ìn kókén k̄y ninh ke
(Mt 24.1-2; Mc 13.1-2)

⁵Ēn k̄a ù ag tóg Topē jo ìn to v̄i há han m̄u. “S̄inv̄i pē ti jē,” he ag tóg m̄u. “Ti pó ve ra ha, mág ti n̄yt̄i. Ti s̄inv̄i han jafā v̄y e n̄yt̄i gé,” he ag tóg. ⁶K̄y Jesus tóg ke m̄u. “M̄y ājag m̄y s̄i?” he tóg. “Kejēn tóg kókén k̄an k̄y n̄ynh m̄u, ha vemn̄i, k̄y pó v̄y jagnē kri n̄yt̄i m̄an ke t̄u n̄i ha. Ḡum ke k̄an jé tóg ke m̄u, tag ti,” he tóg, Jesus ti.

Věnh jagăgtar to ră
(Mt 24.3-14; Mc 13.3-13)

⁷Ky ag tóg ěg Senhor ti mý: “kură tỹ ne kă ke nĕ hỹn?” he mũ. “Ěg hỹn hĕn ri ken ky ti kură ki kanhró nýtĩnh mũ hỹn? Topĕ hỹn ne han ke mũ, ěg tỹ kură ěn ki kanhró nýtĩ jĕ?” he ag tóg.

⁸Ky tóg ag mý: “ker ũ vỹ jĕmĕ hĕ!,” he mũ. “Ū tỹ hĕn ri ke ag vỹ inh jiji tó kămũnh mũ. “Cristo vỹ tỹ inh nĩ,” he jĕ ag tóg ke mũ. “Inh kură vỹ hur jun,” he jĕ ag tóg ke mũ. Ag nón mũ tũg nĩ. ⁹Vĕnh génh mĕgmĕ jĕ ājag tóg ke mũ, jagnĕ kato văsănsăn mũ ag. Kamĕg tũg nĩ hă ra. Vĕnh génh tỹ hĕn ri ke han jĕ ag tóg ke mũ, kură tỹ ěgno to hă. Ti kură kă ke pijĕ!,” he tóg.

¹⁰Ky tóg ag mý: “povo ag tỹ jagnĕ kato văsănsăn ke vĕ, păi krĕm ke ag tỹ păi ũ krĕm ke ag to jũnh ke vĕ,” he mũ. ¹¹“Ga tỹ ragrag ke jagy tỹ hĕn ri ke han ke vĕ gé, ěn kă. Ky vĕjĕn tóg tũ' hĕnh ke mũ gé. Vĕnh kaga kórég (ka) mĕ vỹ vĕnh vinven ke mũ, ěn kă sir. Nĕn ũ vĕnhmỹ vỹ vĕnh vinven ke mũ gé, kanhkă tá, ky vĕnh kar vỹ kanĕ junjur ke mũ,” he tóg, Jesus ti.

¹²“Tag to hă ag tóg ājag sigsenh ke mũ gé, ājag vóg kónăn jĕ ag tóg ke mũ gé, vĕnh kanhrăn jafă krĕm ag tóg ājag jykre vigvenh ke mũ gé, vĕnh se ja kăki ag tóg ājag vin ke mũ gé. Păi mág tỹ rei ag mý ag tóg ājag venven ke mũ, păi tỹ governador ag mý ke gé, ājag tỹ inh jyjy tó ja tugnĩn. ¹³Ājag tỹ inh vỹ tó jĕ, hă jĕ ag tóg ājag tỹ genh ke mũ. ¹⁴Ěn kă ājag tỹ nĕn ũ tónh ke to jykrĕn tũg nĩ, to krĩ kufy han tũg nĩ gé. ¹⁵Inh hă vỹ ājag vỹ han ke mũ, inh jykre nĩm jĕ sóg ke mũ ājag mý, ājag tỹ ag mý tón jĕ,” he tóg. “Ky ag tỹ ājag vỹ kafăn sór mũ ra tóg ag mý vĕnhmỹ tĩnh mũ, ha vemnĩ, ājag kato tĕgtĕ mũ ag mý. Ag tỹ ne tónh ke tóg tũ tĩnh mũ, ha vemnĩ,” he tóg, Jesus ti.

¹⁶“Ěn kă ājag han mũ ěn vỹ ājag senh mũ, ājag mrĕ pafa mũ ag ke gé, ājag mrĕ ke ag ke gé, ājag to há kar ag mýr,” he tóg. “Ājag kămĩ ũ ag kăgtĕn jĕ ag tóg ke mũ gé, ha vemnĩ. ¹⁷Vĕnh kar vỹ ājag to kórég tăvĩ nýtĩnh mũ, inh jiji tugrĩn. ¹⁸Hă ra ājag véké vĕsýrĕnh ke tũ nĩ, ājag gănh pir vỹ fagrĩnh mý kutĕnh ke tũ nĩ, ha vemnĩ. ¹⁹To tar nýtĩmnĩ, ājag vĕsýrĕnh ke to, ky ājag tóg rĩr krýg ja tũ ěn venh ke mũ,” he tóg, Jesus ti.

Jerusalém kókĕn ky nỹnh ke
(Mt 24.15-21; Mc 13.14-19)

²⁰“Kejĕn ag tóg Jerusalém jy nýtĩnh mũ, soldado ag, ag tỹ cidade ěn kókĕn jĕ. Ājag tỹ tag ve ky ājag tóg ki kanhró nýtĩnh mũ. Ag tỹ ti kókĕn kăn ke kură vỹ jun ke mũ, kură ěn kă. ²¹Ky vĕnh pigju mũmnĩ, pănónh ra, ājag tỹ Judĕia ki nýtĩn ky. Ājag tỹ cidade mág tá nýtĩn ky pétigtĕmnĩ, vănh kăra. Ājag tỹ vănh kămĩ ěmă kăsir ki nýtĩn ky cidade ra mũ tũg nĩ. ²²Topĕ tỹ ag vóg kónăn ke kură vĕ sir, ag jykre kórég to, hă ky tóg văsý rán ky nĩ. Vĕnh rá ěn ve jĕ ājag tóg ke mũ, kură ěn kă. ²³Ky ũn kufy fag vỹ vĕsýrĕnh mág ke mũ, kură ěn kă, gĩr pygfăm mũ fag ke gé. Ěpră ke ag vĕsýrĕnh mág tăvĩ han ke vĕ, Topĕ

tỹ povo tag to jũ jagy han ke vễ, kurã ên kã. ²⁴Ăjag kãmĩ ùn e tãvĩ kãgter ke vễ, rógro tỹ. Kỹ ăjag kãmĩ ù ag vỹ sigse kỹ mũnh mũ, povo kar kãmĩ. Kỹ Jerusalém vỹ kókén kãn kỹ nĩnh ke mũ. Fóg ag vỹ sãnsãn ke mũ, ăjag cidade mág ti. Kejẽn fóg ag tỹ tũ! henh ke kurã vỹ jun ke mũ gé hã ra,” he tóg, Jesus ti.

Topê kósin kătĩg mãn ke
(Mt 24.29-31; Mc 13.24-27)

²⁵“Kurã ên kã rã vễnhmỹn ke vễ, kysã ti ke gé, krĩg ti ke gé. Kỹ ga kri mũ ag vỹ kamẽgmẽg kãn ke mũ. Kanẽ junjur mág jé ag tóg ke mũ, povo kar ên ag. Kỹ goj vỹ krém ke mũ, goj kafã tũ vỹ jũnh ke mũ, ti kurã jun kỹ. ²⁶Kỹ ẽprã ke ag fe vỹ vo kónãn ke mũ, ag tỹ jũrũn ke vỹ ag kãgtén ke mũ, ag tỹ ăjag tỹ nén venh ke to jũrũn ken kỹ. Ẽg tỹ kanhkã tá nén vég tũ kar ên vỹ ragrag ke kãn mũ mỹr, ha mẽ. ²⁷Kỹ vãhã vễnh kar vỹ ti kătĩg ên venh ke mũ, ẽprã ke fi kósin ên ti. Kanhkã góg kãmĩ sóg kătĩg ke mũ vãhã sir. Inh ve vỹ tar nĩnh mũ, inh kătĩg mãn kỹ. Kókov kătĩg jé sóg ke mũ vãhã sir,” he tóg, Jesus ti.

Ka tỹ figueira to comparação
(Mt 24.32-35; Mc 13.28-31)

²⁸“Ăjag tỹ isỹ ăjag mỹ nén tó mũ ên ve sí han kỹ ăjag kanẽ nĩm nĩ, ăjag krĩ ti ke gé, ti tỹ ăjag mỹ sér gy tĩn kỹ. Isỹ ăjag krenkren han ken vễ ha, isỹ kurã ên hã kã jun kỹ,” he tóg.

²⁹Kỹ tóg ag mỹ: “inh kătĩg mãn ke vỹ ge nỹnh mũ, ha mẽ,” he mũ. “Ka tỹ figueira to ki kanhrãn nĩ, ka ù to ke gé, to comparação han kỹ,” he tóg. ³⁰“Ti pẽ tánh kỹ, ti fėj tãg han kỹ tóg kakó tĩ sir, ẽkré tygtánh kurã ti. ³¹Ẽn ri ke ti nĩ, ăjag tỹ inh kătĩg mãn ke kurã ki kanhró nỹtĩ ti. Ăjag tỹ sỹ ăjag mỹ nén tó ja ên ve kỹ tóg kakó tãvĩ tĩ ha, inh kătĩg ke ti,” he tóg. “Ẽn kã Topê tỹ tỹ ẽg pã'i nĩ kenh ke vễ sir. ³²Sỹ ke há vễ, hã kỹ sóg tag tó mũ, ha mẽ. Ừ tỹ nén kar ên vég mũ ag vỹ inh kătĩg mãn ke tag venh ke mũ, ùri, ag kãgter ke to hã,” he tóg. ³³“Kanhkã vỹ tũ! he mũ, ga ti ke gé. Jãvo inh vỹ vỹ tũ! henh ke tũ nĩ,” he tóg, Jesus ti.

Ẽg tỹ vễnh ki ẽmẽn ke

³⁴“Vễnh ki ẽmẽ, ăjag tỹ vễjẽn e to nug kaga tũ nĩ jé, tógá nĩnh to, ăjag tỹ kronkron to krĩ vễnhmỹ tũ nĩ jé gé. Kỹ vễjẽn to krĩ kufy han tũg nĩ gé, kur to, tag ki nén ù kar to. Ke tũ nĩ mũ ra kurã ên vỹ ăjag vatánh tá jun ke mũ, inh kătĩg mãn ke kurã ên ti. ³⁵Ăjag tỹ to vễnh kãn kỹ nỹtĩ tũ nĩn kỹ tóg ăjag mỹ sēsĩ tỹ ẽgje ki kutẽ ri ke nĩ. Vễnh vatánh tá tóg ki kutẽ tĩ, jēsĩ ti. Ge ti nĩnh mũ, inh kătĩg mãn ke ti, ga kri mũ ag kar mỹ. Ag vatánh tá sóg jun ke mũ. ³⁶Hã kỹ ăjag kanẽ nĩm nĩ, nũr sór tũg nĩ. Inh kătĩg kã jatu to ken hã vễ, hã vỹ: nũr, he mũ. Topê mrẽ vỹ tovãnh tũg nĩ, ăjag tar nỹtĩ jé, nén ù jagy ên ve kỹ. Kỹ ăjag tóg ẽprã ke fi kósin rĩnja tá jẽn h ke mũ sir, mỹ'lag tũ nĩn kỹ, isỹ vễnh kar jykre tugnỹm kurã ên kã,” he tóg, Jesus ti. Ti tỹ ag mỹ kurã tỹ ẽgno kãmén hã vễ.

³⁷Hã ki tóg kurã kar ki Topẽ jo ãn krẽm ag kanhrãnrãn tí, Jesus ti. Kutyg ký tóg cidade tá kãkutẽ ký pãnónh ra tí tí, tá nũr jé. To ag tóg: Oliveiras, he tí, pãnónh ãn to. ³⁸Ti tý kusã ki Topẽ jo ãn tá jun ký ag tóg tá ti vĩ jẽmẽnh kãmũ tí, ù tý hẽn ri ke ag.

Ag tý Jesus se sór

(Mt 26.1-5; Mc 14.1-2; Jo 11.45-53)

22 ¹Ën kã festa tóg kakó tí sir. Festa ãn ki ag tóg pão ù ko tí, hã ra tóg jãgja tú ja nĩgtĩ. Festa ãn jijin hã vỹ: Páscoa, he mũ. ²Kỹ Topẽ tú ki rĩr tí to pã'i ag vỹ Jesus to jykrén mũ. Ag tý ti tén sór vẽ. Topẽ vĩ to professor ag vỹ ti tén sór mũ gé. Hã ra ag tóg povo kamẽg mũ, ký ag tóg to jykrén ký nỹtĩ nĩ.

Judas tý pã'i ag mỹ Jesus ven sór

(Mt 26.14-16; Mc 14.10-11)

³Ën kã Judas ãn, ù tý Iscariotes he mũ ãn vỹ jagrẽ vég mũ sir, Satanás tý. Hã ra tóg tý ù tý 12 (ke) ag kã ù nĩ, Jesus tý ãn vin mũ ag kã ù vỹ tý ti nĩ. ⁴Ti tý Satanás tý jagrẽ nĩn ký tóg Topẽ tú ki rĩr tí to pã'i ag venh tí mũ sir, soldado to pã'i ag ke gé. Ti tý ag mỹ Jesus ven sór vẽ, ag tý ti se jé.

Kỹ tóg tá jun ký ag mỹ tó mũ. ⁵Kỹ tóg ag mỹ sér pẽ tí sir. Ký ag tóg ti mỹ jãnkamy tó mũ. Ag tý ti mỹ vin sór vẽ, ti tý ag mỹ Jesus ven kar ký. ⁶Kỹ tóg ag mỹ: “hej,” he mũ sir. Ký tóg to jykrén mũ, ti tý ã mỹ ki króm ke to, ag mỹ: “ha ti kãgmĩ ha,” he jé, Judas ti. Ag tý vẽn kar vatánh tá ti se sór vẽ. Hã ký Judas tóg ti tó sór mũ.

Pedro tý João mré festa tý Páscoa han

(Mt 26.17-25; Mc 14.12-21; Jo 13.21-30)

⁷Kỹ tóg pão jãgja tú ãn konh ke kurã tá krỹg mũ sir. Kurã ãn ki ag tóg mé tãg tãnh tí, ovelha tãg ãn, ag tý kurã tý Páscoa kã ko tí ãn. ⁸Kỹ Jesus tóg Pedro jẽnẽg mũ sir, João mré. Ký tóg ag mỹ: “ha mũjẽg, mé tãnh jé, ovelha ãn, ãg tý kon jé,” he mũ. ⁹Kỹ ag tóg ti mỹ: “ãg hẽ tá ti tãnh mũ hỹn!” he mũ. ¹⁰Kỹ tóg ag mỹ: “ha vé,” he mũ. “Ëmã mág tag ra mũjẽg. Tá ãjag tóg ù venh mũ. Goj vyn ký tóg tí mũ. Ën nón mũmni. Ký ti ãn tá junjun ký ti nón gemni. ¹¹Kỹ ãn ki rĩr tí mỹ: “ãg Senhor vỹ ã mỹ vẽn vỹ jẽnẽg mũ,” hemni. “Inh hỹn hẽ tá ovelha konh ke mũ, inh mré mũ tí ag mré?” he ti, ãg Senhor ti,” hemni. “Mỹ ki vẽn kãnkãnjãfã tú?” hemni. ¹²Kỹ tóg ãjag mỹ ven ke mũ sir, kroggrog tý kynhmỹ nỹ ãn ti, assoalho tý kynhmỹ nỹ ãn ti. Éhé ti nĩ, ký mesa to nỹtĩ jãfã vỹ tá nỹtĩ gé. Ën tá ti kãn nĩ ãg mỹ,” he tóg, Jesus ti. ¹³Kỹ ag tóg mũ mũ sir. Jesus tý ag mỹ tó ja ãn ve kãn ag tóg mũ, ký ag tóg mé tãnh mũ sir, tá.

Santa Ceia

(Mt 26.26-30; Mc 14.22-26; 1Co 11.23-25)

¹⁴Kỹ tóg ag tỹ konh ke hora tá krÿg mũ sir. Kÿ Jesus tóg tá nĩ nĩ, ti tỹ ùn vin ja ag mré hã, apóstolo ãn ag. ¹⁵Kỹ tóg ag mÿ vēmén mũ sir. “Sÿ ovelha tag konh ha pẽ tóg tí vẽ ajag mré,” he tóg. “Sÿ inh vēsÿrénh ke to hã ajag mré ko sór ja vẽ,” he tóg, Jesus ti, ã mré mũ tí ag mÿ. ¹⁶“Ti ko mãn ke tũ inh nĩ ha, ha vemnĩ. Topẽ tỹ tỹ ãg pã'i nĩ vỹ vènh ven ke mũ. Ti tỹ vènh ven ja ãn kã sóg ko mãn ke mũ, kejën,” he tóg.

¹⁷Kỹ tóg copa mäg mũ sir. To tóg Topẽ mré vĩ mũ, kÿ tóg ag mÿ: “ha kron,” he mũ. “Ha vènh kãpãm,” he tóg. ¹⁸“Tag kron mãn ke tũ inh nĩ ha, ke gé, ha vemnĩ. Topẽ tỹ tỹ ãg pã'i nĩnh ken kÿ sóg kejën kron mãn ke mũ, ha vemnĩ,” he tóg.

¹⁹Kỹ tóg ãmĩ mäg mũ sir. To tóg Topẽ mré vĩ mũ. Kupãn kÿ tóg ag mÿ vènh pipin mũ. Kÿ tóg ag mÿ: “inh hã vẽ,” he mũ. “Ajag jagfy sóg vènh fêg ke mũ. Kÿ inh mĩ êkrén nĩ, ajag tỹ pão tag konh ken kÿ,” he tóg, Jesus ti. ²⁰Ag tỹ ko kar kÿ tóg copa mäg mũ gé. Kÿ tóg ag mÿ: “copa ki jẽ tag vỹ inh kyvènh ri ke nĩ,” he mũ. “Ajag jagfy tóg inh ki kãkutènh mũ, inh kyvènh ti. Inh jykre tãg to ken hã vẽ, isÿ inh kyvènh tugrĩn ajag mÿ vènh pãte fón jé,” he tóg.

²¹“Hã ra ajag kãmĩ ù tóg inh vatánh tá isónh ke mũ, inh kato tẽ ag mÿ. Inh mré tóg mesa tag to nĩ nĩ. ²²Tĩg jé sóg ke mũ, sÿ tỹ ãprã ke fi kósĩn nĩn kÿ. Vãsÿ Topẽ tóg to jykren ja nĩ, hã kÿ sóg tí mũ. Hã ra ù tỹ isónh ke ãn mÿ tóg vĩ kónãn tãvĩ han ke mũ, Topẽ ti,” he tóg. ²³Kÿ ag tóg jagnẽ mÿ ke mũ. “Ëg kãmĩ ù tỹ hẽ nẽ hÿn?” he ag tóg mũ sir jagnẽ mÿ, ù tỹ ti tónh ke ãn to.

Û tỹ hẽ nẽ tỹ ùn mág nĩ

²⁴Ën kã ag tóg jagnẽ kãfór nĩ sór mũ. Hã kÿ ag tóg jagnẽ to jũ mũ. ²⁵Kÿ Jesus tóg ag mÿ ke mũ. “Fóg ag pã'i ag vỹ ajag krêm ke ag mÿ vĩ tar han tí, kÿ ag tóg ag kri ke ag mÿ: “ãg jóg,” he tí, ag tỹ ag mÿ vĩ tar han mũ ra. ²⁶Ag ri ke han tũg nĩ. Ajag mÿ tỹ ùn mág nÿtĩ sór mũ? Kÿ tỹ ùn kãsir ri ke nÿtĩmĩ jagnẽ mré,” he tóg, Jesus ti. “Û tỹ inh jykre ki tỹ pã'i nĩn kÿ tóg ã krêm ke ag camarada ri ke nĩnh ke mũ, ag ki rĩr kÿ. ²⁷Kejën ãg tóg mesa to nÿtĩ, kÿ ù tóg mesa ki rĩr tĩgtĩ. Û tỹ hẽ nÿ hÿn mesa ki rĩr tí? Ag patrão mÿ! ti camarada mÿ vó? Ti camarada vỹ ki rĩr tĩgtĩ. Jo sóg ajag ki rĩr tĩgtĩ, ajag camarada ri ke. ²⁸Ajag hã ne inh mré mũgtĩ! Isovãnh ja tũ pẽ ajag tóg nÿtĩ. Isÿ nén ù jagy vég mũ ãn ve kãn ajag tóg tí, inh mré. ²⁹Inh panh vỹ isÿ pã'i han ke mũ, kÿ sóg ajag tỹ pã'i han ke mũ gé, ti tỹ isÿ pã'i han kóm, ³⁰ajag tỹ inh mré jën jé tá, inh mré kron jé tá, isÿ tỹ pã'i nĩn kÿ. Kÿ ajag tóg ajag nĩgja kri nĩgnĩ kÿ nÿtĩnh mũ, ajag tỹ povó tỹ Israel ag jykre vigve jé, povó tỹ 12 (ke) ãn ag,” he tóg, Jesus ti.

Jesus t̄y Pedro m̄y tó

(Mt 26.31-35; Mc 14.27-31; Jo 13.36-38)

³¹K̄y ěg Senhor v̄y Pedro m̄y: “Simão!, Simão!,” he m̄. “Ha vé, Satanás v̄y ājag to v̄i, Topē m̄y. Ti t̄y ājag jykre ve sór vē. Trigo t̄y ěg tóg gren ki kākag t̄i, ěg t̄y ti fār pan jé. Ēn ri ke han jé tóg ke m̄, ājag t̄y, Satanás ti. ³²Hā ra sóg hur ā jagfy v̄i, ā t̄y inh ki rā tovānh pē han tū n̄i jé. K̄y ā tóg kejēn ā jykre to jykrén m̄n ke m̄, ā t̄y inh jykre hā han jé. Ēn kā ā tóg ā mré ke ag jyvēn k̄y ag t̄y tar! he m̄.

³³Hā ra Pedro tóg ti m̄y: “Senhor!,” he m̄. “Ā mré sóg se k̄y jēnh m̄, ā mré sóg ter ke m̄ gé,” he tóg. ³⁴Hā ra Jesus tóg Pedro m̄y: “vó,” he m̄. “Ha vé, ūri ā tóg iso: “ti ki kagt̄ig sóg n̄i,” he tāgt̄ū han ke m̄, galo kyr to hā, ha vemn̄i,” he tóg m̄, Jesus ti.

Jesus t̄y ā mré m̄ t̄i ag m̄y tó

³⁵K̄y tóg ag kar m̄y: “ājag jēgnē ja inh n̄i, vās̄y,” he m̄. “K̄y ājag tóg nén ū ma m̄ ja tū n̄igt̄i, saco tū, bolsa tū, pēn né tū, pēn to ró ěn. Ēn kā ājag m̄y jagāgtar ja n̄yt̄igt̄i!” he tóg. K̄y ag tóg ti m̄y: “vó,” he m̄. ³⁶K̄y tóg ag m̄y: “hā ra tóg ūri ke tū n̄igt̄i,” he m̄. “Hā k̄y ājag jānkamy ma m̄jēg, ājag sacon ma m̄jēg, ājag bolsa ma m̄jēg. Ājag t̄y nén ū tū n̄yt̄in k̄y ājag kur vender hemn̄i, rógro kajām jé sir. ³⁷Nén ū tóg iso rán k̄y n̄i, hā v̄y: ag m̄y tóg t̄y ūn jykre pāno n̄i, he m̄. S̄y vāhā tag venh ke vē ha. Is̄y iso nén rán k̄y n̄i ěn ve k̄n ke vē ha, vāhā,” he tóg, Jesus ti.

³⁸K̄y ag tóg ti m̄y: “Senhor!,” he m̄. “Rógro régre v̄y ki n̄yt̄i,” he ag tóg m̄. Hā ra tóg ag m̄y: “gen k̄y,” he m̄.

Jesus t̄y ā panh mré v̄i

(Mt 26.36-46; Mc 14.32-42)

³⁹K̄y tóg ā t̄y t̄i jafā ra t̄i m̄ sir, hā v̄y: pānónh t̄y Oliveira, he m̄ ěn ra. Ti mré m̄ t̄i ag v̄y ti nón m̄ m̄ sir. ⁴⁰Tá jun k̄y tóg ag m̄y: “Topē mré v̄i, ājag t̄y ti v̄i mranh tū n̄i jé, ājag t̄y nén ū jagy ve k̄y,” he m̄, Jesus ti, ā mré m̄ t̄i ag m̄y.

⁴¹K̄y tóg t̄ig s̄i han m̄, k̄y tóg ā jakr̄i t̄y jēg m̄. K̄y tóg Topē mré v̄i m̄ sir. ⁴²K̄y tóg: “panh!,” he m̄. “M̄y ā t̄y inh vēs̄yrenh ke tag t̄y t̄i! he m̄ jāvānh? Hā ra is̄y ā m̄y nén to v̄i m̄ tag han t̄ig n̄i. Ā t̄y nén han ke m̄ ěn hā han n̄i,” he tóg, Jesus ti, Topē m̄y.

⁴³K̄y Topē t̄y jēnē jafā ū v̄y ti m̄y vēnh ven m̄ sir, kanhkā tá, k̄y tóg ti tar han m̄. ⁴⁴Hā ra tóg ā ter ke to kanē jur m̄, k̄y tóg Topē mré v̄i m̄n!, v̄i m̄n!, he m̄. K̄y ti kārān v̄y kyvénh n̄i sir, k̄y tóg ga kri vēnh kugjēg m̄.

⁴⁵K̄y tóg Topē mré v̄i kar ā mré m̄ t̄i ag to k̄at̄i m̄. Hā ra ag tóg n̄ugn̄ur n̄yt̄i n̄i. Krónh! krónh! he ja ag tóg n̄i, ag fe kaj tugr̄in. ⁴⁶K̄y tóg ag m̄y: “ājag ne tóg n̄ugn̄ur n̄yt̄i n̄i!” he m̄. “N̄ign̄i ra, Topē mré v̄i, ājag t̄y ti v̄i mranh tū n̄i jé, ājag t̄y nén ū jagy ve k̄y,” he tóg, ti mré m̄ t̄i ag m̄y.

Ag tÿ Jesus se

(Mt 26.47-56; Mc 14.43-50; Jo 18.3-11)

47Ti tÿ ver tÿ vēmén jē ra ag tóg junjun mū sir, Judas mré hã, ù tÿ 12 (ke) ag kã ù ěn ti. Ti tÿ ag tatín kãtīg hã vē, ù tÿ ti senh ke mū ag. Û tÿ ag jo tĩ mū ěn tóg sir Jesus to grēn ke kÿ ti ki nhun ke mū. 48Kÿ Jesus tóg ti mÿ: “Judas!” he mū. “Ā ne tóg inh ki nhun ke kÿ iso: “ti hã vē,” he mū, inh kato tē ag mÿ, inh, hã vÿ: ěprã ke fi kósin, he mū,” he tóg, Jesus ti.

49Kÿ ti mré mū ag tóg ag tÿ ti senh ke vég mū. Kÿ ag tóg ti mÿ: “Senhor!” he mū. “Ēg mÿ rógro tÿ ag fynh ke tũ?” he ag tóg. 50Kÿ ag kã ù tóg polícia ù fynh mū, ti nigrēg tÿ rãm ke tóg mū, ti pēgja tá. Topē tũ ki rĩr tĩ to pã'i krēm ke ù vē, polícia ěn ti. 51Hã ra Jesus tóg ag mÿ: “ag vóg tũg ra, há ti nĩ,” he mū. Kÿ tóg ti nigrēg mãn kÿ to tÿ grēn ke mū sir.

52Kÿ Jesus vÿ pã'i ag mré vēmén mū, Topē tũ ki rĩr tĩ to pã'i ag mré, Topē jo ĩn ki rĩr tĩ to pã'i ag mré ke gé, kófa ag mré ke gé. Ag kar vÿ ti se kãmū mū. Kÿ tóg ag mÿ: “ājag ne tóg rógro génh kÿ iso kãmū mū!, ka kÿv génh kÿ ke gé,” he mū. “Inh pi(jé) tÿ bandido nĩ!” he tóg. 53“Kurã kar ki sóg Topē jo ĩn krēm ājag mré nĩ ja nĩgtĩ, hã ra ājag tóg tá ise sór ja tũ nĩ, ājag tÿ ag kamēg kÿ,” he tóg. “Hã ra tóg ũri jun, ājag kurã ti, Japo tÿ ā tÿ nén han sór tĩ ěn han jé, ājag tÿ. Jÿkre ki kuty ti nĩ, Japo ti,” he tóg, Jesus ti.

Pedro tÿ Jesus to ón

(Mt 26.57-58; 69-75; Mc 14.53-54; 66-72; Jo 18.12-18; 25-27)

54Kÿ ag tóg ti ség mū sir. Ag tÿ ti pére mū kÿ ag tóg Topē tũ ki rĩr tĩ to pã'i mág ĩn tá junjun mū sir.

Hã ra Pedro vÿ kuvar há tá ag nón tĩ mū. 55Īn vãso tá ag tóg pĩ grug mū, soldado ag, kÿ ag tóg tugtón nÿtĩ nĩ. Kÿ Pedro vÿ ag mré tón nĩ nĩ sir. 56Kÿ pã'i camarada ù fi vÿ tá ti vég mū, pĩ grun ki. Kÿ fi tóg ti tugnÿm mū. Kÿ fi tóg ag mÿ: “ti mré tĩ ù vē inh mÿ!” he mū. 57Hã ra Pedro tóg: “vó,” he mū. “Ti ki kagtīg sóg nĩ, jÿ,” he tóg.

58Kar kÿ ù tóg ti tugnÿm mū gé, kÿ tóg ti mÿ: “ag kã ù vÿ tÿ ā nĩ,” he mū. Hã ra Pedro tóg ti mÿ: “inh hã tũ vē, vÿ,” he mū gé.

59Tag kar kÿ, hora pir tũg kÿ hēn ri ke mūn ù tóg ti tugnÿm mū gé. Kÿ tóg tá nÿtĩ ag mÿ: “ha vé, Galiléia tá ke vÿ tÿ ti nĩ,” he mū. “Inh mÿ tóg tÿ ti mré ke nĩ,” he tóg mū gé sir. 60Hã ra Pedro tóg ti mÿ: “inh pi(jé) ti ki kanhró nĩ, vÿ!” he mū. “Ā tÿ ne tó nē?” he tóg mū sir. Ti tÿ ver tó nĩ ra galo vÿ kyr mū. 61Kÿ ěg Senhor vÿ vēsÿjãm ěvãnh kÿ Pedro tugnÿm mū. Kÿ Pedro vÿ to jÿkrén mū sir, ěg Senhor tÿ ti mÿ nén tó ja to, hã vÿ: “iso ā tóg: “ti ki kagtīg sóg nĩ,” he tãgtũ han ke mū, galo kyr to hã,” he ja ěn mĩ. 62Kÿ Pedro vÿ tá kãkutē mū, kÿ tóg fÿ mág han mū sir.

Ag tÿ Jesus vóg kónän
(Mt 26.67-68; Mc 14.65)

⁶³Kÿ ù tÿ Jesus ség mû ag vÿ ti to é he mû sir. Ti tânĥ ag tóg mû gé sir. ⁶⁴Ti kanĕ pãg kÿ ag tóg ti kakã ki tânĥ kÿ ti mÿ: “ù nÿ ã tânĥ?” he mû. “Ã tÿ nĕn kar ki kanhró nĕn kÿ ã hÿn ki kanhró nĕ,” he ag tóg ti mÿ. ⁶⁵Gen kÿ ag tóg ti mÿ vĭ kónän tÿ hĕn ri ke han mû, ti to é he kÿ.

Pã'i ag tÿ Jesus ki jĕmĕ
(Mt 26.59-66; Mc 14.55-64; Jo 18.19-24)

⁶⁶Tÿ vaj kÿ kófa kar ag tóg vĕnh măn mû, Topĕ tũ ki rĭr tĭ to pã'i ag mré hã, Topĕ vĭ to professor ag mré hã. Ag vĕnh măn kÿ ag tóg ti jé prĕr kÿ ag rĭnĵa tá ti fĕg mû sir, ag tÿ ón kÿ ti jykre ve jé. Ag tÿ ti tĕn sór vĕ, hã ra ag tóg ón kÿ ti jykre ve vén sór mû. ⁶⁷Hã kÿ ag tóg ti mÿ: “ã mÿ tÿ Cristo nĭ?” he mû. “Ha ĕg mÿ tó,” he ag tóg. Kÿ tóg ag mÿ: “ãĵag pi(jé) inh vĭ kri fig tĭ', isÿ ãĵag mÿ tó tĭ (hã) ra!” he mû. ⁶⁸“Isÿ ãĵag ki jĕmĕ sór mû ra ãĵag tóg inh mÿ tó tũ nĭ gé. Kÿ ãĵag tóg isovãnh tũ nĭ gé,” he tóg. ⁶⁹“Hã kÿ ĕprã ke fi kósĭn vÿ Topĕ pĕgĵa tá nĭnh ke mû ha. Topĕ vÿ tar nĭ. Sÿ ti pĕgĵa tá nĭnh ken vĕ ha,” he tóg.

⁷⁰Kÿ ag tóg ti mÿ ke kãn mû. “Kÿ ã mÿ tÿ Topĕ kósĭn nĭ?” he ag tóg mû ti mÿ. Kÿ tóg ag mÿ: “ki hã ãĵag tóg tó mû,” he mû. “Inh hã vĕ,” he tóg ag mÿ, Jesus ti. ⁷¹Kÿ ag tóg: “ti kato vĭ ù jĕmĕ măn ke tũ ĕg nĭ ha,” he mû, jagnĕ mÿ. “Ti jĕnky ki kutĕ mĕ ĕg tóg huri. Topĕ to vĭ kónän ti huri. Ti ter ke vĕ,” he ag tóg mû sir, pã'i ag, Jesus to.

Pilatos tÿ Jesus ki jĕmĕ
(Mt 27.1-2; 11-14; Mc 15.1-5; Jo 18.28-38)

23 ¹Hã ra tá ke kar ag vÿ Jesus pére mû mû, fóg tÿ pã'i tÿ Pilatos mÿ. ²Tá ag tóg ti kato vĭ mû sir, kÿ ag tóg Pilatos mÿ: “vĕnh kar krĭn kónän han tóg tĭ, ag tÿ vĕnh jykre há tovãnh jé,” he mû. “Kÿ tóg ag mÿ: “pã'i mág tÿ imperador mÿ imposto nĭm tũg nĭ,” he tĭ gé. Kÿ tóg vĕso: “tÿ inh Cristo nĭ, pã'i mág tÿ rei ti,” he tĭ gé,” he ag tóg mû, Jesus to. ³Kÿ Pilatos tóg ti mÿ: “ã mÿ tÿ Judeu ag pã'i tÿ rei nĭ?” he mû. Kÿ tóg ti mÿ: “ki hã ã tóg tó mû,” he mû, Jesus ti.

⁴Kÿ Pilatos vÿ ag mÿ kãmĕn mû, Topĕ tũ ki rĭr tĭ to pã'i ag mÿ, povo kar mÿ ke gé, kÿ tóg: “ti tÿ nĕn ù kórĕg han ja vég tũ sóg nĭ, ti ki,” he mû. ⁵Hã ra ag tóg ti tovãnh jãvãnh pĕ nÿtĭ. Kÿ ag tóg ti mÿ: “hã ra tóg vĕnh kar krĭ rÿg tũgtĭ,” he mû. “Ga tÿ Judéia kar mĭ tóg tũg ja nĭ, ga tÿ Galiléia mĭ ke gé, tag mĭ ke gé. Tũg kÿ tóg vĕnh kar krĭn kónän tĭ,” he ag tóg ti mÿ, pã'i ag.

Herodes tÿ Jesus ki jĕmĕ

⁶Kÿ Pilatos vÿ ga tÿ Galiléia tag to jykren mû, kÿ tóg: “ti mÿ tÿ Galiléia tá ke nĭ?” he mû. ⁷Kÿ ag tóg ti mÿ: “hÿ,” he mû. Hã ra Herodes

vỹ tỹ ga tỹ Galiléia tá pã'i mág nĩ. Hã kỹ Pilatos tóg ti hã mỹ ti jẽnẽg mũ. Ën kã tóg Jerusalém tá nĩ gé, Herodes ti.

⁸Kỹ tóg Herodes tá jun mũ sir. Ti tỹ ti ve kỹ tóg ti mỹ sér tĩ. Ti tỹ ti ve sór ja vē. Ti kãme mẽ ja tóg nĩ, hã kỹ tóg ti ve sór ja nĩgtĩ, Herodes ti. “Hẽn ri ke mũn tóg nén ù han vãnh han ke mũ, sỹ ve jé,” he tóg.

⁹Jesus tỹ ti ki jun kỹ Herodes tóg ti ki jẽmẽ sór mũ, nén tỹ hẽn ri ke ki, hã ra tóg ti mỹ vĩ tũg mũ. ¹⁰Hã ra pã'i ag vĩ tá nỹtĩ nĩ, kỹ ag tóg ti kato vĩ mág han mũ sir, Topẽ vĩ to professor ag ke gé. Hã ra Jesus tóg ag mỹ vĩ tũg mũ gé. ¹¹Kỹ Herodes vĩ ti to é he mũ gé, ti mré ke kar ag ke gé, kỹ ag tóg ti nyg mũ sir. Kur kupri pẽ tỹ tóg ti kri fón mũ, ón kỹ. Kỹ tóg Pilatos mỹ ti jẽnẽ mãn mũ sir.

¹²Kurã ãn kã Pilatos vĩ Herodes mỹ vĩ há han mũ. Jagnẽ to há' he mãn ag tóg mũ ha. Ag tỹ Jesus ve jo ag tóg jagnẽ kato tẽ ja nĩgtĩ.

Ag tỹ Jesus tén sór

(Mt 27.15-26; Mc 15.6-15; Jo 18.39-19.6)

¹³Kỹ Pilatos vĩ Topẽ tũ ki rĩr tĩ to pã'i ag jé prẽr mũ sir, pã'i kar ag ke gé. ¹⁴Kar tóg ag mỹ: “ãjag ne inh mỹ ti fẽg!,” he mũ, “kỹ ãjag ne ti to: “vãnh kar krĩn kónãn tóg tĩ,” he mũ! Æjag rĩnve sóg ti ki jẽmẽ huri, hã ra sóg ve ja tũ nĩ, ãjag tỹ ti to nén tó ja ti. Nén ù kórég han ja tũ tóg nĩ. ¹⁵Kỹ Herodes vĩ vég tũ nĩ gé. Sỹ ti mỹ ti jẽnẽ ja vē, ãjag ke gé. Hã ra tóg inh mỹ ti jẽnẽ mãn mũ gé. Ëg hẽ ri ken kỹ ti tén mũ hỹn'? Sỹ ki kagtũg tóg tĩ. ¹⁶Hã kỹ sóg ti mrãnmrãn kar ti tovãnh ke mũ,” he tóg, Pilatos ti.

¹⁷Festa tỹ Páscoa ki tóg ag mỹ vese pir tovãnh tĩ, prỹg kar ki. Ti jykren hã vē. Hã kỹ tóg: “Jesus tovãnh jé sóg ke mũ,” he mũ. ¹⁸Hã ra vãnh kar ag tóg vãnh prẽnprẽr mũ sir. “!..Ti tén ra..!” he ag tóg mũ. “!..Barrabás tovãnh ra..!” he ag tóg. ¹⁹Barrabás vĩ vãnh génh to se kỹ jẽ nĩ. Cidade tá tóg vãnh génh han ja nĩgtĩ, ãn kã tóg ù tén ja nĩgtĩ, hã to tóg se kỹ jẽ nĩ.

²⁰Kỹ Pilatos vĩ ag mỹ vĩ mãn mũ. Ti tỹ Jesus tovãnh sór vē, hã kỹ tóg ag mỹ vĩ mãn mũ. ²¹Hã ra ag tóg prẽnprẽr kỹ: “!..cruz to ti sã, cruz to ti sã..!” he mũ. ²²Kỹ tóg ag mỹ vĩ tãgtũ han mũ gé, Pilatos ti. “Ti kórég tỹ ne han ti? Sỹ vég tũ tóg tĩ. Ti tỹ ne to ter ke nẽ? Sỹ ki kagtũg tóg tĩ. Hã kỹ sóg ti mrãnmrãn kar kỹ ti tovãnh ke mũ,” he tóg. ²³Hã ra ag tóg prẽnprẽr tãvĩ han mũ sir, hã kỹ ag tóg ti kutãn mũ. Ti mỹ ag tóg: “!..cruz to ti sã..!” he tãvĩ han mũ. Kỹ tóg ag prẽnprẽr to ag mỹ han sór mũ sir. ²⁴To tóg jykren mũ, kỹ tóg ag mỹ: “hej,” he mũ, ag tỹ ti kutãn to. ²⁵Kỹ tóg ù ãn tovãnh mũ sir, ù tỹ vãnh génh to se kỹ jẽ ãn ti, ù tỹ ù tén ja ãn ti. Ag tỹ ù to vĩ mũ ãn tovãnh tóg mũ sir. Kỹ tóg ag mỹ Jesus ti fẽg mũ sir, ag tỹ ti ki han sór mũ ãn han jé. ²⁶Kỹ ag tóg ti pére mũ mũ, cruz to ti sa jé.

Jesus tỹ cruz to sa

(Mt 27.32-44; Mc 15.21-32; Jo 19.17-27)

Ag mũn kỹ ag tóg ù kãtĩg vég mũ. Ëpỹ tá tóg kãtĩ mũ, ti jijin hã vĩ: Cirene tá Simão, he mũ. Ti kri ag tóg Jesus cruz ti fig mũ, ti tỹ ti jo va tĩg jé, ti nón.

27Kỹ ù tỹ hēn ri ke ag vỹ Jesus nón mũ mũ, ùn týtá fag ke gé. Ēn fag vỹ vēsýrénh mũ, kygfỹ mág han fag tóg mũ sir. 28Hã ra Jesus tóg vēsýjãm ěvãnh kỹ fag mỹ vĩ mũ. “Jerusalém tá ke!,” he tóg. “Íjē kygfỹ tũg nĩ,” he tóg. “Vēnh jē kygfỹmñĩ, ājag krē jē kygfỹmñĩ,” he tóg fag mỹ. 29“Ha vé, kurã kórég pē vỹ jun ke mũ ājag mỹ. Ēn kã ag tóg tag tónh ke mũ, ha mē: “ùn kurĩ fag mỹn pãgsĩ nĩnh mũ, fag tỹ ājag krē ter vég tũ nĩn kỹ. Ûn krē tũ fag mỹn pãgsĩ ninh mũ, ù tỹ gĩr pafãm tũ fag mỹ ke gé,” he jē ag tóg ke mũ. 30Ēn kã ag tóg pãnónh mỹ: “inh kri tỹ tam ké,” henh ke mũ gé, kỹ ag tóg sór mỹ: “inh péju ra, vēnh krēm,” henh ke mũ gé. 31Ēg kato tē ag tỹ ka tánh gỹn kỹ ag hỹn ka tóg tovãnh ke tũ pē nĩ. Ka tánh ěn ri ke sóg nĩ, jo ājag vỹ ka tóg ri ke nýtĩ. Hã kỹ ājag tóg inh vēsýrénh kãfór venh ke mũ, ha vemñĩ,” he tóg, Jesus ti. Jerusalém fin rãm kỹ tóg ke mũ.

32Ag tỹ Jesus pére mũn kỹ ag tóg ùn régre ag pére mũ mũ gé, ùn jykre pãno ag. Ag tỹ ka to ag sanh ke vē gé. 33Kỹ ag tóg pãnónh tá junjun mũ sir, ti jyjyn hã vỹ: Krĩ Kuka, he mũ. Tá ag tóg cruz to ti sãg mũ sir. Ûn jykre pãno tỹ ag tóg cruz to sãg mũ gé, ti kóm, kỹ ù vỹ ti pēgja tá sa, jo ù vỹ ti jakãnh tá sa.

34Kỹ Jesus vỹ: “panh!,” he mũ. “Ag mỹ vēnh pãte fón nĩ,” he tóg. “Ag pi(jé) ki kanhró nýtĩ!, ag tỹ nén han mũ tag ti!,” he tóg.

Kỹ soldado ag tóg ti kur tỹ jagnē mỹ tỹ vēnh ken jē to jogar he mũ sir. 35Kỹ vēnh e ag vỹ tá vég nýtĩ. Hã ra pãli ag tóg ti nyg mũ. Kỹ ag tóg jagnē mỹ: “ù ag krenkren han ja tóg nĩgtĩ,” he mũ. “Cristo jē vēnh kren han, Topē tỹ ti fēg ja nĩn kỹ, ti tỹ ti kuprēg ja nĩn kỹ, hã ra tóg vēnh kren han ki kagtĩg nĩ,” he ag tóg mũ, Jesus to é he kỹ. 36Kỹ soldado ag vỹ ti nyg mũ gé. Ti rã hã nýtĩn kỹ ag tóg ti mỹ vinagre ven mũ sir. 37Kỹ ag tóg: “ã mỹ tỹ Judeu ag pãli mág nĩ?” he mũ. “Vēnh kren han ra, ã tỹ tỹ pãli nĩn kỹ,” he ag tóg mũ ti mỹ, ti to é he kỹ. 38Hã ra ag tóg rán ja nĩ gé, ti tỹ cruz to sa kỹ jē ěn ti. Ti to rán hã vē, hã vỹ: “Judeu ag pãli mág tỹ rei hã vē,” he mũ. Ti kri tóg cruz to sa gé, ěn rá ti.

39Kỹ ti kóm cruz to sa ù tóg ti mỹ vĩ mũ gé, ùn jykre pãno ěn. Ti to tóg é he mũ gé. Kỹ tóg ti mỹ: “ã mỹ tỹ Cristo nĩ?” he mũ. “Vēnh kren han ra, kỹ ěg krenkren han gé,” he tóg mũ gé. 40Hã ra ti kóm cruz to sa ù ù tóg ti mỹ vĩ jũ han mũ, ù tỹ Jesus mỹ vĩ kónãn mũ ěn mỹ. Kỹ tóg ti mỹ: “kỹ ã mỹ Topē kamēg tũ?” he mũ. “Vēsýrénh ã tóg mũ gé, ti kóm. 41Ēg tỹ ěg tỹ nén han ja kajãm vē jãvo, ěg jykre pãno to ěg vēsýrénh nýtĩ nĩ. Ēg jãvo tóg jykre kuryj nĩ. Ti pi(jé) nén ù kórég han ja nĩ,” he tóg. 42Kỹ tóg Jesus mỹ: “Senhor!,” he mũ. “Inh ki ěkren nĩ, ã tỹ tỹ pãli ki rãn kỹ,” he tóg mũ, Jesus mỹ. 43Kỹ Jesus tóg ti mỹ: “ha mē, ùri ã tóg inh mré nĩnh mũ, ěmã há ěn tá, Paraíso he mũ ěn tá, kanhkã tá. Ki hã sóg tóg mũ,” he tóg, Jesus ti.

Jesus ter

(Mt 27.45-56; Mc 15.33-41; Jo 19.28-30)

44Kejēn rã tóg ěg nĩno kã sa mũ sir. Hã ra tóg kuty! he mũ sir, ga kar mĩ hã. Kuty ěn tóg hora tãgtũ han mũ. 45Kỹ rã vỹ nhyn ke mũ sir. Topē jo

ĩn krēm kur tỹ jänkã mág pẽ vỹ kã sa nĩ. Ęn vỹ jaran ke mũ. Kuju mũ tóg jaran ke kãtére mũ sir, fĩn rãm kãn tóg mũ.

⁴⁶Kỹ Jesus vỹ prēr mág pẽ han mũ. Kỹ tóg: “!..panh!..!” he mũ. “!..Sỹ ã mỹ vãnh fẽg vễ, inh kuprĩg ti..!” he tóg. Tag tó kar tóg hun ke mũ sir.

⁴⁷Hã ra tóg tỹ capitão tóg ti ter vég mũ. Kỹ tóg Topẽ mỹ vĩ há han mũ. “Vãnh vĩ há ja vễ, ùn há ja vễ,” he tóg mũ. ⁴⁸Kỹ vãnh e ěn vỹ ti ter vég mũ gé. Kỹ ag tóg ãjag tỹ nén han ja to jykrén mũ sir. Vãhã tóg ag mỹ e tí. “Topẽ hỹn ěg tỹ hẽ ri kenh mũ, ěg tỹ ti tén kỹ?” he ag tóg mũ sir. Tag tó kỹ ag tóg ãjag ĩn ra vỹnvỹn ke mũ.

⁴⁹Hã ra ti to há kar ag vỹ ti vég nỹtĩ nĩ, kakó ki, ùn tãtã fag ke gé. Galiléia tá ke fag tóg ti mré kãmũ ja nĩgtĩ gé. Ti ter ve kãn fag tóg mũ sir.

Ag tỹ vãnh kej tá Jesus fi

(Mt 27.57-61; Mc 15.42-47; Jo 19.38-42)

⁵⁰Kỹ ù tóg tá nĩ gé, vãnh jyvẽn tĩ ù, ha mẽ, ti jijin hã vỹ: José, he mũ. Judeu ag tỹ cidade tỹ Arimatéia tá ke ti nĩ. Jykre kuryj tóg nĩ, jykre há. ⁵¹Ti pi(jé) ag tỹ Jesus tén ke to: “hej,” he ja nĩgtĩ, ag tỹ Jesus to jykrén kỹ. Topẽ tỹ tỹ ěg pãlĩ nĩnh ke ve sór tóg mũ gé. ⁵²Ęn vỹ Pilatos venh tĩ mũ. Kỹ tóg ti mỹ Jesus to vĩ mũ, ti ter kar kỹ. ⁵³Kỹ tóg cruz to ti kãtérem mũ, kỹ tóg kur há tỹ ti pãg mũ sir. Kỹ tóg pãró nor kãki vãnh kej kãkã ti fig mũ. Vãnh kej tãg vễ, ag pi(jé) kãkã ù fi ja nĩgtĩ ver!. ⁵⁴Hã ra sexta-feira vễ sir, vẽnkhãn ke kurã ki rã tóg nỹ ha, sãbado ki. ⁵⁵Kỹ ùn tỹtã fag vỹ ag nón mũ mũ, ti kej ve jé, ag tỹ ti finh mũ ja tá. Ti mré Galiléia tá kãmũ ja ěn fag vễ, ù tỹ ti fi han vég mũ fag. ⁵⁶Ve kar kỹ fag tóg kyrãgrã kỹ nén ger há han mũ sir, ti tãg jafã ti, ti to tĩn jé. Hã ra fag tóg vẽnkhãn mũ ver, vẽnkhãn ke kurã kã, Topẽ vĩ ki króm jé.

Jesus rĩr mãn

(Mt 28.1-10; Mc 16.1-8; Jo 20.1-10)

24 ¹Kỹ semana kurã ve tóg tá krỹg mũ sir. Kỹ fag tóg kusã pẽ ki ti kej tá venh mũ mũ. Vẽser ger há han jafã ěn ma fag tóg mũ mũ, fag tỹ han ja ěn ti, ti kej ra mũn kỹ. ²Hã ra pó ěn tỹ ti kej nifénh kã nĩ ěn vỹ kunũnh kỹ nĩ nĩ. Hã vég fag tóg mũ. ³Kỹ fag tóg ti kej tá junjun kỹ ra ge mũ, hã ra fag tóg vég tũ nĩ, vẽser ti, Jesus ti, ěg Senhor ti. ⁴Kỹ tóg fag fe kaj tĩ sir, fag tỹ ti vég tũ nĩn kỹ. Kỹ vãhã ùn régre ag vỹ kãge mũ, kur kupri rĩnh kỹ, kur kókov, Topẽ tỹ jẽnẽ jafã ag. ⁵Kỹ fag tóg kanẽ junjur mũ sir, kỹ fag tóg ěprã ěvãnh mũ. Hã ra ag tóg fag mỹ: “ãjag ne tóg vẽser jãvãnh mũ, ti rĩr ja (hã) ra!,” he mũ. ⁶“Ki ti tũ nĩ, rĩr ti jẽ ha. Hã kỹ tóg ãjag mỹ tó ja nĩgtĩ, ãjag tỹ Galiléia tá nỹtĩ ěn kã. ⁷Kỹ tóg ãjag mỹ: “ěprã ke fi kósĩn ěn fẽg jé ag tóg ke mũ, ù tỹ Topẽ vĩ mranh tĩ ag mỹ,” he ja nĩ. “Ka to ag ti sanh ke mũ, hã ra tóg kurã tãgtũ ki rĩr mãn ke mũ,” he ja tóg nĩgtĩ, Jesus ti, vẽso,” he ag tóg mũ, Topẽ tỹ jẽnẽ jafã ag.

⁸Kỹ fag tóg Jesus tỹ nén tó ja ěn mũ ěkrén mãn mũ sir. ⁹Kỹ fag vỹ ti kej tá kãpa kỹ mũ mũ sir, ù tỹ 11 (ke) ag mỹ tó jé, ti mré mũ tĩ kar ag mỹ ke

gé. ¹⁰Maria Madalena fi vē, kar k̄y Joana fi ke gé, Maria ū fi ke gé, Tiago m̄ynh tag fi, ū fag ke gé, fag mré. Fag hā ne Jesus t̄y ūn vin m̄u ag m̄y kāmén m̄u, apóstolo ag m̄y. ¹¹Hā ra tóg ag m̄y t̄y vēnh ó n̄y ve n̄i, hā k̄y ag tóg kri fi ja tū n̄gtī, fag v̄in kri.

¹²K̄y Pedro v̄y jē k̄y ti kej ra vēnh v̄ag tī m̄u. Pānh ke tóg, k̄y tóg ki ēvānh m̄u, k̄y tóg ti kur tāvī vég m̄u sir, ti p̄ag ja ti. K̄y tóg ti m̄y e tī. Ti t̄y to jykrén tū tóg tī sir. K̄y tóg t̄y m̄an m̄u.

Ag t̄y Emaús ra m̄u

(Mc 16.12-13)

¹³K̄y vāhā ag kā ū ag tóg m̄u m̄u, kurā ēn kā, ūn régre ag. Ēmā sī ra ag tóg m̄u m̄u. Jerusalém tán kakó n̄i, 10 (ke) quilômetros h̄yn. Ēmā ēn jyjyn hā v̄y: Emaús, he m̄u. ¹⁴Ag m̄un k̄y ag tóg jagnē mré vēmén m̄u sir, ājag t̄y nén ve ja kar ēn to.

¹⁵Ag t̄y vēmén n̄ytī ra, ag t̄y jagnē mré t̄y vēmén mág han n̄ytī ra Jesus tóg ag tá jun k̄y ag mré tī m̄u. ¹⁶Hā ra ag tóg ti ki kagtīg m̄u, ag t̄y ti vég m̄u (hā) ra. ¹⁷K̄y Jesus tóg ag m̄y: “ājag t̄y ne tó nē?” he m̄u. “Vēmén mág ājag tóg m̄u n̄i,” he tóg. K̄y ag tóg kr̄yg he m̄u sir, ve ū han ag tóg m̄u, ājag fe kaj tugn̄in. ¹⁸K̄y ū tóg ti m̄y tó m̄u. Cleopas he m̄u ēn tóg ti m̄y: “k̄y ā m̄y mēg tū?” he m̄u. “Ū t̄y festa venh kāmū ja ag v̄y mē k̄an. Ā hā m̄y ā pir m̄y mēg tū, ēg t̄y nén ve ja ti, ā t̄y Jerusalém kā n̄i (hā) ra?” he tóg ti m̄y. ¹⁹K̄y tóg ag m̄y: “ne nē?” he m̄u. K̄y ag tóg ti m̄y: “Jesus ti,” he m̄u. “Nazaré tá ke vē. Topē vī tó tī vē. Ēg t̄y nén han vānh hyn han ja tóg n̄gtī. Topē vī tó há han ja tóg n̄gtī, k̄y Topē v̄y ti mré han tī, milagre kar ti. K̄y povo kar ag v̄y vég tī, k̄y tóg ēg kar m̄y e tī. ²⁰K̄y Topē tū ki r̄ir tī ag v̄y ti fēg, ēg p̄ā'i kar ag, fóg t̄y p̄ā'i t̄y ti tén jé, cruz to ti sa jé, hā k̄y tóg tūg m̄u. ²¹Ēg t̄y ti ve k̄y ēg tóg ti to: “tī h̄yn ēg povo t̄y Israel ag krenkren han ke m̄u,” he m̄u vē. Hā ra tóg ter ja n̄i. Ūri tóg kurā tāgtū han, ti ter kri,” he ag tóg, Jesus m̄y. ²²“K̄y ēg kā ū fag v̄y ēg m̄y nén ū tó gé, k̄y tóg ēg m̄y e tī gé. Kusā pē ki fag tóg ti kej ra m̄ujēg. ²³Hā ra fag ti vég tū n̄i, ti t̄y tá n̄y tū n̄in k̄y. K̄y fag tóg: “nén nē ve ēg,” he m̄u gé. Topē t̄y jēnē jafā nēji, k̄y tóg nēji fag m̄y: “r̄ir tī jē n̄i,” hé. ²⁴K̄y ēg kā ū ag v̄y ra m̄u m̄u, ti kej ra, k̄y ag tóg vég m̄u gé, fag t̄y nén tó ja ti. Hā ra ag tóg ti vég tū pē n̄i,” he ag tóg, Jesus m̄y, ag t̄y ti ki kagtīg n̄ytīn k̄y.

²⁵K̄y ū t̄y ag mré tī m̄u ēn tóg ag m̄y: “ājag t̄y ne jé vās̄y Topē vī tó tī ag vī kri fi ja tū n̄i nē?” he m̄u. “Krī tū ājag n̄ytī, to jykrén há han tū ājag tóg n̄ytī,” he tóg. ²⁶“Cristo vēs̄yrénh ke vē, vēs̄yrénh kar k̄y tóg t̄y ūn mág n̄inh m̄u vāhā,” he tóg. ²⁷K̄y tóg ag m̄y vēnh rá kāmén k̄an m̄u sir, Moisés t̄y rá ti, Topē vī tó tī ag kar t̄y rá ti, ag t̄y Jesus to rán ja ti.

²⁸Ag m̄y kāmén tī ki tóg ēmā ēn tá jun m̄u sir. Ag mré tá jun k̄y tóg mā ra tīg m̄u ve n̄i. ²⁹K̄y ag tóg ti kógfyn m̄u sir, k̄y ag tóg: “ēg mré n̄i,” he m̄u. “Rāké tóg n̄y ha, kutyg ke rá tóg n̄y ha,” he ag tóg m̄u sir. K̄y tóg ag mré k̄ara rá m̄u, ag mré n̄i jé. ³⁰K̄y tóg ag mré jēn ke m̄u gé sir. Ag mré

jĕn ke kŷ tóg pão mǎg mũ, ěmĩ ti. Kŷ tóg Topĕ mré vĩ mũ, kar tóg kupãn kŷ tŷ vĕnh ken mũ. ³¹Kŷ ag tóg ti ki kanhrãn mũ sir vãhã. Ti ve há han ag tóg mũ sir. Hã ra tóg ki tũ nĩ ha, ti ve mãn tũ ag tóg nĩ sir.

³²Kŷ ag tóg jagnĕ mŷ: “ti tŷ ěg mré vĕmĕn kŷ tóg ěg fe ki rã,” he mũ. “Ěg mŷ tóg ã to rán ja ěn kãmĕn kãn, ěg mũn kŷ. Hã ja vĕ,” he ag tóg mũ jagnĕ mŷ.

³³Kŷ ag tóg vĕsŷmĕr Jerusalĕm ra vŷnvŷn ke mũ sir. Tá ag tóg ũ tŷ 11 (ke) ag vĕg mũ, ag mré ke ũ ag mré hã. ³⁴Hã ra ěn ag tóg ag mŷ: “ěg Senhor vŷ rĩr mãn,” he vĕn mũ. “Simão Pedro mŷ tóg vĕnh ven, mŷr, ha mĕ,” he ag tóg mũ sir. ³⁵Kŷ ag tóg ag mŷ: “hŷ, ti ve ěg ke gé,” he mũ gé. Kŷ ag tóg ag mŷ ãjag tŷ nĕn ve ja ěn tó mũ sir, ag tŷ ãjag mũ ki ti ve ja ti, ti tŷ ag mŷ ěmĩ kupãn ja ti ke gé. “Hã ki ěg tóg ti ki kanhró nŷtĩ, ěmĩ kupãn ja ki,” he ag tóg mũ.

Jesus tŷ vĕnh kar ěn mŷ vĕnh ven

(Mt 28.16-20; Mc 16.14-18; Jo 20.19-23; Hk 1.6-8)

³⁶Ag tŷ ver tŷ vĕmĕn nŷtĩ ra Jesus tóg ag mré jĕ mũ vãhã, ti tŷ hĕ tá kãrãnh ke tũ nĩ ra. Kŷ tóg ag mŷ: “mŷ sér nŷtĩmnĩ,” he mũ. ³⁷Hã ra ag tóg jũrũnrũn ke mũ sir. Ti kamĕg ag tóg mũ. “Vĕnh kuprĩg hŷn,” he ag tóg mũ, Jesus to. ³⁸Kŷ tóg ag mŷ: “ãjag ne tóg jũrũnrũn ke mũ!” he mũ. ãjag tŷ ne jĕ: “vĕnh kuprĩg hŷn,” he nĕ?” he tóg. ³⁹“Inh nĩgĕ ve ra, inh pĕn ve ra, inh hã vĕ,” he tóg. “Inh mĕgmĕ ra, ve há han ra. Vĕnh kuprĩg pi(jĕ) fãr nĩ!, ti pi(jĕ) kuka nĩ!. Inh fãr ve ra, inh kuka ti,” he tóg. ⁴⁰Vĩ kŷ tóg ag mŷ ã nĩgĕ ven mũ, ã pĕn ke gé. ⁴¹Hã ra tóg ver ag mŷ e tĩ, ag fe tŷ mrin ke pĕ han kŷ, kŷ tóg ver ag tŷ ki kagtĩg tĩ. Hã kŷ tóg ag mŷ: “mŷ ki vĕjĕn tũ?” he mũ. ⁴²Kŷ ag tóg ti mŷ pirã nĩm mũ, mŷg mré. ⁴³Kŷ tóg mãn kŷ ko mũ, ag rĩnve.

⁴⁴Kŷ tóg ag mŷ: “hã tó ja inh nĩ, ãjag mŷ, iser to hã, isŷ ãjag mré nĩgnĩn kã,” he mũ. “Vãhã sóg ve kãn ja nĩgtĩ, ag tŷ iso nĕn rán ja ti, Moissĕs ti, ti tŷ ãjag mŷ vĕnh jykre nĩm jan ki, kar kŷ Topĕ vĩ tó tĩ ag kar tŷ nĕn rán ja ki ke gé, Topĕ to jãn ki ke gé. Sŷ nĕn ven jan hã vĕ,” he tóg, ã mré mũ tĩ ag mŷ. ⁴⁵Kŷ tóg ag mŷ kãmĕn há han mũ sir, hã kŷ ag tóg ti to nĕn rán ja ki kanhrãn kãn mũ sir, to jykren há han ag tóg mũ sir, ti tŷ ag nĩgrĕg róm kŷ. ⁴⁶Kŷ tóg ag mŷ: “tag vŷ rán kŷ nĩ, ha mĕ,” he mũ. “Hã kŷ Cristo vŷ vĕsŷrĕnh, kŷ tóg rĩr mãn gé, ã ter kar kŷ, kurã tãgtũ tũg kŷ. Tag ve kãn sóg huri,” he tóg. ⁴⁷“Kŷ tóg rán kŷ nĩ gé, ũ ag tŷ vĕnh kar mŷ inh kãmĕn ke ti. Inh jijin tó jĕ ag tóg ke mũ, ag tŷ vĕnh kar mŷ: “ãjag jykre si tovãnh ra,” hĕnh ken kŷ, ũ tŷ inh vĩ tó tĩ ag. “Tovãnh kŷ Topĕ tóg ãjag mŷ vĕnh pãte fón ke mũ, ãjag tŷ ti vŷ mranh ja ti,” he jĕ ag tóg ke gé. Povo kar mŷ ag tóg tónh ke mũ, hã ra ag tóg tag ki tó vĕn ke mũ, Jerusalĕm ki. ãjag to ken hã vĕ. Inh kãmĕn jĕ ãjag tóg ke mũ. ⁴⁸Ve kãn ãjag tóg mŷr, hã kŷ ãjag tóg tónh ke mũ. ⁴⁹Ha mĕ, inh panh vŷ ãjag mŷ nĕn ũ tó ja nĩ, ãjag tŷ venh ken jĕ. ěn jĕnĕ jĕ sóg ke mũ ãjag mŷ. Hã kŷ tag ki nŷtĩmnĩ ver, cidade tŷ Jerusalĕm tag ki. Hĕn ra mũ tũg nĩ.

Vãhã ãjag tóg venh ke mũ, inh panh tỹ ãjag mẽ ãn tó ja ti, hã vỹ: ti kuprĩg, he mũ. Kanhkã tá tóg kãtĩg ke mũ, ã tỹ ãjag tar han ke ti,” he tóg, Jesus ti.

Jesus tỹ kanhkã ra tĩg
(*Mc 16.19-20; Hk 1.9-11*)

⁵⁰Kỹ tóg ag jãmĩ tĩ mũ, ãmã tỹ Betânia ra. Tá tóg ã nĩgẽ tỹ ag kri ven mũ. Kỹ tóg ag mẽ vĩ há han mũ sir. ⁵¹Ag mẽ vĩ há han kỹ tóg ag ré kỹ tĩ mũ, kanhkã ra tãpry tóg mũ. ⁵²Kỹ ag tóg ti to: “Topẽ vỹ tỹ ti nĩ,” he mũ sir. Kỹ ag tóg Jerusalém ra kãmũ mãn mũ, vësỹkã. Ag mẽ tóg sér pẽ tĩ vãhã. ⁵³Kurã kar ki ag tóg Topẽ jo ãn ra mũ tĩ, tá Topẽ to vĩ há han jé, ti mẽ nén ã há kar tó jé, ti tỹ ag mẽ sér tĩn kỹ.
Hã vẽ.